


# ZEZI

I SEMEN, LAVERITE EK LAVI









Nou pa vann sa liv. I ganny servi dan sa travay mondyal pour ansenny dimoun lo Labib e i ganny soutenir par kontribisyon volonter.

Si ou ti a kontan fer en donasyon, al lo [www.jw.org](http://www.jw.org).

Eksepte kan i endike, bann sitasyon Lekritir Grek in ganny tire dan *Labib—Matye—Revelasyon* —*Tradiksyon nouvo lemonn*. Bann referans dan Lekritir Ebre in ganny tire dan *Labib an Kreol Seselwa*. Kan NWT i swiv en sitasyon, sa i endike ki sa verse in ganny tradwir apartir *New World Translation of the Holy Scriptures* an Angle.

Zezi i semen, laverite ek lavi *Jesus—The Way, the Truth, the Life* Enprimen an Mars 2017

Seychelles Creole (jy-SC)

© 2017  
WATCH TOWER BIBLE AND TRACT SOCIETY OF PENNSYLVANIA  
Editor

© Wachturm Bibel- und Traktat-Gesellschaft, Selters/Ts.  
Made in Germany


# BANN LANDRWA KOT ZEZI TI RESTE E ANSENNYEN



Nimero i koresponn avek bann seksyon dan sa liv

1 2 3 4 5 6

1 avan Kris 1 apre Kris 2 PERYOD LETAN 29 30 31 32 33



REZYON ZERIZALENM

**BANN  
LANDRWA  
KOT ZEZI TI  
RESTE E  
ANSENNYEN**



Nimero i koresponn avek bann seksyon dan sa liv

1 2 3 4 5 6

1 avan Kris 1 apre Kris 2 PERYOD LETAN 29 30 31 32 33



# ZEZI

## I SEMEN, LAVERITE EK LAVI

En resi lo lavi ek minister Zezi ki montre  
ki kalite dimoun i ti ete, sa ki i ti ansennyen e fer e  
ki manner ou kapab benefisye avek sa ki Zezi in fer.

Sa liv i pour

---

# KONTENI

<b>1</b>	<b>BANN LEVENNMAN AVAN MINISTER ZEZI</b>	<b>PAZ</b>
1	De mesaz sorti kot Bondye	10
2	Zezi i ganny onore avan i ne	12
3	En dimoun pour prepar semen i ne	14
4	Mari i ansent avan i marye	16
5	Kote e kan ki Zezi i ne?	18
6	Sa zanfan ki ti'n ganny promet	20
7	Bann astrolog i vizit Zezi	22
8	Zot sov en move lerwa	24
9	Zezi i grandi Nazaret	26
10	Fanmir Zezi i al Zerizalenn	28
11	Zan ki batize i prepar semen	30
<b>2</b>	<b>KONMANSMAN MINISTER ZEZI</b>	
12	Zezi i ganny batize	34
13	Aprann avek lafason ki Zezi ti fer fas avek tantasyon	36
14	Zezi i konmans fer disip	38
15	Premye mirak Zezi	40
16	Zezi i demontre devouman pour vre ladorasyon	42
17	Zezi i ansenny Nikodenm aswar	44
18	Zezi i fer plis, Zan i fer mwens	46
19	Zezi i ansenny en madanm Samariten	48
<b>3</b>	<b>MINISTER ZEZI GALILE</b>	
20	Dezyenm mirak dan lavil Kana	54
21	Kot sinagog Nazaret	56
22	Kat disip i konmans lapes dimoun	58
23	Zezi i fer bann mirak dan lavil Kapernaoum	60
24	Zezi i fer plis dan predikasyon Galile	62
25	Zezi i demontre konpasyon pour en lepre e geri li	64
26	“Ou pese in ganny pardonnen”	66
27	Matye i ganny envite pour swiv Zezi	68
28	Akoz bann disip Zezi pa zennen?	70
29	Eski en dimoun i kapab fer bann bon keksoz zour Saba?	72





PAZ

30	Relasyon spesyal ki Zezi i annan avek son Papa	74
31	Zot kas zepi zour Saba	76
32	Ki dimoun i ganny drwa fer zour Saba?	78
33	Zezi i akonpli profesi Izai	80
34	Zezi i swazir douz zapot	82
35	Sermon lo Montanny	84
36	En zofisye larme i demontre en gran lafwa	92
37	Zezi i resisit garson en bev	94
38	Zan i anvè konnen si Zezi i Mesi	96
39	Maler pour en zenerasyon rebel	98
40	En leson lo pardon	100
41	Lekel ki donn li pouvwar pour fer mirak?	102
42	Zezi i reprimann bann Farizyen	104
43	Bann legzanp lo Rwayonm	106
44	Zezi i kalmi en tanpet lo lanmer	112
45	Zezi i annan pouvwar lo en kantite demon	114
46	En madanm i ganny geri ler i tous lenz Zezi	116
47	En pti fiy i ganny resisite!	118
48	Menm si Zezi i fer mirak Nazaret, zot pa krwar dan li	120
49	Zezi i pres Galile e form son bann zapot	122
50	Zezi i prepar son bann disip pour prese menm si zot pou ganny persekute	124
51	En dimoun i ganny touye pandan en parti lanniverser nesans	126
52	Zezi i donn manze plizyer milye dimoun avek zis detrwa dipen ek pwason	128
53	En dirizan ki kapab kontrol lanmer ek divan	130
54	Zezi i "dipen lavi"	132
55	Parol Zezi i sok en kantite dimoun	134
56	Kwa ki vreman fer en dimoun enpir?	136
57	Zezi i geri en pti fiy ek en zonn sourd	138
58	Zezi i fer dipen vin en kantite e i averti konsernan lelven	140
59	Lekel Garson zonn?	142
60	Laparans Zezi i sanze e zot vwar Kris dan son laglwar	144
61	Zezi i geri en garson posede par demon	146
62	En leson enportan lo limilite	148
63	Zezi i donn bann zapot lezot konsey enportan	150
64	Nou bezwen pardonnen	152
65	Zezi i ansennyen ler zot pe al Zerizalenm	154





## 4 MINISTER ZEZI ZIDE

PAZ

66	Zezi i al Zerizalenm pour Lafet bann Latant	158
67	“Zanmen okenn dimoun in deza koz koumsa avan”	160
68	Garson Bondye i “lalimyer lemonn”	162
69	Eski zot papa i Abraam oubyen Dyab?	164
70	Zezi i geri en zonm ki ti ne aveg	166
71	Bann Farizyen i kestyonn sa zonm ki ti aveg	168
72	Zezi i anvoy 70 disip prese	170
73	En bon Samariten	172
74	Leson konsernan lospitalite ek lapriyer	174
75	Zezi i montre kwa ki vreman fer nou ere	176
76	Zezi i pran en repa avek en Farizyen	178
77	Zezi i donn konsey konsernan larises	180
78	Bann administrater fidel i devret met zot pare!	182
79	Akoz destriksyon i pros?	184
80	Bon berze ek berkay	186
81	Dan ki sans Zezi ek son Papa i en sel?	188

## 5 MINISTER ZEZI DAN LES ZOURDEN

82	Minister Zezi Pere	192
83	Lenvitasyon pour en repa	194
84	Responsabilite en disip Kris	196
85	Nou kontan ler en dimoun i repantir	198
86	Garson perdi i retournen	200
87	Azir avek lasazes ler ou mazin lavenir	204
88	En sanzman pour sa zonm ris ek Lazar	206
89	Zezi i ansenny dan rezyon Pere ler i pe al Zide	210
90	“Rezireksyon ek lavi”	212
91	Lazar i ganny resisite	214
92	Dis lepre i ganny geri me zis enn ki demontre rekonesans	216
93	Garson zonm pou ganny revele	218
94	I enportan pour priye e annan limilite	220
95	Zezi i koz lo divors ek lanmour pour zanfan	222
96	Zezi i reponn en zenn dirizan ris	224
97	Legzanp bann travayer dan plantasyon rezen	226
98	Bann zapot i rod pozisyon ankor enn fwa	228
99	Zezi i geri de zonm aveg e ed Zase	230
100	Legzanp sa dis min	232



## 6 LAFEN MINISTER ZEZI

PAZ

101	En repa kot lakour Simon, Betani	236
102	Lerwa i antre Zerizalem lo en pti bourik	238
103	Zezi i pirifye tanp ankor enn fwa	240
104	Eski bann Zwif pou ekout e demontre lafwa dan Bondye?	242
105	Zezi i servi en pye fig pour ansenny en leson konsernan lafwa	244
106	De legzanp lo plantasyon rezen	246
107	En lerwa i envit dimoun en resepsyon maryaz	248
108	Zot esey met Zezi dan pyez	250
109	Zezi i kondann bann opozan relizye	252
110	Zezi i al kot tanp pour en dernyen fwa	254
111	Bann zapot i demann en siny	256
112	Legzanp bann vyerz i montre ki i enportan pour kontinyen veye	260
113	Legzanp bann talan i montre ki i enportan pour travay dir	262
114	Ler Kris i vini i pou ziz bann mouton ek kabri	264
115	Dernyen lafet Lapak ki Zezi i selebre i aprobe	266
116	En leson lo limilite pandan dernyen Lapak	268
117	Repa Senyer	270
118	Bann zapot i dispit konsernan lekel ki pli gran	272
119	Zezi i semen, laverite ek lavi	274
120	Bann disip i bezwen raport fri e vin zanmi Zezi	276
121	“Pran kouraz! Mon’n raport laviktwar lo lemonn!”	278
122	Dernyen lapriyer Zezi dan lasanm anler	280
123	Zezi i vreman tris e i priye	282
124	Kris i ganny trair e arete	284
125	Zezi i ganny anmennen kot Anas e apre kot Kaif	286
126	Kot lakaz Kaif Pyer i dir i pa konn Zezi	288
127	Zezi i ganny zize par Sannedren e apre i ganny anmennen kot Pilat	290
128	Pilat ek Erod i trov Zezi inosan	292
129	Pilat i dir: “Gete! La sa zonn!”	294
130	Zezi i ganny anmennen pour ganny met amor	296
131	En lerwa inosan i soufer lo poto	298
132	“Vreman sa zonn ti Garson Bondye”	300
133	Lekor Zezi i ganny prepare e mete dan latonm	302
134	Latonm i vid parski Zezi i vivan!	304
135	Zezi i resisite e i aparet avek en kantite dimoun	306
136	Lo lans Lanmer Galile	308
137	Plizyer santenn i vwar li avan lafet Lapannkot	310
138	Kris lo kote drwat Bondye	312
139	Zezi i fer later revin en paradi e fini sa travay ki Bondye in donn li pour fer	314

8, 9 NIZAN

9 NIZAN

10 NIZAN

11 NIZAN

12, 13 NIZAN

14 NIZAN  
(Iannwit)

14 NIZAN  
(Iazournen)

15 NIZAN

16 NIZAN

## SEMEN, LAVERITE EK LAVI

Petet ou kontan ler ou tann en bon nouvel. Eski ou ti konnen ki Zeova, Kreater nou liniver i annan en bon nouvel pour ou ek bann dimoun ki ou kontan?

Sa bon nouvel i dan Labib, sa liv ki'n ganny ekrir plizyer lannen pase e enspire par Zeova. Dan sa liv, nou pou konsantre lo kat liv Labib ki annan en bon nouvel pour nou tou. Sa bann liv i port non bann dimoun ki Bondye ti servi pour ekri sa bann liv, Matye, Mark, Lik ek Zan.

En kantite dimoun i apel sa bann liv sa kat Levanzil. Tou le kat i rakont levanzil, ki vedir bon nouvel, lo Zezi. Sa bann liv i ed nou aprann ki Zezi i sa mwayen ki Bondye i servi pour sov limanite e ki konman Lerwa dan Rwayonm Bondye dan lesyel, Zezi pou beni tou bann ki demontre lafwa dan li. Sa bann benediksyon pou dire pour touzour.  
—Mark 10:17, 30; 13:13.

### AKOZ I ANNAN KAT LEVANZIL?

Petet ou pe mazinen aköz Bondye ti enspir kat zonn pour ekri lo sa ki Zezi ti ansennyen e fer.

Dan sak sa bann resi, nou kapab aprann en kantite lo sa ki Zezi ti dir e fer. Pour ed nou konpran sa, imazin kat zonn pe debout o bor en ansenyan renonmen. Sa zonn ki pe debout devan sa ansenyan i en kolekter taks. Sa enn lo son kote drwat i en dokter. Sa enn ki pe ekout li lo son kote gos i en peser e i en bon zanmi sa ansenyan. Sa katriyenm dimoun ki par deryer pe gete ki pe pase, i pli zenn ki zot tou. Tou le kat zonn i onnet e sakenn i annan en keksoz ki enteres zot an partikilye. Si zot tou zot ekri lo sa ki sa ansenyan i dir e fer, i tre probab ki tou le kat resi pou annan bann diferan detay ek levennman. Ler nou pran tou le kat resi an konsiderasyon e rapel ki sakenn i annan son prop lentere, nou kapab pli byen konpran sa ki sa





ansenyant ti dir e fer. Sa legzanp i ed nou konpran fason ki nou kapab benefisye ler nou annan kat diferan resi ki koz lo lavi nou Gran Ansenyan Zezi.

Annou retourn lo sa menm legzanp. Sa kolekter taks i anv i atir latansyon bann Zwif, alor i aranz bann lansennyman ouswa levennman dan en fason ki fer li pli fasil pour zot konpran. Sa dokter li i met lanfaz lo gerizon bann dimoun malad oubyen ki annan dezabilite, alor i pa enkli serten keksoz ki sa premye zonn in ekri oubyen i pa rakont sa bann levennman dan menm lord ki sa kolekter taks. Sa bon zanmi i konsantre lo santiman ek kalite sa ansenyant. Resi sa zonn pli zenn i pli kourt me pli presi. Be kantmenm sa, resi sak zonn i egzakt. Sa legzanp i montre ki sa kat resi lo lavi Zezi i ed nou pli byen konpran bann aktivite, lansennyman ek personnalite Zezi.

Ou kapab tann dimoun koz lo ‘Levanzil Matye’ oubyen ‘Levanzil Zan.’ Sa pa mal, parski sak levanzil i en “*bon nouvel* konsernan Zezi Kri.” (Mark 1:1) Par kont, an zeneral i annan zis en levanzil setadir en bon nouvel lo Zezi ki nou kapab lir dan sa kat resi.

En kantite dimoun ki etidye Parol Bondye in konpar bann levennman ek detay ki ganny truve dan Matye, Mark, Lik ek Zan e met zot dan lord. Anviron lannen 170, en ekriyen Siryen ki apel Tatian ti esey fer sa. I ti rekonnèt ki sa kat liv i egzakt e enspire par Bondye. I ti fer en liv (*Diatessaron*) kot i ti rakont lavi ek minister Zezi dan lord ki i’n arive.

Sa liv *Zezi i semen, laverite ek lavi* i fer parey me i pli egzakt e konplet. Sa i akoz aprezan nou pli byen konpran ki mannyer bann profes i ek legzanp Zezi i ganny akonplir. Sa i ed nou pli byen konpran sa ki i ti dir e fer dan lord ki sa bann levennman ti arive. Bann arkeolog in dekouver serten keksoz ki donn leklersisman lo serten detay e lo fason ki bann ekri-

ven ti vwar keksoz. Byensir, personn pa kapab san poursan asire dan ki lord sa bann levennman ti arive, me sa liv *Zezi i semen, laverite ek lavi* i rakont sa bann levennman dan en lord ki fer sans e ki lozik.

## SEMEN, LAVERITE, LAVI

Anmezir ki ou lir sa liv, esey konsantre lo sa mesaz prensipal ki i annan pour ou ek bann dimoun ki ou kontan. Rapel ki Zezi Kri li menm ti dir zapot Toma: “Mwan menm semen, laverite ek lavi. Napa personn ki ariv kot mon Papa san pas par mwan.” —Zan 14:6.

Sa liv *Zezi i semen, laverite ek lavi* pou ed ou apre-sye ki Zezi i definitivman sa “semen.” Sel fason ki nou kapab priy Zeova se atraver Zezi. Deplis, Zezi i sa semen parski i ed nou pour rekonsilye avek Bondye. (Zan 16:23; Romen 5:8) Alor, sel fason ki nou kapab annan en bon relasyon avek Bondye se atraver Zezi.

Zezi i “laverite.” Zezi ti toultan koz e viv an armoni avek laverite. I ti akonpli en kantite profes i, ki ti vin “‘wi’ atraver” li. (2 Korentyen 1:20; Zan 1:14) Sa bann profes i ed nou vwar ki i zve en rol enportan pour ede akonpli plan Bondye.—Revelasyon 19:10.

Finalman, Zezi Kri i “lavi.” Zezi ti donn son lavi ek disan parfe konman ranson e sa in fer li posibil pour nou ganny “sa vre lavi,” setadir, “lavi eternal.” (1 Timote 6:12, 19; Efezyen 1:7; 1 Zan 1:7) A lavenir, i pou osi prouve ki i “lavi” pour plizyer milyon dimoun ki’n mor par resisit zot e donn zot sa lespwar pour viv dan Paradi pour touzour.—Zan 5:28, 29.

Nou tou nou bezwen konpran e apresye sa rol ki Zezi i zve pour ede akonpli plan Bondye. Nou swete ki zot pran plezir pour aprann plis lo Zezi ki “semen, laverite ek lavi.”







SEKSYON

# 1

## BANN LEVENNMAN AVAN MINISTER ZEZI

“SA ZANFAN  
POU REMARKAB.”

—LIK 1:32

# DE MESAZ SORTI KOT BONDYE

LIK 1:5-33

Dan en sans, nou kapab konsider Labib antye konman en mesaz sorti kot Bondye. Nou Papa dan lesyel in donn nou Labib pour ansenny nou. Me annou vwar de mesaz spesyal dan Labib ki ti ganny donnen plis ki 2,000 an pase. Lanz Gabriyel ki “toultan devan Bondye,” ti anons sa bann mesaz. (Lik 1:19) Ki ti pe arive ler sa lanz ti anons sa bann mesaz enportan?

Nou apepre lannen 3 avan Kris. Avek lekel Gabriyel i anons son premye mesaz? Avek en pret ki apel Zekarya. I reste dan bann montanny Zide ki tre probab pa tro lwen avek Zerizalenm. Li ek son madanm Elizabet nepli zenn e zot napa zanfan. I tour Zekarya pour servi konman pret dan tanp Bondye, Zerizalenm. Ler Zekarya i dan tanp, en sel kou lanz Gabriyel i aparet debout o bor lotel kot lansan i ganny brile.

Nou kapab konpran ki sa i fer Zekarya per. Me sa lanz i dir: “Pa bezwen per Zekarya, parski Bondye in tann ou siplikasyon, ou madanm Elizabet pou ganny en garson e ou devret apel li Zan.” Gabriyel i osi dir ki Zan “pou en zonn remarkab devan Zeova” e ki i pou “prepar en pep pour Zeova.”—Lik 1:13-17.

Pour Zekarya, sa i paret enposib. Akoz? Parski laz ki li ek Elizabet in arive. Alor Gabriyel i dir li: “Parski ou pa’n krwar sa ki mon’n

dir ou, ou pa pou kapab koze ziska zour ki sa bann keksoz i arive.”—Lik 1:20.

Antretan, tou dimoun deor pe rode akoz Zekarya pe pran tou sa letan dan tanp. Alafen-defen i sorti, me i pa kapab koze. Zekarya i zis kapab fer bann siny avek son lanmen. Aprezan tou dimoun i konpran ki i’n vwar en vizyon.

Ler Zekarya i fini son servis kot tanp, i retourn kot li. Pa bokou letan apre, Elizabet i tonm ansent. Pandan ki Elizabet pe espere pour ganny son pti baba, i reste kot lakaz pour senk mwan.

Apre, lanz Gabriyel i vin en dezyenm fwa. Kot lekel safwasi? Kot Mari, en zenn fiy ki pa ankor marye. Mari i reste dan lavil Nazaret, dan en rezyon ki apel Galile, dan nor. Sa lanz i dir li: “Ou fer plezir Bondye.” Gabriyel i osi dir Mari: “Ekoute! ou pou tonm ansent e ou pou ganny en garson. Ou devret apel li Zezi. Sa zanfan pou remarkab e i pou ganny apele Garson sa Enn Tre O e . . . I pou Lerwa bann desandans Zakob pour touzour e i pou napa en lafen avek son Rwayonm.”—Lik 1:30-33.

Nou kapab mazine ki kantite Gabriyel ti apresye sa privez pour anons sa de mesaz. Anmezir ki nou lir plis lo Zan ek Zezi, nou pou konpran plis akoz sa bann mesaz sorti kot Bondye i sitan enportan.

- 
- ◇ Lekel ki ti anons sa de mesaz enportan sorti kot Bondye?
  - ◇ Avek ki sa de mesaz ti ganny anonse?
  - ◇ Akoz ou krwar ki sa de mesaz sorti kot Bondye i sitan difisil pour krwar?



• LANZ GABRIYEL I PREDIR NESANS ZAN KI BATIZE  
• GABRIYEL I DIR MARI KI I POU GANNY EN GARSON KI APEL ZEZI

1



## ZEZI I GANNY ONORE AVAN I NE

LIK 1:34-56

Aprè ki lanse Gabriyel in dir sa zenn fiy Mari ki i pou ganny en garson ki apel Zezi e ki pou Lerwa pour touzour, Mari i demande: “Mon ankor en vyerz, ki mannyer sa pou arive?”—Lik 1:34.

Gabriyel i reponn li: “Lespri sen pou desann lo ou e sa Enn Tre O pou kouver ou avek son pwisans. Se pour sa rezon ki sa enn ki pou ne pou ganny apele sen e Garson Bondye.”—Lik 1:35.

Petèt pour Gabriyel ed Mari aksepte sa mesaz, i dir li: “Ekoute! I fer sis mwan depi ki ou fanmir Elizabet i ansent menm si i vye e dimoun ti dir i steril. I pou osi ganny en garson. Parski napa nanryen ki enposib pour Bondye.”—Lik 1:36, 37.

Sa ki Mari i dir apre i montre ki i’n aksepte sa mesaz. I dir: “Gete! Mwan mon lesklav Zeova! Ki sa ki ou’n dir i ariv mwan.”—Lik 1:38.

Deswit apre ki Gabriyel in ale, Mari i prepar li pour al vizit Elizabet ek son msye Zekarya ki reste o bor Zerizalenm dan bann montanny Zide. Sorti Nazaret pour al kot Elizabet i reste, i kapab pran trwa oubyen kat zour.

Alafendefen Mari i ariv kot lakaz Zekarya. Ler i antre i dir Elizabet bonzour. Deswit Elizabet i ranpli avek lespri sen e i dir Mari: “Ki Bondye i beni ou parmi bann madanm e ki sa zanfan ki dan ou vant i ganny beni. Ki mannyer mon kapab ganny sa loner pour manman mon Senyer vin kot mwan? Parski desito ki ou ti dir mwan bonzour, sa pti baba dan mon vant ti bouze telman i ti kontan.”—Lik 1:42-44.

Mari i reponn e eksprim son lapresyasyon: “Mon rann glwar Zeova, mon vremen dan en gran lazwa aköz Bondye mon Sover, parski i’n

vwar ki son lesklav i en senp dimoun. Depi ozordi tou bann zenerasyon pou dir ki mon en madanm beni, parski sa Bondye pwisan in fer bann keksoz merveye pour mwan.” Nou kapab remarke ki menm si Mari i ganny onore, i donn tou laglwar Bondye. I dir: “Son non i sen. Zenerasyon apre zenerasyon, i pou demontre konpasyon anver sa bann ki annan en gran respe pour li.”—Lik 1:46-50.

Anba lenfliyans lespri sen, Mari i kontinyen loue Bondye avek sa bann parol profetik: “Avek son lebra, i’n azir avek pwisans. I’n eparpiy bann ki annan move lentansyon aköz larogans dan zot leker. I’n fer bann dirizan desann lo zot tronn e i’n onor bann senp dimoun. I’n donn bann ki lafen tou bann bon keksoz ki zot bezwen e i’n fer bann ki ris al lanmen vid. I’n vin ed Izrael son serviter, pour montre ki i rapel son promes pour demontre konpasyon anver Abraam ek son desandans pour touzour parey i ti’n dir nou zanset.”—Lik 1:51-55.

Mari i reste avek Elizabet pour apepre trwa mwan. San dout i ed Elizabet en kantite pandan sa bann dernyen detrwa semenn avan ki i ganny son pti baba. Pa i byen pour vwar sa de madanm fidel ki ansent gras a led Bondye, reste ansanm pandan sa moman spesyal dan zot lavi!

Deplis, remarke ki Zezi ti ganny onore menm avan i ti ne. Elizabet ti apel li “mon Senyer” e ler Mari ti fek arive sa zanfan dan vant Elizabet “ti bouze telman i ti kontan.” Parey nou pou vwar apre, sa i vremen diferan avek fason ki lezot dimoun i tret Mari ek son pti baba ki pa ankor ne.



- ◇ Ki Gabriyel ti dir ki ti ed Mari konpran ki mannyer i ti pou tonm ansent?
- ◇ Ki mannyer Zezi ti ganny onore avan i ti ne?
- ◇ Konbyen letan Mari ti reste avek Elizabet e akoz i ti fer sa?



## EN DIMOUN POUR PREPAR SEMEN I NE

LIK 1:57-79

Elizabet i pros pour ganny son pti baba. Mari in reste avek li pour trwa mwan. La i'n ariv ler pour Mari ale e fer sa gran vwayaz pour retourn kot li Nazaret dan nor. Dan apepre sis mwan, li osi pou ganny en pti garson.

Pa bokou letan apre ki Mari in ale, Elizabet i ganny son pti baba. Tou dimoun i byen kontan ki tou keksoz in byen pase e ki tou le de Elizabet ek son pti baba i byen. Ler Elizabet i montre son bann fanmir ek vwazen son pti baba, zot tou zot kontan.

Dapre Lalwa ki Bondye ti donn nasyon Izrael, en pti garson ti devret ganny sirkonsi wityenm zour apre son nesans. Normalman, i ti pou osi ganny son non sa zour. (Levitik 12: 2, 3) I annan serten ki mazine ki i devret ganny apele Zekarya parey son papa. Me Elizabet i dir: "Non! I pou apel Zan." (Lik 1:60)

Pa bliye ki lanz Gabriyel ti'n dir ki sa pti baba i devret ganny apele Zan.

Son bann vwazen ek fanmir pa dakor. Zot dir: "Napa enn ou fanmir ki apel sa non." (Lik 1:61) Zot fer siny avek Zekarya pour demann li ki mannyer i anv i son garson i apele. I demann zot pour donn li en plak dibwa e i ekri: "Son non i Zan."—Lik 1:63.

Ler Zekarya i fer sa, i reganny son abilite pour koze atraver en mirak. Petet ou rapel ki i ti nepli kapab koze ler i pa ti krwar mesaz sa lanz. Sa lanz ti'n dir li ki Elizabet ti pou ganny en pti garson. Alor la ler son bann vwazen i tann li koze, zot enpresyonnen e zot dir dan zot menm: "Ki sa pti garson pou vini?" (Lik 1:66) I evidan pour zot ki Bondye ki'n fer Zan ganny sa non.

Apre sa, Zekarya i ranpli avek lespri sen e



i dir: “Ki Zeova, Bondye Izrael i ganny loue, parski i’n mazin son pep e i’n delivre zot. I’n anvoy pour nou en sover pwisan sorti dan desandans David son serviter.” (Lik 1:68, 69) Sa “sover pwisan” ki Zekarya ti pe refer avek i Senyer Zezi ki ti pros pour ne. Zekarya i dir ki gras a sa Enn, Bondye pou “sov nou kont nou lennmi, nou pou kapab annan sa privez pour servi li san okenn lafreyer, avek fidelite ek la-drwatir tou dilon nou lavi.”—Lik 1:74, 75.

Zekarya i predir sa konsernan son garson: “Tandis ki ou mon garson, ou pou profet sa

Enn Tre O, parski ou pou al par devan Zeova pour prepar son semen, pour fer son pep konnen ki gras a pardon zot pese zot pou ganny sove, akoz tandres ek konpasyon nou Bondye. Sa konpasyon sorti dan lesyel pou parey lalimyer soley leve ki pou ekler sa bann ki dan fernwanr e dan lonbraz lanmor e gid nou lipye dan semen lape.” (Lik 1:76-79) Pa sa profes i vreman ankourazan!

Sa letan, Mari ki pa ankore marye, i’n ariv kot li Nazaret. Ki pou arive avek li ler dimoun i konmans remarke ki i ansent?

- 
- ◇ Ki diferans laz i ti annan ant Zan ek Zezi?
  - ◇ Ki ti arive wityenm zour apre ki Zan ti ne?
  - ◇ Ki travay Bondye ti pou donn Zan pour fer?



## MARI I ANSENT AVAN I MARYE

MATYE 1:18-25 LIK 1:56


I fer kat mwan depi ki Mari i ansent. Petet ou rapel ki ler Mari ti'n fek tonm ansent, i ti al vizit son fanmir Elizabet ki reste dan bann montanny Zide dan sid. Me la Mari in retourn kot li Nazaret. Byento tou dimoun dan sa lavil pou konnen ki i ansent. Zis mazine ki kantite difisil sa sityasyon i ete pour Mari!

Sa ki fer keksoz pli pir ankor, se ki Mari in fiyanse avek Zozef, en sarpantye ki reste dan menm landrwa avek li. Mari i osi konnen ki dapre Lalwa ki Bondye ti donn nasyon Izrael, en madanm ki'n fiyanse avek en msye ki volontermen dormi avek en lot zonn ki devret ganny saboule avek ros. (Deteronnm 22:23, 24) Alor, menm si Mari pa'n fer nanryen mal, i tre probab ki i pe mazine ki man-

nyer i pou eksplik Zozef ki i ansent e ki pou arive apre sa.

Mari pa ti la pour trwa mwan, alor Zozef i vremen kontan pour vwar li. I tre probab ki ler zot zwenn, Mari i dir li ki i ansent e i esey son mye pour eksplike ki se gras a lespri sen Bondye ki sa in arive. Me parey ou kapab mazine, i difisil pour Zozef konpran e krwar sa.

Zozef i konnen ki Mari i en bon fiy e ki i annan en bon repitasyon. I kontan Mari en kantite. Me malgre sa ki Mari i dir li, pour Zozef i paret ki Mari i bezwen ansent pour en lot dimoun. Zozef pa oule ki i ganny saboule avek ros oubyen fer li onte devan tou dimoun, alor i deside pour divors li an sekre. Sa letan, de dimoun ki ti'n fiyanse ti konmsi zot ti'n fini





marye, alor pour kas en fiyansay zot ti bezwen divorce.

Zozef i ankor pe reflexir lo tou sa bann zafer. I al dormi e en lanz Zeova i aparet avek li dan en rev. I dir li: “Pa bezwen per pour anmenn ou madanm Mari kot ou, akoz sa ki’n arive avek li i gras a lespri sen. I pou ganny en garson e ou pou apel li Zezi, akoz i pou sov son pep dan zot pese.”—Matye 1:20, 21.

Ler Zozef i leve, i vremen kontan ki aprezan tou keksoz i pli kler. I pa tarde pour fer

sa ki sa lanz in dir li. I anmenn Mari kot li. Anfet, sa i vin parey en seremoni maryaz ki montre tou dimoun ki aprezan Zozef ek Mari in marye. Me kantmenm sa, Zozef pa annan relasyon seksyel avek Mari tan ki i ankor ansent.

Detrwa mwan pli tar, Zozef ek son madanm Mari ki pros pour ganny pti baba, i bezwen met zot pare pour kit zot lakour Nazaret e fer en gran vwayaz. Kote zot bezwen ale, la ki Mari i ansent?

- 
- ◇ Ki Zozef ti’n bezwen mazinen ler i ti aprann ki Mari i ansent e akoz?
  - ◇ Ki mannyer Zozef ti kapab divorce avek Mari menm si zot pa ti ankor marye?
  - ◇ Kwa ki ti montre tou dimoun ki aprezan Zozef ek Mari ti’n marye?



## KOTE E KAN KI ZEZI I NE?

LIK 2:1-20

Lanperer Sezar Ogis in donn lord ki tou dimoun dan Lanpir Romen i bezwen al anrezistre. Alor Zozef ek Mari i bezwen al Betleenm, sa lavil kot Zozef ti ne. Betleenm i dan sid Zerizalenm.

I annan en kantite dimoun ki'n al Betleenm pour anrezistre. Sel landrwa ki Zozef ek Mari i



gannyen pour reste i dan en pti lakaz kot bou-rik ek lezot zannimo i ganny mete. I lanmenm la ki Zezi i ne. Mari i anvlop li dan bann bout latwal e met li dan en loz, ki ganny servi pour met manze zannimo.

I bezwen Bondye ki ti pous Sezar Ogis pour pas sa lalwa ki bann dimoun i al anrezistre. Akoz? Parski sa ti fer li posib pour Zezi ne Betleenm, menm landrwa ki son zanset Lerwa David ti sorti. Depi lontan, Labib ti'n predir ki sa Dirizan ki ti'n ganny promet ti pou ne dan sa lavil.—Mika 5:2.

Sa i en zour swar vreman enportan! I annan en gro lalimyer ki klere toultour en group

berze ki pe reste deor dan lakanpanny. Sa i laglwar Zeova! Enn sa bann lanz i dir bann berze: “Pa bezwen per, parski mon pe anons zot en bon nouvel ki pou anmenn lazwa pour tou dimoun. Ozordi, dan lavil David, en sover in ne, li menm Kris ek Senyer. La ki mannyer zot pou rekonnet li, zot pou vwar en pti baba anvlope dan bann bout latwal dan en loz.” En sel kou, plis lanz i aparet e dir: “Laglwari pour nou Bondye dan lesyel e lape lo later parmi bann dimoun ki annan son laprouvasyon.”—Lik 2:10-14.

Ler bann lanz i ale, bann berze i dir avek kanmarad: “Annou al Betleenm deswit pour vwar sa ki'n arive laba parey Zeova in dir nou.” (Lik 2:15) Zot depese e ale. Laba, zot vwar Zezi ki fek ne kot sa lanz in dir zot. Ler bann berze i rakonte ki sa lanz ti'n dir zot, tou dimoun ki tande i etonnen. Mari i gard tou sa bann parol dan son lespri e tir konklizyon dan son leker.

En kantite dimoun ozordi i krwar ki Zezi ti ne le 25 Desanm. Me Desanm, Betleenm, i en landrwa ki fer fre avek en kantite lapli. Par ler i menm annan lanez. Sa letan i rar ki ou ti pou vwar bann berze pe reste deor aswar avek zot zannimo. An plis ki sa, lanperer Romen pa ti pou'n demann bann dimoun pour vwayaze pour plizyer zour dan sa gro lafreser pour al anrezistre, espesyalman akoz zot ti deza anvi rebel kont li. I paret ki Zezi ti ne an Oktob.

- 
- ◇ Akoz Zozef ek Mari ti bezwen al Betleenm?
  - ◇ Ki ti arive sa zour swar ler Zezi ti ne?
  - ◇ Akoz i pa rezonnab pour krwar ki Zezi ti ne le 25 Desanm?





# SA ZANFAN KI TI'N GANNY PROMET

LIK 2:21-39

Olye retourn Nazaret, Zozef ek Mari i reste Bet-leenm. Ler Zezi i annan wit zour, i ganny sirkon-si parey Lalwa ki Bondye ti donn nasyon Izrael i demande. (Levitik 12:2, 3) I osi koutim pour donn sa pti baba son non sa zour. Zis parey lanz Gabriyel ti'n demann zot, zot apel zot pti garson Zezi.

Plis ki en mwan in pase, i fer 40 zour depi ki Zezi in ne. Kote son paran i anmenn li aprezan? Kot tanp Zerizalenm, ki pa tro lwen avek kot zot pe reste, zis detrwa kilomet. Dapre Lalwa, 40 zour apre ki en manman i ganny en pti garson i bezwen al kot tanp e fer en lofrann pour li kapab ganny pirifye.—Levitik 12:4-8.



## “I TI'N ARIV LER POUR ZOT GANNY

**PIRIFYE”** An Izrael, ler en madanm ti ganny en pti baba, i ti ganny konsidere konman enpir pour en serten letan. A lafen sa peryod letan, i ti bezwen ofer en lofrann brile konman en sakrifis pour li ganny pirifye. Sa ti fer tou dimoun rapel ki en paran enparfe i transmet pese avek son zanf. Zezi ti parfe e sen. (Lik 1:35) Kantmenm sa, Mari ek Zozef ti al kot tanp “pour zot ganny pirifye” dapre Lalwa e zot ti anmenn Zezi “pour prezant li devan Zeova.” —Lik 2:22.

Sanmenm sa ki Mari i fer. I anmenn de pti zwazo konman son lofrann. Sa i montre nou ki Zozef ek Mari i pov. Dapre Lalwa, en manman i devret ofer en zenn mal mouton ek en zwazo. Me si i napa ase larzan pour ofer en mal mouton, i kapab ofer de tourtrek oubyen de pizon. Vi ki Mari napa ase larzan, sanmenm sa ki i ofer.

Ler Zozef ek Mari i kot tanp, en msye aze i apros zot. I apel Simeon. Bondye in revel avek li ki avan i mor, i pou vwar Kris, andotmo, sa Mesi ki Zeova in promet. Sa zour, lespri sen i gid Simeon pour li vwar Zozef, Mari ek zot pti baba dan tanp. Simeon i pran sa pti garson dan son lebra.

Avek sa pti baba dan son lebra, Simeon i remersye Bondye e dir: “Aprezan, Souvren Seyner, ou pe les ou lesklav al anpe dapre sa ki ou'n dir, parski mon'n vwar sa enn ki pou anmenn delivrans ki ou'n anvoye devan tou pep. I pou en lalimyer ki pou tir sa vwal ki anpes bann nasyon vwar kler e i pou en laglwar pour ou pep Izrael.”—Lik 2:29-32.

Zozef ek Mari i etonnen ler zot tann sa. Simeon i beni zot e dir Mari ki gras a son garson “bokou dimoun Izrael pou tonbe e lezot pou releve.” I osi dir li ki a lavenir i pou dan en sitan gran sagrinasyon ki i pou konmsi en gran lepe pou'n pers li.—Lik 2:34.

I annan en lot dimoun ki la sa zour. I apel Ann, en madanm profet ki annan 84 an. Anfet, i toultan dan tanp. Dan sa menm moman, i vin kot Zozef, Mari ek Zezi. Ann i konmans remersye Bondye e koz lo Zezi avek tou bann ki pare pour ekoute.

Pa Zozef ek Mari i vreman kontan ler zot vwar tousala! Definitivman tousala i fer zot asire ki zot garson i sa Enn ki Bondye in promet.



- ◇ Kan en pti baba Izraelit ti ganny donnen son non?
- ◇ Ki en manman ti bezwen fer ler son pti garson i ganny 40 zour? Dapre lofrann ki Mari ti ofer, ki nou aprann konsernan Mari?
- ◇ Lekel ki ti rekonnèt Zezi kot tanp e ki zot ti fer?

# BANN ASTROLOG I VIZIT ZEZI

MATYE 2:1-12

Bann astrolog sorti dan les i vin Zerizalenm. En astrolog i en dimoun ki etidye pozisyon bann zetwal pour predir bann levennman ki arive dan lavi dimoun. (Izai 47:13) Ler zot ankor kot zot, sa bann zonm i vwar en “zetwal” e zot swiv li pour plizyer santenn kilomet. Sa zetwal pa anmenn zot Betleenm, me Zerizalenm.

Ler bann astrolog i ariv laba, zot demande: “Lerwa bann Zwif ki’n ne, kote i ete? Parski nou ti vwar son zetwal kan nou ti dan Les e nou’n vin onor li.”—Matye 2:1, 2.


Ler Lerwa Erod, Zerizalenm, i tann sa, i pa kontan ditou. Alor i kriy bann sef pret ek lezot sef relizye Zwif e demann zot kote Kris i sipoze ne. Zot dir ki dapre Lekritir, i sipoze ne “Betleenm.” (Matye 2:5; Mika 5:2) Apre sa, Erod i kriy bann astrolog an sekre e dir zot: “Ale e rod byen partou sa pti garson e kan zot in trouv li, fer mwan konnen pour ki mwan

osi mon a kapab al onor li.” (Matye 2:8) Me an realite, Erod i anvi trouv sa zanfan pour touy li.

Ler bann astrolog i ale, en keksoz enkrwab i arive. Sa “zetwal” ki zot in vwar ler zot ti dan les i al par devan zot. I kler ki sa zetwal pa parey tou lezot zetwal, me i zis la pour gid zot. Bann astrolog i swiv sa zetwal ziska ki i aret zis par lao sa lakaz kot Zozef ek Mari pe reste avek zot pti garson.

Ler bann astrolog i antre dan lakaz, zot vwar Mari avek son pti garson Zezi. Bann astrolog i vwar Zezi e zot tonm azenou devan li. Zot fer li kado lor, lansan blan ek lamir. Letan zot pros pour retourn kot Erod, dan en rev, Bondye i averti zot pour pa fer sa. Alor zot pran en lot semen pour retourn dan zot pei.

Lekel ou krwar ti fer sa “zetwal” gid sa bann astrolog? Pa bliye ki sa zetwal pa ti gid zot direkteman kot Zezi, Betleenm. Plito, i ti gid zot Zerizalenm, kot zot ti zwenn Lerwa Erod ki ti anvi touy Zezi. Erod ti pou’n reisi fer sa si Bondye pa ti’n entervenir e demann bann astrolog pour pa dir Erod kote Zezi ti ete. I kler ki i ti Satan, lennmi Bondye ki ti pe esey zot Zezi dan sa fason.



- ◇ Ki mannyer nou konnen ki sa “zetwal” ki bann astrolog ti vwar pa ti parey tou lezot zetwal?
- ◇ Kote Zezi ti pe reste ler bann astrolog ti al vwar li?
- ◇ Akoz nou kapab dir ki Satan ki ti pe gid bann astrolog?





## ZOT SOV EN MOVE LERWA

MATYE 2:13-23

Zozef i lev Mari dan son sonmey pour dir li en keksoz irzan. Lanz Zeova fek aparet avek li dan en rev e dir li: “Leve, pran sa pti garson ek son manman e sov Lezip. Reste laba ziska ki mon a dir ou retournen, parski Erod pe al rod sa pti garson pour touy li.”—Matye 2:13.

Deswit, Zozef, Mari ek zot garson i sove pandan lannwit. Zot fer sa zis a tan, akoz Erod i tande ki bann astrolog in anbet li. I’n demann zot pour tourn kot li pour donn li lenformasyon. Me zot in kit sa pei san retourn kot li. Erod i vremen ankoler. I ancor anvi touy Zezi, alor i donn lord pour touy tou bann pti garson de-z-an e mwens ki reste Betleenm e dan zalantour. I’n kalkil sa laz dapre sa ki bann astrolog in dir li.


Lanmor tou sa bann pti garson i vremen fer lapenn! Nou pa konnen konbyen pti garson ki ti ganny touye, me tou sa bann manman ki ti pe kriye e plere asodlarm ti akonpli en profesi Labib ki Bondye ti donnen atraver profet Zeremi.—Zeremi 31:15.



Antretan, Zozef ek son fanmir in sove e al reste Lezip. Me en zour swar, lanz Zeova i aparet avek Zozef ancor enn fwa dan en rev. Sa lanz i dir li: “Leve, pran sa pti garson ek son manman e al dan pei Izrael, parski bann ki ti anvi pran lavi sa pti garson in mor.” (Matye 2:20) Alor Zozef i mazine ki aprezan zot kapab retourn dan zot pei. Sa i akonpli en lot profesi Labib ki dir ki Bondye ti pou fer son Garson sorti Lezip.—Osea 11:1.

I paret ki Zozef i anvi ki son fanmir i reste dan rezyon Zide, petet en lavil pros avek Betleenm kot zot ti pe reste avan zot sove pour





al Lezip. Me i tande ki se Arkelais, en garson Erod ki move ki pe diriz Zide. Alor dan en lot rev, Bondye i averti Zozef ki i danzere pour reste Zide. Aprezan, Zozef ek son fanmir i al reste dan lavil Nazaret, dan teritwar Galile, dan nor. Alor zot reste lwen avek Zerizalenm

kot laplipar aktivite relizye Zwif i ganny fer. Zezi i grandi dan sa kominote e sa i akonpli en lot profes: “I pou ganny apele en Nazaren.”—Matye 2:23.

- 
- ◇ Ler bann astrolog pa ti retourn kot Lerwa Erod, ki Erod ti fer e ki mannyer Zezi ti ganny proteze?
  - ◇ Ler Zozef ek son fanmir ti sorti Lezip, akoz zot pa ti retourn Betleenm?
  - ◇ Ki profes Labib ki ti ganny akonplir pandan sa letan?



# ZEZI I GRANDI NAZARET

MATYE 13:55, 56 MARK 6:3

Zezi pe grandi Nazaret, dan en pti lavil ki pa tro enportan. Sa lavil i dan nor, dan en rezyon ki apel Galile kot i annan bokou pti montanny, lo kote was en lak ki apel Lanmer Galile.

Ler Zezi i annan apepre de-z-an, Zozef ek Mari i kit Lezip e zot al reste Nazaret. I paret ki zot annan zis Zezi sa letan. Me pli tar, Zezi i ganny plizyer demi frer. Zot apel Zak, Zozef, Simon ek Zida. Zozef ek Mari i osi ganny bann fiy, bann demi ser Zezi. Alor Zezi i annan omwen sis pti frer ek ser.

Byensir, Zezi i annan lezot fanmir ankor. Nou'n deza koz lo Elizabet ek son garson Zan.

Zot reste ase lwen dan sid, dan en rezyon ki apel Zide. I osi annan Salome ki reste pa tro lwen Galile. Li aparaman i ser Mari e alor i tantin Zezi. Salome i madanm Zebede. Zot de garson ki apel Zak ek Zan i kouzen Zezi. Nou pa konnen si Zezi in pas bokou letan avek zot ler zot pe grandi, me pli tar zot vin pros ler zot vin son zapot.

Zozef ki en sarpantye i bezwen travay dir pour siport son fanmir ki pe kontinyen agrandi. Zozef i elve Zezi konmsi i son prop garson, sanmenm sa Zezi i ganny apele "garson sa sarpantye." (Matye 13:55) Zozef i montre



Zezi ki manner pour fer travay sarpantye e Zezi i aprann byen. Anfet, pli tar dimoun i dir sa lo Zezi: “Li menm li sa sarpantye.”—Mark 6:3.

Zozef i fer sir ki ladorasyon Zeova i pas avan tou keksoz dan zot lavi fanmir. Zozef ek Mari i swiv Lalwa Bondye e enstri zot zanfan lo bann keksoz spirityel ‘ler zot dan lakour, ler zot pe

marse lo semen, ler zot pe al dormi e ler zot reveye.’ (Deteronnm 6:6-9) I annan en sinagog Nazaret. Nou kapab asire ki Zozef i regilyerman anmenn son fanmir laba pour ador Zeova. Pli tar, i ti ganny ekrire ki “zour Saba, parey son labitid,” Zezi ti al sinagog. (Lik 4:16) Fanmir Zozef ti osi kontan vwayaz ase souvan pour al kot tanp Zeova, Zerizalenm.

- ◇ Konbyen pti frer ek ser Zezi ti annan?
- ◇ Ki metye Zezi ti aprann e akoz?
- ◇ Ki lenstriksyon enportan Zozef ti donn son fanmir?



# FANMIR ZEZI I AL ZERIZALENM

LIK 2:40-52

Nou dan sezon prentan e i ler pour fanmir Zozef, ansanm avek zot zanmi ek fanmir al Zerizalenm. Zot fer sa vwayaz tou le-z-an pour zot selebre Lapak parey Lalwa i demande. (Deterononm 16:16) Ant Nazaret ek Zerizalenm, i annan en zistans apepre 120 kilomet. Tou dimoun i okipe e byen eksite ler zot pe met zot pare. Zezi, ki'n ganny 12 an, i byen kontan pour al selebre sa lafet e pour li ganny sans vwar tanp ankor enn fwa.

Pour Zezi ek son fanmir, Lapak pa en levennman ki dire zis pour en zour. Sa zour apre Lapak, i annan en lot lafet ki konmanse ki dire pour set zour. Sa i Lafet Dipen san Lelven. (Mark 14:1) Sa lafet i form parti sezon Lapak. An tou, i pran apepre de semenn pour zot vwayaze sorti Nazaret, reste Zerizalenm e retourn kot zot. Me sa lannen i pran plis letan ki labitid aköz en pti lensidan ki'n arive avek Zezi ler zot pe retournen sorti Zerizalenm.

Ler zot pe vwayaze, Zozef ek Mari i krwar ki Zezi i avek bann fanmir ek zanmi ki pe al dan direksyon Nazaret. Me ler tou dimoun i arete pour repoze aswar, zot pa vwar li. Alor zot rod li partou parmi bann zanmi ek fanmir me i pa


la. Zot pa vwar zot garson okenn par! Zozef ek Mari i retourn Zerizalenm pour rod li.

Zot rod li en lazournen antye me zot pa vwar li. Son lannmen, zot kontinyen rod li me zot pa vwar li menm. Finalman, trwazyenm zour zot vwar zot garson dan tanp, kot i annan en kantite lasal. Zot vwar Zezi pe asize parmi bann ansenyan Zwif. I pe ekoute, demann kestyon e tou dimoun i etonnen avek son lentelizans.

Mari i demann li: “Mon garson, aköz ou'n fer sa avek nou? Nou de ou papa nou ti vreman enkyet pe rod ou.”—Lik 2:48.

Zezi i sirprann ki zot pa ti konnen kote i ete. I demann zot: “Aköz zot ti pe rod mwan? Eski zot pa ti konnen ki mon bezwen dan lakaz mon Papa?”—Lik 2:49.

La ki zot in retrouv kanmarad, Zezi i retourn kot li Nazaret avek Zozef ek Mari e i kontinyen obei zot. Zezi i kontinyen grandi e i vin deplizanpli saz. Menm si i ankor zenn, i fer plezir Bondye ek zonn. Nou vwar ki depi byen zenn, Zezi i kit en bon legzanp konman en dimoun ki enterese avek keksoz spirityel e ki demonstre respe pour son paran.



**BANN VWAYAZ INOUBLIYAB** Tou dimoun ti kontan ler zot ti al Zerizalenm pour selebre bann lafet trwa fwa par an. (Deterononm 16:15) Pandan sa bann vwayaz, Zezi ti vwar diferan landrwa, aprann plis lo zeografi sa pei e zwenn lezot adorater Zeova ki sorti dan lezot landrwa. Sa ti bann vwayaz inoubliyab!





- ◇ Ki vwayaz Zezi ti fer regilyerman avek son fanmir e akoz?
- ◇ Ler Zezi ti annan 12 an, ki Zozef ek Mari ti realize ler zot pe vwayaze sorti Zerizalenn e kote zot vwar Zezi?
- ◇ Ki bon legzanp Zezi in kite pour bann zenn ozordi?

## ZAN KI BATIZE I PREPAR SEMEN

MATYE 3:1-12 MARK 1:1-8 LIK 3:1-18 ZAN 1:6-8, 15-28

I fer 17 an depi ki Zezi ti kestyonn bann anse-nyan kot tanp a laz 12 an. La i prentan lan-nen 29. I annan en kantite dimoun ki pe koz lo Zan, fanmir Zezi ki pe pres partou dan was La-rivyer Zourden.

Laparans ek fason koze Zan i enpresyonan. Son lenz in ganny fer avek pwal samo e i met en sang lapo dan son leren. I manz sotrel ek dimyel maron. Ki mesaz i anonse? “Repantir, parski Rwayonm lesyel in aprese.”—Matye 3:2.

Bann ki vin ekout mesaz Zan i vreman kon-tan pour tann li. En kantite dimoun i reali-ze ki zot bezwen repantir, savedir ki zot be-zwen sanz zot latitud ek fason fer par rezet zot vye fason viv ki pa bon. Bann dimoun ki vin vwar li i sorti “Zerizalenm e partou dan Zide ek rezyon Zourden.” (Matye 3:5) En kantite dimoun ki vin vwar Zan i vreman repantir. I batiz zot par plonz zot dan Larivyer Zourden. Akoz?

Bann dimoun ki ganny batize par Zan i mon-tre ki zot in senserman repantir pour bann pese ki zot in fer kont lalyans Lalwa Bondye. (Akt 19:4) Me pa tou dimoun ki kalifye pour batize. Ler serten sef relizye, bann Farizyen ek bann Sadiseen i vin kot Zan, i dir zot: “Bann piti serpan, . . . fer bann aksyon ki montre ki zot in repantir. Pa krwar ki zot kapab zis dir, ‘Abraam i nou papa.’ Parski mon dir zot ki Bondye i kapab fer sa bann ros vin zanfan Abraam. Lars in fini pare pour koup rasin pye dibwa. Alor, tou pye dibwa ki pa raport bon fri pou ganny koupe e zete dan dife.”—Matye 3:7-10.

Vi ki bokou dimoun i kontan Zan ek son me-

saz e en kantite i batize, bann pret ek Levit i ganny anvoye pour demann li: “Lekel ou?”

Zan i admet: “Mon pa Kris.”

Zot demande: “Be alor, eski ou menm Eliya?”

I reponn zot: “Non.”

Zot demann li: “Eski ou sa Profet?” Zot pe koz konsernan sa Profet ki Moiz ti dir ti pou vini.—Deterononm 18:15, 18.

Zan i reponn: “Non!”

Zot kontinyen ensiste: “Lekel ou? Dir nou pour ki nou kapab donn en larepons sa bann ki’n anvoy nou. Ki ou annan pour dir lo ou menm?” Zan i dir: “Zis parey profet Izai ti dir, Mwan menm sa dimoun ki pe kriye dan dezer, ‘Fer semen Zeova drwat.’”—Zan 1:19-23.

Ankor enn fwa zot demann li: “Alor, akoz ou pe batiz dimoun si ou pa ni Kris, ni Eliya, ni sa Profet?” I donn zot en bon larepons: “Mwan mon batiz dimoun dan delo me i annan en di-moun parmi zot ki zot pa konnen, sa enn ki pe vin apre mwan, ki mon pa diny pour delarg lase son sandalet.”—Zan 1:25-27.

Zan i la pour prepar semen Mesi par ed bann dimoun annan sa bon leta lespri pour aksepte sa Mesi ki ti’n ganny promet e ki pou vin Lerwa. Zan i dir sa lo li: “Sa enn ki pe vin apre mwan ki mon pa diny pour tir son sanda-let i pli for ki mwan.” (Matye 3:11) Anfet, Zan i menm dir: “Sa enn ki pe vin apre mwan in depas mwan, parski i ti egziste avan mwan.”—Zan 1:15.

Alor mesaz Zan i apropiye. I dir: “Repantir, parski Rwayonm lesyel in aprese.” (Matye 3:2) Sa mesaz i fer tou dimoun konnen ki Zezi Kri, sa Lerwa ki Zeova in anvoye, i pros pour kon-mans son minister.



- ◇ Ki kalite dimoun Zan ti ete e ki i ti pe fer?
- ◇ Akoz Zan ti batiz bann dimoun?
- ◇ Ki mesaz Zan ti anonse e akoz sa i apropiye?







SEKSYON

# 2

## KONMANSMAN MINISTER ZEZI

‘GETE!  
LA PTI MOUTON BONDYE  
KI TIR PESE.’

—ZAN 1:29



## ZEZI I GANNY BATIZE

MATYE 3:13-17 MARK 1:9-11 LIK 3:21, 22 ZAN 1:32-34

Anviron sis mwan apre ki Zan ki batize in konmans prese, Zezi ki annan apepre 30 an, i vin kot li kot Larivyèr Zourden. Akoz? I pa zis en pti vizit pour vwar en zanmi e i pa senpleman akoz Zezi i anvi konnen ki mannyer travay Zan pe progrese. Zezi i vin kot Zan pour demann li pour batiz li.

Larepons Zan pa sirprann nou. I dir: “Mwan ki bezwen ganny batize par ou e ou ki pe vin kot mwan?” (Matye 3:14) Zan i konnen ki Zezi i Garson Bondye. Mazinen ki Zan ti bouze dan vant son manman, akoz i ti kontan ler Mari, ki ti ansent sa letan ti vin vizit Elizabet manman Zan. San dout manman Zan ti rakont li tousa-la pli tar. I ti pou’n osi aprann konsernan sa lanz ki ti anons nesans Zezi e bann lanz ki ti aparet avek bann berze sa zour swar ki Zezi ti ne.

Zan i konpran ki i pe batiz dimoun pour montre ki zot in repantir pour zot bann pese. Me Zezi pa’n zanmen fer pese. Menm si Zan pa oule batiz Zezi, Zezi i ensiste: “Les li sa-

fwasi, parski dan sa fason nou akonpli tou sa ki drwat.”—Matye 3:15.

Akoz i byen pour Zezi ganny batize? Zezi pa pe ganny batize pour montre ki i’n repantir pour son bann pese. Son batenm i montre ki i’n pare pour fer lavolonte son Papa. (Ebre 10:5-7) Ziska prezan Zezi ti pe travay konman en sarpantye, me la i’n ariv ler pour li konmans sa minister ki son Papa in anvoy li pour fer lo later. Eski ou krwar ki Zan pe ekspekte en keksoz spesyal pour arive ler i batiz Zezi?

Pli tar Zan i dir: “Sa Enn ki’n anvoy mwan batiz dimoun dan delo ti dir mwan: ‘Sa enn ki ou vwar lespri sen desann e reste lo li, li menm ki batiz avek lespri sen.’” (Zan 1:33) Alor Zan pe ekspekte ki lespri sen pou desann lo en dimoun ki i batize. I kapab ki Zan pa sirprann ler Zezi i sorti anba delo e i vwar “lespri sen Bondye parey en kolonm, pe desann lo [Zezi].”—Matye 3:16.

Me pa se tou, Labib i dir ki ‘Lesyel i ouver.’ Ki sa i vedir? I paret ki ler Zezi i ganny batize,






i rapel son lavi dan lesyel avan i ti vin lo later. Alor, aprezan Zezi i rapel sa ki i ti fer ler i ti en garson spirityel Zeova e tou keksoz ki Bondye ti'n ansenny li dan lesyel avan i vin lo later.

An plis, ler Zezi i ganny batize en lavwa dan lesyel i dir: "Sa i mon Garson ki mon kontan ki mon'n aprouve." (Matye 3:17) Lavwa lekel sa? I pa kapab lavwa Zezi parski i lanmenm la avek Zan. I lavwa Bondye. I kler ki Zezi i Garson Bondye, pa Bondye.

I enportan pour note ki konman en imen, Zezi i en garson Bondye, zis parey sa premye zomn Adan. Apre ki disip Lik ti dekrir batenm Zezi, i ti ekri: "Zezi ti annan apepre 30 an ler i ti konmans son minister. Parey dimoun ti krwar, i ti garson Zozef, garson Eli, . . . garson David, . . . garson Abraam, . . . garson Noe, . . . garson Adan, garson Bondye."—Lik 3:23-38.

Adan ti en "garson Bondye" lo later, zis parey Zezi ler i ti lo later. Ler Zezi i ganny batize, i konmans en nouvo relasyon avek Bondye e vin son Garson spirityel. Alor Zezi i kapab ansenny laverite lo Bondye e montre nou semen ki anmenn ver lavi. Zezi i konmans en lot letap dan son lavi ki pou permet li pour sakri-fye son lavi konman en imen pour sov limanite dan pese.

- 
- ◇ Ki mannyer nou konnen ki Zan ti bezwen konn Zezi?
  - ◇ Zezi pa ti'n fer okenn pese, alor akoz Zan ti batiz li?
  - ◇ Akoz i kapab ki Zan pa ti sirprann ki lespri sen Bondye ti desann lo Zezi?
- 



# APRANN AVEK LAFASON KI ZEZI TI FER FAS AVEK TANTASYON

MATYE 4:1-11 MARK 1:12, 13 LIK 4:1-13

Deswit apre ki Zezi in ganny batize par Zan, lespri sen Bondye i anmenn Zezi dan dezer Zide. I annan en kantite keksoz pour li refle-sir lo la. Ler Zezi in batize, “lesyel ti ouver.” (Matye 3:16) Alor i kapab rapel bann keksoz ki i’n aprann e fer dan lesyel. Vreman, i an-nan en kantite keksoz pour li medit lo la!

Zezi i pas 40 zour ek 40 lannwit dan de-zer. Pandan sa letan, i pa manz nanryen. Ler Zezi in vreman lafen, Satan i vin kot li pour esey tant li. I dir li: “Si ou en garson Bondye, dir sa bann ros vin dipen.” (Matye 4:3) Vi ki Zezi i konnen ki i mal pour servi sa pwisans ki i’n gannyen pour fer mirak pour satisfèr son prop dezir, i rezet sa tantasyon.

Me Dyab pa aret la. I esey en lot metod. I anmenn Zezi anler lo miray tanp e demann li pour sot anba. Me Zezi pa les li ganny tan-te pour fer sa kalite spektak. Zezi i sit Lekritir pour monte ki i mal pour teste Bondye dan sa fason.


Apre, dan en trwazyenm tantasyon, Dyab i montre Zezi “*tou bann rwayonm dan sa lemonn*” e i dir: “Tousala mon pou donn ou si ou azenou devan mwan e ador mwan.” Me ankor enn fwa, Zezi i kareman refize e dir: “Sorti la ale Satan!” (Matye 4:8-10) I pa les

li ganny tante pour fer sa ki mal parski i kon-nen ki i devret ador zis Zeova. Zezi i swazir pour reste fidel avek Bondye.

Nou kapab aprann en leson avek sa bann tantasyon ek lafason ki Zezi ti fer fas avek zot. Sa bann tantasyon ti reel e sa i montre ki Dyab pa zis lemal ki dan nou parey serten dimoun i dir. I en vre personnaz envizib. Sa resi i osi montre nou ki bann gouvèrnman sa lemonn i pour Dyab e ki i pe kontrol zot. Si non, ki mannyer i ti pou’n kapab ofer zot avek Zezi? I pa ti pou en vre tantasyon.

An plis ki sa, Dyab ti dir ki i pare pour re-konpans Zezi si i ti ador li zis en fwa e i ti menm pare pour donn Zezi *tou bann rwayonm dan sa lemonn*. I kapab arive ki Dyab i esey tant nou dan menm fason, petet par donn nou bann loportinite ki fer nou krwar ki nou kapab vin ris oubyen ganny en serten pouvwat ouswa pozisyon dan sa lemonn. Nou montre ki nou saz ler nou imit legzanp Zezi par reste fidel avek Bondye dan nen-port tantasyon ki nou rankontre. Me pa bliye ki Dyab ti kit Zezi “ziska en pli bon lo-kazyon.” (Lik 4:13) I kapab fer menm parey avek nou, alor nou pa devret zanmen bes nou gard.

- 
- ◇ Ki serten keksoz Zezi ti’n kapab medit lo la pandan sa 40 zour ki i ti pase dan dezer?
  - ◇ Ki diferan fason Dyab ti esey tant Zezi?
  - ◇ Ki nou kapab aprann avek bann tantasyon ki Zezi ti gannyen ek lafason i ti fer fas avek zot?





## ZEZI I KONMANS FER DISIP

ZAN 1:29-51

Apré ki Zezi in fer 40 zour dan dezer i retourn kot Zan ki ti'n batiz li, avan i retourn Galile. Ler Zezi pe aprozé, Zan i vwar li e i dir avek tou dimoun ki la: "Gete! la Pti Mouton Bondye ki tir pese lemonn! Li menm sa enn ki mon ti koz lo la: 'Sa enn ki pe vin apre mwan in depas mwan, parski i ti egziste avan mwan.'" (Zan 1:29, 30) Menm si Zan i en pti pe pli vye ki Zezi, i konnen ki Zezi ti egziste avan li konman en lespri dan lesyel.

Detrwa semenn avan sa, ler Zezi ti'n vin kot li pour ganny batize, i pa paret ki Zan ti asire ki Zezi ti Mesi. Zan i dir: "Mwan osi mon pa ti konn li, me rezon akoz mon pe batiz dimoun dan delo se pour ki Izrael i kapab konnen lekel li."—Zan 1:31.

Apré sa, Zan i eksplike ki ti arive ler i ti batiz Zezi: "Mon ti vwar lespri sen, parey en kolonm, pe desann sorti dan lesyel e reste lo li. Mwan osi mon pa ti konn li, me sa Enn ki'n anvoy mwan batiz dimoun dan delo ti dir mwan: 'Sa enn ki ou vwar lespri sen desann e reste lo li, li menm ki batiz avek lespri sen.' Mwan mon'n vwar li e mon'n rann temwanyaz ki i Garson Bondye."—Zan 1:32-34.

Son lannmen, Zan i avek de son bann disip ler Zezi i vin kot li ankore fwa. Zan i dir: "Gete! la Pti Mouton Bondye!" (Zan 1:36) Ler sa de disip i tann Zan ki batize dir sa, zot swiv Zezi. Enn i apel Andre. I tre probab ki sa lot disip i sa menm dimoun ki'n ekri sa resi. Li osi i apel Zan. I paret ki Zan i kouzen Zezi akoz i garson Salome. I tre probab ki Salome i ser Mari e i madanm Zebede.



Ler Zezi i vire e vwar Andre ek Zan pe swiv li, Zezi i demande: "Ki zot pe rode?"

Zot demann li: "Rabi . . . , kote ou pe reste?"

Zezi i reponn zot: "Vini zot pou vwar."—Zan 1:37-39.

I apepre kat-r-er apremidi e Andre ek Zan i reste avek Zezi pour larestan lazournen. Andre i sitan eksite ki i al rod son frer Simon, ki osi ganny apele Pyer e dir li: "Nou'n trouv Mesi." (Zan 1:41) Andre i anmenn Pyer kot Zezi. Sa ki arive pli tar, i donn lenpresyon ki Zan osi i al rod son frer Zak e anmenn li kot Zezi. Par kont, Zan pa koz lo la dan son resi.

Son lannmen, Zezi i zwenn Filip ki sorti Betsayda. Sa lavil i lo lakot nor Lanmer Galile. Sanmenm sa lavil kot Andre ek Pyer osi



i sorti. Zezi i dir Filip: “Vin mon disip.”—Zan 1:43.

Aprè sa, Filip i zwenn Natanael, ki osi ganny apele Bartelemi e dir li: “Nou’n trouv sa enn ki Lalwa Moiz ek lansennyman bann Profet ti koz lo la, Zezi, garson Zozef, sorti Nazaret.” Me Natanael i annan bann dout. I dir Filip: “Eski i kapab annan okenn bon keksoz sorti Nazaret?”

Filip i demann li pour “vin gete.” Ler Zezi i vwar Natanael pe vin kot li, i dir: “Gete, la en vre Izraelit ki napa okenn lipokrizi dan li.”

Natanael i demann Zezi: “Ki mannyer ou konn mwan?”

Zezi i reponn li: “Avan ki Filip ti vin kriy ou, mon ti vwar ou anba pye fig.”

Natanael i sirprann e i reponn: “Anse-nyan, ou Garson Bondye, ou Lerwa Izrael.”

Zezi i demann li: “Eski ou krwar aköz mon’n dir ou ki mon ti vwar ou anba pye fig? Ou pou vwar bann pli gran keksoz ki sa.” Aprè sa, Zezi i promet: “Vreman mon dir zot laverite, zot pou vwar lesyel ouver e bann lanz Bondye pe monte desann pour vin kot Garson zonn.”—Zan 1:45-51.

Deswit aprè sa, Zezi ansanm avek son bann nouvo disip i kit Vale Zourden e zot al Galile.

- 
- ◆ Lekel bann premye disip Zezi?
  - ◆ Ki mannyer Pyer e petet osi Zak ti konmans swiv Zezi?
  - ◆ Kwa ki konvenk Natanael ki Zezi i Garson Bondye?



# PREMYE MIRAK ZEZI

ZAN 2:1-12





I fer trwa zour depi ki Natanael in vin enn parmi bann premye disip Zezi. Zezi ek serten sa bann premye disip i al dan nor, dan distrik Galile kot zot sorti. Zot al dan en lavil ki apel Kana, kot Natanael i sorti. Kana i dan bann pti montanny ki dan nor Nazaret, kot Zezi ti grandi. Zot in ganny envite en maryaz laba.

Manman Zezi osi in ganny envite dan sa maryaz. Mari i zanmi bann ki pe marye, alor i paret ki i pe ede servi bann envite. I pa pran lontan pour Mari realize ki i annan en problem e i al dir Zezi: “Diven in fini.”—Zan 2:3.

Anfet, vi ki diven in fini, Mari pe sizere ki Zezi i fer en keksoz. Zezi i servi en lekspre-syon ki montre ki i pa dakor. I dir: “Madanm, ki sa i annan pour fer avek mwan ouswa ou?” (Zan 2:4) Zezi in ganny apwente konman fitir Lerwa Bondye, alor i son Papa dan lesyel ki pou dir li ki pour fer pa son fanmir ni son zanmi. Mari i demontre lasazes par les son garson rezourd keksoz e i zis dir avek bann dimoun ki pe servi: “Fer tou sa ki i dir zot fer.”—Zan 2:5.

I annan sis resipyan an ros e sakenn i kapab pran plis ki karant lit delo. Zezi i demann bann ki pe servi pour “ranpli sa bann resipyan avek delo.” Apre, Zezi i dir: “Aprezan, pran en pe ladan e amenn kot sa enn ki ansarz resepsyon.”—Zan 2:7, 8.

Sa enn ki ansarz resepsyon i vwar diven vreman bon me i pa konnen ki sa diven in ganny fer atraver en mirak. I kriy nouvo marye e dir li: “Tou dimoun i normalman donn sa bon diven avan e ler dimoun in sou, i donn sa ki pa tro bon. Ou ou’n anmas sa bon diven pour pli tar.”—Zan 2:10.

Sa i premye mirak ki Zezi i fer. Ler son bann nouvo disip i vwar sa mirak, zot konmans annan plis lafwa dan li. Apre sa, Zezi, son manman ek son bann frer i al dan lavil Kapernaoum ki lo lakot nor was Lanmer Galile.



- ◇ Pandan minister Zezi, kan i ti annan en maryaz Kana?
- ◇ Ki Zezi ti dir ler son manman ti koz avek li lo diven?
- ◇ Ki mirak Zezi ti fer e ki lefe sa ti annan lo lezot?

# ZEZI I DEMONTRE DEVOUMAN POUR VRE LADORASYON

ZAN 2:12-22



Apré maryaz Kana, Zezi i al Kapernaoum. Manman Zezi ek son bann frer, setadir Zak, Zozef, Simon ek Zida pe vwayaz ansanm avek li.

Me akoz Zezi i al Kapernaoum? I paret ki sa lavil i pli gran e osi i pli fasil pour ganny akse avek ki Nazaret ek Kana. Deplis, en kantite parmi bann nouvo disip Zezi i reste Kapernaoum oubyen pa tro lwen. Alor, Zezi i kapab form zot dan rezyon kot zot reste.

Pandan ki Zezi i Kapernaoum, i osi fer bann mirak. Sa i fer ki en kantite dimoun dan sa lavil e dan zalantour i tann koz konsernan bann keksoz ki i fer laba. Me Zezi ek son bann disip i bann Zwif fidel, alor zot pou bezwen al Zerizalenm byento pour asiste Lapak lannen 30.

Ler bann disip Zezi i kot tanp Zerizalenm, sa ki Zezi i fer i vreman enpresyonn zot. I vreman diferan avek okenn keksoz ki zot in deza vwar avan.

Dapre Lalwa Bondye, bann Izraelit i bezwen fer bann sakrifis zannimo kot tanp e bann viziter i bezwen ganny manze pandan sa letan ki zot pase Zerizalenm. Alor Lalwa i permet bann ki sorti lwen pour vin Zerizalenm pour anmenn larzan pour aste bef, mouton,

kabri ek lezot keksoz ki zot bezwen pandan sa letan ki zot Zerizalenm. (Deterononm 14:24-26) Sa i fer ki bann marsan Zerizalenm i vann bann zannimo ouswa zwazo dan en gran lakour dan tanp. Serten parmi zot pe vol dimoun par vann zot bann keksoz tro ser.

Zezi i ankoler ler i vwar sa. I zet ater larzan bann ki pe sanz larzan, savir zot lata e i pous sa bann zonm. Apre Zezi i dir: “Tir sa bann zafer la! Aret fer lakaz mon Papa vin en bazar!”—Zan 2:16.

Ler bann disip Zezi i vwar sa, zot rapel sa profes konsernan Garson Bondye ki dir: “Devouman pour ou lakaz pou brile dan mwan parey dife.” Me bann Zwif i demann li: “Ki siny ou pou fer pour montre ki ou annan drwa fer sa bann keksoz?” Zezi i reponn zot: “Detri sa tanp e mon pou rekonstri li dan trwa zour.”—Zan 2:17-19; Psonm 69:9.

Bann Zwif i prezimen ki Zezi pe koz lo sa tanp ki la Zerizalenm, alor zot dir li: “I ti pran 46 an pour konstri sa tanp e ou, ou pou pran trwa zour pour rekonstri li?” (Zan 2:20) Me Zezi li pe refer avek son lekor konman en tanp. Trwa-z-an pli tar, son bann disip pou rapel sa bann parol ler i ganny resisite.

- 
- ◇ Apre maryaz Kana, ki diferan landrwa Zezi ti ale?
  - ◇ Akoz Zezi ti ankoler ler i ti vwar sa ki ti pe pase dan tanp e ki i ti fer?
  - ◇ Ki Zezi ti pe refer avek ler i ti koz lo “sa tanp” e ki sa i vedir?



# ZEZI I ANSENNY NIKODENM ASWAR

ZAN 2:23–3:21

Ler Zezi i Zerizalenm pour Lapak lannen 30, i fer bann siny oubyen mirak ki ekstraordiner. Sa i fer ki bokou dimoun i annan lafwa dan li. Nikodenm i en Farizyen e en manm Sannedren, setadir lakour siprenm Zwif. Zezi i enpresyonn li e Nikodenm i anv aprann plis, alor i al vwar Zezi ler fernwanr in fer. Petet i fer sa akoz i per ki si lezot sef relizye i vwar li, sa pou gat son repitasyon.

Nikodenm i dir: “Ansenyan, nou konnen ou en ansenyan ki sorti kot Bondye parski personn pa kapab fer sa bann mirak ki ou fer amwen ki Bondye i avek li.” Zezi i dir Nikodenm ki pour en dimoun antre dan Rwayonm Bondye i bezwen “ne ancor.”—Zan 3:2, 3.

Me ki mannyer en dimoun i kapab ne ancor? Nikodenm i demann Zezi: “I pa kapab antre dan vant son manman en dezyenm fwa pour li ne, non?”—Zan 3:4.

Non, ne ancor pa vadir sa. Zezi i eksplike: “Si en dimoun pa’n ne par delo ek lespri sen, i pa kapab antre dan Rwayonm Bondye.” (Zan 3:5) Ler Zezi ti batize e lespri sen ti desann lo li, i ti ne “par delo ek lespri sen.” An menm tan, en lavwa dan lesyel ti dir: “Sa i mon Garson ki mon kontan ki mon’n aprouve.” (Matye 3:16, 17) Dan sa fason, Bondye ti anonse ki aprezan Zezi ti’n vin en garson spirityel ki annan sa lespwar pour antre dan Rwayonm lesyel. Pli tar zour Lapannkot lannen 33, lezot dimoun ki’n batize ti pou ganny lespri sen e alor zot ti pou ne ancor konman bann garson spirityel Bondye.—Akt 2:1-4.

I difisil pour Nikodenm konpran sa ki Zezi pe ansenny li konsernan Rwayonm. Alor Zezi i donn li plis lenformasyon konsernan son rol konman Garson Bondye ler i lo later. Zezi

i dir: “Parey Moiz ti met en serpan anpandan dan dezer, Garson zonnm osi i devret ganny met anpandan lo poto, pour ki tou sa ki krwar dan li i a kapab ganny lavi eternal.”—Zan 3:14, 15.

Zezi ti pe refer avek sa letan kot bann Izraelit ki ti ganny morde avek serpan ti bezwen get en serpan an kwiv pour ganny sove. (Nonm 21:9) Pareyman, tou bann imen i bezwen demontre zot lafwa dan Garson Bondye pour zot ganny libere anba kondannasyon lanmor e ganny lavi eternal. “Bondye in telman kontan lemonn ki i’n donn son sel Garson pour ki nenport ki ki demonstre lafwa dan li pa ganny detrir me i ganny lavi eternal.” (Zan 3:16) Alor, lanmenm la, Zerizalenm, zis sis mwan apre ki Zezi in konmans son minister, i fer kler ki se li menm li sa mwayen pour sov limanite.

Zezi i dir Nikodenm: “Bondye pa ti anvoy son Garson dan lemonn pour ziz lemonn.” Sa i vadir ki i pa’n ganny anvoye pour ziz tou dimoun avek lentansyon pour kondann zot tou amor. O kontrer, Zezi i dir ki i’n ganny anvoye “pour ki lemonn i ganny sove atraver li.”—Zan 3:17.

Nikodenm in vin kot Zezi aswar dan kasyet akoz i per. Alor i enteresan ki Zezi i termin son konversasyon avek li par dir li: “Sa lalimyer [setadir Zezi par son fason viv ek lansennyman] in vin dan lemonn, me bann imen in pli kontan fernwanr ki lalimyer akoz sa ki zot fer i move e pour sa rezon zot pou ganny zize. Parski sa ki pratik sa ki mal i ay lalimyer





e i pa vin kot lalimyer pour ki son bann aksyon pa ganny devwale. Me sa ki fer sa ki byen i vin kot lalimyer pour montre ki sa ki i'n fer i an armoni avek lavolonte Bondye.”—Zan 3:19-21.

Aprezan Nikodenm, sa Farizyen ek anse-nyan Izrael i bezwen reflesir lo sa ki i fek tan-de konsernan rol Zezi dan plan Bondye.

- ◇ Kwa ki ti pous Nikodenm pour vizit Zezi e akoz i ti al vwar li aswar?
- ◇ Ki savedir “ne ankor”?
- ◇ Dan ki sans Zezi pa ti vin “pour ziz lemonn”?

## ZEZI I FER PLIS, ZAN I FER MWENS

MATYE 4:12 MARK 6:17-20 LIK 3:19, 20 ZAN 3:22-4:3

Apré ki Zezi ek son bann disip in selebre Lapak lannen 30, li ek son bann disip i kit Zerizalenn. Me selman zot pa retourn direkteman kot zot Galile. Zot al dan lakanpanny Zide kot zot batiz en kantite dimoun. Pour apepre en an aprezan, Zan ki batize pe fer en travay en pe parey dan vale Larivyè Zourden. Serten bann disip Zan i ankor avek li.

Zezi li menm pa batiz person, me son bann disip i fer sa anba son direksyon. Ziska prezan, Zezi ek Zan pe ansenny bann Zwif ki'n repantir akòz zot in fer pese kont lalyans Lalwa Bondye.—Akt 19:4.

Me bann disip Zan i zalou e zot konplent avek li lo Zezi. Zot dir: "Sa zonn [Zezi] ki ti avek ou . . . pe batiz dimoun e zot tou zot pe al kot li." (Zan 3:26) Me Zan pa zalou li. I kontan pour Zezi e i oule ki son bann disip osi i kontan. Zan i fer zot rapel: "Zot menm, zot in tande ler mon ti dir, 'Mwan mon pa Kris me mon'n ganny anvoye par devan li.'" I servi en legzanp pour eksplike ki sa i vèdir dan en fasòn ki tou dimoun i kapab konpran. I dir: "Se nouvo marye ki annan nouvel marye. Me ler zanmi nouvo marye i o bor li e i tann li koze, i dan en gran lazwa akòz i tann lavwa nouvo marye. Pareyman mwan osi mon dan en gran lazwa."—Zan 3:28, 29.

Detrwa mwan avan sa, Zan konman zanmi nouvo marye ti kontan pour entrodwi son bann disip avek Zezi. Serten parmi zot ti swiv Zezi e pli tar zot ti pou ganny swazir par lespri sen. Zan i osi anvi ki bann disip ki ankor avek li i swiv Zezi. Anfèt, lobzektif Zan se ki i prepar semen pour Kris fer son minister. Zan i eksplike: "Sa enn i devret kontinyen ogman-te me mwan mon pou kontinyen diminyen."—Zan 3:30.

Pli tar, en lot Zan, ki'n konmans swiv Zezi pli boner, i ekri konsernan lorizin Zezi ek son rol enportan pour sov limanite: "Sa enn ki sorti anler i par lao tou dimoun. . . . Papa i kontan son Garson e i'n donn li lotorite lo tou keksoz. Sa enn ki demontre lafwa dan Garson i ganny lavi eternel, sa enn ki dezobei Garson pa pou ganny lavi, me i pou eksperyans lakoler Bondye." (Zan 3:31, 35, 36) Pa i enportan ki dimoun i konn sa!

Pa bokou letan apré ki Zan ki batize in dir ki i pou fer mwens, Lerwa Erod i fer li ganny arete. Erod in pran Erodyad, madanm son demi frer Filip e i'n marye avek li. Ler Zan i dir devan tou dimoun ki Erod in komet adilter, Erod i fer li ganny mete dan prizon. Ler Zezi i tande ki Zan in ganny arete, i kit Zide avek son bann disip e zot "al Galile."—Matye 4:12; Mark 1:14.





- ◇ Ki sinifikasyon batenm ki Zan ti fer? Ki sinifikasyon batenm ki bann disip Zezi ti fer avan rezireksyon Zezi?
- ◇ Ki mannyer Zan ti montre ki son bann disip pa ti devret zalou sa ki Zezi ti fer?
- ◇ Akoz Zan ti ganny mete dan prizon?

## ZEZI I ANSENNY EN MADANM SAMARITEN

ZAN 4:3-43

Ler Zezi ek son bann disip i kit Zide pour al Galile dan nor, zot pas par distrik Samari. Zot byen fatige. Apepre midi zot aret o bor en pwi pros avek lavil Sikar pour repoze. I tre probab ki plizyer santenn lannen avan, Zakob ti fouy sa pwi oubyen i ti pey lezot pour fouy sa pwi pour li. Ziska ozordi, nou kapab trouv sa pwi dan lavil Nablus.

Zezi i repoze o bor sa pwi e son bann disip i al aste manze dan sa lavil. Ler zot in ale, en madanm Samariten i vin sers delo. Zezi i dir li: “Donn mwan en pe delo pour bwar.”—Zan 4:7.

Normalman bann Zwif ek Samariten pa koz avek kanmarad akoz bann diskriminasyon ki egziste antre zot. Alor sa madanm i etonnen e i demande: “Ki mannyer i posib ki ou, en Zwif, ou demann mwan en pe delo pour bwar menm si mon en madanm Samariten?” Zezi i reponn: “Si ou ti konn sa kado ki Bondye i donnen e lekel ki pe dir ou, ‘Donn mwan en pe delo pour bwar,’ ou ti pou demann li e i ti pou donn ou delo lavi.” Sa madanm i dir: “Msye, ou napa ni en seo pour tir delo e sa pwi i fon. Alor, kote ou pou ganny sa delo lavi? Se nou zanset Zakob ki’n donn nou sa pwi, li, son bann garson ek son troupo ti bwar sa delo. Eski ou pli gran ki li ou?”—Zan 4:9-12.

Zezi i dir: “Tou sa ki bwar sa delo pou swaf ancor. Sa ki bwar sa delo ki mon pou donn li pa pou zanmen swaf ancor, me sa delo ki mon pou donn li pou vin parey en sours delo dan li ki kontinyen koule pour donn lavi eternel.” (Zan 4:13, 14) Nou vwar ki menm si Zezi i fatige, i pare pour anons laverite ki kapab donn lavi sa madanm Samariten.



Apré sa, sa madanm i dir: “Msye, donn mwan sa delo, pour ki mon pa swaf ancor e mon ava aret vin sers delo isi.” I paret ki apre-zan Zezi i sanz konversasyon e dir li: “Al kiry ou msye e retourn isi.” I reponn: “Mon napa en msye.” Alor Zezi i dir li: “Ou annan rezon ler ou dir, ‘Mon napa en msye.’ Parski ou’n annan senk msye e sa zonn ki ou avek konmela i pa ou msye.” Sa madanm pa oule krwar ki Zezi i konn tousala.—Zan 4:15-18.

Ler sa madanm i tann sa, i realize ki Zezi pa en dimoun ordiner e i dir: “Msye, mon vwar ki ou en profet.” Apré sa, i montre ki i enterese avek bann keksoz spirityel. Ki mannyer i fer sa? I dir li: “Nou bann zanset [bann Samariten] ti adore lo sa montanny [Montanny Gezezim ki pa tro lwen], me zot [bann Zwif], zot dir ki dimoun i devret al Zerizalenm pour ador Bondye.”—Zan 4:19, 20.

Par kont, Zezi i eksplike ki i pa sa landrwa kot zot adore ki enportan. I dir: “Letan pe vini kot zot pa pou ador Bondye, ni lo sa montanny, ni Zerizalenm.” Apré i dir li: “Letan pe vini e i la konmela, kot bann vre adorater pou ador Bondye an armoni avek lespri sen ek





- ◇ Akoz sa madanm Samariten ti sirprann ki Zezi ti koz avek li?
- ◇ Ki Zezi ti ansenny sa madanm konsernan delo lavi e konsernan kote pour ador Bondye?
- ◇ Ki mannyer Zezi ti fer sa madanm Samariten konnen lekel li e ki kalite ladorasyon ki akseptab devan Bondye?



**LEKEL BANN SAMARITEN?** Sa rezyon ki apel Samari ti ant Zide ek Galile. Galile ti dan nor e Zide dan sid. Apre ki Lerwa Salomon ti mor, sa dis tribi Izrael dan nor ti separe avek tribi Zida ek Benzamen.

Bann dimoun dan sa dis tribi ti konmans ador pti bef. Alor an 740 avan Kris, Zeova ti permet bann Asiryen pour konkerir Samari. Bann Asiryen ti fer laplipar dimoun ki ti reste Samari al reste lezot landrwa e fer lezot dimoun ki sorti lezot landrwa dan Lanpir Asiryen vin reste Samari. Sa bann dimoun ki ti ador bann fo bondye ti marye avek bann Izraelit ki ti'n reste dan sa pei. Avek letan, bann dimoun ki ti reste dan sa landrwa ti devlop en kalite ladorasyon ki ti enplik serten krwayans ek pratik ki sorti dan Lalwa Bondye, tel parey sirkonsizyon. Me kantmenm sa, zot pa ti pe pratik vre ladorasyon.—2 Lerwa 17:9-33; Izai 9:9.

Dan letan Zezi, bann Samariten ti aksepte bann liv Moiz me zot pa ti ador Bondye dan tanp Zerizalenm. Pour plizyer lannen, zot ti'n servi en tanp ki ti'n ganny konstrir lo Montanny Gerizim, ki pa tro lwen avek Sikar e zot ti kontinyen fer zot ladorasyon lo sa montanny menm apre ki tanp Zerizalenm ti'n ganny detrir. Sa laenn ki bann Zwif ek Samariten ti annan anver kanmarad ti evidan pandan minister Zezi.—Zan 8:48.

laverite, parski Bondye pe rod bann dimoun koumsa pour ador li.”—Zan 4:21, 23, 24.

Sa ki enportan pour nou Papa dan lesyel, i pa kote nou ador li me ki mannyer nou ador li. Sa i enpresyon sa madanm e i dir Zezi: “Mon konnen ki Mesi pe vini, sa enn ki apel Kris. Ler sa enn pou vini, i pou anons nou tou keksoz klerman.”—Zan 4:25.

Answit, Zezi i revel en laverite enportan: “Li menm ki pe koz avek ou.” (Zan 4:26) Zis mazin, sa madanm in vin sers delo midi e la Zezi i dir li en keksoz ekstraordiner, en keksoz ki aparaman i pa ankor dir lezot, sa se ki i Mesi.

#### EN KANTITE SAMARITEN I KRWAR

Bann disip i retournen sorti dan lavil Sikar avek manze. Zot vwar Zezi kot pwi Zakob kot zot in kit li, me la aprezan i pe koz avek en madanm Samariten. Ler bann disip i arive, sa madanm i kit son resipyen delo e al dan lavil.

Ler sa madanm i ariv lavil Sikar, i rakont bann dimoun bann keksoz ki Zezi in dir li. Avek lasirans i dir zot: “Vin get sa zonm ki'n dir mwan tou sa ki mon'n fer.” Apre, petet pour ankouraz zot pour al get li, i demann zot: “Petet li menm Kris, non?” (Zan 4:29) Sa kes-tyon i vremen enportan, akoz i'n enteres dimoun depi lepok Moiz. (Deterononm 18:18) Sa i ankouraz bann dimoun dan sa lavil pour al vwar Zezi pour zot menm.

Antretan, bann disip i kontinyen dir li manz sa ki zot in anmennen. Me i dir zot: “Mon annan manze pour manze ki zot pa konnen.” Bann disip pa tro konpran ki i pe dir, alor zot demann kanmarad: “Personn pa'n anmenn nanryen pour li manze, non?” Zezi i eksplik zot en keksoz ki annan bokou sinifikasyon pour tou son bann disip: “Mon manze se pour fer lavolonte sa enn ki'n anvoy mwan e pour fini son travay.”—Zan 4:32-34.





Zezi pa pe koz lo travay rekolt ki pou ganny fer dan apepre kat mwan. O kontrè, i pe koz konsènan en rekolt spirityel. I fer sa kler ler i dir: “Get bann plantasyon, pa zot in pare pour rekolt? Deza sa ki fer rekolt pe resevwar son lapey e i pe anmas rekolt pour lavi eternal, pour ki sa enn ki senmen e sa enn ki rekolte i rezoui ansanm.”—Zan 4:35, 36.

I kapab ki Zezi in fini realize ki lefe son konsèyasyon in annan lo sa madanm Samariten. En kantite dimoun sorti Sikar i annan lafwa dan li akòz temwanyaz sa madanm, akòz i pe dir bann dimoun: “I’n dir mwan tou sa ki mon’n fer.” (Zan 4:39) Alor, ler bann dimoun dan lavil Sikar i al kot Zezi kot sa pwi, zot demann li pour reste e koz plis avek zot. Zezi i aksepte zot lenvityasyon e i reste Samari pour de zour.

Plis Samariten i annan lafwa dan Zezi anmezir ki zot ekout li. Zot dir sa madanm: “Nou nepli krwar zis akòz sa ki ou’n dir, parski nou menm nou’n tandè e nou konnen ki sa zonn i vreman sa enn ki pou sov lemonn.” (Zan 4:42) Sirman sa madanm Samariten i kit en bon legzanp lo konman nou kapab rann temwanyaz lo Kris dan en fason ki fer bann ki pe ekout nou anvi konn plis.


Rapel ki dan kat mwan i pou sezon rekolt. I paret ki sa i rekolt lorz, ki dan sa rezyon i ganny fer dan pretan. Alor i tre probab ki i Novanm oubyen Desanm. Sa i vèdir ki apre Lapak lannen 30, Zezi ek son bann disip in pas apepre wit mwan Zide pe ansenny e baptiz dimoun. Aprezan zot al dan nor e reste Galile. Ki pou arive ler zot ariv laba?

- 
- ◇ Ki konklizyon sa madanm ti tire lo Zezi e ki i ti fer apre sa?
  - ◇ Ki Zezi ek son bann disip ti’n fer depi Lapak lannen 30?









SEKSYON

# 3

## MINISTER ZEZI GALILE

‘ZEZI TI KONMANS  
PRESE:  
“RWAYONM LESYEL  
IN APROSE.”’

—MATYE 4:17

# DEZUYENM MIRAK DAN LAVIL KANA

MARK 1:14, 15 LIK 4:14, 15 ZAN 4:43-54

Aprè ki Zezi in pas a pepre de zour Samari, i kit sa landrwa pour al dan son prop rezyon. I'n fer en gran kanpanyi predikasyon Zide, me i pa pe retourn Galile pour repoze. O kontrè, i anvi fer plis dan son minister dan sa rezyon kot i'n grandi. Petet i pa pe ekspekte ki i pou ganny byen resevwar laba, akòz Zezi in dir ki "en profet pa ganny onore dan son prop pei." (Zan 4:44) Olye reste avek Zezi, son bann disip i retourn kot zot fanmir e re-pran travay ki zot ti fer avan.

Ki mesaz Zezi i konmans anonse? Son mesaz i: "Rwayonm Bondye in aproz. Repantir e annan lafwa dan sa bon nouvel." (Mark 1:15) Ki mannyer bann dimoun i reazir anver sa mesaz? En kantite Galileen i akey li e onor li. Zot pa pe fer sa zis akòz son mesaz. Plizyè mwan pase, serten parmi sa bann Galileen ti Zerizalenm pour Lapak e zot ti'n vwar bann mirak remarkab ki Zezi ti fer.—Zan 2:23.

Kote Zezi i konmans son minister, Galile? Aparaman dan lavil Kana, kot Zezi ti'n fer delo vin diven dan en resepsyon maryaz. La i fer dezyenm fwa ki Zezi i laba e i tande ki i annan en garson ki telman malad ki pros pour mor. I garson en zofisye gouvènan ki travay pour Lerwa Erod Antipas. Li menm li sa lerwa ki pou fer koup latet Zan ki batize pli tar. Sa zofisye i tande ki Zezi in retournen sor-

ti Zide e ki aprezan i Kana. Alor sa zofisye i sorti Kapernaoum e i al Kana pour vwar Zezi. Dan son gran latristes, i sipli Zezi: "Senyer, vin avek mwan avan ki mon zanfan i mor." —Zan 4:49.

Sa msye i sirprann ler i tann larepons Zezi. Zezi i dir li: "Ale, ou garson in geri." (Zan 4:50) Sa zofisye Erod i krwar Zezi e i retourn se li. Son bann lesklav i zwenn li dan milye semen pour donn li en bon nouvel. Son garson i byen, i ankor vivan! Pour esey konpran sa ki'n vreman arive, i demann zot: "Ki ler i ti ganny geri"?

Zot reponn: "Sa lafyev ti kit li yer enn er apremidi."—Zan 4:52.

Sa zofisye i realize ki i ti sanmenm sa ler ki Zezi ti'n dir, "Ou garson in geri." I paret ki sa msye i ris akòz i annan bann lesklav. Aprè sa, li ek tou dimoun dan son lakour i vin disip Kris.

Zezi in fer de mirak dan lavil Kana. Premyèman, i'n fer delo vin diven e aprè i'n geri en garson ki ti en zistans a pepre 26 kilomet avek li. Byensir, Zezi pa'n fer zis sa de mirak. Me sa gerizon i enportan akòz i montre ki i'n retourn Galile. I kler ki i en profet ki Bondye in aprouve, me ziska ki degre sa 'profet pou ganny onore dan son prop pei'?

Nou pou vwar sa anmezir ki Zezi i retourn kot li Nazaret. Ki pou arive laba?

- 
- ◇ Ler Zezi ti retourn Galile, ki mesaz i ti konmans anonse e ki mannyer dimoun ti reazir?
  - ◇ Ki mirak Zezi ti fer ler i ti retourn dan lavil Kana e ki ti arive aprè sa?
  - ◇ Kwa ki remarkab avek lafason ki Zezi ti geri en garson Kapernaoum?





# KOT SINAGOG NAZARET

LIK 4:16-31

Bann dimoun Nazaret i vremen eksite. Zezi ti en sarpantye Nazaret. En pti pe plis ki enn an pase, i ti kit sa lavil e i ti ganny batize par Zan. Me aprezan tou dimoun i konn li konman en zonn ki fer bann mirak. Bann dimoun ki reste dan sa lavil i vremen anvli vwar li fer bann mirak.

Zot pli eksite ankor ler parey son labitid, Zezi i al kot sinagog dan sa lavil. “Sak saba . . . dan sinagog,” i annan en dimoun ki fer la-priyer e lir bann liv Moiz. (Akt 15:21) Bann liv profetik i osi ganny lir. Ler Zezi i debout pour lir, i tre probab ki i konn en kantite dimoun apre tou sa bann lannen ki i’n al dan sa sinagog. Zot donn li roulo profet Izai. I ouver kot i koz lo sa Enn ki’n ganny swazir par lespri sen Zeova. Ozordi sa verse Labib i dan Izai 61:1, 2.

Zezi i lir sa pasaz ki koz lo ki mannyer sa Enn ki’n ganny swazir ti pou anons liberasyon avek bann lesklav, fer bann aveg vwar kler e pres lo sa letan kot i pou posib ganny laprouvasyon Zeova. Zezi i rann sa serviter sa roulo e apre i asize. Tou dimoun pe get li. Apre i koze, tre probab pour en pe letan e i fini par dir sa parol enportan: “Ozordi, sa parol dan lekritir ki zot fek tande in ganny akonplir.”—Lik 4:21.

Bann dimoun i enpresyonnen par “son bann zoli parol” e zot demann kanmarad: “Pa i en garson Zozef li?” Me Zezi i realize ki zot

anvi vwar li fer bann mirak parey zot in tann koz lo la, alor i dir zot: “San dout zot pou dir sa parol i aplik pour mwan, ‘Dokter, geri ou lekor. Nou’n tande ou’n fer bokou keksoz Kapernaoum, fer parey isi, dan ou prop lavil.’” (Lik 4:22, 23) I paret ki sa bann dimoun i panse ki Zezi ti devret konmans fer son bann gerizon Nazaret pour benefisyen dimoun ki sorti dan son lavil. Alor i kapab ki zot krwar ki Zezi in mal azir akoz i pa’n fer mirak kot zot premye.

Ler Zezi i realize ki zot pe mazine, i mansyonnen serten levennman dan listwar Izrael. I dir ki i ti annan en kantite vev Izrael dan letan Eliya, me Eliya pa ti ganny anvoye kot okenn sa bann madanm. O kontrè, i ti al kot en vev ki pa ti en Izraelit dan lavil Zarefat, ki pre avek Sidon e laba menm ki Eliya ti fer en mirak ki ti sov zot lavi. (1 Lerwa 17:8-16) Deplis, dan letan Eliya, i ti annan en kantite lepre an Izrael, me sa profet ti geri zis Naamann ki ti en Siryen.—2 Lerwa 5:1, 8-14.

Ki mannyer sa bann dimoun Nazaret i reazir ler zot tann sa konparezon ki montre ki zot egois e ki zot mank lafwa? Sa bann dimoun dan sinagog i ankoler, zot leve e pous Zezi an deor lavil. Lavil Nazaret in ganny konstrir lo en montanny, zot anmenn li ziska kot en ranpar e esey zet li anba. Me Zezi i nobou sove san ki zot fer li nanryen. Apre sa, Zezi i desann Kapernaoum ki lo lakot nor was Lanmer Galile.

- 
- ◇ Akoz tou dimoun ti eksite dan lavil Nazaret kot Zezi ti grandi?
  - ◇ Ki mannyer dimoun ti reazir ler zot ti tann parol Zezi me kwa ki ti fer zot ankoler?
  - ◇ Ki bann dimoun Nazaret ti esey fer avek Zezi?





# KAT DISIP I KONMANS LAPES DIMOUN

MATYE 4:13-22 MARK 1:16-20 LIK 5:1-11





Apré ki bann dimoun Nazaret in esey touy li, Zezi i al Kapernaoum, en lavil ki pre avek Lanmer Galile, ki osi ganny apele “lak Zenezaret.” (Lik 5:1) Sa i akonpli sa profesè dan liv Izai ki dir ki bann dimoun Galile ki pe reste o bor lanmer ti pou vwar en gran lalimyè.—Izai 9:1, 2.

Alor la Galile, Zezi i kontinyen anonse ki “Rwayonm lesyel in aprose.” (Matye 4:17) Zezi i zwenn kat son bann disip. Zot ti pe swiv li pli boner, me ler zot ti retournen sorti Zide, zot in rekonmans zot biznes lapès. (Zan 1:35-42) Me la i’n ariv ler pour zot toultan swiv Zezi pour ki i kapab form zot pour kontinyen prese apse apse ki i’n ale.

Anmezir ki Zezi i marse o bor lanmer, i vwar Simon Pyer, son frer Andre ek lezot ankor pe lav zot lasenn. Zezi i al kot zot, i anbank dan kannot Pyer e demann li pour pous sa kannot en ptigin a lekar avek later. Ler zot in ariv en pti zistans, Zezi i asize e i konmans ansenny sa lafoul dimoun ki ti’n rasanble lo lans konsernan Rwayonm Bondye.

Apré sa, Zezi i dir Pyer: “Avans kannot dan kre e pas ou lasenn pour atrap pwason.” Pyer i reponn: “Ansenyan, nou’n rente lannwit antye e nou pa’n ganny nanryen, me akoz ou’n demann mwan, mon pou fer li.”—Lik 5:4, 5.

Zot pas lasenn e zot telman atrap en kantite pwason ki zot lasenn i konmans desire! Deswit zot fer swiv avek bann ki lapès avek zot dan lot

kannot pa tro lwen pour vin ed zot. Tou le de kannot i telman ranpli avek pwason ki zot konmans koule. Ler Pyer i vwar sa, i tonm azenou devan Zezi e dir: “Senyer, sorti o bor mwan parski mon en dimoun ki fer pese.” Me Zezi i dir li: “Pa bezwen per. Konmansman ozordi ou pou lapès dimoun.”—Lik 5:8, 10.



Zezi i dir Pyer ek Andre: “Swiv mwan e mon pou fer zot lapès dimoun.” (Matye 4:19) I osi envit de lezot peser, setadir Zak ek Zan, bann garson Zebede pour swiv li. Deswit zot osi zot aksepte. Alor sa kat peser i kit zot biznes lapès deryer e zot vin bann premye disip Zezi ki swiv li a plen tan.

- ◇ Ki kalite dimoun Zezi ti envite pour vin son bann disip a plen tan e lekel zot?
- ◇ Ki mirak ki ti fer Pyer per?
- ◇ Ki kalite lapès sa kat disip ti pou fer aprezan?

# ZEZI I FER BANN MIRAK DAN LAVIL KAPERNAOUM

MATYE 8:14-17 MARK 1:21-34 LIK 4:31-41

Zezi in envit Pyer, Andre, Zak ek Zan, son kat disip pour lapes dimoun. Zour Saba, zot tou zot al dan sinagog Kapernaoum. Zezi i ansenny dan sinagog e ankor enn fwa tou dimoun i vremen etonnen par son fason ansennyen. I pa ansenny zot parey bann profeser lalwa me i ansenny zot sa ki sorti kot Bondye.

Sa menm zour Saba, en zonm ki posede par demon i la dan sinagog. I kriye: “Ki ou’n vin fer isi ou, Zezi sa Nazareen? Ou’n vin isi pour detri nou? Mon konn tre byen lekel ou, ou sa Enn ki Sen sorti kot Bondye.” Zezi i koz severman avek sa demon ki pe kontrol sa zonm. I dir li: “Reste trankil e sorti dan sa zonm!” —Mark 1:24, 25.

**POSEDE PAR DEMON** Ler en dimoun ti posede par enn oubyen plizyer demon, zot ti kapab fer sa dimoun soufer en kantite par fer li malad oubyen perdi lespri. (Matye 17:14-18) Me ler sa demon ti ganny sase, sa dimoun ti retourn normal. Plizyer fwa, Zezi ti montre ki gras a lespri sen i ti annan pouvwar pour sas bann demon.—Lik 8:39; 11:20.

Ler sa demon i tann sa, i kriy avek tou son lafors e fer sa zonm tonm kriz. Me sa demon i sorti dan sa zonm “san fer li okenn dimal.” (Lik 4:35) Tou dimoun otour li i etonnen! Zot demande: “Kisisa sa? . . . I menm annan lotorite pour donn lord bann demon e zot obei li.” (Mark 1:27) Alor, i pa drol ki nouvel konsernan sa ki’n arive i fann partou dan Galile.

Zezi ek son bann disip i kit sinagog e al kot Simon, ki osi ganny apele Pyer. Laba belmer Pyer i vremen malad avek en gro lafyev. Zot sipliy Zezi pour ed li. Alor Zezi i al kot li, pran son lanmen e fer li leve. I ganny geri deswit e i konmans servi Zezi ek bann disip ki avek li. Petet i menm prepar en repa pour zot.

Ler soley i kouse, dimoun sorti partou kote i vin kot lakour Pyer avek bann dimoun ki malad. Dan en pti moman, i paret ki tou dimoun dan lavil in rasanble devan son laport. Akoz? Zot anvii ganny geri. Anfet, ‘tou sa bann ki i annan dimoun malad avek tou sort maladi i anmenn zot kot li. I poz lanmen lo sakenn ant zot e geri zot.’ (Lik 4:40) Parey i ti’n ganny predir, Zezi i kapab geri nenport ki kalite maladi. (Izai 53:4) I menm sas bann demon. Ler i fer sa, sa bann demon i kriye: “Ou Garson Bondye.” (Lik 4:41) Me Zezi i koz avek zot severman e i pa les zot koz ankor. Zot konnen ki Zezi i Kris e i pa anvii ki zot donn lenpresyon ki zot pe servi Zeova.

- 
- ◇ Ki ti arive kot sinagog Kapernaoum zour Saba?
  - ◇ Ler Zezi ti kit sinagog, kote i ti ale e ki i ti fer laba?
  - ◇ Ki mannyer bann dimoun dan sa lavil ti reazir apre sa ki Zezi ti fer laba?





# ZEZI I FER PLIS DAN PREDIKASYON GALILE

MATYE 4:23-25 MARK 1:35-39 LIK 4:42, 43

Zezi ek son kat disip in byen okipe pandan la-zournen Kapernaoum. Aswar, bann dimoun Kapernaoum i anmenn bann ki malad kot li pour li geri zot. Zezi pa'n ganny bokou letan li tousel.

Aprezan, son lannmen granmaten, ler i ankor fernwanr, Zezi i leve e i al deor li tousel. I rod en landrwa izole kot i kapab priy son Papa an prive. Me Zezi pa reste bokou letan tousel. Ler 'Simon ek lezot ki avek li' i realize ki Zezi pa la, zot al rod li. I kapab ki se Pyer ki pran linisyativ pour rod Zezi akoz Zezi ti kot li.—Mark 1:36; Lik 4:38.

Ler zot trouv Zezi, Pyer i dir: "Tou dimoun pe rod ou." (Mark 1:37) I fer sans ki bann dimoun Kapernaoum i oule ki Zezi i reste. Zot vreman apresye sa ki i'n fer, alor zot esey "anpes li ale." (Lik 4:42) Par kont, eski Zezi ti vin lo later prensipalman pour fer bann mirak pour geri dimoun? Deplis, eski i pou fer tou son bann aktivite zis dan sa landrwa? Ki Zezi i dir konsernan tousala?

Zezi i reponn son bann disip: "Annou al en lot landrwa, dan bann lavil pros, pour ki mon kapab pres laba osi parski se pour sa rezon ki mon'n vini." Anfet, Zezi i menm dir avek bann ki pe esey anpes li ale: "Mon bezwen

anons bon nouvel Rwayonm Bondye dan lezot lavil osi parski se pour sa ki mon'n ganny anvoye."—Mark 1:38; Lik 4:43.

Anfet, rezon pli enportan ki Zezi in vin lo later, se pour pres konsernan Rwayonm Bondye. Sa Rwayonm pou sanktifye non son Papa e rezourd tou problem imen pour touzour. Zezi i montre ki Bondye ki'n anvoy li par fer bann mirak pour geri dimoun. Dan menm fason, plizyer santenn lannen avan sa, Moiz ti'n fer bann mirak pour montre ki i ti'n ganny anvoye par Bondye.—Egzod 4:1-9, 30, 31.

Alor Zezi i kit Kapernaoum pour pres dan lezot lavil e son kat disip i al avek li. I avek Pyer ek son frer Andre e osi Zan ek son frer Zak. Son semenn avan, zot ti'n ganny envite pour partisip dan predikasyon avek Zezi.

Kanpanny predikasyon Zezi avek sa kat disip in byen reisi! Anfet, nouvel konsernan Zezi i "fann partou atraver Siri," dan sa dis lavil ki apel Dekapol e ziska lot kote Larivyer Zourden. (Matye 4:24, 25) Bann gran lafoul sorti dan sa bann landrwa e osi sorti Zide i swiv Zezi ek son bann disip. En kantite dimoun i anmenn bann ki bezwen ganny geri kot li. Zezi pa dezapwent zot, i geri bann ki malad e i sas bann demon.

- 
- ◇ Ki arive son lannmen granmaten apre tou sa ki Zezi ti'n fer Kapernaoum?
  - ◇ Akoz Zezi ti ganny anvoye lo later e ki son bann mirak ti montre?
  - ◇ Lekel ki ti partisip avek Zezi dan sa kanpanny predikasyon Galile e ki mannyer dimoun ti reazir?





# ZEZI I DEMONTRE KONPASYON POUR EN LEPRE E GERI LI

MATYE 8:1-4 MARK 1:40-45 LIK 5:12-16





Anmezir ki Zezi ek son kat disip i al prese “dan bann sinagog partou dan Galile,” nouvel konsernan bann keksoz ekstraordiner ki Zezi pe fer i fannen. (Mark 1:39) Nouvel konsernan sa ki Zezi pe fer i ariv ziska kot lavil en msye ki malad avek lalep. Dokter Lik i dir ki “son lekor ti kouver avek lalep.” (Lik 5:12) Ler sa maladi in ariv dan son staz avanse, ptitap-ti i diform bann diferan parti lekor en dimoun.

Alor sityasyon sa lepre i grav e i bezwen reste lwen avek lezot. An plis ki sa, ler dimoun i pros avek li, i bezwen kriye: “Enpir! Enpir!” pour anpes zot vin tro pros e riske ganny enfekte. (Levitik 13:45, 46) Be ki sa lepre i fer apre sa? I tonm azenou devan Zezi e sipliye: “Senyer, ou kapab fer mwan vin pir si ou oule.”—Matye 8:2.

Pa sa zonn i annan en gran lafwa dan Zezi! Zis mazine ki mannyer i fer lapenn aköz sa maladi! Ki Zezi pou fer? Ki ou ou ti pou’n fer si ou ti la? Zezi i annan konpasyon anver sa msye, alor i tous li e dir li: “Mon oule ki ou vin pir, vin pir!” (Matye 8:3) I vre ki i kapab difisil pour serten krwar, me deswit sa lalep i kit li.

Pa ou ti a kontan ganny en lerwa ki annan konpasyon ek pwisans parey Zezi? Lafason ki Zezi ti tret sa lepre i fer nou annan konfyans ki ler Zezi pou’n vin Lerwa lo later antye, sa

profesi Labib pou ganny akonplir: “I ava pran pitye pour bann ki feb ek bann malere; i ava sov lavi bann pov.” (Psonm 72:13) Sa letan, Zezi pou vreman kontan pour ed *tou* bann ki pe soufer.

Rapel ki menm avan ki Zezi i geri sa zonn ki ti annan lalep, bann dimoun ti deza byen eksite aköz tou sa ki i ti’n fer dan son minister. Zis mazine sa ki pou arive ler dimoun pou tann sa keksoz ekstraordiner ki Zezi in fer. Me Zezi pa oule ki bann dimoun i met lafwa dan li senpleman aköz sa ki zot in tandé. I konn konsernan sa profesi ki dir ki “personn pa pou antann son lavwa dan semen,” andotmo i pa pou fer keksoz pour enpresyon lezot. (Izai 42:1, 2) Sanmenm sa Zezi i donn lord sa zonn ki fek ganny geri: “Fer sir ou pa dir personn, me al kot pret pour li egzamin ou e ofer sa lofrann ki ganny demande dan Lafwa Moiz.”—Matye 8:4.

Par kont, parey ou kapab mazine, sa zonn i telman kontan ki i’n ganny geri ki i pa kapab gard sa pour li tousel. I ale e dir tou dimoun. Sa i fer bann dimoun pli anvi konn Zezi ankor. Finalman, Zezi i nepli kapab al dan okenn lavil telman dimoun pe vin vwar li. Alor pour en pe letan, i reste dan bann landrwa kot napa personn. Kantmenm sa, dimoun sorti partou kote i vin vwar li pour li ansenny zot e geri zot.

- 
- ◇ Ki mannyer lalep i afekte en dimoun e ki en dimoun ki ganny sa maladi ti bezwen fer?
  - ◇ Ki en lepre ti demann Zezi e ki nou aprann avek lafason ki Zezi ti reazir?
  - ◇ Ki sa zonn ki ti ganny geri ti fer apre ki Zezi ti’n geri li e ki lefe sa ti annan lo lezot?

# “OU PESE IN GANNY PARDONNEN”

MATYE 9:1-8 MARK 2:1-12 LIK 5:17-26



Aprezan dimoun partou kote in tann koz lo Zezi. I annan dimoun ki menm sorti lwen pour vin ekout li ansennyen e pour vwar son bann mirak. Par kont, apre detrw a zour, i retourn Kapernaoum, sa landrwa prensipal kot i ti reste diran son minister. Partou dan sa lavil ki o bor Lanmer Galile, nouvel i fannen ki Zezi in retournen. Sa i fer ki bokou dimoun i vin kot sa lakaz kot i ete. Serten parmi zot i bann Farizyen ek ansenyan Lalwa ki sorti partou Galile ek Zide, enkli Zerizalenm.

'I annan sitan en kantite dimoun ki'n rasanble la ki i nepli annan plas ankor, pa ni menm devan laport, alor i konmans koz lo parol Bondye avek zot.' (Mark 2:2) La devan tou sa bann dimoun en keksoz vremen remarkab pe al arive. Sa pou montre nou ki Zezi i annan pouvwar pour retir pese ek soufrans e i kapab fer tou dimoun reganny en bon lasante.

Anmezir ki Zezi pe ansennyen dan sa lasanm ranpli avek dimoun, kat zonn i anmenn en zonn paralize lo en lanmak. Zot oule ki Zezi i geri zot zanmi. Par kont, vi ki i annan en lafoul dimoun, zot pa kapab "anmenn li kot Zezi." (Mark 2:4) Zis mazin ki kantite sa ti'n kapab dekouraz zot! Zot mont lo twa lakaz ki plat e zot fer en trou. Apre sa, zot fer desann sa lanmak ki sa zonn paralize i lo la.

Eski Zezi i ankoler aköz zot in enteronp li? Byensir non! I vremen enpresyonnen ler i vwar zot lafwa e i dir avek sa zonn paralize: "Ou pese

in ganny pardonnen." (Matye 9:2) Me eski Zezi i vremen kapab pardon bann pese? Bann profeser lalwa ek bann Farizyen i pran sa an mal e zot dir: "Akoz sa zonn pe koz koumsa? I pe koz kont Bondye. Lekl apard Bondye ki kapab pardon pese?"—Mark 2:7.

Zezi i konnen ki zot pe mazin, alor i dir zot: "Akoz zot pe mazin bann keksoz koumsa? Kwa ki pli fasil pour dir sa zonn paralize, 'Ou pese in ganny pardonnen' oubyen pour dir 'Leve, pran ou lanmak e marse?'" (Mark 2:8, 9) Baze lo sa sakrifis ki Zezi pou ofer pli tar, i kapab pardon pese sa zonn.

Apre sa, Zezi i montre sa lafoul, enkli bann ki pe kritik li, ki i annan lotorite pour pardon pese lo later. I vire pour get sa zonn paralize e i donn li sa lord: "Mon dir ou, Leve, pran ou lanmak e al kot ou." Deswit sa zonn i fer sa. Devan tou dimoun i pran son lanmak e ale. Bann dimoun pa oule krwar sa ki zot in vwar! Zot loue Bondye e dir: "Zanmen nou'n deza vwar en keksoz koumsa!"—Mark 2:11, 12.

I enportan pour remarke ki Zezi i montre ki nou malad aköz pese e reganny en bon lasante i relye avek pardon pese. Labib i dir ki nou zanset Adan ti fer pese e ki nou tou nou'n erit pese ek tou son bann konsekans, setadir maladi ek lanmor. Me anba dominasyon Rwayonn Bondye, Zezi pou pardon pese tou bann ki kontan e servi Bondye. Ler sa i arive, i pou nepli annan maladi pour touzour.—Romen 5:12, 18, 19.

- 
- ◇ Kwa ki ti pous Zezi pour geri en zonn paralize dan lavil Kapernaoum?
  - ◇ Ki mannyer sa zonn ti ariv kot Zezi?
  - ◇ Ki nou kapab aprann avek sa mirak konsernan pese ek lanmor? Ki lespwar sa i donn nou?



# MATYE I GANNY ENVITE POUR SWIV ZEZI

MATYE 9:9-13 MARK 2:13-17 LIK 5:27-32

Zezi i reste dan lavil Kapernaoum ki o bor Lanmer Galile pour detrwa zour apre ki i'n geri sa zonn ki ti paralize. Ankor enn fwa, en lafoul dimoun i vin kot li e i konmans ansenny zot. Anmezir ki i pe marse, i vwar Matye ki osi apel Levi pe asize kot lofis taks. Zezi i donn li en zoli lenvitasyon: "Vin mon disip."—Matye 9:9.

I tre probab ki Matye i deza familye avek bann lansennyman Zezi ek bann mirak ki i'n fer dan sa landrwa parey Pyer, Andre, Zak ek Zan. Zis parey zot, Matye i aksepte lenvitasyon Zezi deswit. Matye i dekrir sa dan son Levanzil. I dir: "Deswit i [Matye] ti leve e swiv" Zezi. (Matye 9:9) Alor, Matye i kit son travay konman en kolekter taks e i vin en disip Zezi.

Pli tar, Matye i fer en gran dinen kot li, petet pour demontre son lapresyasyon pour sa lenvitasyon spesyal ki Zezi in donn li. Lekel ankor ki ganny envite apard ki Zezi ek son bann disip? I osi annan en kantite lezot kolekter taks ki Matye ti travay avek avan. Zot anmas taks pour lotorite Romen ki bann Zwif pa kontan. Sa i enkli taks lo bann marsandiz ki antre dan pei e osi taks lo bann bato ki vin lo por oubyen lo bann ki anmenn marsandiz lo semen. Ki mannyer bann Zwif an zeneral i konsider sa bann kolekter taks? Bann dimoun i ay zot parski souvan zot demann plis larzan ki zot sipoze. Dan sa dinen, i osi annan bann dimoun ki "annan en move lavi."—Lik 7:37-39.

Bann Farizyen ki krwar ki zot sitan drwat devan Bondye i la osi. Ler zot vwar Zezi avek sa bann dimoun dan sa dinen, zot demann son bann disip: "Akoz zot ansenyan i manz avek bann kolekter taks ek dimoun ki annan en move lavi?" (Matye 9:11) Ler Zezi i tann zot, i dir: "Dimoun an bonn sante pa bezwen dokter,

me bann ki malad ki bezwen dokter. Alor, al aprann ki sa i vedir: 'Pa sakrifis ki mon oule, me konpasyon.' Parski mon pa'n vin pour dimoun drwat me pour bann ki annan en move lavi." (Matye 9:12, 13; Osea 6:6) Bann Farizyen pa senser ler zot apel Zezi, "ansenyan," me toudmenm Zezi i kapab ansenny zot en keksoz konsernan sa ki byen.

Aparaman, Matye in envit bann kolekter taks ek bann ki annan en move lavi kot li pour zot kapab ekout Zezi e ganny gerizon spirityel, "parski i ti annan en kantite zot ki ti pe swiv li." (Mark 2:15) Zezi i anvi ed zot ganny en bon relasyon avek Bondye. Kontreraman avek bann Farizyen, Zezi pa mepriz sa bann dimoun. I annan en kantite konpasyon ek pitye e dan en sans, i kapab vin en dokter spirityel pour tou bann ki malad spirityelman.

Zezi i demontre konpasyon anver bann kolekter taks ek bann ki annan en move lavi. I pa soutir sa ki mal me i annan pitye pour bann ki annan en move lavi ensi ki pour bann ki malad. Par egzanzp, mazin ler Zezi ti tous sa zonn ki ti annan lalep akoz i ti annan konpasyon pour li e i ti dir li: "Mon oule ki ou vin pir, vin pir!" (Matye 8:3) Pa nou devret devlop menm konpasyon pour lezot e ed bann ki dan bezwen, sirtou bann dimoun ki bezwen ganny ede spirityelman?

- 
- ◇ Ki Matye ti pe fer ler Zezi ti vwar li?
  - ◇ Akoz bann Zwif ti ay bann kolekter taks?
  - ◇ Akoz Zezi ti pas letan avek bann ki annan en move lavi?

• ZEZI I ENVIT MATYE KI EN KOLEKTER TAKS POUR SWIV LI  
• ZEZI I PAS LETAN AVEK BANN KI ANNAN EN MOVE LAVI POUR KAPAB ED ZOT



## AKOZ BANN DISIP ZEZI PA ZENNEN?

MATYE 9:14-17 MARK 2:18-22 LIK 5:33-39

Aprè ki Zezi ti asiste Lapak lannen 30, Zan ki batize ti ganny met dan prizon. I fer en pe letan depi ki i dan prizon. Zan i oule ki son bann disip i vin bann disip Zezi, me pa zot tou ki'n fer sa.

La aprezan, Lapak lannen 31 i pros e ser-ten disip Zan i vin kot Zezi e demann li: "Akoz nou ek bann Farizyen nou abitye zennen me ou bann disip pa zennen?" (Matye 9:14) Bann Farizyen i abitye zennen, pour zot, sa i en pratik relizye. Pli tar, Zezi i menm servi legzanp en Farizyen ki krwar i sitan drwat devan Bondye ki i priye: "Ar Bondye, mon remersye ou ki mon pa parey lezot dimoun . . . de fwa par semenn mon zennen." (Lik 18:11, 12) Bann disip Zan osi ti annan labitud zennen. I osi kapab ki zot ti pe zennen akoz zot ti tris ki Zan ti dan prizon. Bann

**BANN LEGZANP KONSERNAN ZENNEN** Zezi ti servi legzanp koud lenz ki dimoun ti fasilman kapab konpran. Si en dimoun i koud en nouvo latwal ki pa ankor retresi lo en vye lenz oubyen latwal, ki pou arive? Ler sa lenz i ganny lave, sa nouvo latwal pou retresi e i pou desir sa vye latwal ki'n ganny pyeste lo la.

Pareyman, par ler diven ti ganny mete dan bann boutey ki'n ganny fer avek lapo zannimo. Avek letan, sa lapo ti vin red e nepli elastik. I pa ti en bon nide pour met nouvo diven dan sa kalite boutey. I kapab ki sa nouvo diven i kontinyen fermante e fer presyon lo sa vye boutey lapo ki'n red e fer li pete.



disip Zan i anvi konnen akoz bann disip Zezi pa zennen, petet pour montre ki zot osi zot sagren akoz sa ki'n arive avek Zan.

Zezi i servi en legzanp pour reponn zot: "Bann zanmi nouvo marye napa rezon pour zot dan dey osi lontan ki nouvo marye i avek zot, pa i vre? Me sa zour pou arive ler nouvo marye pou ganny pran avek zot, la zot pou zennen." —Matye 9:15.

Zan li menm ti'n refer avek Zezi konman en nouvo marye. (Zan 3:28, 29) Alor, pandan ki Zezi i la, son bann disip pa bezwen zennen. Pli tar ler Zezi i mor, son bann disip pou dan en gran sagrinasyon e zot pa pou anvi manze. Me keksoz pou sanze ler i ganny resisite! Alor, zot pou nepli annan rezon pour zennen akoz zot sagren.

Aprè sa, Zezi i donn sa de legzanp: "Personn pa pyeste en vye lenz avek en latwal nef, parski sa latwal nef pou retresi e sa trou pou vin pli gran. Personn pa met nouvo diven dan bann vye boutey lapo. Si zot fer sa, sa boutey lapo pou pete, diven pou fann ater e boutey pou gate. Me dimoun i met nouvo diven dan bann boutey nef." (Matye 9:16, 17) Ki Zezi pe esey dir?

Zezi pe esey ed bann disip Zan ki batize pour konpran ki personn pa devret ekspekte ki bann disip Zezi i swiv bann vye pratik larelizyon Zwif, tel parey zennen. I pa'n vin pour pyeste en vye form ladorasyon e fer li dire plis letan. Son letan in fini e i pe ganny ranplase. Zezi pe ansenny zot konsernan en ladorasyon ki napa nanryen pour fer avek larelizyon Zwif ki sa letan i ranpli avek bann tradisyon zonn. I pa pe esey met en latwal nef lo en vye lenz oubyen nouvo diven dan en vye boutey lapo ki'n red.





- ◇ Dan letan Zezi, lekel ki ti abitye zennen e pour ki rezon?
- ◇ Akoz bann disip Zezi pa ti zennen ler i ti avek zot, me pli tar akoz zot ti pou bezwen zennen?
- ◇ Ki sa bann legzanp ki Zezi ti donnen konsernan nouvo diven e pyeste en vye latwal i vedir?

# ESKI EN DIMOUN I KAPAB FER BANN BON KEKSOZ ZOUR SABA?

ZAN 5:1-16

Zezi in fer en kantite pandan son minister Galile. Par kont, ler Zezi i dir, “Mon bezwen anons bon nouvel Rwayonm Bondye dan lezot lavil,” i pe mazin lezot landrwa apard ki Galile. Alor, i al “prese dan bann sinagog Zide.” (Lik 4: 43, 44) Sa i fer sans parski i dan letan prentan e bann Zwif i pros pour selebre en lafet Zerizalenm.

Levanzil pa koz bokou lo son bann aktivite Zide par kont i koz bokou lo minister Zezi, Galile. Menm si laplipar dimoun Zide pa entere-se avek mesaz Zezi, sa pa anpes li pres avek devouman e fer bann mirak partou kote.

Pa bokou letan apre, Zezi i al Zerizalenm, lavil prensipal Zide, pour asiste Lapak lan-nen 31. Pre o bor sa landrwa ki apel Baro Mouton, kot i annan en kantite aktivite, i annan en gran basen avek bann kolonn toultour. Sa basen i apel Betzata. I annan en kantite dimoun malad, aveg e bwate ki vin kot sa basen. Pour ki rezon? Parski zot krwar ki bann dimoun i kapab ganny geri si zot antre dan sa basen ler delo i azite.

En zour Saba, Zezi i vwar en zonm ki’n mal-lad pour 38 an kot sa basen. Zezi i demann li: “Eski ou ti a kontan ganny geri?” Sa zonm i reponn: “Msye, mon napa personn pour met mwan dan basen ler delo pe azite, me ler mon

pe esey ale, en lot dimoun i pas avan mwan.” —Zan 5:6, 7.

Zezi i dir en keksoz ki fer sa zonm e tou dimoun ki tande sirprann: “Leve! Pran ou nat e marse.” (Zan 5:8) Sa zonm i fer sanmenm sa. Deswit sa zonm i ganny geri, i anmas son nat e i konmans marse!

Ler bann Zwif i vwar sa zonm, olye kontan ki en bon keksoz in arive, zot konmans ziz li e dir: “I en zour Saba e i kont lalwa pour ou an-menn sa nat.” Sa zonm i reponn zot: “Sa enn ki’n geri mwan ki’n dir mwan, ‘Pran ou nat e marse.’” (Zan 5:10, 11) Sa bann Zwif i kritik sa dimoun ki’n fer sa gerizon zour Saba.

Zot demann li, “Lekel sa zonm ki’n dir ou, ‘Pran ou nat e marse?’” Akoz zot demann li sa? Parski i “annan bokou dimoun e Zezi [in] kit sa landrwa.” Sa zonm ki’n ganny geri pa konnen ki mannyer Zezi i apele. (Zan 5:12, 13) Me pli tar, sa zonm i zwenn Zezi dan tanp e aprezan i konnen lekel ki’n geri li kot sa basen.

Sa zonm ki’n ganny geri i al kot bann Zwif ki ti’n demann li lekel ki’n geri li. I dir zot ki i Zezi. Ler zot tann sa, zot al kot Zezi. Eski zot al kot Zezi pour konnen ki mannyer Zezi i kapab fer sa bann keksoz ekstraordiner? Non. Plito, zot kritik Zezi akoz i’n fer sa bann bon keksoz zour Saba. Zot menm konmans persekit li akoz sa!

- 
- ◇ Akoz Zezi ti al Zide e ki i ti kontinyen fer laba?
  - ◇ Akoz en kantite dimoun ti al kot sa basen ki apel Betzata?
  - ◇ Ki mirak Zezi ti fer kot sa basen e ki mannyer serten Zwif ti reazir?







# RELASYON SPESYAL KI ZEZI I ANNAN AVEK SON PAPA

ZAN 5:17-47

Serten Zwif i akiz Zezi konmkwa i'n kas lalwa Saba akoz i ti geri en zom zour Saba. Zezi i dir zot: "Mon Papa in kontinyen travay ziska prezan e mwan osi mon pe kontinyen travay."—Zan 5:17.

Lalwa Bondye konsernan Saba pa enterdi fer bann keksoz ki Zezi in fer, parey geri sa zom. Son travay predikasyon ek gerizon i montre ki i pe imit bann bon travay ki Bondye i fer. Alor, toulezour Zezi i kontinyen fer sa ki byen. Par kont, sa larepons i fer bann ki pe akiz li pli ankoler e zot anvi touy li. Akoz?

An plis ki krwar ki Zezi in kas lalwa Saba akoz i'n geri en dimoun zour Saba, zot osi ofanse ler Zezi i dir ki i Garson Bondye. Zot vwar li konmsi i pe koz kont Bondye ler i dir ki Bondye i son Papa. Pour zot, ler Zezi i dir ki Zeova i son Papa, se konmsi Zezi pe fer li vin egal avek Bondye. Par kont, Zezi pa per pour donn zot plis detay konsernan son relasyon spesyal avek Bondye. I dir: "Papa i kontan son Garson e i montre li tou bann keksoz ki li menm i fer."—Zan 5:20.

Bondye, nou Papa i sa Enn ki donn lavi e i'n montre sa dan lepase ler i'n donn bann zom son pwisans pour resisit lezot. Zezi i osi dir: "Zis parey Papa i resisit bann mor e donn zot lavi, pareyman, Garson osi i donn lavi sa ki i anvi." (Zan 5:21) Sa i en zoli parol ki annan bokou sinifikasyon pour nou e ki donn nou en zoli lespwar pour lavenir! Menm la konmela, Garson Bondye pe redonn lavi bann ki'n mor dan en sans spirityel. Alor Zezi i dir: "Sa ki tann mon parol e krwar sa Enn ki'n anvoy mwan, pou ganny lavi eternal e i pa pou ganny zize me i pou parey en dimoun mor ki'n reganny lavi."—Zan 5:24.

Ler Zezi i dir sa parol, i paret ki i pa'n deza resisit en dimoun ki'n mor, me i dir bann ki pe akiz li ki dimoun pou vreman ganny resisite. I dir: "Letan pe vini kot tou bann ki dan latonm

pou tann son lavwa e zot pou resisite."—Zan 5:28, 29.

Menm si Zezi i annan en rol ki vreman enportan, i fer li kler ki i anba lotorite son Papa ler i dir: "Mon pa kapab fer nanryen ki mon'n deside lo mwan menm. . . . Mon oule fer lavolonte sa enn ki'n anvoy mwan e non pa mon prop lavolonte." (Zan 5:30) Par kont, Zezi i eksplik sa rol enportan ki i annan dan plan Bondye. Sa i en keksoz ki i pa ancor fer an piblik. Me pa zis sa ki Zezi in dir lo li menm ki donn levidans lo son rol dan plan Bondye. Pour fer zot rapel, i dir: "Zot in anvoy bann zom kot Zan [ki batize] e son temwannayaz lo mwan i vre."—Zan 5:33.

I posib ki apepre de-z-an pase, bann ki pe akiz Zezi ti tann sa ki Zan ti dir bann sef relizye konsernan sa Enn ki ti pou vin apre li, sa enn ki zot apel "sa Profet" ek "Kris." (Zan 1:20-25) Zezi i rapel bann ki pe akiz li ki kantite zot ti respekte Zan avan i ti ganny met dan prizon, i dir: "Pour en pti moman letan zot ti anvi rezouir en kantite dan son lalimyer." (Zan 5:35) Par kont, Zezi pou kontinyen rann en pli gran temwannayaz ki Zan ki batize.

"Travay ki . . . mon pe fer [enkli sa gerizon ki i fek fer] . . . se sanmenm ki rann temwannayaz ki se mon Papa ki'n anvoy mwan. Mon Papa li menm in rann temwannayaz konsernan mwan." (Zan 5:36, 37) Par egzanp, ler Zezi ti batize, Bondye ti klerman montre ki Zezi i son garson.—Matye 3:17.

Vreman, bann ki pe akiz Zezi napa en sou leskiz pour rezet li. Bann Lekritir ki zot swadizan lir e fer resers lo la i koz lo Zezi. "Si zot ti krwar Moiz, zot ti pou krwar mwan, parski i ti ekri konsernan mwan. Me si zot pa krwar sa ki i'n ekri, ki mannyer zot kapab krwar sa ki mon dir?"—Zan 5:46, 47.



- ◇ Akoz Zezi pa ti pe kas lalwa Saba ler i ti fer bann bon keksoz sa zour?
- ◇ Ki manner Zezi ti dekrir son rol enportan dan plan Bondye?
- ◇ Ki levidans i annan ki prouve ki Zezi i Garson Bondye?

## ZOT KAS ZEPI ZOUR SABA

MATYE 12:1-8 MARK 2:23-28 LIK 6:1-5

Aprezan Zezi ek son bann disip i al dan direksyon nor pour al Galile. I dan letan prentan e i annan bann lagrenn dible dan bann plantasyon. Bann disip i kas zepi pour manze akoz zot lafen. Me i en zour Saba e bann Farizyen pe get sa ki zot fer.

Rapel ki pa bokou letan pase, i ti annan ser-ten Zwif Zerizalenm ki ti akiz Zezi ki i'n kas lalwa Saba e zot ti anvi touy li akoz sa. La aprezan, bann Farizyen i akiz Zezi akoz sa ki son bann disip in fer. "Gete! Ou bann disip pe fer sa ki kont lalwa zour Saba."—Matye 12:2.

Bann Farizyen i krwar ki kas zepi, frot frot li dan lanmen pour tir lapay i parey rekolte e bat dible. (Egzod 34:21) Zot in etabli bann lalwa sever konsernan bann travay ki defann fer

zour Saba e sa i en gro fardo pour bann dimoun. Pourtan, Saba ti sipoze en zour zwaye e ankou-razan spirityelman. Zezi i donn zot bann legzanp pour montre ki Zeova pa ti zanmen anvi ki Son lalwa lo Saba i ganny aplike dan sa fason sitan strik.

En legzanp ki Zezi i donnen i konsernan David ek son bann zonm. Ler zot ti lafen, zot ti aret kot tabernak e manz dipen prezantasyon. Normalman, se bann pret ki ti manz sa bann dipen ki ti'n fini ganny tire devan Zeova dan tabernak e ranplase par dipen fre. Par kont, dan sa sityasyon, David ek son bann zonm pa ti koupab pour manz sa dipen.—Levitik 24:5-9; 1 Samyel 21:1-6.

Zezi i donn en dezyenm legzanp. "Pa zot in osi lir dan Lalwa ki zour Saba bann pret i travay dan





tanp san ki zot koupab pour kas lalwa Saba?" Zezi pe dir ki menm zour Saba, bann pret i touy bann zannimo pour fer sakrifis e zot osi fer lezot louvraz dan tanp. Zezi i osi dir, "Me mwan mon dir zot ki sa enn ki la i pli enportan ki tanp."—Matye 12:5, 6; Nonm 28:9.

Ankor enn fwa, Zezi i servi Lekritir pour eksplik zot: "Si zot ti'n konpran ki sa i vedir, 'Pa sakrifis ki mon oule me konpasyon,' zot pa ti pou'n kondann bann ki pa koupab." Finalman, i dir zot:

"Parski Garson zonn ki annan lotorite lo Saba." La Zezi pe koz lo sa letan kot i pou annan lape ler i pou diriz Rwayonn pour mil an.—Matye 12: 7, 8; Osea 6:6.

I fer plizyer lannen depi ki bann imen pe soufer akoz vyolans ek lager partou kote e akoz zot lesklav Satan. Pa i pou fer en gran diferans ler nou pou dan sa gran zour Saba ler Zezi pou dirize! Nou pou vremen ganny sa repo ki nou anv i bezwen!

- 
- ◇ Pour ki rezon bann Farizyen ti akiz bann disip Zezi e akoz?
  - ◇ Ki manyer Zezi ti koriz fason panse bann Farizyen?
  - ◇ Dan ki sans Zezi i "annan lotorite lo Saba"?



## KI DIMOUN I GANNY DRWA FER ZOUR SABA?

MATYE 12:9-14 MARK 3:1-6 LIK 6:6-11

En lot zour Saba, Zezi i vizit en sinagog, tre probab Galile. Laba i vwar en zonn ki son lanmen i paralize. (Lik 6:6) Bann profeser lalwa ek bann Farizyen pe vey Zezi byen. Akoz? Nou konpran zot vre lentansyon ler zot demann sa kestyon: “Eski i kont lalwa pour geri en dimoun zour Saba?”—Matye 12:10.

Bann sef relizye Zwif i krwar ki en dimoun i kapab ganny geri zour Saba *selman* si son lavi i an danze. Par egzantp, dapre zot, i kont lalwa pour remet lezo en dimoun dan son plas oubyen met en bann lo lipye en dimoun ki’n foul son lipye zour Saba akoz sa bann keksoz pa pou touy sa dimoun. I kler alor ki bann profeser lalwa ek bann Farizyen pa pe kestyonn Zezi akoz zot vremen enterese avek byennet sa zonn, me zot pe sey rod en rezon pour kondann Zezi.

Par kont, Zezi i konn zot bann move rezonnman. I realize ki zot in adopte en pwennvi tro strik konsernan ki kalite aksyon ki kas lalwa Saba. (Egzod 20:8-10) Zot in kritik Zezi pour bann bon keksoz ki i’n fer zour Saba. Aprezan Zezi pe al montre zot ki zot rezonnman pa bon e ki i pa dapre Lekritir. I dir sa zonn ki son lanmen i paralize: “Leve e vin la dan milye.”—Mark 3:3.

Apre Zezi i get bann profeser lalwa ek Farizyen e dir: “Si enn antre zot i annan zis en mouton e i tonm dan en trou zour Saba, pa zot ti pou tir li?” (Matye 12:11) En mouton i en bon pti sonm larzan, alor zot pa pou kit li dan en trou ziska lanmen akoz antretan i kapab mor e zot pou perdi larzan. An plis, Lekritir i dir ki en dimoun drwat i pran swen avek son zannimo.—Proverb 12:10.

Zezi i fer en konparezon ki fer sans ler i dir: “Pa en zonn i annan bokou plis valer ki en mouton! Alor, i pa kont lalwa pour fer en bon keksoz zour Saba.” (Matye 12:12) Pour sa rezon, Zezi pa pe kas lalwa Saba si i geri sa zonn. Bann sef relizye pa kapab dir nanryen pour kontredir sa rezonnman ki sitan lozik e ki demontre konpasyon pour lezot. Alor zot zis reste trankil.

Zezi i get zot tou, byen mekontan e tris akoz zot move rezonnman. Apre i dir sa zonn: “Redi ou lanmen.” (Matye 12:13) Ler sa zonn i fer sa, son lanmen i revin byen. Sa zonn i vremen kontan, me ki mannyer bann ki ti pe sey met Zezi dan pyez i santi?

Olye kontan ki sa zonn in ganny geri, deswit bann Farizyen i ale e zwenn ansanm “avek bann siporter parti Erod pour fer konplo pour touy” Zezi. (Mark 3:6) Bann Sadiseen i en group relizye, me aparaman serten Sadiseen i dan sa parti politik. Normalman, bann Sadiseen ek bann Farizyen pa tro byen avek kanmarad me aprezan zot tonm dakor akoz zot tou zot lennmi Zezi.





- ◇ Akoz Zezi ti koriz bann sef relizye?
- ◇ Ki move rezonnman bann sef relizye Zwif ti annan konsernan lalwa Saba?
- ◇ Ki manner Zezi ti koriz bann move rezonnman konsernan Saba?



# ZEZI I AKONPLI PROFESI IZAI

MATYE 12:15-21 MARK 3:7-12

Ler Zezi i tande ki bann Farizyen ek bann siporter parti Erod i anv i touy li, li ek son bann disip i kit sa landrwa e al ver Lanmer Galile. En kantite dimoun i vin kot li sorti partou kote. I annan ki sorti Galile, lavil Tir ek Sidon lo lakot, les Larivyer Zourden, Zerizalenm ek Idime dan sid. Zezi i geri en kantite dimoun. I telman annan en kantite dimoun ki bann malad i bezwen pouse pour ariv kot Zezi. Zot pa esper Zezi tous zot, me zot anvoy lanmen pour tous li zot menm. —Mark 3:9, 10.

I telman annan en kantite dimoun ki Zezi i demann son bann disip pour met pare en kannot an ka lafoul i pous li e i bezwen dekile avek lans. Sa pou osi fer ki i kapab ansenny zot ler i dan kannot oubyen zot kapab al en lot bor lo lakot pour ed plis dimoun.

Matye, son disip i ekri ki bann aktivite Zezi i akonpli “sa ki ti’n ganny dir atraver profet Izai.” (Matye 12:17) Ki profes i Zezi pe akonpli?

“Gete! Mon serviter ki mon’n swazir, sa enn ki mon kontan e ki mon’n aprouve! Mon pou donn li mon lespri sen e i pou fer tou nasyon konnen kisisa vre lazistis. I pa pou dispit ni kriye e personn pa pou tann son lavwa dan gran semen. I pa pou kraz en zon ki’n kase e i pa pou tenny en lanmes ki pros pour tennyen ziska ki i fer lazistis ranport laviktwar. Vreman, bann nasyon pou met zot lespwar dan son non.”—Matye 12:18-21; Izai 42:1-4.

Byensir, Zezi i sa serviter ki Bondye i kontan e aprouve. Zezi i montre klerman kisisa vre lazistis, en keksoz ki difisil pour dimoun konpran akoz bann fo tradisyon relizye. Lefet ki bann Farizyen i aplik Lalwa Bondye dan zot prop fason, zot pa pou ni menm ed en dimoun ki malad zour Saba! Pour montre kisisa lazistis Bon-



dye e osi ki i’n ganny lespri sen, Zezi i ed bann dimoun rezet bann tradisyon enzis ki en fardo pour zot. I pour sa rezon ki bann sef relizye i oule touy li. Pa sa i terib!

Ki savedir “i pa pou dispit ni kriye e personn pa pou tann son lavwa dan gran semen”? Ler Zezi i geri bann dimoun, i pa permet zot oubyen bann demon pour “fer dimoun konnen lekel li.” (Mark 3:12) I pa anv i ki bann dimoun i aprann konn li atraver bann lanons ki ganny fer an piblik oubyen bann rimer ki dimoun i rakonte.



Deplis, Zezi i anons sa mesaz rekonfortan avek bann ki parey en zon (sa i en plant) ki'n kase dan en sans senbolik. Zot parey en lanmes lalanp ki pros pour tennyen. Zezi pa kraz sa zon ki'n kase oubyen tenny sa lanmes la-

lanp ki ancor annan en pti lafimen. O kontrer, i tret bann ki annan limilite avek tandres ek lanmour pour ankouraz zot. Definitivman, Zezi i sa enn dan ki bann nasyon i kapab met zot lespwar!


- 
- ◇ Ki mannyer Zezi ti montre kisisa lazistis san dispit e kriye dan gran semen?
  - ◇ Lekel ki ti parey bann zon ki'n kase ek lanmes lalanp ki pros pour tennyen e ki mannyer Zezi ti tret zot?

## ZEZI I SWAZIR DOUZ ZAPOT

MARK 3:13-19 LIK 6:12-16

I fer apepre enn an edmi depi ki Zan ki bati-ze in entrodwi Zezi konman Pti Mouton Bondye. Ler Zezi in konmans son minister, plizyer zomn senser in vin son disip, parey Andre, Simon Pyer, Zan, petet Zak (frer Zan), Filip ek Bartelemi (ki osi ganny apele Natanael). Avek letan, plizyer lezot in swiv Kris.—Zan 1:45-47.

Aprezan Zezi i pare pour swazir son bann zapot. Son bann zapot pou toultan travay an-sanm avek Zezi e zot pou ganny en forma-syon spesyal. Me avan ki Zezi i swazir zot, i al



lo en montanny, petet pa tro lwen avek Kapernaoum o bor Lanmer Galile. I priy Bondye tou lannwit, san dout pour demann li lasazes ek son benediksyon. Son lannmen, i kriy son bann disip e i swazir 12 parmi zot pour vin son bann zapot.

Zezi i swazir sa sis zomn ki nou'n mansyonnen o konmansman. I osi swazir Matye ki travay dan lofis taks. Sa senk lezot ki ganny swa-

zir i Zida (ki osi ganny apele Tade oubyen “garson Zak”), Simon sa enn ki devoue, Toma, Zak garson Alfe ek Zida Iskaryot.—Matye 10:2-4; Lik 6:16.

Sa 12 zapot in swiv Zezi ziska aprezan, alor i konn zot byen. Serten parmi zot i son fanmir. I paret ki sa de frer, Zak ek Zan, i son kouzen. Serten i osi krwar ki Alfe ti frer Zozef, papa adoptif Zezi. Si i vre, Zak garson Alfe i kouzen Zezi.

Byensir i fasil pour Zezi rapel non son bann zapot. Me eski ou ou kapab? En keksoz ki kapab ed ou, se si ou gard antet ki i annan de parmi zot ki apel Simon, de ki apel Zak e de ki apel Zida. Simon (Pyer) i annan en frer ki apel Andre e Zak (garson Zebede) i annan en frer ki apel Zan. Sa pou ed ou rapel wit dan sa douz zapot. Parmi sa lot kat i annan en kolekter taks (Matye), enn ki pou annan bann dout pli tar (Toma), enn ki ti ganny apele ler i ti anba en pye fig (Natanael) ek zanmi Natanael (Filip).

Onz parmi sa bann zapot i sorti Galile, kot Zezi in grandi. Natanael i sorti Kana. Filip, Pyer ek Andre i sorti Betsayda. Pli tar, Pyer ek Andre i al reste Kapernaoum, kot aparaman Matye i reste. Zak ek Zan osi i reste Kapernaoum oubyen pa tro lwen e zot ti annan en biznes lapes lanmenm. I paret ki Zida Iskaryot ki trai Zezi pli tar i sa sel zapot ki sorti Zide.

- 
- ◇ Ki gro desizyon Zezi ti fer apre ki i ti priye en lannwit antye?
  - ◇ Lekel bann zapot Zezi e kwa ki kapab ed ou rapel zot non?







# SERMON LO MONTANNY

MATYE 5:1-7:29 LIK 6:17-49



Zezi i bezwen fatigue apre ki i'n pas en lannwit antye pe priy Bondye e apre swazir 12 disip pour vin son zapot. Aprezan i lizour me Zezi i ankor annan lafors ek dezir pour ed dimoun. I fer sa lo en montanny Galile, petet pa tro lwen avek Kapernaoum kot i abitye prese.

Lafoul in vin kot Zezi sorti byen lwen. Serten i sorti dan sid, Zerizalenm ek Zide. Lezot dimoun i sorti dan bann lavil Tir ek Sidon lo lakot dan rezyon nor was. Akoz zot pe rod Zezi? Pour zot “ekout li e ganny geri.” Sanmenm sa ki pe arive. Zezi pe “geri zot tou.” Zis mazin sa! *Tou* dimoun malad pe ganny geri. Zezi i osi ed bann ki “posede avek demon,” dimoun ki pe soufer akoz bann move lanz Satan.—Lik 6: 17-19.

Apre, Zezi i rod en landrwa ase plat lo montanny e lafoul i vin kot li. Petet son bann disip, sirtou son 12 zapot i vin o bor li. Tou dimoun i enpasyan pour ekout sa ansenyan ki kapab fer tou sa bann mirak. Zezi i fer en diskour ki benefisye son lodyans. Nou osi nou kapab benefisye avek sa sermon parski i profon, senp e kler. Zezi i servi bann legzanp ek keksoz ki dimoun i konn byen. Sa i fer ki tou dimoun ki anvi viv en pli bon lavi ki annakor avek bann standar Bondye i kapab byen konpran son bann nide. Ki pwen enportan dan sa sermon ki fer li annan sitan bokou valer?

#### LEKEL KI VREMAN ERE?

Tou dimoun ti a kontan ere. Vi ki Zezi i konn sa, i deside konmans par dekrir bann ki vreman

ere. Sa in bezwen fer son lodyans vreman anvi ekoute. Me i bezwen annan serten keksoz ki zot pa tro konpran.

Zezi i dir: “Ere bann ki rekonnet ki zot bezwen gidans Bondye, parski Rwayonm lesyel i pour zot. Ere bann ki dan en gran latristes, parski zot pou ganny rekonforte. . . . Ere bann ki lafen e swaf ladrwatir, parski zot pou rasazye. . . . Ere bann ki'n ganny persekute akoz zot fer sa ki drwat, parski Rwayonm lesyel i pour zot. Ere kan dimoun i ensilte zot, persekit zot . . . akoz mwan. Zot devret kontan e dan lazwa.”—Matye 5:3-12.

Ki Zezi pe sey dir par “ere”? I pa pe koz lo sa lazwa ki nou gannyan ler nou pe anmize. Vre boner oubyen lazwa i plis ki sa. I enplik lakontantman, satisfaksyon ki nou'n akonpli en keksoz ki vo lapenn dan nou lavi.

Zezi i dir ki dimoun ki rekonnet ki zot bezwen gidans Bondye, ki tris akoz zot enparfe e ki aprann konn Bondye e servi li, se zot menm ki vreman ere. Menm si dimoun i ay oubyen persekit zot akoz zot fer lavolonte Bondye, zot ere akoz zot konnen ki zot pe fer plezir Zeova ki pou rekonpans zot avek lavi eternal.


En kantite dimoun i krwar ki zot pou ere si zot ris oubyen satisfere tou zot dezir, me Zezi i dir lekotr. Zezi i donn en konparezon ki bezwen fer bann ki pe ekout li reflesir. I dir: “Maler zot ki ris, parski zot in fini ganny tou zot konsolasyon. Maler zot ki pe rasazye la konmela, parski zot pou lafen. Maler zot ki pe riye la konmela, parski zot pou dan dey e zot pou

- 
- ◇ Kote Zezi ti fer son Sermon e lekel ki ti la pour ekoute?
  - ◇ Kwa ki ti fer sa sermon Zezi sitan enportan?
  - ◇ Lekel ki vreman ere e akoz?



plere. Maler, ler tou dimoun i koz an byen lo zot, parski sanmenm ki zot zanset ti fer avek bann fo profet.”—Lik 6:24-26.

Akoz bann ki ris, bann ki riye oubyen ki kontan ganny felisite pou malere? Parski ler en dimoun i ganny e kontan sa bann keksoz, i kapab negligiz son ladorasyon pour Bondye e finalman i malere. Zezi pa pe dir ki ou bezwen mizer oubyen lafen pour ou ere. Par kont, laplipar ditan se bann dimoun ki dan bezwen ki aksepte bann lansennyman Zezi e ki vreman ere.



Zezi i dir konsernan son bann disip: “Zot, zot disel later.” (Matye 5:13) Byensir, zot pa vreman disel. Disel i prezerv keksoz. En kantite disel i ganny mete o bor lotel kot tanp Bondye e i ganny servi pour sal bann lofrann. Disel i osi senbolik akoz i ganny servi pour anpes keksoz gate oubyen pouri. (Levitik 2:13; Ezekyel 43:23, 24) Bann disip Zezi i “disel later” dan sa sans ki zot kapab ed lezot pour pa ganny kontaminen spirityelman oubyen moralman. Zot mesaz i kapab prezerv lavi tou bann ki ekoute.

Zezi i osi dir son bann disip: “Zot, zot lalimyer lemonn. En lavil ki anler lo en montanny pa kapab ganny kasyet. Dimoun i alim en lalanp, pa pour met li anba en pannyen, me i met li anler lo en keksoz pour kler tou bann ki dan lakaz. Pareyman, zot lalimyer i devret

briye devan dimoun, pour ki zot kapab vwar zot bon aksyon e glorifye zot Papa dan lesyel.”—Matye 5:14-16.

#### EN STANDAR O NIVO POUR SON BANN DISIP

Bann sef relizye Zwif i vwar Zezi konman en dimoun ki kas Lalwa Bondye e pa bokou letan pase, zot ti fer konplo pour touy li. Alor Zezi i dir devan tou dimoun: “Pa krwar ki mon’n vin detri Lalwa oubyen lansennyman bann Profet. Mon’n vin, pa pour detri me pour akonpli zot.”—Matye 5:17.

Parey nou konnen, Zezi i annan en gran respe pour Lalwa Bondye e i ankouraz lezot pour fer parey. Anfet i dir: “Pour sa rezon alor, nenport dimoun ki kas enn sa bann pli pti komanman e ansenny lezot pour fer parey, i pou ganny konsidere pli pti an sa ki konsern



Rwayonm lesyel.” Zezi pe dir ki en dimoun ki fer sa pa pou zanmen antre dan Rwayonm Bondye. I osi dir: “Me nenport dimoun ki obei e an-senny sa bann komannman pou ganny konsidere gran an sa ki konsern Rwayonm lesyel.” —Matye 5:19.

Zezi i menm kondann bann latitid ki kapab fer en dimoun kas Lalwa Bondye. Apre ki Zezi in dir ki dapre Lalwa “ou pa devret komet mert,” i osi dir: “Me mwan mon dir zot ki si en dimoun i kontinyen ankoler avek son frer, i pou rann kont devan lakour lazistis.” (Matye 5: 21, 22) Ler en dimoun i kontinyen ankoler avek en lot, sa i en keksoz grav ki menm kapab pous sa dimoun pour komet mert. Alor, Zezi i eksplike ziska ki degre en dimoun i devret fer zefor pour fer lape: “Si ou pe anmenn ou lofrann devan lotel e laba ou mazin en ki ou frer i annan en keksoz kont ou, kit ou lofrann laba devan lotel, al fer lape avek ou frer avan tou, apre retournen e ofer ou lofrann.”—Matye 5:23, 24.

En lot komannman dan Lalwa i defann komet adilter. Zezi i dir: “Zot in tande ki i’n ganny dir: ‘Ou pa devret komet adilter.’ Me mwan mon dir zot ki en dimoun ki kontinyen get en madanm e devlop en dezir pour li, i’n fini fer adilter avek li dan son leker.” (Matye 5:27, 28) Zezi pa pe koz lo en panse imoral ki kapab pas dan lespri en dimoun. Me i pe met lanfaz lo sa danze ki i annan ler en dimoun i ‘kontinyen gete.’ Souvandfwa si en dimoun i kontinyen gete, sa i kapab fer li devlop bann move dezir ki vreman for. Apre si i ganny en lokazyon, sa i kapab fer li komet adilter. Ki mannyer en dimoun i kapab anpes sa arive? Petet sa dimoun i bezwen pran aksyon vreman serye. Zezi i dir: “Alor, si ou lizye kote drwat pe fer ou fer pese, tir li e


zet li lwen, . . . Si ou lanmen drwat osi pe fer ou fer pese, koup li e zet li.” —Matye 5:29, 30.

I annan serten dimoun ki’n pare pour perdi zot lebra oubyen lipye akoz maladi pour zot kapab sov zot lavi. Alor i fer sans ki Zezi i dir ki i enportan pour “zet” *okenn keksoz*, menm en keksoz ki i annan bokou valer tel parey en lizye ouswa lanmen, pour evit bann panse ek aksyon imoral. Zezi i eksplike: “I pli bon pour ou perdi en parti ou lekor ki ou lekor antye i ganny zete dan Zeenn.” Zeenn ti en landrwa an deor miray Zerizalenm kot salte ti ganny brile, alor Zeenn i reprezant destriksiyon permanan.

Zezi i osi donn konsej lo konman pour tret bann dimoun ki bles ouswa ofans nou. I dir: “Pa lager avek en move dimoun, me si en dimoun i donn ou en kalot lo ou lazou kote drwat, donn li lot kote osi.” (Matye 5:39) Sa pa vedir ki en dimoun pa kapab defann son lekor ouswa son fanmir si i ganny atake. Zezi i koz lo en kalot, en kalot pa pou bles en dimoun oubyen



- ◇ Kontrerman avek bann ki vreman ere, lekel ki pou malere e akoz?
- ◇ Dan ki sans bann disip Zezi i “disel later” ek “lalimyer lemonn”?
- ◇ Eski Zezi ti demontre en kantite respe pour Lalwa Bondye? Eksplike.
- ◇ Ki mannyer Zezi ti ed dimoun pour pa komet mert ek adilter?



touy li. Plito i en lensilt. Alor i pe dir ki si en dimoun i donn ou en kalot oubyen ensilte ou pour esey provok ou pour lager ouswa dispit, pa bezwen rann mal pour mal.

Sa konsey i annakor avek lalwa Bondye pour kontan ou prosen. Alor, Zezi i konsey bann ki pe ekout li: “Kontinyen kontan zot lennmi e priy pour sa bann ki persekit zot.” I donn en bon rezon pour sa ler i dir: “Dan sa fason, zot a kapab vin zanfan zot Papa ki dan lesyel vi ki i fer soley tap lo bon konman move dimoun.”—Matye 5:44, 45.

Zezi i fer en pti rezimen lo sa ki i fek dir: “Pareyman, zot devret parfe parey zot Papa dan lesyel i parfe.” (Matye 5:48) I vre, i pa pe dir ki dimoun i kapab konpletman parfe. Par kont, ler nou imit Bondye nou kapab annan plis lanmour pour lezot, menm nou lennmi. Zezi i eksplik sa dan en lot fason ler i dir: “Kontinyen demontre konpasyon parey zot Papa i demontre konpasyon.”—Lik 6:36.

#### LAPRIYER EK KONFYANS DAN BONDYE

Dan sa sermon, Zezi ti osi dir: “Veye ki zot pa fer sa ki drwat zis pour dimoun vwar zot.” Zezi i kondann lipokrizi bann dimoun ki fer krwar zot devoue anver Bondye e i dir: “Ler ou ed

bann pov, pa soufle tronpet parey bann ipokrit i fer.” (Matye 6:1, 2) I pli bon pour ed lezot an prive.

Apré sa Zezi i dir: “Ler zot priye, pa fer parey bann ipokrit, akoz zot zot kontan debout pour fer lapriyer dan sinagog e dan kwen bann gran semen pour ki dimoun i vwar zot.” O kontré, i dir zot: “Ler ou priye, antre dan ou lasanm prive e apré ki ou’n ferm laport, priy avek ou Papa ki dan lesyel.” (Matye 6:5, 6) Zezi pa defann pour fer lapriyer an piblik, akoz li menm i ti fer sa. Me plito i pe kondann bann lapriyer ki ganny fer pour enpresyonn lezot pour ki zot ganny felisite.

I donn lafoul sa konsey: “Ler ou priye, pa repet menm zafer parey dimoun lezot nasyon i fer.” (Matye 6:7) Zezi pa pe dir ki i mal pour priy lo menm size plizyer fwa. I pe dir ki i mal pour “repet” bann fraz oubyen lapriyer ki’n ganny aprann parker. Apré sa, i donn en model lapriyer ki enkli set demann. Sa trwa premye demann i annan pour fer avek drwa Bondye pour dirize ek son plan. Nou demande ki son non i ganny sanktifye, ki son Rwayonm i vini e ki son lavolonte i ganny fer. Apré sa, nou kapab priy pour bann keksoz personel tel parey nou dipen sak zour, ganny pardonnen nou pese, pa ganny tante plis ki nou kapab siporte e ki nou ganny sove kont sa enn move.

Ki lenportans nou bann byen materyel i devret annan pour nou? Zezi i ankouraz lafoul: “Aret anmas pour zot menm bann trezor lo



- ◇ Ki Zezi ti pe sey dir ler i ti dir donn lot kote lazou ler ou ganny en kalot?
- ◇ Ki mannyer nou kapab parfe parey Bondye i parfe?
- ◇ Ki lenstriksyon Zezi ti donner konsernan lapriyer?





later, kot lever ek larouy i gat zot e kot voler i kas lakaz e vole.” Pa sa i fer sans! Bann trezor lo later i kapab gate e sanmenm sa ki arive. Nou pa ganny laprouvasyon Bondye zis aköz nou annan sa bann zafer. I pour sa rezon ki apre sa Zezi i dir: “Anmas pour zot menm bann trezor dan lesyel.” Nou fer sa ler nou met servis Bondye premye dan nou lavi. Personn pa kapab fer nou perdi laprouvasyon Bondye oubyen nou rekonpans, lavi eternel. Parol Zezi i vre: “Kot ou trezor i ete, ou leker pou la osi.” —Matye 6:19-21.




Zezi i donn en legzanp pour met lanfaz lo sa pwen: “Lizye i lalanp lekor. Alor, si ou lizye i get en sel keksoz, ou lekor antye pou dan lalimyer.

Me si ou lizye i get sa ki move, ou lekor antye pou dan fernwanr.” (Matye 6:22, 23) Dan en sans senbolik, ler nou lizye i fonksyonn byen, i parey en lalanp ki kler nou. Me pour nou lizye kapab fer sa, i bezwen konsantre lo zis en keksoz, si non, nou pa pou fer bann bon desizyon dan nou lavi. Si nou konsantre lo bann byen

### ZEZI I SERVI REPETISYON POUR ANSENNYEN

Parfwa, Zezi i repet bann lansennyman prensipal. Par egzanzp, dan Sermon lo Montanny, i ti ansenny bann ki ti pe ekout li ki mannyer pour priye e ed zot pour annan en bon pwennvi konsernan bann keksoz materyel.—Matye 6:9-13, 25-34.

Apre enn an edmi pli tar, Zezi ti repet sa bann lansennyman. (Lik 11:1-4; 12:22-31) Lefet ki Zezi ti repet sa bann pwen, sa ti benefisyè bann ki pa ti la pandan son sermon e i ti osi ed bann disip pour rapel bann pwen prensipal.



materyel olye lo nou servis pour Bondye, nou “lekor antye pou dan fernwanr,” sa i vedir ki nou kapab konmans fer bann keksoz dan fernwanr, setadir bann keksoz ki pa onnet.

Zezi i donn en bon legzanp: “En lesklav pa kapab servi de met, parski swa i pou ay enn e kontan lot oubyen i pou fidel avek enn e mepriz lot. Ou pa kapab lesklav Bondye e lesklav Larises an menm tan.”—Matye 6:24.

Petet serten ki pe ekout Zezi i enkyet pour zot bezwen materyel. Alor Zezi i asir zot ki zot pa bezwen enkyet si zot met servis Bondye premye dan zot lavi. “Get byen bann zwazo dan lesyel, zot pa senm lagrenn, ni rekolte, ni anmas dan stor, pourtan zot Papa dan lesyel i donn zot manze.”—Matye 6:26.

Ki nou kapab dir konsernan bann lis maron? Zezi i dir ki “menm Salomon dan tou son lagwar pa ti abiye parey enn sa bann lis.” Ki sa i montre nou? “Si se koumsa ki Bondye i abiye bann fler maron ki la ozordi e ki demen i ganny zete dan dife, pa i pou pli kontan abiy zot?” (Matye 6:29, 30) Zezi i donn en konsey saz: “Pa zanmen trakase e dir, ‘Ki nou pou manze?’ oubyen ‘Ki nou pou bwat?’ oubyen ‘Ki nou pou mete?’ . . . Zot Papa dan lesyel i konnen ki zot bezwen tou sa bann keksoz. Alor, kontinyen rod Rwayonm ek son ladrwatir premye e Bondye pou donn zot tou lezot keksoz.”—Matye 6: 31-33.

#### KI MANNYER POUR GANNY LAVI

Bann zapot ek lezot dimoun senser i anvi viv dan en fason ki fer Bondye plezir, me sa pa fasil akoz sityasyon ki zot ladan. Par egzansp, i annan en kantite Farizyen ki kritik e ziz lezot dan en fason vreman dir. Alor Zezi i ankouraz bann dimoun ki pe ekout li pour “aret zize pour ki zot pa ganny zize. Parski zot pou ganny zize dan menm fason ki zot pe ziz lezot.”—Matye 7: 1, 2.

Zezi i donn en legzanp pour montre ki i danzere pour swiv legzanp bann Farizyen ki kontan kritike. I dir: “En aveg pa kapab gid en aveg, non? Tou le de pou tonm dan en trou, pa i vre?” Alor ki mannyer dimoun ki pe ekout Zezi i devret vwar lezot? Zot pa devret vwar zis sa ki mal dan dimoun e kritike akoz sa ti pou en gro lofans. Zezi i demande: “Ki mannyer ou kapab dir ou frer, ‘Mon frer, les mwan tir sa pti lapay dan ou lizye,’ kan salerla ou pa vwar sa plans ki dan ou prop lizye? Ipokrit! Tir sa plans dan ou lizye avan e apre ou pou vwar pli kler pour tir sa pti lapay dan lizye ou frer.”—Lik 6: 39-42.

Sa pa vdir ki bann disip pa devret zanmen servi zot abilite pour zize, parski Zezi i dir zot: “Pa donn sa ki sen avek lisyen. Pa anvoy

zot perl avek koson.” (Matye 7:6) Bann laverite sorti dan Parol Bondye i parey bann perl senbolik akoz zot annan bokou valer. Si serten dimoun i azir parey bann zannimo, setadir zot pa montre lapresyasyon pour sa bann laverite, bann disip i devret les zot e rod bann ki anvi ekoute.



Zezi i koz ankor lo lapriyer e i dir ki i enportan pour kontinyen priye. “Kontinyen demande e zot pou gannyen.” Bondye i pare pour reponn nou lapriyer. Zezi i fer resorti sa pwen ler i demann zot: “Lekel parmi zot ki si son garson i demann li dipen, i pou donn li en ros? . . . Alor, si zot, menm si zot move, zot konn donn bann bon kado zot zanfan, pa zot Papa ki dan lesyel pou pli pare ankor pour donn bann bon keksoz bann ki pe demann li!”—Matye 7:7-11.

Apre sa, Zezi i donn en lareg ki bokou dimoun i konnen ozordi: “Alor, tou sa ki zot anvi dimoun i fer pour zot, zot osi zot devret fer parey pour zot.” Pa nou tou nou devret pran aker e aplik sa bon konsey dan nou relasyon avek lezot? Me i kapab difisil pour fer sa, parey Zezi i



montre ler i dir: “Pas par pti baro, parski sa gran baro e sa semen ki fasil i anmenn ver des-triksyon e bokou pe pas par la, tandis ki sa pti baro e sa semen ki difasil i anmenn ver lavi, me pa bokou ki pe trouv li.”—Matye 7:12-14.



Zezi i averti son bann disip ki dimoun pou esey fer zot kit sa semen ki anmenn ver lavi. I dir: “Vey byen sa bann fo profet ki vin kot zot e fer krwar zot bann mouton, me ki an realite zot bann lelou voras.” (Matye 7:15) Zezi i osi dir ki nou konnen si en

pye dibwa i bon oubyen non par son fri. I parey avek bann dimoun. Alor nou kapab rekonnet bann fo profet par zot lansennyman ek aksyon. Wi, Zezi i eksplike ki i pa senpleman sa ki en dimoun i *dir* ki fer li vin en disip, me osi sa ki i *fer*. Serten dimoun i dir ki Zezi i zot Senyer, me eski sa i leka si zot pa pe fer son lavolonte? Zezi i dir: “Mon pou dir zot: ‘Mon napa nanryen pour fer avek zot! Sorti la devan mwan, zot ki fer lemal!’”—Matye 7:23.

Zezi i fini son sermon par dir: “Tou dimoun ki ekout mon parol e met li an pratik pou parey en zonnm pridan ki’n fer son lakaz lo ros. Gro lapli ti tonbe, delo ti monte, gro divan ti soufle lo sa lakaz, me i pa ti tonbe parski i ti’n ganny konstrir lo ros.” (Matye 7:24, 25) Kwa ki ti anpes sa lakaz tonbe? Parski sa zonnm “ti fouy dan fon e fer son fondasyon lo ros.” (Lik 6:48) Alor i pa sifi zis pour ekout parol Zezi, me nou bezwen fer en kantite zefor pour met zot “an pratik.”

Me ki Zezi i dir konsernan sa enn ‘ki ekout son parol me ki pa met li an pratik’? I “parey en zonnm bet ki’n fer son lakaz lo disab.” (Matye 7:26) Ler lapli i tonbe, delo i monte e divan i soufle, sa i fer sa kalite lakaz tonbe.

Lafoul i vreman etonnen par fason ansennyen Zezi dan sa sermon. I pa ansenny parey bann profeser lalwa me i ansenny sa ki sorti kot Bondye. I tre probab ki en kantite dimoun ki ti ekout Zezi sa zour ti vin son bann disip.

- 
- ◆ Akoz bann trezor spirityel i annan plis valer e ki mannyer dimoun i kapab ganny zot?
  - ◆ Akoz bann disip Zezi pa devret enkyet konsernan bann keksoz materyel?
  - ◆ Ki Zezi i dir konsernan ziz lezot e akoz nou bezwen servi nou abilite pour zize par ler?
  - ◆ Kwa ankore ki Zezi ti dir konsernan lapriyer e ki lareg i ti donner?
  - ◆ Ki mannyer Zezi ti montre ki i pa fasil pour vin enn son disip e ki i danzere pour ganny anbete?



# EN ZOFISYE LARME I DEMONTRE EN GRAN LAFWA

MATYE 8:5-13 LIK 7:1-10



Aprè ki Zezi in fer son Sermon lo Montanny, i al dan lavil Kapernaoum. Laba, serten ansyen ki Zwif i vin kot li. Zot in ganny anvoye par en zom sorti dan en lot nasyon. Sa zom i en zofisye larme Romen ki ansarz 100 solda.

En serviter sa zofisye larme i vremen malad e i pros pour mor. Sa zofisye i byen kontan sa serviter, alor menm si sa zofisye pa en Zwif, i rod led Zezi. Bann Zwif i dir Zezi ki serviter sa zom “i paralize kot lakour e i pe soufer en kantite.” (Matye 8:6) Bann sef Zwif i eksplik Zezi akoz ki sa zofisye i merit son led. Zot dir: “I kontan nou nasyon e li menm i’n konstri nou sinagog.”—Lik 7:4, 5.

Alor Zezi i al avek sa bann ansyen kot lakaz sa zofisye larme. Ler zot pros pour ariv kot son lakaz, sa zofisye i anvoy bann zanmi pour dir li: “Msye, pa bezwen fatig ou pour vin kot mwan, parski mon pa diny pour ou vin dan mon lakaz, sanmenm rezon ki mon pa’n vin kot ou.” (Lik 7: 6, 7) Pour en zofisye ki abitye donn dimoun lord, sa parol i vremen demontre en kantite limilite! I osi montre nou ki kantite sa zom i diferan avek bann Romen ki tret zot lesklav dan en fason dir.—Matye 8:9.

Sa zofisye i konnen ki bann Zwif pa asosye avek bann ki pa Zwif. (Akt 10:28) Petet sanmenm ki i pe mazin ler i anvoy son zanmi dir Zezi: “Zis donn lord e mon serviter i ava geri.”—Lik 7:7.

Zezi i etonnen ler i tann sa e i dir: “Mon dir zot, menm dan Izrael mon pa’n vwar personn

ki annan en sitan gran lafwa koumsa.” (Lik 7:9) Ler son bann zanmi i retourn kot lakaz sa zofisye, zot vwar ki sa lesklav ki ti vremen malad in byen.

La ki Zezi in geri sa zom, i servi sa lokazyon pour konfirman ki bann ki pa Zwif ki annan lafwa pou ganny laprouvasyon ek benediksyon Bondye. I dir: “Bokou dimoun sorti dan les ek was pou vin atab avek Abraam, Izaak ek Zakob dan Rwayonm lesyel.” Ki pou arive avek bann Zwif ki napa lafwa? Zezi i dir ki zot “pou ganny zete deor dan fernwanr. Se laba kot zot pou plere e grens zot ledan akoz dezespwar.”—Matye 8:11, 12.



Bann Zwif in ganny ofer premye, pour form parti Rwayonm ansanm avek Kris. Bann ki pa aksepte sa loportinite pou ganny rezete. Me bann dimoun lezot nasyon pou kapab vin atab avek li, andotmo zot pou kapab ansanm avek li “dan Rwayonm lesyel.”

- ◇ Akoz bann Zwif ti sipliy Zezi pour ed en zofisye larme sorti dan en lot nasyon?
- ◇ Petet pour ki rezon sa zofisye pa ti demann Zezi pour vin kot li?
- ◇ Dapre Zezi, ki posibilite bann dimoun lezot nasyon pou annan?

# ZEZI I RESISIT GARSON EN VEV

LIK 7:11-17

Pa bokou letan apre ki Zezi in geri serviter sa zofisye larme, i kit Kapernaoum e al Nain, en lavil ki apepre 32 kilomet sid was avek Kapernaoum. I pa tousel. Son bann disip ek en gran lafoul i vwayaz avek li. I tre probab ki i lo tar apremidi ler zot ariv an deor lavil Nain. Zot zwenn en bon pe Zwif ki pe anmenn en lekor mor. Sa i lekor en zenn garson ki zot pe al antere an deor lavil.

Manman sa zenn onm i pli tris dan tou. I deza en vev e la aprezan son sel zanfan in mor. Ler son msye ti mor omwen i ti ancor annan son garson ki i kontan en kantite avek li. I ti'n bezwen vreman pros avek son garson ki ti son sel lespwar ek sekirite pour lavenir. La aprezan, li osi in mor. Napa personn ancor pour siport li e reste avek li.

Zezi i pran lapenn ler i vwar ki kantite sa madanm i tris e i mazin son sityasyon difisil. Avek

tandres ek lasirans, Zezi i dir li: "Aret plere." Apre i fer en lot keksoz. I al pli pre e tous sa lanmak kot lekor sa garson i ete. (Lik 7:13, 14) Ler zot vwar sa, bann dimoun ki pe al lanterman i sirprann e zot aret marse. I bezwen ki zot pe mazine, 'Ki sa zonm pe esey dir? Ki i pou fer?'

Bann ki pe vwayaz avek Zezi in deza vwar li fer bann mirak e geri en kantite malad, ki zot zot pe mazine? Aparaman zot pa'n deza vwar Zezi resisit okenn dimoun mor. Menm si dimoun ti deza ganny resisite dan lepase, eski Zezi i kapab fer sa li osi? (1 Lerwa 17:17-23; 2 Lerwa 4: 32-37) Zezi i donn sa lord: "Zenn onm, mon dir ou, leve!" (Lik 7:14) Sanmenm sa ki arive! Sa zenn onm i asize e konmans koze. Zezi i anmenn li kot son manman ki pa oule krwar sa ki'n arive me ki vreman kontan. La i nepli tousel.


Ler bann dimoun i vwar ki sa zenn onm i vreman vivan, zot loue Zeova, sa Enn ki donn lavi.





Zot dir: “En gran profet in vin parmi nou.” Le-zot dimoun i konpran sinifikasyon sa ki Zezi in fer e zot dir: “Bondye in mazin son pep.” (Lik 7:16) Nouvel konsernan sa mirak ekstraordiner i fann partou dan bann rezyon dan zalantour e petet menm ziska Nazaret, sa lavil kot Zezi in grandi ki apepre en zistans dis kilomet avek lavil Nain. Sa nouvel i menm ariv ziska dan rezyon Zide dan sid.

Zan ki batize i ankor dan prizon e i vremen anvi konn plis lo sa ki Zezi pe fer. Son bann disip i rakont li sa bann mirak. Ki mannyer i reazir?



- 
- ◇ Ki ti arive ler Zezi ti pros pour ariv lavil Nain?
  - ◇ Ki mannyer Zezi ti santi ler i ti vwar sa e ki i ti fer?
  - ◇ Ki mannyer bann dimoun ti reazir anver sa ki Zezi ti fer?



## ZAN I ANVI KONNEN SI ZEZI I MESI

MATYE 11:2-15 LIK 7:18-30

I fer apeare enn an depi ki Zan ki batize i dan prizon. Me kantmenm sa i ganny nouvel konsernan bann mirak Zezi. Zis mazine ki mannyer Zan i santi ler son bann disip i dir li ki Zezi in resisit garson en vev dan lavil Nain. Toudmenm, Zan i anvi tann avek Zezi li menm ki tousala i vedir. Alor i kriy de son bann disip e anvoy zot kot Zezi pour demande: “Eski ou sa Enn ki nou pe espere oubyen nou bezwen esper en lot?”—Lik 7:19.

Eski sa keston i paret drol? Zan i en servirter fidel Bondye ki de-z-an pase ti batiz Zezi. I ti vwar lespri sen Bondye desann lo Zezi e i ti tann Bondye dir Zezi ki i’n aprouv li zour son batenm. Nou napa okenn rezon pour krwar ki lafwa Zan in afebli. Si non, Zezi pa ti pou koz an byen lo Zan, parey i fer sa zour. Me si Zan pa pe ganny okenn dout, akoz i demann sa keston lo Zezi?

I kapab ki Zan i senpleman anvi ki Zezi i konfirm avek li direkteman ki i sa Mesi. Sa ti pou ankouraz Zan ki pe soufer dan prizon. I osi paret ki i annan en lot rezon ki Zan i demann sa keston. I konn bann profesi Labib ki dir ki Mesi i sipoze vin en lerwa ek sover. Par kont, plizyer mwan apre ki Zezi in ganny batize, Zan i ankor dan prizon. Alor Zan pe demande si i pou annan en lot ki vini pour ranplas Zezi e ki pou fini akonpli tou sa ki sa Mesi i sipoze fer dapre bann profesi.


Zezi pa zis dir bann disip Zan, ‘Byensir mon sa Enn ki zot pe espere,’ me i geri en kantite dimoun ki annan toudsort maladi pour montre ki i annan laprouvasyon Bondye. Apre sa, i dir bann disip: “Ale e rakont Zan sa ki zot pe tande e vwar: Bann aveg pe vwar aprezan, bann ki

bwete pe marse, bann ki annan lalep pe vin pir, bann sourd pe tande, bann mor pe ganny resisite e bann pov pe ganny anonse sa bon nouvel.”—Matye 11:4, 5.

Petet Zan pe demann sa akoz i ekspekte ki Zezi pou fer plis ki sa ki i pe deza fer e ki i pou tir li dan prizon. Me Zezi pe dir Zan ki i pa devret ekspekte plis ki bann mirak ki i deza pe fer.

Ler bann disip Zan i ale, Zezi i fer sir ki lafoul i konnen ki Zan pa zis en profet. I “mesaze” Zeova ki’n ganny profetize dan Malaki 3:1. I osi profet Eliya ki’n ganny predir dan Malaki 4:5, 6. Zezi i eksplike: “Laverite mon dir zot, napa personn ki’n ne lo later ki pli gran ki Zan ki batize, me sa enn ki pli pti dan Rwayonm lesyel i pli gran ki li.”—Matye 11:11.

Ler Zezi i dir ki enn ki pli pti dan Rwayonm lesyel i pli gran ki Zan, i pe montre ki Zan pa pou dan sa Rwayonm dan lesyel. Zan ti prepar semen pour Zezi me i pou mor avan ki Kris i fer li posib pour dimoun konmans al dan lesyel. (Ebre 10:19, 20) Par kont, Zan i en profet fidel Bondye e i pou en sitwayen Rwayonm Bondye ki pou viv lo later.





- ◇ Akoz Zan ti demande si Zezi ti sa Enn ki zot pe espere oubyen si zot devret esper en lot?
- ◇ Dapre Zezi, ki profesy Zan ti akonpli?
- ◇ Akoz Zan ki batize pa pou al dan lesyel avek Zezi?



## MALER POUR EN ZENERASYON REBEL

MATYE 11:16-30 LIK 7:31-35

Zezi i annan en kantite respe pour Zan ki bati-ze, me ki mannyer laplipar dimoun i vwar Zan? Zezi i dir: “Sa zenerasyon . . . i parey bann zanfan ki pe asize lo bazar pe kriy avek kanmarad, ‘Nou ti zwe laflit pour zot, me zot pa ti danse, nou ti plere e fer leokri, me zot pa ti tap zot lestoman pour montre ki zot dan lapenn.’” —Matye 11:16, 17.

Ki sa i vedir? Zezi i eksplike: “Zan pa ti manze ni bwar parey tou dimoun, me dimoun i dir, ‘I posede par en demon.’ Garson zonn li i manze e bwar, me dimoun i dir, ‘Get sa zonn! I manz tro bokou e i kontan bwar diven, en zanmi bann kolekter taks ek dimoun ki annan en move lavi.’” (Matye 11:18, 19) Lo en kote, nou annan Zan ki’n viv en lavi senp konman en Nazireen. I menm pa bwar diven, me sa zenerasyon i dir ki i posede par en demon. (Nonm 6:2, 3; Lik 1:15) Lo lot kote, nou annan Zezi ki viv parey tou lezot dimoun. I manze e bwar dan en fason rezonnab, me dimoun i akiz li ki i fer tousala an ekse. I paret ki i enposib pour satisfere dimoun.

Zezi i dir ki sa zenerasyon i parey bann zanfan dan bazar ki refize danse ler lezot zanfan i zwe laflit oubyen ki refize dan lapenn ler lezot i plere e fer leokri. I dir: “Lasazes en dimoun i ganny rekonnèt par son aksyon.” (Matye 11:16, 19) Sa bann “aksyon” i levidans ki Zan ek Zezi i donnen pour montre ki sa bann lakizasyon kont zot i fo.

Aprè ki Zezi in koz lo sa zenerasyon ki’n rebel, i koz lo lavil Korazin, Betsayda ek Kapernaoum kot i’n fer bokou mirak. Zezi i reprimann bann dimoun dan sa bann lavil e dir ki si i ti’n fer sa bann mirak Tir ek Sidon, de lavil

ki Fenisi, bann dimoun dan sa lavil ti pou’n repantir. I osi koz lo Kapernaoum, sa landrwa kot i’n reste laplipar ditan. Menm laba, laplipar dimoun pa’n aksepte son mesaz. Zezi i dir sa lo sa lavil: “Zour Zizman, i pou pli sever pour zot ki pour Sodonm.” —Matye 11:24.

Aprè sa, Zezi i loue son Papa ki kasyet bann laverite spirityel avek “bann ki saz e entelizan” me ki revel zot avek bann ki annan limilite, ki parey bann zanfan. (Matye 11:25) I donn bann dimoun koumsa en zoli lenvitasyon: “Vin kot mwan, zot tou ki pe rente e fatigue e mon pou redonn zot lafors. Vin mon disip e swiv mon legzanp, parski mon dous e mon annan limilite e zot pou reganny lafors. Parski i fasil pour vin mon disip e sa ki mon demann zot pour anmennen i pa lour.” —Matye 11:28-30.

Ki mannyer Zezi i redonn lafors lezot? Bann sef relizye in met en kantite fardo lo bann dimoun avek zot bann tradisyon ki fer dimoun vin parey prizonnien. Par egzanp, zot in fer bann lareg sever konsernan Saba. Me Zezi i redonn bann dimoun lafors ler i ansenny zot laverite lo Bondye ki napa nanryen pour fer avek sa bann tradisyon. I osi montre ki mannyer pour soulaz bann ki oprimen par bann lotorite politik oubyen ki trouble aköz zot pese. I montre zot ki mannyer zot kapab ganny pardonnen e anpe avek Bondye.

Tou bann dimoun ki anvi vin disip Zezi i kapab dedye zot lavi avek Bondye e servi nou Papa dan lesyel ki toultan demontre konpasyon ek pitye anver son serviter. Servi Bondye i pa parey anmenn en gro pake lour parski bann komannman Bondye pa en fardo.—1 Zan 5:3.



- ◇ Ki manyer bann dimoun dan zenerasyon Zezi ti parey bann zanfan?
- ◇ Kwa ki ti pous Zezi pour loue son Papa dan lesyel?
- ◇ Dan ki sans bokou dimoun ti pe rente e ki soulazman Zezi ti ofer?

## EN LESON LO PARDON

LIK 7:36-50

Fason ki dimoun i azir anver sa ki Zezi i dir e fer i depan lo zot kondisyon leker. Nou vwar sa ler nou get sa ki arive dan en lakaz Galile. En Fari-zyen ki apel Simon i envit Zezi pour vin pran en repa kot li, petet pour li aprann en pti pe plis lo sa enn ki pe fer tou sa bann mirak. Kekfwa, Zezi i aksepte sa lenvitasyon parey i'n deza fer avek bann kolekter taks ek bann ki fer pese akoz sa i donn li en loportinite pour prese.

Par kont, Zezi pa ganny menm latansyon ki bann envite i normalman gannyen. Dan bann semen Palestin, i annan en ta lapousyè e bann dimoun i abitye met sandalet, alor zot lipye i so e sal. Sanmenm, zot abitye lav lipye en envite avek delo fre. Me zot pa fer sa pour Zezi. Zot pa ni anbras li ler i arive parey i labitid pour bann Zwif. En lot koutim ki zot annan se pour vid en pe delwil lo latet sa envite pour demon- tre labonte ek lospitalite. Sa osi zot pa fer avek Zezi. I evidan ki Zezi pa'n ganny byen akeyir!

Tou dimoun pe asiz atab e zot konmans man- ze. Anmezir ki zot manze en madanm ki pa'n ganny envite i antre trankilman. Sa madanm i "renonmen dan sa lavi pour son move lavi." (Lik 7:37) I paret ki sa madanm pe viv en lavi imor- ral, petet konman en prostitye. I posib ki i'n tann bann lansennyman Zezi, enkli sa lenvitasyon: "Vin kot mwan, zot tou ki pe rente e fatige e mon pou redonn zot lafors." (Matye 11:28, 29) I paret ki parol ek aksyon Zezi in tous li e la apre- zan i pe rod li.

I vin par deryer Zezi kot latab e i azenou kot son lipye. Son larm i koul lo lipye Zezi e i eswi- y li avek son seve. I anbras son lipye avek tandres e vid delwil parfimen ki i'n anmennen lo son li- pye. Simon i gete ki pe arive e i pa dakor. I dir dan li menm: "Si sa zonn ti vremen en profet,

i ti pou konnen lekel sa madanm ki pe tous li, ki kalite dimoun i ete e ki i annan en move lavi." —Lik 7:39.

Zezi i konnen ki Simon pe mazinen alor i dir li: "Simon, mon annan en keksoz pour dir ou." Simon i reponn: "Ale, Ansenyan, dir mwan!" Zezi i dir: "De zonn ti demann pret larzan avek en serten dimoun, enn ti dwa li 500 denye e lot ti dwa li 50. Vi ki zot ti napa nanryen pour rann li, sa zonn ti pardonn zot tou le de avek tou son leker. Alor, lekel parmi sa de ki pou kontan li plis?" Petet Simon i reponn dan zar i pa tro en- terese: "Mon krwar sa enn ki i'n pardonn plis." —Lik 7:40-43.

Zezi i dakor. Apre i get sa madanm e an menm tan koz avek Simon: "Eski ou vwar sa madanm? Mon'n antre dan ou lakaz, ou pa'n donn mwan delo pour lav mon lipye. Me sa madanm in lav mon lipye avek son larm e eswiy li avek son seve. Ou pa'n anbras mwan, me sa madanm, depi ki i'n antre i pa'n aret anbras mon lipye avek tan- dres. Ou pa'n vid delwil lo mon latet, me sa ma- danm in vid delwil parfimen lo mon lipye." Zezi i remarke ki menm si sa madanm ti annan en move lavi in montre ki i'n vremen repantir. Alor i dir li: "Akoz sa, mon dir ou, menm si son pese i bokou, i'n ganny pardonnen parski i'n kontan bokou. Me sa enn ki'n ganny pardonnen en pti- gin i kontan en ptigin."—Lik 7:44-47.

Zezi pa pe soutir imoralite. Me son konpa- syon i pous li pour konpran bann dimoun ki'n fer bann pese grav me ki montre ki zot regrete sa ki zot in fer e vin kot Kris pour ganny soula- ze. Zis mazin sa gran soulazman ki sa madanm in bezwen santi ler Zezi i dir li: "Ou pese in ganny pardonnen. . . . Ou lafwa in sov ou, al anpe." —Lik 7:48, 50.





- ◇ Ki mannyer Simon ti akeyir son envite Zezi?
- ◇ Akoz en madanm ti vin kot Zezi?
- ◇ Ki legzanp Zezi ti servi e ki mannyer i ti aplik li?

## LEKEL KI DONN LI POUVWAR POUR FER MIRAK?

MATYE 12:22-32 MARK 3:19-30 LIK 8:1-3

Pa bokou letan apre ki Zezi in koz konsernan pardon kot lakour Simon sa Farizyen, i konmans son dezyenm kanpanny predikasyon Galile. Sa i dezyenm lannen dan son minister e i pa pe vwayaz li tousel. Sa 12 zapot i avek li ensi ki serten madanm ki Zezi ti'n "sas demon dan zot e geri zot maladi." (Lik 8:2) Parmi zot i annan Mari Magdalenn, Sizann ek Zann, madanm en zofisyè Lerwa Erod Antipas.

Anmezir ki plis dimoun i tann koz lo Zezi, i annan plis diskisyon ek largiman konsernan son bann aktivite. Sa i evidan ler Zezi i geri en zonn posede par demon ki osi aveg e kozpa. La aprezan, sa zonn i nepli anba kontrol demon e i kapab vwar e koze. Bann dimoun i enpresyonnen ler zot vwar sa e zot dir: "Sa, pa Garson David sa?"—Matye 12:23.

Sa lafoul ki'n rasanble kot sa lakaz kot Zezi pe reste i sitan gran ki bann disip pa ni menm kapab pran en repa. Me pa tou dimoun ki krwar ki Zezi i "Garson David," sa Mesi ki'n ganny promet. Serten profeser lalwa ek Farizyen in sorti Zerizalenm pour vin vwar li. Me zot pa'n vin pour aprann avek Zezi ouswa siport li. Zot pe dir bann dimoun: "I posede par Belzebib e se par pouvwar sef demon" ki i fer sa bann mirak. (Mark 3:22) Ler fanmir Zezi i tann konsernan tou sa ki pe pase, zot esey tyonbo li. Pour ki rezon?

Sa letan, bann frer Zezi pa krwar ki i Garson Bondye. (Zan 7:5) Sa Zezi ki tou dimoun pe koz lo la pa parey sa Zezi ki zot ti konnen ler zot ti pe grandi Nazaret. Alor zot mazinen ki i annan en problemm mantal. Zot dir: "I'n perdi latet."—Mark 3:21.





Me eski sa i leka? Zezi fek geri en zonn ki ti annan demon e la aprezan i osi kapab vwar e koze. Personn pa kapab dir ki sa pa vre. Alor bann profeser lalwa ek bann Farizyen i fer en fo lakizasyon lo Zezi konmkwa i pe anbet dimoun. Zot dir: “Sa zonn i sas demon avek pouvwar Belzebib, sef demon.”—Matye 12:24.


Zezi i konnen ki bann profeser lalwa ek bann Farizyen pe mazinen alor i fer resorti sa pwen: “Si i annan divizyon dan en rwayonn, i pou ganny detrir e si i annan divizyon dan en lavil oubyen lakour i pa pou reisi. Dan menm fason, si Satan i sas Satan, i annan divizyon dan li menm, alor ki mannyer son rwayonn pou kapab reisi?”—Matye 12:25, 26.

Sa rezonnman i lozik, pa i vre? Bann Farizyen i konnen ki serten Zwif i sas bann demon. (Akt 19:13) Alor Zezi i demande: “De plis, si mwan mon sas demon par pouvwar Belzebib, par pouvwar lekel zot bann dimoun i sas demon?” Andotmo, sa lakizasyon kont Zezi i devret aplik pour zot osi. Apre, pour ed zot rezonnen, Zezi i dir: “Me si i par pouvwar Bondye ki mon sas demon, zot pa’n realize ki Rwayonn Bondye in arive.”—Matye 12:27, 28.

Pour montre ki i annan pouvwar lo Satan akoz i sas demon, Zezi i donn en legzanp: “Ki mannyer en dimoun i kapab kas lakaz en zonn for e pran son bann keksoz? I pou bezwen anmar sa zonn for avan e apre ki i pou kapab vol tou kek-

soz dan son lakaz. Sa ki pa dan mon kote i kont mwan, sa ki pa ed mwan pour fer dimoun vin kot mwan i fer zot ale.” (Matye 12:29, 30) I kler ki bann profeser lalwa ek Farizyen i kont Zezi, alor zot montre ki zot pe travay pour Satan. Zezi i Garson Bondye ki pe fer lavolonte Zeova e zot zot pe anpes dimoun swiv li.

Zezi i averti sa bann opozan ki pe travay pour Satan: “Bann imen pou ganny pardonnen zot pese, nenport pese zot komet e nenport move parol ki zot dir. Me sa ki koz an mal kont lespri sen pa pou zanmen ganny pardonnen me i koupab pour en pese eternal.” (Mark 3:28, 29) Zis mazinen ki sa i vedir pour bann ki pe akiz Zezi pour fer sa bann mirak avek led Satan olye lespri sen!



- ◇ Lekel ki ti avek Zezi dan son dezyenm kanpanny predikasyon Galile?
- ◇ Akoz bann fanmir Zezi ti esey tyonbo li?
- ◇ Ki mannyer bann profeser lalwa ek bann Farizyen i esey akiz Zezi konmkwa i pe anbet dimoun e ki Zezi i reponn?



# ZEZI I REPRIMANN BANN FARIZYEN

MATYE 12:33-50 MARK 3:31-35 LIK 8:19-21

Vi ki bann profeser lalwa ek bann Farizyen pa oule aksepte ki Zezi i servi pouvwar Bondye pour sas demon, i posib ki zot koz kont lespri sen. Alor ki kote zot pou pran, Bondye oubyen Satan? Zezi i dir: “Si ou annan en bon pye fri, ou pou ganny bann bon fri me si ou annan en pye fri ki pa bon, son fri osi pa pou bon parski ou rekonnet en pye par son fri.” —Matye 12:33.



Sas demon i parey en bon fri, alor i bet pour sa bann dimoun dir ki Zezi pe fer sa bann mirak akoz i servi Satan. Parey Zezi ti fer resorti dan Sermon lo Montanny, si fri i bon, sa pye fri osi i bezwen bon, i pa kapab pa bon. Bann Farizyen pe fer fo lakizasyon kont Zezi, ki kalite fri sa i ete? Pa sa bann fri pa bon! Zezi i dir zot: “Bann piti serpan, zot ki move, ki mannyer zot kapab dir bann bon keksoz? Parski labous i koz sa ki deborde dan leker.” —Matye 7:16, 17; 12:34.

I kler ki sa ki nou dir i montre sa ki nou annan dan nou leker e nou ganny zize dapre sa. Alor Zezi i dir: “Mon dir zot ki dimoun pou bezwen rann kont Zour Zizman pour tou parol inital ki zot dir, parski si zot dir bann bon keksoz zot pou ganny aprouve konman drwat, me si zot dir bann move keksoz zot pou ganny kondannen.” —Matye 12:36, 37.

Malgre tou sa bann mirak ki Zezi pe fer, bann profeser lalwa ek bann Farizyen i anvi plis levians, zot dir: “Ansenyan, nou anvi vwar en siny ki montre ki Bondye ki’n anvoy ou.” Menm si zot pa’n vwar Zezi pe fer sa bann mirak avek zot prop lizye, i annan en kantite dimoun ki’n vwar

e ki pe koz lo la. I pour sa rezon ki Zezi i kapab dir sa bann sef Zwif: “En zenerasyon move e enfidel pe kontinyen rod en siny, me i pa pou vwar okenn siny eksepte siny profet Zonas.” —Matye 12:38, 39.

Zezi i eksplike ki sa i vedir: “Zis parey Zonas ti dan vant sa gro pwason pour trwa zour ek trwa lannwit, Garson zom pou dan vant later pour trwa zour ek trwa lannwit.” Zonas ti ganny anvale par en gro pwason e apre i ti sorti dan vant sa pwason konmsi i ti’n ganny resisite. Alor Zezi i predir ki i pou mor e resisite trwazyenm zour. Pli tar, ler sa i arive, bann sef Zwif pa pou aksepte “siny profet Zonas” akoz zot refize repantir e sanze. (Matye 27:63-66; 28:12-15) De lot kote, “bann dimoun Niniv” ti repantir ler Zonas ti pres avek zot. Alor zot pou kondann sa zenerasyon. Zezi i osi dir ki par son legzanp, larenn Seba pou kondann zot. I ti



deside pour ekout lasazes Salomon e i ti enpresyonnen. Zezi i dir ki aprezan “i annan enn ki pli enportan ki Salomon.”—Matye 12:40-42.

Zezi i konpar sityasyon sa move zenerasyon avek en zonm ki en demon in sorti dan li. (Matye 12:45) Vi ki sa zonm pa ranpli sa lespas vid avek bann bon keksoz, sa demon i retournen avek set lezot ki pli move ki li e zot antre dan sa zonm. Pareyman, nasyon Izrael ti’n ganny pirifye e retabli, en pe parey sa zonm ki sa demon ti’n sorti dan li. Me sa nasyon ti rezet bann profet Bondye, ziska finalman zot in menm rezet Zezi ki klerman annan lespri sen Bondye. Sa i montre ki kondisyon sa nasyon i pli pir ki o konmansman.

Anmezir ki Zezi pe koze, son manman ek son bann frer i arive e zot debout pre avek lafoul. Serten dimoun ki pe asiz pros avek Zezi i dir li: “Ou manman ek ou bann frer pe debout deor, zot anvi vwar ou.” Apre sa, Zezi i montre ki kantite i pros avek son bann disip ki parey bann vre frer, ser ek manman pour li. I montre ledwa lo son bann disip e dir: “Mon manman ek mon bann frer i sa bann ki ekout parol Bondye e met li an pratik.” (Lik 8:20, 21) Alor i montre ki menm si son relasyon avek son fanmir i enportan pour li, son relasyon avek son bann disip i annan plis valer. Nou osi nou apresye sa relasyon ki nou annan avek nou bann frer ek ser spirityel, sirtou ler lezot i kritik nou oubyen kritik nou travay e persekit nou. Pa sa i ankourazan!



- ◇ Dan ki sans bann Farizyen ti parey en move pye fri?
- ◇ Kisisa “siny profet Zonas” e pli tar ki mannyer i ti ganny rezete?
- ◇ Ki mannyer nasyon Izrael dan premye syek ti parey en zonm ki en demon in sorti dan li?
- ◇ Ki mannyer Zezi i montre ki i annan en relasyon pros avek son bann disip?

# BANN LEGZANP LO RWAYONM


MATYE 13:1-53 MARK 4:1-34 LIK 8:4-18

I paret ki Zezi i Kapernaoum ler i'n reprimann bann Farizyen. Pli tar sa zour, i kit sa lakaz kot i ete e i marse ziska Lanmer Galile ki pa tro lwen. En lafoul i vin kot Zezi. Zezi i anbark dan en kannot, dekile avek lans e i konmans ansenny bann dimoun konsernan Rwayonm le-syel. I servi diferan legzanp pour ansenny zot. Sa bann dimoun ki pe ekout Zezi i abitye avek bann keksoz ki Zezi pe koz lo la, alor sa i fer li pli fasil pour zot konpran sa ki i pe ansennyen lo Rwayonm.

Premyerman, Zezi i koz lo en fermye ki pe senm lagrenn. En pe lagrenn i tonm o bor semen e bann zwazo i manz tou. Lezot lagrenn i tonm lo ros kot napa bokou later. Napa fonder e rasin pa kapab pouse, bann pti plant i ganny brile dan soley e zot sek. Lezot lagrenn ankor i tonm dan pikan ki touf sa pti plant ler i konmans pouse. Finalman, en pe lagrenn i tonm lo bon later. Sa bann lagrenn i raport fri, "sa enn 100 fwa plis, lot 60 e lot ankor 30."—Matye 13:8.

Dan en lot legzanp, Zezi i konpar Rwayonm avek en zonn ki senm lagrenn. Dan sa ka, menm si sa zonn i dormi e i leve, sa bann lagrenn i pouse. Ki mannyer sa i arive? "I zis pa konnen." (Mark 4:27) Zot pous lo zot menm e raport bann lagrenn ki sa zonn i kapab rekolte.

Apré sa, Zezi i donn en trwazyenm legzanp ki annan pour fer avek senm lagrenn. En zonn i senm bann bon kalite lagrenn, me "pandan ki bann zonn ti pe dormi," en lennmi i senm move zerb dan plantasyon dible. Bann lesklav sa zonn i demande si zot devret al tir bann



◇ Kan e kote Zezi ti servi legzanp pour ansenny lafoul?





move zerb. I dir zot: “Non, pangar zot derasin dible dan pe tir move zerb. Les tou le de pous ansanm ziska rekolt e pandan letan rekolt, mon pou dir bann ki fer rekolt: Tir move zerb e anmar zot par pake pour zot ganny brile, apre anmas dible e met dan mon stor.”—Matye 13:24-30.

En kantite parmi bann ki pe ekout Zezi i abitye plante. I osi mansyonn en lot keksoz ki bokou dimoun i konnen. I koz lo sa pti lagrenn moutard ki grosi e vin en pye dibwa ki bann zwazo i kapab reste lo son bann brans. Zezi i dir: “Rwayonm lesyel i parey en lagrenn moutard ki en zom ti plant dan son plantasyon.” (Matye 13:31) I pa konmsi Zezi pe fer leson lo bann plant. O kontrer, i pe donn en legzanp pour montre ki mannyer en keksoz ki telman ptipti i kapab pouse oubyen ogmante pour vin en keksoz vreman gran.

Apre sa, Zezi i koz lo en travay ki bokou i abitye avek. I dir ki Rwayonm lesyel i parey “lerven ki en madanm ti pran e melanz li avek trwa gran mezir lafarin.” (Matye 13:33) Menm si personn pa vwar sa lerven, i melanze avek tou sa lapat e fer li monte. Dimoun pa remark deswit sa ki sa lerven i fer dan sa lapat e ki mannyer sa lapat i monte.

Apre ki Zezi in donn sa bann legzanp, i fer sa lafoul ale e i retourn kot sa lakaz kot i pe reste. I pa pran bokou letan avan ki son bann disip i vin kot li aköz zot anvi konpran sa ki i’n dir.

#### ZOT BENEFISYE AVEK BANN LEGZANP ZEZI

Bann disip in deza tann Zezi servi legzanp pour ansennyen avan, me i pa’n zanmen servi

sa kantite legzanp en sel kou. Alor zot demann li: “Aköz ou koz avek zot par servi legzanp?” —Matye 13:10.

En rezon ki Zezi i fer sa se aköz i akonpli bann profesi Labib. Resi Matye i dir: “I pa ti dir zot nanryen san servi legzanp pour akonpli sa ki ti’n ganny dir atraver sa profet: ‘Mon pou servi bann legzanp pour ansennyen, mon pou dir keksoz ki ti’n kasyet depi o konmansman.’” —Matye 13:34, 35; Psonm 78:2.

Me i annan en lot rezon aköz Zezi i servi legzanp. Bann legzanp i ede montre ki kalite latitid bann dimoun i annan. En kantite parmi zot i zis vwar Zezi konman en dimoun ki konn rakont bann zoli zistwar e fer bann mirak. Zot pa vwar li konman zot Senyer ki zot devret obei e swiv san ekspekte keksoz an retour. (Lik 6:46, 47) Zot pa anvi sanz zot pwennvi ni zot fason viv. Zot pa oule ki sa mesaz i tous zot leker o profon.

Pour reponn kestyon bann disip, Zezi i dir: “Sanmenm ki mon koz avek zot par servi legzanp, parski zot vwar me i konmsi zot pa vwar nanryen, zot tande me i konmsi zot pa tann nanryen e zot pa konpran nanryen. Profesi Izai pe ganny akonplir lo sa bann dimoun. I ti dir: ‘. . . Parski leker sa bann dimoun in vin dir.’” —Matye 13:13-15; Izai 6:9, 10.

Me sa pa aplik pour tou bann ki pe ekout Zezi. I eksplike: “Par kont, zot zot ere parski zot lizye i vwar e zot zorey i tande. Parski laverite mon dir zot, en kantite profet ek zom drwat ti anvi vwar sa bann keksoz ki zot pe vwar me zot pa ti vwar e zot ti anvi tann sa ki zot pe tande me zot pa ti tann sa bann keksoz.”—Matye 13:16, 17.

- 
- ◇ Ki sa senk legzanp ki Zezi ti servi o konmansman?
  - ◇ Aköz Zezi ti servi legzanp pour ansennyen?
  - ◇ Ki mannyer bann disip Zezi ti diferan avek larestan dimoun dan lafoul?
  - ◇ Ki mannyer Zezi ti eksplik sa legzanp lo fermye ki senm lagrenn?



Sa 12 zapot ek lezot disip fidel i pare pour aprann e les sa lansennyman tous zot leker. Sanmenm sa Zezi i dir: “Zot, Bondye in permet zot pour konpran bann sekre Rwayonm lesyel, me i pa leka pour sa bann dimoun.” (Matye 13:11) Vi ki zot senserman anvi konpran, Zezi i eksplik son bann disip ki sa legzanp lo sa fermye ki senm lagrenn i vedir.

Zezi i dir: “Sa lagrenn i parol Bondye.” (Lik 8:11) Later i reprezant leker. Zot bezwen konpran sa de pwen pour konpran sa legzanp.

Zezi i eksplike ki i arive avek bann lagrenn ki tonm o bor semen kot dimoun i marse. I dir: “Dyab i vini e tir sa parol dan zot leker pour ki zot pa krwar e ganny sove.” (Lik 8:12) Ler Zezi i koz lo bann lagrenn ki pous lo ros, i pe refer avek bann dimoun ki byen kontan resevwar parol me sa parol pa pran rasin dan fon zot leker. “Ler problem ek persekisyon i vini aköz sa

mesaz,” zot tonbe. “Letan zot ganny teste,” petet aköz zot ganny presyon sorti kot zot fanmir ek lezot, zot abandonn lafwa.—Matye 13:21; Lik 8:13.

Ki sa bann lagrenn ki tonm dan pikan i reprezante? Zezi i dir son bann disip ki sa i refer avek bann dimoun ki’n tann mesaz, me “traka lavi ek pouvwar larises i anbet” zot e fer zot tonbe. (Matye 13:22) Sa mesaz ti’n tous zot leker, me aprezan i’n ganny toufe e i pa kapab raport fri.

Dernyen kalite later ki Zezi i koz lo la i sa bon later. Sa i refer avek bann ki tann sa mesaz, pran li aker e vreman konpran ki i vedir. Ki rezilta sa i anmennen pour zot? Zot “prodwir fri.” Vi ki zot sityasyon i diferan aköz laz ouswa lasanté, zot pa kapab fer menm kantite. Enn i raport 100 fwa plis, sa lot 60 e sa lot ankor 30. Bondye i beni “sa bann ki annan en leker bon





e pir ki tann sa mesaz, gard li e prodwir fri avek landirans.”—Lik 8:15.

Vi ki bann disip in demann Zezi pour eksplik zot sa bann legzanp, i bezwen ki zot in vremen kontan ler i eksplik zot. La aprezan zot pli byen konpran sa bann legzanp. Zezi i anvi ki zot konpran sa bann legzanp pour ki an retour zot kapab ansenny lezot dimoun laverite. I demann zot: “Dimoun pa met en lalanp anba en pannyen ouswa anba lili, non? Pa i ganny met anler lo en keksoz?” Alor Zezi i donn zot sa konsey: “Sa enn ki annan zorey pour ekoute, i devret ekoute.”—Mark 4:21-23.

#### ZOT GANNY BENI POUR GANNY PLIS LENSTRIKSYON

Apres ki Zezi in eksplik bann disip legzanp sa fermye ki senm lagrenn, zot anvi konn plis. Zot demande: “Eksplik nou legzanp move zerb dan plantasyon.”—Matye 13:36.



Pa sa i montre en gran diferans ant sa bann disip ek larestan dimoun ki ti lo lans. I paret ki sa bann dimoun i ekoute me zot pa anvi konnen ki sa bann legzanp i vedir e ki mannyer zot kapab aplik zot. Pour zot i ase pour zis ekout sa bann legzanp. Zezi i montre diferans ant sa bann dimoun ki ti pe ekout li ek son bann disip ki’n vin kot li pour aprann plis. I dir:

“Pran aker sa ki zot pe tande. Mezir ki zot pe

servi pour lezot sanmenm mezir ki pou ganny servi pour zot, wi, zot pou menm ganny plis ankor.” (Mark 4:24) Bann disip pe ekout byen sa ki Zezi i dir. Bann disip pa’n servi en pti mezir me zot in donn bokou lentere ek latansyon Zezi e zot ganny beni par ganny plis lenstriksyon ek leksplikasyon. Alor, pour reponn kestyon son bann disip lo sa legzanp dible ek move zerb, Zezi i eksplike:

“Sa zonm ki senm bon lagrenn i Garson zonm, sa plantasyon i lemond. Sa bon lagrenn i bann garson Rwayonm, me move zerb i bann garson sa enn mesan e sa lennmi ki ti senm move zerb i Dyab. Rekolt i ler lafen sa lemond i pros e bann ki fer rekolt i bann lanz.”—Matye 13:37-39.

Apres ki Zezi in eksplike ki sak keksoz dan sa legzanp i vedir, i dir ki arive a lafen dan sa legzanp. Dan letan lafen, bann ki fer rekolt, andotmo bann lanz, pou separ dible avek move zerb, setadir bann vre “garson Rwayonm” avek bann fo Kreyen. “Bann ki drwat” pou ganny rasanble e pli tar zot pou briye “dan Rwayonm zot Papa.” Ki pou arive avek “bann garson sa enn mesan”? Zot pou ganny detrir, sanmenm sa zot “plere e grens zot ledan.”—Matye 13:41-43.

Apres sa, Zezi i donn son bann disip ankor trwa legzanp. Premyerman i dir: “Rwayonm





lesyel i parey en trezor ki'n ganny kasyet dan en plantasyon. En zonm ti trouv sa trezor e i ti rekasyet li. Parski i ti dan lazwa, i ti al vann tou sa ki i ti annan e i ti aste sa plantasyon.”—Matye 13:44.

I dir osi: “Rwayonm lesyel i osi parey en marsan ki pe vwayaze pour rod bann zoli perl. Desito ki i ti vwar en perl ki annan en gran valer, deswit i ti al vann tou sa ki i ti annan e aste sa perl.”—Matye 13:45, 46.

Dan tou le de legzanp, Zezi i koz lo en dimoun ki pare pour fer sakrifis pour ganny sa ki vremen annan valer. Sa marsan pa tarde pour vann “tou sa ki i ti annan” pour aste zis en perl ki annan en gran valer. Bann disip Zezi i kapab konpran sa legzanp konsernan en perl presye. Osi, sa zonm ki trouv trezor ki'n ganny kasyet dan en plantasyon i “vann tou sa ki i ti annan” pour aste li. Dan tou le de ka, Zezi pe koz lo en

keksoz ki annan en gran valer e dimoun i kapab ganny sa keksoz e fer li vin son trezor. Sa i kapab ganny konpare avek bann sakrifis ki en dimoun i fer pour satisfere son bezwen spirityel. (Matye 5:3) Serten parmi bann ki pe ekout Zezi donn sa bann legzanp in deza montre ki zot pare pour fer en kantite zefor pour satisfere zot bezwen spirityel e vin son vre disip.—Matye 4: 19, 20; 19:27.

Finalman, Zezi i konpar Rwayonm lesyel avek en lasenn ki atrap diferan kalite pwason. (Matye 13:47) Ler zot triy bann pwason, bann ki bon i ganny mete dan bann pannyen e bann ki pa bon i ganny zete. Zezi i dir ki i pou parey ler lafen sa lemond i pros. Bann lanz pou separ sa ki move ek sa ki drwat.

Ler Zezi ti pe prese, i konmsi i ti pe lapes dan en sans spirityel. I ti kriy son bann premye disip pour ki zot osi zot “lapes dimoun.” (Mark 1:17) Par kont, i dir ki sa legzanp konsernan lasenn i aplik pour en letan a lavenir, “ler lafen sa lemond i pros.” (Matye 13:49) Alor bann zapot ek lezot disip ki pe ekout Zezi i kapab konpran ki i annan bann keksoz vremen enteresan ki pou arive a lavenir.

Bann ki'n tann sa bann legzanp ki Zezi in donner ler zot ti dan bato i ganny plis byenfe ankor. Zezi pe montre ki i pare pour “eksplik tou keksoz avek son bann disip an prive.” (Mark 4:34) I parey “en zonm, en met lakour, ki tir bann nouvo keksoz ek bann vye keksoz dan son stor.” (Matye 13:52) Zezi pa servi sa bann legzanp zis pour montre ki i konn ansennyen. Plito, i pe partaz bann laverite ki parey bann trezor presye avek son bann disip. I vremen en ansennyan san konparezon!

- 
- ◇ Dan sa legzanp lo dible ek move zerb, ki sa zonm ki senm lagrenn, sa lennmi, bann ki fer rekolt, plantasyon, bon lagrenn ek move zerb i reprezante?
  - ◇ Ki sa trwa lezot legzanp ki Zezi ti donner e ki nou kapab aprann avek zot?



# ZEZI I KALMI EN TANPET LO LANMER

MATYE 8:18, 23-27 MARK 4:35-41 LIK 8:22-25





Ozordi, Zezi in pas en gran lazournen dan son minister. Aswar, i dir son bann disip: “Annou al lot kote lanmer,” ki an fas Kapernaoum. —Mark 4:35.

Bann Zerazyen i reste dan les Lanmer Galile. Sa landrwa i osi ganny apele Dekapol. Bann lavil Dekapol i ganny bokou enfliyanse par kiltir Grek, me i osi annan en kantite Zwif ki reste laba.

Bann dimoun i vwar ler Zezi i kit Kapernaoum. Zot anbank dan bann kannot pour al lot kote lanmer zot osi. (Mark 4:36) Anfet, Lanmer Galile pa sitan gran, i parey en gran lak delo dou, ki environ 21 kilomet longer e en larzer pa plis ki 12 kilomet. Me i ase fon.

Menm si Zezi i en zonm parfe, nou kapab konpran ki par ler i fatige aköz tou sa ki i pe fer dan son minister. Alor apre ki zot konmans navige, Zezi i alonze deryer dan kannot, i poz son latet lo en zorye e tonm dormi.

Serten zapot i bann maren byen kalipa, me sa vwayaz pa fasil. I annan bann montanny toultour sa lak e laplipar ditan delo Lanmer Galile i ase so. Par ler, divan fre sorti anler lo montanny i desann e melanz avek sa ler so ki par lao delo. Aköz sa, bann gro tanpet i deklare en sel kou lo lanmer. Sanmenm sa ki arive la. I pa pran bokou letan avan bann laroul i konmans kraz lo kannot. Kannot i konmans “ranpli avek delo e zot lavi [i] an

danze.” (Lik 8:23) Kantmenm sa, Zezi i kontinyen dormi!

Bann zapot i bann bon maren ki’n deza pas dan movetan e zot fer zot mye pour anpes kannot koule. Me safwasi, nanryen pa marse. Zot konmans per pour zot lavi. Zot lev Zezi e dir li: “Senyer, sov nou, nou pe al mor!” (Matye 8:25) Bann disip i per ki zot pou noye!

Ler Zezi i leve, i dir son bann zapot: “Akoz zot sitan per koumsa? Aköz zot lafwa i ptigin?” (Matye 8:26) Apre Zezi i donn lord divan ek lanmer: “Silans! Reste trankil!” (Mark 4:39) Sa gro divan i aret soufle en sel kou e lanmer i kalmi. (Mark ek Lik i rakont sa levennman enpresyonan. Zot koz lo sa ki Zezi in fer premye e apre zot dir ki bann disip i mank lafwa.)

Zis mazin lefe ki sa i annan lo bann disip! Zot in fek vwar lanmer ki ti vreman move kalmi kompletman. Zot ganny en nespes lafreyer. Zot dir avek kanmarad: “Lekel li? Menm divan ek lanmer i obei li.” Zot ariv lot kote lanmer sen e sof. (Mark 4:41–5:1) Petet lezot kannot ki ti pe swiv in nobou retourn lo kote was lakot.

Pa i ankourazan pour konnen ki Garson Bondye i annan kontrol lo letan! Konman Lerwa, ler Zezi pou kompletman kontrol later, tou dimoun pou viv an sekirite, aköz i pou napa okenn dezans natirel!

- 
- ◇ Aköz i ti annan bann gro tanpet lo Lanmer Galile?
  - ◇ Ki bann disip Zezi ti fer dan sa gro tanpet?
  - ◇ Ki nou aprann avek sa mirak Zezi?

## ZEZI I ANNAN POUVWAR LO EN KANTITE DEMON

MATYE 8:28-34 MARK 5:1-20 LIK 8:26-39

Anmezir ki bann disip i ariv lo lans apre sa move leksperyans ki zot in pas atraver lo lanmer, zot ganny en sok! De zonm vyolan posede par demon i sorti dan en simityer pa tro lwen e tay kot Zezi! Labib i koz plis lo enn ant sa de zonm, petet akoz i pli vyolan e i'n ganny kontrole par bann demon pour plis letan.

Sa pov zonm i al partou touni. Lizour konman aswar i “kriye e koup koup son lekor avek ros dan simityer e dan montanny.” (Mark 5:5) I sitan sovaz ki bann dimoun i per pour pas dan sa semen. Serten dimoun in esey anmar li, me i kas bann lasenn ek minot ki zot met lo son lanmen ek lipye. Napa personn ki annan ase lafors pour met li anba kontrol.

Sa zonm i vin kot Zezi e tonm azenou devan li. Bann demon ki pe kontrol li i fer li kriye: “Ki ou'n vin fer isi ou Zezi, Garson Bondye Tre O? Fer serman par Bondye vivan pour pa tourmant mwan.” Zezi i montre ki annan pouvwar

lo bann demon. I donn zot lord: “Demon, sorti dan sa zonm.”—Mark 5:7, 8.

An realite, i annan en kantite demon ki pe kontrol sa zonm. Ler Zezi i demande, “Ki mannyer ou apele?” zot reponn: “Mon apel Larme, akoz i annan en kantite nou.” (Mark 5:9) Dan en larme oubyen Lezyon Romen, i annan plizyer milye solda, alor i annan en kantite demon ki'n zwenn ansanm pour fer sa zonm soufer e zot pran plezir dan son soufrans. Zot sipliy Zezi “pour ki i pa donn lord pour zot al dan labim.” I paret ki zot realize ki pou arrive avek zot ek zot sef, Satan, a lavenir.—Lik 8:31.

Dan zalantour, i annan apepre 2,000 koson ki pe manze. Dapre Lalwa, koson i enpir e bann Zwif pa devret ni menm sonny zot. Bann demon i dir: “Anvoy nou dan sa bann koson pour ki nou a kapab antre dan zot.” (Mark 5:12) Zezi i dir zot ale e zot antre dan sa bann koson. Ler





sa i arive, sa 2,000 koson i taye, tonm dan pre-pisipis e noye dan lanmer.

Ler bann dimoun ki pe okip bann koson i vwar sa, zot taye pour al rakont bann dimoun dan lavil ek lakanpanny. Bann dimoun i vin vwar sa ki'n arive. Ler zot vini, zot vwar sa zonm ki ti posede par demon. La i la pe asize o bor Zezi, i'n met en lenz lo li e son lespri in bon.

Bann dimoun ki tann sa ki'n arive oubyen ki vwar sa zonm i per aköz zot pa konnen ki Zezi i kapab fer ankor. Zot sipliy Zezi pour kit sa landrwa. Ler Zezi pe anbank dan kannot pour ale, sa zonm ki ti posede par demon i sipliy Zezi pour vin avek li. Me Zezi i dir li: "Al kot ou

fanmir e rakont zot tou sa ki Zeova in fer pour ou e sa konpasyon ki i'n demontre anver ou." —Mark 5:19.

Normalman Zezi i demann bann dimoun ki i'n geri pour pa dir personn aköz i pa anvi ki dimoun i annan lafwa dan li zis aköz bann zis-twar eksitan ki dimoun i rakonte. Dan sa ka, sa mirak lo sa zonm ki ti posede par demon i donn levidans konkret ki Zezi i annan pwisans Bondye e osi sa zonm i kapab pres avek dimoun ki petet Zezi pa pou kapab zwenn li menm. Deplis, temwanniaz sa zonm pou kapab demanti okenn fo rapor konsernan lanmor sa bann koson. Alor sa zonm i ale e i konmans anons partou dan Dekapol sa ki Zezi in fer pour li.



- ◇ Aköz Labib i koz plis lo enn ant sa de zonm ki ti posede par demon?
- ◇ Ki bann demon i konnen konsernan zot lavenir?
- ◇ Aköz Zezi ti demann sa zonm ki ti posede par demon pour rakont lezot sa ki i'n fer pour li?



## EN MADANM I GANNY GERI LER I TOUS LENZ ZEZI

MATYE 9:18-22 MARK 5:21-34 LIK 8:40-48

Bann Zwif ki pe reste lo lakot nor was Lanmer Galile i tande ki Zezi in retournen sorti Dekapol. I kapab ki en kantite dimoun in tande ki Zezi in kalmi en tanpet lo lanmer e ki i'n geri en zomn posede par demon. Alor, "en gran lafoul" i rasanble o bor lanmer, petet dan zanmirant Kapernaoum pour akeyir Zezi. (Mark 5:21) Ler i poz lipye lo lans, tou dimoun i kontan pour vwar li.

Zairis, en zofisye sinagog, petet sa enn ki Kapernaoum i parmi bann dimoun ki byen anv i vwar Zezi. I tonm azenou devan Zezi e sipliy li plizyer fwa: "Mon pti fiy i gravman malad. Silvouple vini e poz ou lanmen lo li pour ki i a byen e viv." (Mark 5:23) Zairis i annan zis en fiy ki annan zis 12 an e i kontan li en kantite. Ki mannyer Zezi pou reazir anver son siplikasyon?—Lik 8:42.

Ler i pe al kot lakaz Zairis, Zezi i trouv li dan en lot sityasyon fer lapenn. Bann dimoun ki pe swiv Zezi i eksite aköz zot pe mazine si zot pou vwar li fer en lot mirak. Par kont, i annan en madanm parmi zot ki pe mazin son prop problemn lasante.

I fer 12 an depi ki sa madanm Zwif pe soufer avek lemorazi. I'n rod led avek plizyer dokter e i'n depans tou son larzan lo bann tretman ki zot in donn li. Me tousala pa'n abouti dan nanryen. Anfet, son problemn in "vin pli pir."—Mark 5:26.

Nou tou nou kapab konpran ki son problemn pa zis fer li fay me i osi vremen anbarasan pour li. An zeneral dimoun pa tro tro koz lo en maladi koumsa. An plis ki sa, dapre Lalwa

Moiz, ler en madanm i perdi disan i ganny konsidere enpir pour fer servis Bondye. Si en dimoun i tous li oubyen son lenz ki'n tase avek disan, i bezwen bennyen e i ganny konsidere konman enpir ziska aswar.—Levitik 15:25-27.

Sa madanm in 'tann sa ki dimoun pe rakonte lo Zezi' e la aprezan i pe rod Zezi. Vi ki sa madanm i enpir, i pas dan lafoul byen trankil pour dimoun pa remark li e i dir dan li menm: "Si zis mon tous son lenz, mon pou byen." Ler i tous lenz Zezi, deswit i santi ki i'n aret perdi disan! I'n ganny 'geri avek sa maladi ki'n fer li soufer.'—Mark 5:27-29.

Ler sa i arive Zezi i dir: "Lekel ki'n tous mwan?" Ki mannyer ou krwar sa madanm i santi ler i tann sa? Me li Pyer dan zar pe koriz Zezi i dir: "Ansenyan, i annan en lafoul ki pe pouse otour ou." Alor aköz Zezi i demande "Lekel ki'n tous mwan?" Zezi i eksplike: "I annan en dimoun ki'n tous mwan, parski mon'n santi ki en lafors in sorti dan mwan." (Lik 8:45, 46) Zezi in santi ki en pe son lafors in sorti dan li pour geri sa madanm.

Sa madanm i realize ki i'n ganny dekouver, alor i tonm azenou devan Zezi, pe tranble avek lafreyer. La devan tou dimoun, i dir laverite lo son maladi e ki i fek ganny geri. Avek lanmour, Zezi i rekonfort li: "Mon fiy, ou lafwa in fer ou byen. Al anpe, ou'n geri avek sa maladi ki ti pe fer ou soufer."—Mark 5:34.

I kler ki sa Enn ki Bondye in swazir pour diriz later i zantiy, bon, i annan konpasyon e i pa zis kontan bann dimoun me i osi annan sa pouvwar pour ed zot!



- ◇ Akoz bann dimoun ti rasanble pour akeyir Zezi ler i ti retourn Kapernaoum?
- ◇ Ki problemm en madanm ti annan e akoz i ti pe rod led Zezi?
- ◇ Ki mannyer sa madanm ti ganny geri e ki mannyer Zezi ti rekonfort li?

## EN PTI FIY I GANNY RESISITE!

MATYE 9:18, 23-26 MARK 5:22-24, 35-43 LIK 8:40-42, 49-56

Zairis i vwar ler Zezi i geri sa madanm ki annan lemorazi. Alor i mazinen ki sirman Zezi i kapab ed son fiy osi, menm si i krwar ki son “fiy in bezwen fini mor aprezan.” (Matye 9:18) Eski Zezi i ankor kapab ed li?

Ler Zezi i ankor pe koz avek sa madanm ki i’n geri, serten zonm sorti dan lakour Zairis i vin dir li: “Ou fiy in mor! I pa nesese deranz Anse-nyan plis ki sa, non?”—Mark 5:35.

Sa nouvel in bezwen tap Zairis! Menm si dimoun i annan bokou respe pour li dan son kominote, sa zonm pa kapab fer nanryen. Son sel fiy in mor. Me Zezi i tande sa ki zot in dir Zairis. I vire, get Zairis e dir: “Pa bezwen per, zis annan lafwa.”—Mark 5:36.

Apres sa, Zezi i al avek Zairis kot li. Ler zot ari-ve zot tann en kantite tapaz. Bann dimoun ki’n

rasanble pe fer leokri, plere e tap zot lestoman akoz zot dan latristes. Zezi i antre anndan e dir zot en keksoz enkrwayab: “Sa zanfan pa’n mor me i pe dormi.” (Mark 5:39) Ler zot tann sa, bann dimoun i riy Zezi. Zot konnen ki sa fiy in vreman mor. Par kont, Zezi pou servi pwisans Bondye pour montre ki i posib pour dimoun mor reviv zis parey en dimoun ki pe dormi i kapab leve.

Aprezan Zezi i fer tou dimoun al deor, eksepte Pyer, Zak, Zan ek paran sa fiy ki’n mor. I pran sa senk dimoun avek li e zot al kot sa fiy i ete. I pran lanmen sa fiy e dir: “‘*Talita koumi,*’ ki ve-dir: ‘Pti fiy, mon dir ou, leve!’” (Mark 5:41) Deswit sa pti fiy i leve e konmans marse. Zairis ek son madanm pa oule krwar sa ki’n arive, zot dan en gran lazwa! Pour montre ki sa fiy i vreman vivan, Zezi i demann zot pour donn li en pe manze.

Normalman, Zezi i demann bann ki i geri pour pa dir person sa ki i’n fer pour zot e i demann paran sa fiy pour fer parey. Me kantmenm sa, paran sa fiy ek lezot dimoun ki la i fann sa nouvel “partou dan sa rezyon.” (Matye 9:26) Si ti ou, pa ou osi ou ti pou koz lo la avek tou dimoun? Dapre sa ki’n ganny rikorde dan Labib, sa i dezyenm rezireksyon ki Zezi in fer.



- ◇ Ki dimoun ti dir Zairis e ki mannyer Zezi ti ankouraz li?
- ◇ Ler Zezi ek Zairis ti ariv kot li, ki ti pe arive laba?
- ◇ Akoz Zezi ti dir ki sa pti fiy ki ti’n mor ti pe zis dormi?







# MENM SI ZEZI I FER MIRAK NAZARET, ZOT PA KRWAR DAN LI

MATYE 9:27-34; 13:54-58 MARK 6:1-6



Ozordi, Zezi in fer en kantite keksoz. Apre ki i'n vwayaze sorti Dekapol, i'n geri sa madanm ki ti annan lemorazi e resisit fiy Zairis. Me son la-zournen pa fini la. Ler Zezi i kit lakour Zairis, de zonm aveg i swiv li e zot pe kriye: "Garson David, pran pitye pour nou."—Matye 9:27.

Lefet ki zot kriy Zezi "Garson David," sa bann zonm i montre ki zot krwar ki Zezi i en desan-dans David ki pou vin Lerwa e ki i Mesi. I paret ki Zezi i inyor zot, petet pour gete si zot pou perseste e se sa ki zot fer. Ler Zezi i antre dan en la-kaz, sa de zonm i swiv li e zot osi zot antre. Zezi i demann zot: "Eski zot annan lafwa ki mon kapab fer sa?" Zot reponn avek lasirans: "Wi, Senyer." Alor Zezi i tous zot lizye e dir: "Ki sa ki zot in demande i arive dapre zot lafwa."—Matye 9:28, 29.

En sel kou zot vwar kler! Parey i'n fer pli boner, Zezi i demann zot pour pa dir lezot sa ki i'n fer. Me zot telman kontan ki pli tar zot koz lo li avek tou dimoun dan sa rezyon.

Ler sa de zonm pe kit sa landrwa, dimoun i anmenn en zonm ki pa kapab koze akoz i pose-de par demon. Zezi i sas sa demon e deswit sa zonm i konmans koze. Lafoul i enpresyonnen ler zot vwar sa e zot dir: "En keksoz koumsa pa'n zanmen deza arive Izrael." Bann Farizyen osi i la. Zot pa kapab dir ki Zezi pa'n fer sa bann mirak, alor zot fer menm lakizasyon ki avan e zot demande kote i ganny pouvwar pour fer sa. Zot dir: "Se avek pouvwar sef demon ki i sas demon."—Matye 9:33, 34.

Pa bokou letan apre, Zezi i retourn Nazaret, me safwasi i avek son bann disip. Apepre enn an pase, i ti ansenny dan sinagog laba. O konmansman bann dimoun ti enpresyonnen avek sa ki Zezi ti dir me pli tar son lansennyman ti ofans zot e zot ti esey touy li. Ankore enn fwa Zezi i esey ed bann dimoun dan sa landrwa kot i'n grandi.

Zour Saba, i retourn dan Sinagog pour ansennyen. En kantite dimoun i etonnen e zot menm demande: "Kote sa zonm in ganny sa lasazes e ki mannyer i kapab fer sa bann mirak? Pa i garson sa sarpantye li? Son manman pa i apel Mari e son bann frer pa zot apel Zak, Zozef, Simon ek Zida? Son bann ser, pa zot tou zot la avek nou? Alor, kote i'n ganny tousala?"—Matye 13:54-56.

Pour sa bann dimoun, Zezi i zis parey nenport ki dan sa landrwa. I konmsi dan zot menm zot pe dir: 'Pa nou'n vwar li grandi, ki mannyer i kapab Mesi?' Alor, malgre tou sa ki zot vwar, lasazes Zezi ek bann mirak ki i pe fer, zot pa krwar dan li. Vi ki zot abitye avek Zezi menm son fanmir pa krwar dan li. Sanmenm sa Zezi i dir: "En profet i ganny loner partou eksepte dan son prop lavil e dan son prop lakour."—Matye 13:57.

Zezi i sirprann ki zot telman mank lafwa. Alor i pa fer okenn mirak laba "eksepte poz son lanmen lo detrwa dimoun malad e geri zot."—Mark 6:5, 6.

- 
- ◇ Ler sa de zonm aveg ti kriy Zezi "Garson David," ki sa ti montre?
  - ◇ Ankore enn fwa, ki bann Farizyen ti dir konsernan bann mirak Zezi?
  - ◇ Ki mannyer Zezi ti ganny akeyir Nazaret e akoz?



## ZEZI I PRESE GALILE E FORM SON BANN ZAPOT

MATYE 9:35-10:15 MARK 6:6-11 LIK 9:1-5

Zezi in pres en kantite pandan sa de-z-an. Eski la aprezan i pou fer mwens e konmans repoz en pe? O kontrè, Zezi i fer plis e al ‘dan tou lavil ek vilaz [Galile], i ansenny zot dan bann sinagog, anons sa bon nouvel lo Rwayonm e i geri dimoun ki annan tou sort maladi ek tou sort problem lasante.’ (Matye 9:35) Sa ki i vwar i fer li asire ki i bezwen fer plis ankor dan son minister. Be ki mannyer i pou fer sa?

Anmezir ki Zezi i vwayaze, i vwar ki bann dimoun i bezwen sa led ek rekonfor spirityel. Zot ganny maltrete e rezete parey bann mouton ki napa en berze. Zezi i pran pitye pour zot e i dir son bann disip: “Wi, rekolt i gran, me i annan en ptigin travayer. Pour sa rezon, sipliy Met

rekolt pour anvoy plis travayer pour anmas son rekolt.”—Matye 9:37, 38.

Zezi i konnen ki mannyer pour fer plis pour ed sa bann dimoun. I kriy son 12 zapot e i fer zot al prese de par de. Apre sa, i donn zot bann lenstriksyon kler: “Pa al kot lezot nasyon e pa antre dan okenn lavil Samariten, me plito, kontinyen al ver bann mouton perdi pep Izrael. Ler zot ale, prese e dir: ‘Rwayonm lesyel in aprose.’”—Matye 10:5-7.

Zot pou pres lo sa Rwayonm ki Zezi ti koz lo la dan son lapriyer model. ‘Rwayonm in aprose’ dan sa sans ki sa Lerwa ki Bondye in swazir, setadir Zezi Kri i la avek zot. Me kwa ki pou montre ki bann disip Zezi i vreman bann



reprezantan sa Rwayonm? Zezi i donn zot pwi-sans pour geri bann malad e menm resisit bann ki'n mor e zot fer tousala pour nanryen. Si sa i leka, ki mannyer bann zapot pou kapab aste bann keksoz ki zot bezwen, parey zot manze pour sak zour?

Zezi i dir son bann disip ki zot pa devret pran okenn traka pour keksoz materyel dan sa kanpanny predikasyon. Zot pa devret anmenn lor, larzan oubyen kwiv dan zot portmonnen. Zot pa ni menm bezwen en sak manze oubyen de lenz, ni en lot per sandalet. Akoz? Zezi i asir zot: "En travayer i merit son manze." (Matye 10:10) Bann dimoun ki zot zwenn ki apresye zot mesaz pou donn bann disip sa ki zot bezwen. Zezi i dir: "Dan nenport ki lakaz ki zot antre ladan, reste laba ziska ki zot kit sa landrwa." —Mark 6:10.

Zezi i osi donn lenstriksyon lo konman zot devret anons sa mesaz Rwayonm avek dimoun ki zot zwenn. I dir: "Ler ou antre dan lakaz, dir tou dimoun ki reste la, 'Ki lape i avek zot.' Si dimoun dan sa lakaz i merite, ki zot lape i reste avek sa bann dimoun, me si sa bann dimoun pa merite, ki sa lape i retourn avek zot. Partou kot dimoun pa resevwar zot oubyen pa ekout zot, ler zot pe kit sa lakaz oubyen sa lavil, tap zot lipye pour tir lapousyèr." —Matye 10:12-14.

I menm kapab arive ki tou dimoun dan en



lavit oubyen vilaz pa aksepte zot mesaz. Ki pou arive avek sa landrwa? Zezi i dir ki zot pou ganny zize. "Laverite mon dir zot, Zour Zizman, i pou pli sever pour sa lavil ki pour Sodonm ek Gomor." —Matye 10:15.

- ◇ Kan ki Zezi ti konmans en lot kanpanny predikasyon Galile e ki i ti remarke konsernan bann dimoun?
- ◇ Ki mannyer Zezi ti anvoy son 12 zapot e ki lenstriksyon i ti donn zot?
- ◇ Dan ki sans 'Rwayonm in aprozè'?

## ZEZI I PREPAR SON BANN DISIP POUR PRESE MENM SI ZOT POUR GANNY PERSEKITE

MATYE 10:16–11:1 MARK 6:12, 13 LIK 9:6

Zezi i anvoy son bann zapot de par de e i donn zot bann bon lenstriksyon lo konman pour prese. Me i osi fer plis ki sa. I averti zot ki i pou annan dimoun ki pou opoz zot: “Ekoute! Mon pe anvoy zot parey mouton parmi lelou . . . Fer atansyon, parski dimoun pou anmenn zot ankour e pou fwet zot dan zot sinagog. Zot pou ganny anmennen devan bann gouverner ek lerwa akoz mwan.”—Matye 10:16-18.

Alor i kapab arive ki bann disip Zezi i pas atraver bann gro persekisyon, me i fer en promes avek zot. I asir zot: “Ler zot ganny anmennen devan lakour, pa bezwen trakase ki mannyer zot pou koze e ki zot pou dir, parski sa letan zot pou konnen ki pour dir akoz pa zis zot ki pou koze, me se avek led lespri sen zot Papa ki zot pou koze. Deplis, frer pou denons frer pour li ganny touye, papa pou denons son zanfan e zanfan pou vir kont paran e fer zot ganny met amor. Tou dimoun pou ay zot akoz zot port mon non, me sa enn ki’n andire ziska lafen pou ganny sove.”—Matye 10:19-22.

Vi ki prese i sa travay pli enportan ki son bann disip i annan pour fer, Zezi i dir ki zot bezwen reste pridan koumsa zot kapab reste lib pour fer sa travay. I dir: “Ler zot ganny perse-

kite dan en lavil, sov dan en lot, parski laverite mon dir zot, zot pa pou zanmen kapab fini pres dan tou lavil ek vilaz Izrael avan ki Garson zonn i arive.”—Matye 10:23.

Pa Zezi i donn son 12 zapot bann bon lenstriksyon, lavertisman ek lankourazman! Anfet, sa bann parol i osi aplik pour bann ki pou partisip dan predikasyon apre ki Zezi i mor e resisite. Nou konn sa akoz Zezi i dir ki “*tou* dimoun pou ay” son bann disip, pa zis bann dimoun ki bann zapot in pres avek. Deplis, dan Labib, nou pa lir ki pandan sa kanpanya predikasyon Galile bann zapot ti ganny anmennen devan bann gouverner ek lerwa, ni ki zot fanmir ti denons zot pour ganny touye.

I kler ki Zezi pe mazin lavenir ler i donn sa bann lenstriksyon avek son bann zapot. Pran par egzanp sa fraz kot Zezi i dir ki son bann disip pa pou fini pres dan tou lavil ek vilaz “*avan* ki Garson zonn i arive.” La Zezi pe montre ki son bann disip pa pou fini prese konsernan Rwayonn Bondye avan ki li konman Lerwa dan lesyel i vin ziz later.

Ler bann zapot pe prese, zot pa devret sirprann si dimoun i opoz zot parski Zezi i dir: “En disip pa pli siperyer ki son ansenyan, ni en les-





klav pa pli siperyer ki son met.” Sa ki Zezi pe esey dir i kler. Bann dimoun i tret li dan en move fason e persekit li akoz i pres lo Rwayonm Bondye, alor zot osi zot pou pas parey. Par kont i ankouraz zot: “Pa bezwen per bann ki kapab touy ou me ki pa kapab anpes ou reganny lavi a lavenir, plito, per sa enn ki kapab detri ou dan Zeenn.”—Matye 10:24, 28.

Zezi in kit en bon legzanp dan sa domenn. I pa ti per pour mor e i pa ti kas son fidelite avek sa enn ki annan tou pouvwar, Zeova. Se Bondye Tou Pwisan ki kapab detri en dimoun (setadir i pou napa lespwar pour viv a lavenir) oubyen ki kapab resisit li pour ganny lavi eternal. Pa sa in bezwen ankouraz son bann zapot!

Zezi i servi en legzanp pour montre ki kantite Bondye i pran swen avek bann disip Zezi. I dir: “Pa de sren i vann pour en pti sou? Poutan, napa ni enn parmi zot ki tonm ater san ki zot Papa i konnen. . . . Alor, pa bezwen per, zot annan bokou plis valer ki en kantite sren.”—Matye 10:29, 31.

Sa mesaz ki bann disip Zezi pe anonse pou diviz bann fanmir parski serten dan fanmir pou aksepte sa mesaz tandis ki lezot non. Zezi i eksplike: “Pa krwar ki mon’n vin anmenn lape lo later.” I demann kouraz pour en manm fanmir aksepte laverite dan Labib. “En dimoun ki annan plis lanmour pour son papa oubyen son



manman ki pour mwan pa diny pour vin mon disip e en dimoun ki annan plis lanmour pour son garson oubyen son fiy ki pour mwan pa diny pour vin mon disip.”—Matye 10:34, 37.

Par kont, i annan serten ki pou byen akeyir son bann disip. I dir: “En dimoun ki donn zis en ver delo fre avek sa enn ki pli pti parmi mon bann disip, zis akoz i mon disip, vreman mon dir zot, i pou sirman ganny son rekonpans.”—Matye 10:42.

Bann zapot in ganny byen prepare. Zezi in donn zot bann lenstriksyon, lavertisman ek lankourazman, alor zot al “dan tou vilaz, enn apre lot pe anons sa bon nouvel e geri bann dimoun partou.”—Lik 9:6.

- ◇ Ki lavertisman Zezi ti donn son bann disip?
- ◇ Ki lankourazman ek rekonfor Zezi ti donn son bann disip?
- ◇ Akoz bann lenstriksyon Zezi i osi aplik pour nou ozordi?

# EN DIMOUN I GANNY TOUYE PANDAN EN PARTI LANNIVERSER NESANS

MATYE 14:1-12 MARK 6:14-29 LIK 9:7-9

Pandan ki bann zapot Zezi pe prese Galile, sa premye dimoun ki ti koz lo Zezi napa sa menm liberte parey zot. I fer preski de-z-an depi ki Zan ki batize i dan prizon.

Lerwa Erod Antipas in pran Erodyad konman son madanm menm si i ti madanm son demi frer Filip. Erod ti divorce avek son premye madanm pour li marye avek Erodyad. Erod i swadizan swiv Lalwa Moiz e dapre sa lalwa, sa ti en maryaz adilter. Zan ti dir an piblik ki sa i mal. Sanmenm sa Erod in fer Zan ganny mete dan prizon, petet akoz Erodyad in demann li pour fer sa.

Erod pa konnen ki i pou fer avek Zan akoz bann dimoun i “konsider Zan konman en profet.” (Matye 14:5) Me Erodyad li i konnen ki i anvi fer. I “pe gard rankin kont Zan” e anfet i pe menm rod en fason pour fer li ganny met amor. (Mark 6:19) Finalman, i ganny sa sans.

Zis avan Lapak lannen 32, Erod i fer en gro parti pour son lanniverser nesans. Tou son bann o zofisyé, zofisyé larme ek dimoun o plase Galile i ganny envite. Pandan sa festen, Salome, fiy Erodyad ki i ti gannyen avek Filip, son msye avan, i ganny demande pour vin danse pour bann envite. Tou dimoun i kontan lafason ki i’n danse.

Erod i telman kontan ki i dir avek fiy Erodyad: “Nenport keksoz ki ou demann mwan, mon pou donn ou.” I menm fer serman avek li: “Nenport

keksoz ki ou demann mwan, mon pou donn ou, menm ziska lanmwatye mon rwayonm.” Avan ki Salome i reponn, i al demann son manman: “Ki mon devret demann li?”—Mark 6:22-24.

La loportinite ki Erodyad pe rode! Deswit i dir li: “Latet Zan sa enn ki batize.” Osito, Salome i retourn kot Erod e i dir li: “Mon oule ki la konmela menm ou donn mwan latet Zan ki batize lo en plato.”—Mark 6:24, 25.

Sa i fer Erod vreman tris, me tou son bann envite in tann sa serman ki i’n fer avek Salome. I anbarase pour pa fer sa ki Salome in demann li, menm si sa i vedir touy en dimoun inosan. Alor, Erod i anvoy en gard kot prizon. Sa i vreman fer lapenn! Pa bokou letan apre, sa gard i tournen avek latet Zan lo en plato. I donn Salome sa plato e Salome i anmenn sa plato kot son manman.

Ler bann disip Zan i tande ki’n arive, zot vin pran lekor Zan e anter li. Apre sa, zot les Zezi konnen ki’n arive.

Pli tar, Erod i per ler i tande ki Zezi pe geri bann dimoun e sas bann demon. I mazine si sa zonm ki pe fer tou sa bann keksoz, setadir Zezi, i an realite Zan ki batize ki’n “ganny resisite.” (Lik 9:7) I pour sa rezon ki Erod Antipas i vreman anvi vwar Zezi. Sa i pa akoz i anvi tann Zezi prese. Plito, Erod i anvi vwar Zezi pour konnen si sa ki i pe mazine i vre oubyen non.

- 
- ◇ Akoz Zan ki batize ti dan prizon?
  - ◇ Ki mannyer Erodyad ti nobou fer Zan ganny touye alafendefen?
  - ◇ Apre ki Zan ti’n ganny touye, akoz Erod Antipas ti anvi vwar Zezi?





# ZEZI I DONN MANZE PLIZYER MILYE DIMOUN AVEK ZIS DETRWA DIPEN EK PWASON

MATYE 14:13-21 MARK 6:30-44 LIK 9:10-17 ZAN 6:1-13

Bann zapot in pas en bon moman dan zot kanny predikasyon Galile e zot rakont Zezi “tou bann keksoz ki zot ti’n fer e ansennyen.” I fer sans alor ki zot fatige. Par kont, zot pa ni menm annan letan pour manze akoz i telman annan en kantite dimoun pe ale vini. Alor Zezi i dir: “Vini, annou al dan en landrwa kot nou pou tousel e repoz en pe.”—Mark 6:30, 31.

Zot anbank dan en kannot, tre probab pre avek Kapernaoum e zot depas Betsayda e al ver en landrwa trankil, dan les Larivyier Zourden. Par kont, en kantite dimoun i vwar zot ler zot pe ale e lezot osi i tann sa nouvel. Zot tou zot taye lo lans e zot ariv sa landrwa avan ki kannot i arive.

Ler Zezi pe debarke dan kannot, i vwar sa lafoul e son leker i fermal akoz zot parey

bann mouton ki napa berze. Alor i konmans “ansenny zot en kantite keksoz” lo Rwayonm. (Mark 6:34) I osi geri “bann malad.” (Lik 9:11) Letan i pas vit e bann disip i vin kot li e dir: “Sa landrwa i izole e tar pe fer, fer lafoul ale pour zot kapab aste manze dan bann vilaz.”—Matye 14:15.

Zezi i reponn: “Sa bann dimoun pa bezwen ale, zot, donn zot en keksoz pour manze.” (Matye 14:16) Zezi i deza konnen ki i pe al fer, me kantmenm, sa i demann Filip en kestyon pour teste li: “Kot nou pou aste dipen pour donn sa gran lafoul?” Zezi i annan rezon demann Filip sa kestyon akoz i sorti Betsayda ki pa tro lwen. Toudmenm, aste dipen pa pou rezourd sa probleman akoz i annan apepre 5,000 zonn. I menm kapab annan de fwa plis dimoun si nou azout bann madanm ek zanfan. Filip i reponn: “Laval 200 denye dipen pa pou ase pour tou dimoun ganny menm en pti morso.”—Zan 6:5-7.

Petet pour montre ki i enposib pour donn tou dimoun manze, Andre i dir: “I annan en pti garson la ki annan senk dipen lorz ek de pti pwason. Me sa pou ase pour tou sa dimoun?”—Zan 6:9.

I sezon prentan, zis avan Lapak lannen 32 e sa landrwa i kouver avek zerb. Zezi i demann son bann disip pour dir bann dimoun asiz lo zerb par group 50 ek 100. I pran sa senk dipen ek sa de pwason e remersye Bondye. Apre sa, i kas bann dipen an morso e partaz sa de pwason. Zezi i donn sa dipen ek pwason son bann disip pour zot partaz avek bann dimoun. Sa ki etonan, se ki tou dimoun i manze vant plen!

Pli tar, Zezi i dir son bann disip: “Anmas tou bann restan pour ki nanryen pa ganny gaspiye.” (Zan 6:12) Zot ranpli 12 pannyen avek bann morso ki reste!





- ◇ Akoz Zezi ti rod en landrwa trankil pour son bann zapot?
- ◇ Kote Zezi ek son bann disip ti ale e ki ti arive ler zot ti ariv laba?
- ◇ Ki bann disip ti demann Zezi pour fer e ki Zezi ti fer?



# EN DIRIZAN KI KAPAB KONTROL LANMER EK DIVAN

MATYE 14:22-36 MARK 6:45-56 ZAN 6:14-25





Ler Zezi i fer mirak pour donn manze plizyer milye dimoun, sa i fer en gran lenpak lo zot. Zot dir: “Li menm sa Profet ki devret vin dan lemond,” sa Mesi ki pou vin en bon dirizan. (Zan 6:14; Deterononm 18:18) Alor bann dimoun i anv i fer li vin lerwa pardfors.

Me Zezi i realize ki bann dimoun pe mazin fer. Alor i fer lafoul ale, apre i dir son bann disip anbarke dan kannot. Kot zot pou ale? Zot sipoze al dan direksyon Betsayda pour al Kapernaoum. Tandis ki li Zezi, i al dan montanny li tousel pour priye aswar.

Dan laklerte lalin avan lizour i fer, Zezi i vwar kannot dan lwen. I annan en gro divan pe soufle, bann laroul pe bat bat lo kannot e bann zapot ‘pe ganny difikilte pour naz zaviron vi ki divan i kont zot.’ (Mark 6:48) Zezi i desann lo montanny e konmans mars lo delo pour al ver zot. Zot in “naz zaviron pour apepre senk a sis kilomet.” (Zan 6:19) Bann disip i vwar Zezi pe pas o bor zot me zot krwar ki i en vizyon. Zot per e zot kriye: “Sa i en vizyon!”—Mark 6:49.

Pour kalme zot, Zezi i dir: “Pran kouraz! Mwan sa, pa bezwen per.” Me Pyer i dir: “Senyer, si vreman ou sa, donn mwan lord pour mars lo delo pour vin kot ou.” Zezi i reponn li: “Vini!” Alor Pyer i sorti dan kannot e i vreman mars lo delo pour al kot Zezi. Me ler i vwar sa tanpet, Pyer i per e i konmans koule. I kriye:

“Senyer, sov mwan!” Zezi i anvoy son lanmen, atrap li e dir li: “Ou ki annan en ptigin lafwa, akoz ou’n doute?”—Matye 14:27-31.

Pyer ek Zezi i anbarke dan bato e divan i kalmi. Bann disip i etonnen. Me eski zot devret sirprann? Si zot ti’n konpran “sinifikasyon mirak ki [Zezi] ti’n fer avek dipen” pli boner son lavey, ler i ti donn plizyer milye dimoun manze, zot pa ti pou’n sirprann ki i kapab mars lo delo e kalmi divan. La apreman zot tonm azenou devan li e dir: “Ou vreman Garson Bondye.”—Mark 6:52; Matye 14:33.

I pa pran bokou letan pour zot ariv sid Kapernaoum, dan en landrwa ki apel Zenezaret, en landrwa vreman zoli kot i annan en ta fri ki pouse. Zot met kannot lo mouyaz e zot al lo lans. Bann dimoun i rekonnèt Zezi e zot dir lezot dan zalantour. Zot tou zot konmans anmenn bann dimoun malad kot li. Ler sa bann dimoun i tous zis son bout lenz anba, zot konpletman ganny geri.

Antretan, sa lafoul ki ti’n vwar Zezi fer mirak ler i ti donn manze plizyer milye dimoun i realize ki i’n ale. Alor ler bann kannot sorti Tiberiyad i ariv dan sa landrwa, bann dimoun i anbarke e al Kapernaoum pour rod Zezi. Ler zot vwar li, zot demann li: “Ansenyan, ki ler ou’n ariv la?” (Zan 6:25) Zezi i reprimann zot. Nou pou vwar akoz apre.

- 
- ◇ Apre ki Zezi ti donn manze plizyer milye dimoun, ki zot ti anv i fer avek li?
  - ◇ Akoz bann disip pa ti devret sirprann ki Zezi i kapab mars lo delo e kalmi divan?
  - ◇ Ki ti arive apre ki Zezi ti ariv lo lans o bor Kapernaoum?

## ZEZI I “DIPEN LAVI”

ZAN 6:25-48

Ler Zezi ti dan les Lanmer Galile, i ti fer en mirak e nouri plizyer milye dimoun. Apre sa, i ti sove ler zot ti anvi fer li vin lerwa. Sa zour swar, i ti mars lo delo ler lanmer ti move e i ti sov Pyer ki ti osi mars lo delo, me ki ti konmans koule akoz i ti mank lafwa. Zezi ti osi kalmi divan e petet ler i'n fer sa, sa in anpes son bann disip fer nofraz.

La Zezi in retourn lo kote was Lanmer Galile, dan rezyon Kapernaoum. Bann dimoun ki Zezi in donn manze i rod li e zot demande: “Ki ler ou'n ariv la?” Zezi i reprimann zot akoz zot pe zis rod li pour ganny manze. I ankouraz zot pour “pa travay pour manze ki gate, me travay pour manze ki pa gate e ki donn lavi eternal.” Alor zot demande: “Ki nou devret fer pour ganny laprouvasyon Bondye?”—Zan 6:25-28.

I posib ki zot pe mazin bann keksoz ki Lalwa i demann zot pour fer, me sa ki Zezi pe refer avek i pli enportan. I dir zot: “Pour ganny laprouvasyon Bondye, demontre lafwa dan sa enn ki i'n anvoye.” Par kont, malgre tou sa ki Zezi in fer, bann dimoun pa demontre lafwa dan Zezi. Zot demann li pour fer en siny pour zot kapab krwar dan li. Zot demande: “Ki ou pou fer? Nou zanset ti manz lamann dan dezer, zis parey i'n ganny ekrir: ‘I ti donn zot dipen sorti dan lesyel.’”—Zan 6:29-31; Psonm 78:24.

Ler bann dimoun i demann Zezi pour fer en mirak, i fer zot konnen lekel ki donn li pouvwar pour fer sa: “Mon dir zot laverite, Moiz pa ti donn zot sa vre dipen sorti dan lesyel, me mon Papa i donn zot sa vre dipen ki sorti dan lesyel. Parski dipen Bondye i sa enn ki sorti dan lesyel pour donn lavi lemonn.” Me zot pa konpran sa ki Zezi pe esey dir zot, alor zot dir:

“Senyer, toultan donn nou sa dipen.” (Zan 6:32-34) Me ki “dipen” Zezi pe koz lo la?

I eksplike: “Mwan menm sa dipen lavi. Sa ki vin kot mwan pa pou zanmen lafen ankore e sa ki demontre lafwa dan mwan pa pou zanmen swaf ankore. Me parey mon'n dir zot, menm si zot in vwar mwan zot pa krwar. . . . Mon'n desann sorti dan lesyel, pa pour fer mon prop lavolonte me pour fer lavolonte sa enn ki'n anvoy mwan. La lavolonte sa enn ki'n anvoy mwan, se ki mon pa perdi ni menm enn dan tou sa ki i'n donn mwan, me ki mon devret resisit zot dernyen zour. Parski sa i lavolonte mon Papa, ki sa ki aksepte Garson e demontre lafwa dan li pou ganny lavi eternal e mon pou resisit li dernyen zour.”—Zan 6:35-40.

Ler bann Zwif i tann sa, zot ankoler e zot konmans kritik li. Zot pa konpran ki mannyer Zezi i kapab dir ki i “dipen sorti dan lesyel.” (Zan 6:41) Pour zot, i en senp zonn ki son paran i sorti dan lavil Nazaret, Galile. Bann dimoun i demande: “Eski sa pa Zezi garson Zozef, pa nou konn son papa ek son manman?”—Zan 6:42.

Zezi i dir: “Aret konplent antre zot. Personn pa kapab vin kot mwan si mon Papa ki'n anvoy mwan pa atir li ver mwan e mon pou resisit li dernyen zour. La sa ki'n ganny ekrir dan liv bann Profet: ‘Zot tou zot pou ganny ansennyen par Zeova.’ Tou sa ki'n ekout e aprann avek Papa i vin kot mwan. Pa ki okenn imen in vwar Papa, zis sa enn ki'n sorti kot Bondye ki'n vwar Papa. Vreman mon dir zot laverite, sa ki krwar dan mwan pou ganny lavi eternal.”—Zan 6:43-47; Izai 54:13.

Avan sa, ler Zezi ti koz avek Nikodenm, i ti mansyonnen ki pour en dimoun kapab ganny



lavi eternel i bezwen annan lafwa dan Garson zonn. I ti dir: “Nenport ki ki demontre lafwa dan [sel Garson Bondye] pa ganny detrir me i ganny lavi eternel.” (Zan 3:15, 16) Me la apre-zan i pe koz avek en lafoul e i pe dir zot ki pour zot kapab ganny lavi eternel, zot bezwen ak-septe rol Zezi dan plan Bondye. Ni lamann, ni

sa dipen ki zot abitye manze Galile pa pou kapab donn zot lavi eternel. Alor, ki mannyer zot kapab ganny lavi eternel? Zezi i repet memm parol: “Mwan memm dipen lavi.”—Zan 6:48.

Zezi i kontinyen koz lo sa memm size plis ankor dan sinagog Kapernaoum, annou vwar ki i annan pour dir.

- ◇ Ler nou pran an konsiderasyon bann keksoz ki ti’n fek arive, akoz i pa ti aproprye ki bann dimoun i demann Zezi pour donn zot en siny?
- ◇ Ki mannyer bann Zwif ti reazir ler Zezi ti dir ki i sa vre “dipen sorti dan lesyel”?
- ◇ Akoz sa dipen ki Zezi ti koz lo la i pli siperyer ki lamann oubyen dipen?



## PAROL ZEZI I SOK EN KANTITE DIMOUN

ZAN 6:48-71

Dan en sinagog Kapernaoum, Zezi i dir ki i sa vre dipen sorti dan lesyel. Aparaman sa i en kontinyasyon sa konversasyon ki Zezi ti annan dan les Lanmer Galile avek bann dimoun ki ti'n manz dipen ek pwason laba.

Zezi i dir: "Zot zanset ti manz lamann dan dezer, pourtan zot ti mor." De lot kote, i eksplike: "Mwan menm sa dipen ki donn lavi. Sa ki manz sa dipen pou viv pour touzour e anfet, sa dipen ki mon pou donner pour ki lemonn i viv, se mon laser."—Zan 6:48-51.

Prentan lannen 30, Zezi ti dir Nikodenm ki Bondye i telman kontan lemonn ki i'n donn son Garson konman Sover. La apreze Zezi i met lanfaz lo lefet ki tou dimoun i bezwen manz son laser, setadir demontre lafwa dan sa sakrifis ki i pou fer. Koumsanmenm ki tou dimoun i kapab ganny lavi eternal.

Par kont, bann dimoun pa dakor avek parol Zezi. Zot demande: "Ki mannyer sa zonn i kapab donn nou son laser pour manze?" (Zan 6:52) Zezi i oule ki zot konpran ki sa ki i pe dir i senbolik. Zezi i eksplik zot sa ki i pe esey dir.

"Vreman mon dir zot laverite, si zot pa manz laser Garson zonn e bwat son disan, zot pa pou ganny lavi. Sa ki manz mon laser e bwat mon disan i a ganny lavi eternal, . . . parski mon laser i sa vre nouritir e mon disan sa vre labwason. Sa ki manz mon laser e bwat mon disan i ini avek mwan e mwan mon ini avek li."—Zan 6:53-56.

Pour bann Zwif, sa i vreman mal! Zot kapab krwar ki Zezi pe ankouraz zot pour manz dimoun oubyen pour kas lalwa Bondye ki defann servi disan. (Zenez 9:4; Levitik 17:10, 11)

Me Zezi pa pe dir zot vreman manz son laser oubyen bwat son disan. I pe montre ki tou dimoun ki oule viv eternalman i bezwen demontre lafwa dan sa sakrifis ler i pou ofer son lekor parfe e vers son disan. Me menm en kantite son bann disip pa konpran sa lansennyman. Serten i dir: "Sa lansennyman i soka, lekel ki kapab ekout sa?"—Zan 6:60.

Vi ki Zezi i realize ki serten son bann disip pe konplent, i demande: "Eski sa i soka pour zot? Me ki zot pou dir si zot vwar Garson zonn pe mont kot i ti ete avan? . . . Sa ki mon'n dir zot i an armoni avek lespris ek laverite. Me i annan serten parmi zot ki pa krwar." Ler bann disip i tann sa, en kantite parmi zot i ale e zot aret swiv li.—Zan 6: 61-64.

Alor Zezi i demann son 12 zapot: "Zot pa anvie ale zot osi?" Pyer i reponn: "Senyer, kot lekel nou pou ale? Ou annan parol lavi eternal. Nou'n krwar e konnen ki ou sa Enn ki Sen sorti kot Bondye." (Zan 6:67-69) Menm si Pyer ek lezot zapot pa vreman konpran sa ki Zezi pe ansennyen lo sa size, zot reste fidel. Pa sa i en zoli legzanp!

Menm si Zezi i kontan larepons Pyer, i fer sa remark: "Pa mon'n swazir douz zot, pourtan, enn parmi zot i fer kalonmi." (Zan 6:70) Zezi pe koz lo Zida Iskaryot. I posib ki i apartir sa moman ki Zezi i remarke ki Zida pe konmans pran en move lapant.

Be kantmenm sa, Zezi i bezwen vreman kontan pour konnen ki Pyer ek lezot zapot osi pa'n aret swiv li e ki zot pare pour kontinyen fer sa travay ki sov lavi, zis parey Zezi pe fer.



- ◇ Dan ki sans Zezi ti dir ki i pe donn dimoun son laser? Ki mannyer en dimoun i kapab ‘manz laser Zezi’?
- ◇ Akoz bann dimoun ti soke ler zot tann sa ki Zezi ti dir lo son laser ek disan, me ki pwen i ti pe fer resorti?
- ◇ Ler en kantite dimoun ti aret swiv Zezi, ki mannyer Pyer ti reazir?

## KWA KI VREMAN FER EN DIMOUN ENPIR?

MATYE 15:1-20 MARK 7:1-23 ZAN 7:1

Anmezir ki Lapak lannen 32 i aproses, Zezi i okipe pe ansenny bann dimoun Galile. I tre probab ki apre sa, i al Zerizalenm pour Lapak, zis parey Lalwa Bondye i demande. Par kont, Zezi i fer atansyon akoz bann Zwif pe rod touy li. (Zan 7:1) Apre sa, i retourn Galile.

I tre probab ki Zezi i Kapernaoum ler bann Farizyen ek profeser lalwa i vin kot li sorti Zerizalenm. Akoz zot in fer sa vwayaz? Zot pe rod fason pour zot kapab akiz Zezi konmkwa i'n kas en lalwa relizye. Zot demann li: "Akoz ou bann disip pa swiv tradisyon nou zanset? Par egzanp, zot pa lav zot lanmen avan manze." (Matye 15:2) Bondye pa ti zanmen demann son pep pour swiv sa koutim 'lav lanmen ziska kot koud.' (Mark 7:3) Par kont, pour bann Farizyen, sa i en gran lofans.

Olye reponn zot bann lakizasyon direkte-man, Zezi i koz lo lafason ki zot zot volonterman kas Lalwa Bondye. I demann zot: "Akoz zot tradisyon i fer zot pa obei komannman Bondye? Par egzanp, Bondye ti dir, 'Onor ou papa ek ou manman' e 'Sa ki ensilte son papa oubyen son manman i devret ganny met amor.' Me zot zot dir, 'En dimoun ki dir son papa oubyen son manman: "Tou sa ki mon annan pour kapab ed ou, mon'n fini donn li avek Bondye," andotmo, sa dimoun pa oblize onor son papa ditou.'"—Matye 15:3-6; Egzod 20:12; 21:17.

Bann Farizyen i dir ki larzan, propriyete ek okenn keksoz ki'n ganny dedye avek Bondye i pour tanp, alor i pa kapab ganny servi pour en lot keksoz. Me an realite, sa kado ki'n ganny dedye i ancor pour sa dimoun. Par egzanp, en garson i kapab dir ki son larzan ek propriyete i "*korbann*," setadir ki sa larzan oubyen propriyete i en kado ki'n ganny dedye avek Bon-

dye oubyen tanp. Alor, sa kado i devret ganny servi premyerman pour tanp. Sa garson i ancor kapab servi sa larzan oubyen propriyete, me i dir ki i pa kapab servi sa bann keksoz pour ed son paran aze ki dan bezwen. Koumsa, i nepli annan sa responsabilite pour pran swen avek zot.—Mark 7:11.

Zezi i annan rezon ankoler ki zot in sanz Lalwa Bondye e i dir: "Zot in fer parol Bondye napa valer akoz zot tradisyon. Ipokrit, lzai ti annan rezon ler i ti profetiz sa lo zot: 'Sa pep i onor mwan avek zot labous, me zot leker i vremen lwen avek mwan. I anven ki zot pe kontinyen ador mwan, parski se bann komannman zonn ki zot ansennyen.'" Bann Farizyen pa dir nanryen ler zot tann Zezi kritik zot. Alor i demann lafoul pour vin pli pre pour zot kapab tande. I dir: "Ekoute e konpran sa parol: Pa sa ki antre dan labous en zonn ki fer li vin enpir, me sa ki sorti dan son labous ki fer li vin enpir."—Matye 15:6-11; lzai 29:13.

Pli tar, ler zot dan en lakaz, bann disip i demann Zezi: "Eski ou konnen ki bann Farizyen pa'n kontan sa ki ou'n dir?" Zezi i dir: "Tou plant ki mon Papa ki dan lesyel pa'n plante pou ganny derasinen. Les zot, zot bann gid aveg. Alor, si en aveg i gid en lot aveg, tou le de pou tonm dan trou."—Matye 15:12-14.

I paret ki Zezi i sirprann ler Pyer, delapar bann disip, i demann Zezi pour eksplike kwa ki fer en dimoun enpir. Zezi i reponn: "Eski zot pa konnen ki sa ki en dimoun i manze i desann dan vant e apre i sorti dan lekor? Par kont, sa ki sorti dan labous i sorti dan leker e se sa bann keksoz ki fer en dimoun vin enpir. Par egzanp, se dan leker ki sorti bann move rezonnman, mert, adilter, imoralite seksyel, vol, fo





temwannaz e koz an mal lo keksoz sakre. Se sa bann keksoz ki fer en dimoun vin enpir, me pran en repa san lav lanmen pa fer en dimoun vin enpir.”—Matye 15:17-20.

Zezi pa pe dir ki nou pa devret prop e i pa ni pe dir ki en dimoun pa devret lav son lan-

men avan i prepar en repa oubyen avan i manze. Plito, i pe kondann lipokrizi bann sef relizye ki met an plas bann tradisyon imen pour ki zot pa bezwen swiv bann lalwa Bondye. Anfet, se bann move aksyon ki sorti dan leker en dimoun, ki fer li enpir.

- 
- ◇ Ki lakizasyon bann Farizyen ek profeser lalwa ti fer?
  - ◇ Parey Zezi ti fer resorti, ki mannyer bann Farizyen ti montre ki zot ti volonterman kas Lalwa Bondye?
  - ◇ Kwa ki vreman fer en zonn enpir?

## ZEZI I GERI EN PTI FIY EK EN ZONM SOURD

MATYE 15:21-31 MARK 7:24-37

Aprè ki Zezi in kondann bann Farizyen akòz zot swiv bann tradisyon ki dan zot lavantaz, li ek son bann disip i kit sa landrwa. I al Tir ek Sidon, dan rezyon Fenisi ki plizyer kilomet dan nor was.

Zezi i trouv en lakaz pour zot reste me i pa oule ki personn i konnen ki i laba. Pourtan, menm dan sa landrwa i enposib pour dimoun pa vwar li. En madanm Grek, ki'n ne dan sa landrwa, i al kot Zezi e i konmans sipliy li: "Pran pitye pour mwan, Senyer, Garson David. Mon fiy pe soufer en kantite akòz i posede par en demon."—Matye 15:22; Mark 7:26.

Aprè en serten letan, bann disip Zezi i dir li: "Fer li ale, parski i kontinyen kriye la deryer nou." Zezi i eksplike akòz i pe inyòr sa madanm: "Mon pa'n ganny anvoye kot personn eksepté kot bann mouton perdi pep Izrael." Me sa madanm pa arete. I tonm azenou devan Zezi e i sipliy li: "Senyer, ed mwan!"—Matye 15:23-25.

Aparaman pour teste son lafwa, Zezi i koz parey bann Zwif ki annan en move pwennvi lo dimoun sorti dan lezot nasyon. I dir: "I pa byen pour pran dipen bann zanfan e zet avek bann pti lisyen." (Matye 15:26) Zezi i servi sa lekspresyon "*pti lisyen*" pour montre ki i annan konpasyon pour bann dimoun ki pa Zwif. Son ton lavwa ek son figir i bezwen montre ki Zezi i annan konpasyon.

Olye ofanse, avek limilite sa madanm i servi sa ki Zezi fek dir konsènan prezidis ki bann Zwif i annan pour reponn: "Wi, Senyer, me selman bann pti lisyen i manz bann pti bout dipen ki tonm anba latab zot met." Zezi i vwar ki i annan en bon leker e i dir: "Ou annan en

gran lafwa madanm! Ki sa ki ou'n demande i arive." (Matye 15:27, 28) Sanmenm sa ki arive, menm si sa fiy pa la! Ler sa madanm i retourn kot li, i vwar son fiy pe alonze lo lili. I'n ganny konpletman geri, 'sa demon in fini sorti dan li!'—Mark 7:30.

Zezi ek son bann disip i kit rezyon Fenisi, zot travers pei e al dan rezyon Larivyèr Zourden, dan nor. I paret ki zot travers Zourden kekpar dan nor Lanmer Galile e zot al dan rezyon Dekapol. Ler zot ariv laba, zot al lo en montanny me lafoul dimoun i vwar zot. Zot anmenn bann dimoun ki pe bwete, bann envalid, aveg ek kozpa kot Zezi e i geri zot. Bann dimoun i etonnen ler zot vwar sa e zot konmans glorifye Bondye Izrael.

Zezi i donn en latansyon spesyal en zonn sourd ki pa kapab koz byen. Zis mazinè ki mannyer sa zonn i kapab santi dan en gran lafoul. Petet Zezi i realize ki sa zonn i per, alor i anmenn li a lekar lwen avek lafoul. Ler zot tousel, Zezi i fer bann siny pour li konnen ki i pe al fer. I met son ledwa dan zorey sa zonn e apre ki i'n krase i tous lalang sa zonn. Apre, i get dan lesyel e i dir "'Efata,' setadir 'Ouver.'" Sa i fer ki sa zonn i kapab tande e i kapab koz byen. Zezi pa oule ki sa i ganny anonse an piblik, i prefere ki bann dimoun i met lafwa dan li dapre sa ki zot in vwar e tande.—Mark 7: 32-36.

Ler bann dimoun i vwar pwisans Zezi pour fer sa bann gerizon, sa i annan en gro lefe lo zot, 'zot vreman etonnen.' Zot dir: "I'n fer tou keksoz byen e i menm fer bann sourd tande e bann kozpa koze."—Mark 7:37.



- ◆ Akoz Zezi pa ti geri fiy sa madanm Fenisyen deswit?
- ◆ Ler Zezi ek son bann disip ti kit rezyon Fenisi, kote zot ti ale?
- ◆ Ki manyer Zezi ti demontre konpasyon dan lafason ki i ti tret en zonm sourd ki kozpa?



# ZEZI I FER DIPEN VIN EN KANTITE E I AVERTI KONSERNAN LELVEN BANN FARIZYEN

MATYE 15:32–16:12 MARK 8:1-21

En kantite dimoun in vin kot Zezi dan rezyon Dekapol ki dan les Lanmer Galile. Zot in vin ekout li e ganny geri. Zot in osi vin avek bann gran pannyen ki zot abitye met manze ladan.

Me pli tar, Zezi i dir son bann disip: “Mon leker i fermal ler mon vwar sa lafoul, parski i fer trwa zour depi ki zot avek mwan e zot napa nanryen pour manze. Si mon anvoy zot se zot lafen, zot pou tonm feb dan semen e serten parmi zot i reste lwen.” Me son bann disip i dir li: “Kote nou pou al ganny ase dipen dan sa landrwa izole pour donn manze tou sa dimoun?”—Mark 8:2-4.

Zezi i demande: “Konbyen dipen zot annan?” Bann disip i reponn: “Set ek detrwa pti pwason.” (Matye 15:34) Apre sa, Zezi i fer bann dimoun asiz ater. I pran dipen ek pwason, priy Bondye e apre i donn son bann disip pour zot distribye. Sa ki etonan, se ki tou dimoun i manze vant plen. Zot ranpli set gran pannyen avek sa ki reste, menm si i annan


a pepre 4,000 zomn ensi ki madanm ek zanfan ki’n manze!

Apre ki Zezi in fer bann dimoun ale, li ek son bann disip i pran kannot e al dan rezyon Magadann ki lo kote Lanmer Galile, lo lakot was. La bann Farizyen ansanm avek serten manm sa sekt Sadiseen i esey teste Zezi e demann li pour donn zot en siny sorti dan lesyel.

Zezi i realize ki zot pe esey fer, alor i dir: “Ler fernwanr pe fer, zot dir, ‘I pou fer botan demen akoz lesyel i rouz’ e dan bomaten zot dir, ‘I pou fer fre ozordi e lapli pou tonbe, parski lesyel i rouz me i sonm.’ Zot get bann siny dan lesyel e zot konn predir letan me zot pa kapab enterpret bann siny sa letan ki zot pe viv ladan.” (Matye 16:2, 3) Apre Zezi i dir bann Farizyen ek Sadiseen ki zot pa pou ganny okenn siny apard ki siny Zonas.

Zezi ek son bann disip i anbark dan en kannot e al ver Betsayda ki lo lakot nordes Lanmer Galile. Ler zot pe ale, bann disip i realize ki zot in oubliye anmenn ase dipen. Zot annan zis en dipen. Zezi pe mazin sa ki fek arive avek bann Farizyen ek bann Sadiseen ki siport Erod, alor i averti zot: “Gard zot lizye ouver e fer atansyon lelven bann Farizyen ek lelven Erod.” I paret ki bann disip i krwar ki Zezi pe refer avek lefet ki zot in oubliye anmenn dipen ler i mansyonn lelven. Zezi i realize ki zot in mal konpran e i dir zot: “Akoz zot pe argimante lo lefet ki napa dipen?”—Mark 8:15-17.

Pa tro lontan pase, Zezi ti donn plizyer milye dimoun dipen. Alor bann disip i devret konnen ki Zezi pa enkyet akoz napa ase dipen. I demann zot: “Eski zot pa rapel ler mon



ti kas sa senk dipen an morso pour donn sa 5,000 zonm, ki kantite restan manze zot ti anmase dan bann pannyen?” Zot reponn: “Douz.” Zezi i osi dir zot: “Ler mon ti kas sa set dipen an morso pour sa 4,000 zonm, ki kantite manze zot ti anmase dan bann gran pannyen?” Zot reponn: “Set.”—Mark 8:18-20.

Zezi i demande: “Akoz zot pa’n konpran ki mon pa ti pe koz avek zot lo dipen”? Alor i dir:

“Fer atansyon lelven bann Farizyen ek Sadiseen”.—Matye 16:11.

Finalman, bann disip i konpran sa ki Zezi pe esey dir. Lelven i ganny servi dan fermanstasyon e i fer dipen monte. La Zezi pe servi lelven pour reprezant sa ki mal. I pe averti bann disip konsernan “*lansennyman* bann Farizyen ek Sadiseen” ki kapab annan en move lefe lo bann dimoun.—Matye 16:12.



- ◇ Akoz bokou dimoun ti al kot Zezi?
- ◇ Ler Zezi ti koz lo lelven, ki bann disip ti krwar?
- ◇ Ki Zezi ti pe refer avek ler i ti koz lo “lelven bann Farizyen ek Sadiseen”?

## LEKEL GARSON ZONM?

MATYE 16:13-27 MARK 8:22-38 LIK 9:18-26

Zezi ek son bann disip i ariv Betsayda. La bann dimoun i anmenn en zonm aveg kot Zezi e sipliy li pour tous sa zonm e geri li.

Zezi i tyonbo lanmen sa zonm e anmenn li an deor vilaz. I kras lo son lizye e apre i demann li: “Ou vwar keksoz?” Sa zonm i reponn: “Mon vwar dimoun, zot parey bann pye dibwa me zot pe marse.” (Mark 8:23, 24) Zezi i poz son lanmen lo lizye sa zonm e i fer li vwar kler. La sa zonm i kapab vwar byen kler e Zezi i anvoy li kot li e dir li pa bezwen al dan sa vilaz.

Apre sa, Zezi ek son bann disip i al dan nor dan en rezyon ki apel Sezare Filip. Pour en dimoun al dan sa landrwa, i bezwen mont en zistans apepre 40 kilomet. Sa vilaz i 350 met par lao nivo delo sale. Ler zot pe monte, zot kapab vwar Montanny Ermonn ki dan nordes. I annan lanez lo latet montanny akoz sa montanny i byen o. I tre probab ki i pran detrwa zour pour ariv dan sa vilaz.


Pandan zot vwayaz, Zezi i al en landrwa li tousel pour priye. I reste zis apepre nef oubyen dis mwan avan ki Zezi i mor e i enkyet pour son bann disip. Resaman en kantite disip in aret swiv li e i paret ki lezot i konfize oubyen dezapwente. I kapab ki zot pa konpran akoz i pa'n les bann dimoun fer li vin lerwa oubyen akoz i pa ti oule donn zot en siny pour montre enn fwa pour tou ki i vreman ete.

Ler bann disip i vin kot Zezi ki pe priye, Zezi i demann zot: “Dapre sa ki dimoun i dir, lekel li Garson zonm?” Zot reponn: “Serten i dir ki se Zan ki batize, lezot i dir Eliya e lezot ankor i dir ki se Zeremi oubyen enn bann profet.” Parey nou vwar, bann dimoun i krwar ki Zezi i enn sa bann zonm ki'n resisite. Pour konn zot pwennvi, Zezi i demann son bann disip: “Be zot, ki zot dir mon

ete?” Deswit Pyer i reponn: “Ou menm Kris, Garson sa Bondye vivan.”—Matye 16:13-16.

Zezi i dir ki Pyer i annan rezon pour ere akoz Bondye in revel sa avek li. I osi dir li: “Ou ou Pyer e lo sa ros mon pou batir mon kongregasyon, lanmor pa pou ranport laviktwar lo li.” Zezi pe dir ki li menm ki pou batir en kongregasyon e lanmor pa pou gard prizonyen bann manm kongregasyon ki reste fidel ler zot lo later. I promet Pyer: “Mon pou donn ou bann lakle Rwayonm lesyel.”—Matye 16:18, 19.

Zezi pa pe donn Pyer premye plas parmi bann zapot e i pa fer li vin fondasyon kongregasyon. Zezi ki sa Ros ki kongregasyon pou ganny batir lo la. (1 Korentyen 3:11; Efezyen 2:20) Pyer li pou ganny trwa lakle. I pou annan sa privelez pour ouver oubyen donn diferan group dimoun sa loportinite pour antre dan Rwayonm lesyel.






Pyer pou servi sa premye lakle Lapannkot lannen 33 ler i montre bann Zwif ki'n repantir ek bann ki'n konverti dan larelizyon Zwif ki zot bezwen fer pour ganny sove. I pou servi sa dezeyenm lakle pour donn bann Samariten loportinite pour antre dan Rwayonm Bondye. Apre, lannen 36, Pyer pou servi sa trwazyenm lakle pour donn bann dimoun lezot nasyon ki pa'n ganny sirkonsi sa loportinite pour antre dan Rwayonm Bondye. Korney, son fanmir ek zanni ti premye dan sa group pour ganny sa loportinite.—Akt 2:37, 38; 8:14-17; 10:44-48.

Pandan sa konversasyon, bann zapot Zezi i enkyet ler i predir ki byento i pou soufer e mor Zerizalenm. Pyer pa pe konpran ki Zezi pou ganny resisite pour al dan lesyel, alor i anmenn li akote e koz severman avek li. I dir: “Pa bezwen dir sa Senyer, sa pa pou zanmen ariv avek ou.” Me Zezi i vir son led o avek li e dir: “Pas deriyer mwan Satan! Ou parey en ros dan mon semen, parski ou pa mazin parey Bondye me plito parey en zonm.”—Matye 16:22, 23.

Aprezan Zezi i kriy lezot dimoun apard ki son bann zapot e i eksplik zot ki i pa pou fasil pour swiv li. I dir: “Si en dimoun i oule swiv mwan, fodre i aret viv zis pour li menm e pran son potomartir e kontinyen swiv mwan. Parski, en dimoun ki oule sov son lavi pou perdi li, me sa ki perdi son lavi aköz mwan e aköz sa bon nouvel pou reganny li.”—Mark 8:34, 35.

Parey nou'n vwar, pour ki en disip Zezi i ganny son laprouvasyon, i bezwen annan kou-



raz e pare pour fer sakrifis. Zezi i dir: “Nenport dimoun dan sa zenerasyon enfidel e move ki onte aköz mwan e aköz mon parol, Garson Bondye osi pou onte aköz li kan i vini dan laglwar son Papa avek son bann lanz sen.” (Mark 8:38) Alor ler Zezi i vini, “i pou donn sakenn dapre son kondwit.”—Matye 16:27.

- ◇ Dapre serten, ki Zezi ti ete? Ki mannyer bann zapot ti vwar li?
- ◇ Ki lakle Pyer ti gannyen e ki mannyer sa bann lakle ti pou ganny servi?
- ◇ Ki mannyer Zezi ti reprimann Pyer e aköz?

# LAPARANS ZEZI I SANZE E ZOT VWAR KRIS DAN SON LAGLWAR

MATYE 16:28–17:13 MARK 9:1-13 LIK 9:27-36

Zezi pe ansenny bann dimoun dan rezyon Sezare Filip, en landrwa ki apepre 25 kilometre avèk Montanny Ermonn. Zezi i dir en keksoz ki sirprann son bann zapot. I dir: “Laverite mon dir zot, i annan serten ki pe debout la ki pa pou mor avan zot vwar Garson zonn pe vini dan son Rwayonn.”—Matye 16:28.

Petet bann disip pe demann zot lekòr ki Zezi pe esey dir. Apepre en semenn pli tar, i pran trwa parmi son bann zapot, Pyer, Zak ek Zan e i anmenn zot anler lo en montanny byen o. I tre probab ki i tar dan lannwit vi ki sa trwa zonn i ansonmey. Ler Zezi pe priye, son laparans i sanze la devan zot. Bann zapot i vwar son figir briye parey soley e son lenz i vin blan klate parey lalimyer.

Aprè de zonn ki ganny idantifye konman “Moiz ek Eliya” i aparet. Zot konmans koz avèk Zezi lo ‘son depar ki pou ariv Zerizalenm.’ (Lik 9:30, 31) I paret ki son depar pe refer avèk lanmòr Zezi ek son rezireksyon ki pou arive aprè. Zezi fek koz lo la pa tro lontan pase. (Matye 16:21) Sa konversasyon i montre ki kontrèman avèk sa ki Pyer ti’n ankouraz Zezi pour fer, i pa pe esey evit en lanmòr fermal.

La sa trwa zonn i nepli ansonmey, zot etonnen, zot gete e ekoute. Sa i en vizyon, me i paret telman reel ki Pyer i esey rod en fason pour partisip dan sa ki pe pase. I dir: “Ansenyan, i byen ki nou la. Les nou mont trwa latant, enn pour ou, enn pour Moiz e enn pour Eliya.” (Mark 9:5) Eski Pyer i anvi mont bann latant pour ki sa vizyon i dir plis letan?

Ler Pyer pe koze, en nyaz klate i kouver zot e zot tann en lavwa dan sa nyaz dir: “Sa i mon garson ki mon kontan, sa enn ki mon’n aprouve. Ekout li.” Ler bann zapot i tann lavwa Bondye, zot per e tonm azenou lafas anba me Zezi i dir zot: “Leve. Pa per.” (Matye 17:5-7) Ler zot fer sa, sa trwa zapot pa vwar personn ekseptè Zezi. Sa vizyon in fini. Ler lizour i fer e zot pe desann lo montanny, Zezi i donn zot sa lord: “Pa koz avèk personn lo sa vizyon ziska ki Garson zonn i ganny resisite.”—Matye 17:9.

Lefet ki Eliya ti dan sa vizyon, sa i fer bann zapot demann en keston. Zot dir: “Akoz bann profeser lalwa i dir ki Eliya i bezwen vin avan?” Zezi i reponn: “Eliya in fini vini, me zot pa ti rekonnèt li.” (Matye 17:10-12) Zezi pe koz lo Zan ki batize ki ti annan en rol en pe parey pour Eliya. Eliya ti prepar semen pour Elisa e Zan ti prepar semen pour Kris.

Sa vizyon i vremen ankourazan pour Zezi ek son bann zapot! Sa vizyon i donn en apersi laglwar Kris dan Rwayonn Bondye. Alor parey Zezi ti’n promet, bann disip ti vwar “Garson zonn pe vini dan son Rwayonn.” (Matye 16:28) Ler zot ti lo sa montanny, zot ti ‘vwar pour zot menm son laglwar merveye.’ Menm si bann Farizyen ti anvi vwar en siny ki prouve ki Zezi i sa Lerwa ki Bondye in swazir, i pa ti donn zot en siny. Me bann disip ki pros avèk Zezi in ganny drwa vwar Zezi sanz laparans e sa in konfirm bann profesè lo Rwayonn. Alor pli tar, Pyer ti kapab ekri: “Nou pli asire ki bann profesè pou ganny akonplir.”—2 Pyer 1:16-19.



- ◇ Ki manyer serten ti vwar Zezi pe vini dan son Rwayonm avan zot mor?
- ◇ Dan sa vizyon, ki Moiz ek Eliya ti koz lo la avek Zezi?
- ◇ Akoz sa vizyon kot laparans Zezi ti sanze ti ankourazan pour bann disip Kris?



## ZEZI I GERI EN GARSON POSEDE PAR DEMON

MATYE 17:14-20 MARK 9:14-29 LIK 9:37-43


Ler Zezi, Pyer, Zak ek Zan i desann sorti lo montanny, zot vwar en gran lafoul dimoun. Ki pe arive? Bann profeser lalwa in antour bann disip e zot pe argimante avek zot. Bann dimoun i sirprann ler zot vwar Zezi e zot taye pour al zwenn li. I demann zot: “Ki zot pe argimant lo la?”—Mark 9:16.

En zonm dan lafoul i azenou devan Zezi e i dir li: “Ansenyan, mon’n anmenn mon garson kot ou akoz en demon pe anpes li koze. Sak fwa ki sa demon i tourmant li, i zet li ater e i konmans kimen e grens son ledan e i perdi son lafors. Mon’n demann ou bann disip pour sas sa demon, me zot pa’n kapab.”—Mark 9:17, 18.

Aparaman bann profeser lalwa pe kritik bann disip akoz zot pa’n kapab geri sa gar-

son. Petet zot pe menm boufonn zot. Alor olye reponn sa papa ki enkyet, Zezi i koz avek lafoul. I dir: “Zot en zenerasyon move ki napa lafwa, ziska kan mon pou bezwen kontinyen avek zot? Ziska kan mon pou bezwen siport zot?” Sirman sa parol i aplik pour bann profeser lalwa ki pe fer problemm avek bann disip ler i pa ti la. Zezi i vire, get papa sa garson e dir: “Anmenn li kot mwan.”—Matye 17:17.

Ler sa garson i vin kot Zezi, sa demon dan li i zet li ater e fer li tonm kriz. Sa garson i kontinyen roul roule ater e kimen. Zezi i demann sa papa: “Depi kan i ganny sa?” I reponn: “Depi son lanfans, souvandfwa sa demon ti fer li tonm dan dife e osi dan delo pour touy li.” Sa papa i sipliye: “Si ou kapab




fer en keksoz, silvouple pran pitye pour nou e ed nou.”—Mark 9:21, 22.

Sa papa i dezespere akoz menm bann disip Zezi pa’n kapab ede. Zezi i servi parol sa zonm ki dan dezespwar pour ankouraz li: “Akoz ou dir, ‘Si ou kapab’? Be, tou keksoz i posib pour sa enn ki annan lafwa.” Deswit sa papa i kriye: “Mon annan lafwa! Me ed mwan pour annan plis lafwa!”—Mark 9:23, 24.

Zezi i vwar lafoul pe vin kot li an tayan. Tou dimoun pe gete, alor Zezi i koz severman avek sa demon: “Demon kozpa e sourd, mon donn ou lord, sorti dan li e pa antre dan li ankor!” Avan ki sa demon i sorti dan sa garson i fer li kriye e tonm kriz plizyer fwa. Apre sa, sa garson i reste la ater, i pa pe bouze. Ler bann dimoun i vwar sa, zot dir: “I’n mor!” (Mark 9:25, 26) Me ler Zezi i pran lanmen sa garson, i leve e ‘deswit i geri.’ (Matye 17:18) Nou kapab konpran ki bann dimoun i sirprann akoz sa ki Zezi in fer.

Pa tro lontan pase, ler Zezi ti anvoy bann disip prese, zot ti kapab sas bann demon. Alor la, an prive dan en lakaz zot demann li: “Akoz nou pa ti kapab sas sa demon?” Zezi i eksplike ki se akoz zot mank lafwa. I dir: “Sa kalite demon i sorti zis par lapriyer.” (Mark 9: 28, 29) Zot ti bezwen annan en lafwa for e priye ki Bondye i donn zot lafors e ed zot pour sas sa demon ki ti for.



Finalman Zezi i dir: “Laverite mon dir zot, si zot annan lafwa groser en lagrenn moutard, zot pou dir sa montanny, ‘Sorti la al laba’ e i pou ale e napa nanryen ki pou enposib pour zot.” (Matye 17:20) Pa en lafwa for i kapab ed nou fer en kantite!

Bann lobstak ek difikilte ki anpes nou fer progre dan servis Zeova i kapab paret parey en montanny ki nou pa kapab monte oubyen bouze. Wi, si nou devlop lafwa, nou kapab sirmont bann lobstak ek difikilte ki parey en montanny.

- ◇ Ki Zezi ti vwar ler i ti retournen sorti lo montanny?
- ◇ Akoz bann disip pa ti kapab sas sa demon dan sa garson?
- ◇ Ki nou lafwa i kapab permet nou pour fer?

## EN LESON ENPORTAN LO LIMILITE

MATYE 17:22-18:5 MARK 9:30-37 LIK 9:43-48

Aprè ki bann zapot ti ganny en vizyon kot Zezi ti sanz laparans e apre ki Zezi ti geri en garson ki ti posede par en demon dan rezyon Sezare Filip, i al dan direksyon Kapernaoum. I vwayaz zis avek son bann disip akòz i pa anvi ki lafoul i 'konnen kot i ete.' (Mark 9:30) Sa i donn li plis sans pour prepar son bann disip pour son lanmor e pour sa travay ki zot pou fer apre sa. I eksplike: "Garson zonn pou ganny trair par son lennmi, zot pou touy li e trwazyenm zour i pou resisite."—Matye 17:22, 23.

Sa pa sipoze en nouvo nide pour son bann disip. Pli boner, Zezi ti'n koz lo lefet ki i pou ganny touye, me Pyer ti'n refize krwar ki sa pou arive. (Matye 16:21, 22) Depli, trwa zapot ti'n vwar en vizyon kot Zezi ti sanz laparans e tann sa diskisyon konsernan "depar" Zezi. (Lik 9:31) Aprezan, son bann disip i "vremant tris" ler zot tann Zezi dir sa, menm si zot pa vremen konpran tou sa ki i pe dir. (Matye 17:23) Kantmenm sa, zot per pour demann li plis kestyon lo la.

Finalman zot ariv Kapernaoum, sa landrwa prensipal kot i reste diran son minister e kot laplipar son bann zapot i sorti. Laba, bann zonn ki kolekte taks i vin kot Pyer. Petet, zot oule akiz Zezi ki i pa pe pey taks, alor zot demande: "Ou ansenyan pa pey taks tanp li?"—Matye 17:24.

Pyer i reponn: "Wi i peye li." Ler i retourn kot lakaz, Zezi i deza konnen ki'n arive. Alor olye esper Pyer dir li, Zezi i demande: "Ki ou panse Simon? Lekel ki pey taks oubyen taks ladwann avek bann lerwa lo later? Zot bann garson oubyen bann etranze?" Pyer i reponn: "Bann etranze." Alor Zezi i fer sa

remark: "Vremen alor, bann garson pa pey okenn taks."—Matye 17:25, 26.

Papa Zezi i Lerwa liniver e sa Enn ki zot adore kot tanp. Alor, legalman, Garson Bondye pa bezwen pey taks tanp. Zezi i dir: "Me pour ki dimoun pa koz an mal lo nou, al o bor lanmer, zet ou laliny dan delo e dan labous sa premye pwason ki ou pou krose ou pou vwar en pyes larzan [en stater, lavalè kat drak]. Pran li e pey pour nou de."—Matye 17:27.



En pti pe letan apre, bann disip Zezi i zwenn ansanm e zot vin kot Zezi pour demann li lekel ki pou pli gran dan Rwayonn Bondye. Pourtan, pa zot menm ki pa tro bokou letan pase ti per pour demann Zezi konsernan son lanmor? Me la aprezan, zot pa per pour vin demann li kestyon konsernan zot lavenir. Zezi i konnen ki zot pe mazine. I en keksoz ki zot in deza diskite lo la ler zot ti pe swiv li pour al Kapernaoum. Alor i demann zot: "Ki zot ti pe argimant lo la dan semen?" (Mark 9:33) Bann disip i anbarase alor zot reste trankil akòz zot ti pe diskite pour konnen lekel ki pli gran parmi zot. Finalman bann zapot i demann Zezi sa kestyon ki zot ti pe koz lo la: "Lekel ki pli gran dan Rwayonn lesyel?"—Matye 18:1.

I enkrwayab ki bann disip pour dispit lo en keksoz koumsa apre ki zot in pas aprepre trwa-z-an pe vwar e ekout Zezi. Par kont, zot enparfe e zot in grandi dan en lanvironnman kot bann dimoun relizye i met en kantite



lanfaz lo pozisyon ek ran sosyal. An plis, pa tro bokou letan pase, Zezi ti promet pour donn Pyer bann “lakle” Rwayonm. Eski i posibil ki i krwar ki i pli siperyer? I kapab ki Zak ek Zan osi i krwar parey, akoz zot ti vwar sa vizyon kot Zezi ti sanz laparans.

Nenport ki rezon ki’n fer zot mazin koumsa, Zezi i servi en legzanp pour koriz zot latitud. I kriy en pti garson, fer li debout parmi zot e dir son bann disip: “Si zot pa sanze e vin parey bann zanfan, zot pa pou zanmen antre dan Rwayonm lesyel. Alor, sa ki abes li parey sa zanfan, se li ki pou pli gran dan Rwayonm lesyel e en dimoun ki resevwar en zanfan parey sa enn akoz mwan se konmsi i resevwar mwan osi.”—Matye 18:3-5.

Pa sa i en bon fason ansennyen! Zezi pa ankoler avek son bann disip e dir zot ki zot voras oubyen anbisye. O kontrer, i servi legzanp en zanfan pour ansenny zot en leson enportan. Bann zanfan napa en o pozisyon. Alor Zezi i montre bann disip ki zot bezwen develop sa menm latitud. Finalman Zezi i dir son bann disip: “Sa enn ki konport li parey enn ki pli pti parmi zot tou i sa enn ki pli gran.”—Lik 9:48.



- ◇ Ler zot ti retourn Kapernaoum, ki pwen enportan Zezi ti repete e ki mannyer bann disip ti reazir?
- ◇ Akoz Zezi pa ti oblize pey taks tanp me akoz i ti peye kantmenm sa?
- ◇ Petet kwa ki ti fer bann disip diskite lo pozisyon e ki mannyer Zezi ti koriz zot?

# ZEZI I DONN BANN ZAPOT LEZOT KONSEY ENPORTAN

MATYE 18:6-20 MARK 9:38-50 LIK 9:49, 50

Zezi i fek servi en legzanp pour montre son bann disip sa latitid ki zot devret annan. Zot devret konsider zot lekou konman bann zanfan, setadir zot devret annan limilite e pa met tro gran lenportans lo pozisyon. Si bann disip i 'resevwar en zanfan parey sa enn aköz Zezi se konmsi i resevwar Zezi osi.'—Matye 18:5.

Pa tro lontan pase, bann zapot ti pe dispit lo lekel ki pli gran, alor i kapab ki zot konsider sa ki Zezi in fek dir konman en reprimann. Aprezan, zapot Zan i koz lo en keksoz ki fek arive: “Nou ti vwar en dimoun pe sas demon par servi ou non, nou ti esey anpes li aköz i pa ansanm avek nou.”—Lik 9:49.

Eski Zan i krwar ki zis bann zapot ki ganny drwa geri lezot oubyen sas demon? Si sa i leka, ki mannyer sa zonn Zwif in reisi sas sa bann demon? I paret ki Zan i krwar ki sa zonn pa devret pe fer sa bann mirak aköz i pa pe akonpany Zezi ek bann zapot.

Me Zan i sirprann ler Zezi i dir: “Pa bezwen anpes li, parski napa person ki pou fer mirak par servi mon non e deswit apre pou kapab koz an mal lo mwan. Parski sa ki pa kont nou i avek nou. En dimoun ki donn ou en ver delo aköz ou en disip Kris, vremen mon dir zot, i pou sirman ganny son rekonpans.”—Mark 9:39-41.

Sa letan, i pa ti nesaser ki sa zonn i akonpany Kris pour montre ki i lo kote Zezi. Kongregasyon Kreyen pa ti ankor ganny formen, alor lefet ki sa zonn pa pe vwayaz avek Zezi pa vedir ki i opoz li oubyen ki i pe promot en fo larelizyon. I evidan ki sa zonn i annan lafwa dan non Zezi e sa ki Zezi i dir i montre ki sa zonn pou ganny son rekonpans.

De lot kote, i ti pou grav si sa zonn ti fer pese aköz parol ek aksyon bann zapot. Zezi i

dir: “Sa ki fer en dimoun ki annan lafwa dan mwan e ki parey en zanfan fer pese, plito en ros moulen i ganny anmare dan son likou e i ganny zete dan lanmer.” (Mark 9:42) Apre, Zezi i dir ki son bann disip i devret pare pour sakrifye menm en keksoz ki presye parey en lanmen, lipye oubyen lizye si sa ti pou fer en



dimoun fer pese. I pli byen ki nou viv san en keksoz ki annan bokou valer pour nou e antre dan Rwayonm Bondye plito ki gard sa keksoz e ganny zete dan Zeenn (Vale Inonm). I tre probab ki bann zapot in vwar Vale Inonm ki pros avek Zerizalenm kot bann salte i ganny brile, alor zot kapab konpran ki sa pe reprezant des-triksiyon permanan.

Zezi i osi averti: “Fer atansyon ki zot pa me-priz enn sa bann dimoun ki parey en zanfan, parski mon dir zot ki zot lanz dan lesyel i toul-tan devan mon Papa.” Ki mannyer Papa i kon-sider ‘sa bann dimoun ki parey zanfan’? Pour

montre ki kantite valer zot annan, Zezi i servi legzanp en zom ki annan 100 mouton me ki perdi enn. Sa zom i kit sa 99 pour rod sa enn ki'n perdi e ler i vwar li i annan plis lazwa pour sa enn ki pour sa 99. Zezi i osi dir: "Mon Papa dan lesyel pa anvi ki ni enn sa bann dimoun ki parey en zanfan i perdi."—Matye 18:10, 14.

Petet Zezi pe mazin ler son bann zapot ti pe dispit lo lekel ki pli gran, ler i donn zot sa lan-kourazman: "Met disel dan zot lavi e reste anpe avek kanmarad." (Mark 9:50) Disel i fer manze pli goute. Alor, met disel dan sa ki nou dir i ve-dir koz dan en fason ki fer li fasil pour lezot aksepté e sa i kapab ede gard lape olye argiman-te.—Kolosyen 4:6.

Par ler, nou kapab ganny bann gro problem e Zezi i dir ki mannyer nou kapab regle zot. I dir: "Si ou frer i komet en pese, al kot li tou-sel e montre li son fot. Si i ekout ou, ou'n ed ou frer pour fer sa ki byen." Me si i pa ekoute? Zezi i dir: "Anmenn avek ou enn oubyen de lezot dimoun, pour konnen si en keksoz i vre ou-byen fo, i bezwen annan de oubyen trwa tem-wen." Si malgre sa, zot pa kapab rezourd sa problem, zot devret koz avek "kongregasyon," setadir, avek bann ansyen ki kapab pran en desizyon. Ki arive si kantmenm sa, sa dimoun pa ekoute? "Konsider li konman en dimoun lezot nasyon ek en kolekter taks," bann dimoun ki bann Zwif pa devret asosye avek.—Matye 18:15-17.



Bann sirveyan dan kongregasyon i bezwen swiv bann lenstriksyon ki dan Parol Bondye. Si en dimoun in fer en pese e i bezwen ganny disiplin, zot zizman "pou'n fini ganny anmare dan lesyel." Me ler en dimoun i inosan, i pou'n "ganny delarge dan lesyel." Sa bann lenstriksyon pou itil ler kongregasyon Kretyen i ganny formen. Dan bann ka koumsa, Zezi i dir: "Kot i annan de oubyen trwa ki'n rasanble ansanm an mon non, mon pou avek zot."—Matye 18:18-20.

- ◇ Akoz sa zom ki ti pe sas demon pa ti en opozan?
- ◇ Ki degre serye i ete pour fer en dimoun fer pese? Ki legzanp Zezi ti servi pour montre lenportans bann ki parey zanfan?
- ◇ Ki lenstriksyon Zezi ti donnen konsernan si en frer i fer pese?



## NOU BEZWEN PARDONNEN

MATYE 18:21-35

Pyer fek tann konsey Zezi konsernan ki mannyer pour regle bann problem ant bann frer ek ser. Par kont, i paret ki Pyer i anv i konnen konbyen fwa i devret fer sa zefor pour regle problem.

Pyer i demande: “Senyer, konbyen fwa mon frer i kapab fer pese kont mwan e mon devret pardonn li? Set fwa?” Serten sef relizye i dir ki en dimoun i devret pardonn son kanmarad trwa fwa. Alor Pyer i kapab mazine ki i vremen byen si i pardonn son frer “set fwa.”—Matye 18:21.

Par kont, konte konbyen fwa en dimoun in ofans ou pa an armoni avek lansennyman Zezi. Alor i koriz Pyer: “Mon dir ou, pa zis set fwa, me 77 fwa.” (Matye 18:22) Andotmo, nou devret touzour pardonnen. I pa devret annan okenn limit lo lakantite fwa ki Pyer i pardonn son frer.

Aprè sa, Zezi i donn Pyer ek lezot en legzanp pour montre ki i en obligasyon pour pardonn lezot. I koz lo en lesklav ki pa montre menm konpasyon ki son met in demontre. Sa lerwa i anv ki son bann lesklav i pey zot det. Zot anmen en lesklav ki annan en gro det. I dwa lerwa 10,000 talan [60 milyon denye]. Napa okenn fason ki i kapab pey sa det. Alor sa lerwa i donn lord ki sa lesklav, son madanm ek son bann zanfan i ganny vann pour pey son det. Ler sa lesklav i tann sa, i tonm azenou devan son met e sipli li: “Donn mwan ankor en pe letan e mon pou pey ou tou sa ki mon dwa ou.”—Matye 18:26.

Ler sa lerwa i vwar sa, son leker i fermal e son konpasyon i pous li pour kennel sa gro det ki son lesklav i dwa li. Dek ki sa lerwa in fer sa, sa lesklav i ale e zwenn en lot lesklav ki dwa li 100 denye. I graponn sa lot lesklav e konmans tranfle li. I dir: “Pey mwan tou sa ki ou dwa mwan.” Me sa lesklav i tonm azenou devan li e sipli





pa pardonn zot frer avek tou zot leker.”—Matye 18:32-35.

Pa sa i ansenny nou en zoli leson konsernan pardonn lezot! Bondye in pardonn nou bann pese ki parey en gro det. Alor, nenport keksoz ki en frer i fer kont nou pa sitan grav. Deplis, Zeova pa pardonn nou zis en fwa me plizyer milye fwa. Pa nou kapab pardonn nou frer ou-byen ser plizyer fwa menm si i’n vreman ofans nou? Parey Zezi ti ansennyen dan Sermon lo Montanny, Bondye pou “pardonn nou nou bann pese parey nou’n osi pardonn bann ki’n ofans nou.”—Matye 6:12.

li: “Donn mwan ankor en pe letan e mon pou pey ou sa ki mon dwa ou.” (Matye 18:28, 29) Par kont, sa lesklav ki lerwa fek pardonnen pa fer parey lerwa. I fer sa lesklav ki dwa li bokou mwens ganny met dan prizon ziska ki i pey sa ki i dwa.

Aprè Zezi i rakonte ki lezot lesklav ki vwar sa ki’n arive i ale e raport avek zot met. Sa lerwa i ankoler ki sa lesklav pa’n montre konpasyon e i krey sa lesklav e dir li: “Move lesklav, mon ti kennsel tou ou det ler ou ti sipliy mwan. Pa ou ti’n devret pran pitye pour ou kanmarad parey mon ti pran pitye pour ou?” Sa lerwa ki byen ankoler i livre sa lesklav ki napa konpasyon avek gard prizonnyen ziska ki i pey tou sa ki i dwa. Zezi i fini par dir: “Se koumsanmenm ki mon Papa dan lesyel pou fer avek zot si zot



- ◇ Akoz Pyer ti demande konbyen fwa i devret pardonnen e akoz i ti krwar ki i bon si i ti pardonn en dimoun set fwa?
- ◇ Ki mannyer reaksyon sa lerwa ek sa lesklav ti diferan?
- ◇ Ki leson nou devret aprann avek legzanp Zezi?

# ZEZI I ANSENNYEN LER ZOT PE AL ZERIZALENM

MATYE 8:19-22 LIK 9:51-62 ZAN 7:2-10

Pour en pe letan, Zezi in fer laplipar son bann aktivite Galile, kot plis dimoun in aksepte li konpare avek bann dimoun Zide. Deplis, ler i ti geri en zonm zour Saba Zerizalenm, “bann Zwif ti pli anvi touy li ankor.”—Zan 5:18; 7:1.

Aprezan i lotonn lannen 32 e Lafet bann Lantant (oubyen Payot) i pros. Sa lafet i ganny selebre pour set zour e wityenm zour zot fer en rasanbleman sakre. Sa lafet i ganny selebre a lafen rekolt e i en letan kot bann dimoun i dan lazwa e zot remersye Bondye.

Bann demi frer Zezi ki apel Zak, Simon, Zozef ek Zida i dir li: “Kit sa landrwa, al Zide.” Zerizalenm i sa landrwa prensipal kot dimoun i ador Bondye. Pandan sa trwa lafet ki ganny fer tou le lannen, i annan en kantite dimoun dan sa lavil. Bann frer Zezi i dir: “Napa personn ki fer keksoz an kasyet si i oule ki dimoun i konn li. Si ou pe fer sa bann keksoz, ale pour ki tou dimoun i vwar ou.”—Zan 7:3, 4.

An realite, son kat frer ‘pa pe demontre lafwa dan li’ konman Mesi. Kantmenm sa, zot anvi ki bann dimoun ki’n rasanble pour sa lafet i vwar li fer bann mirak. Zezi i konnen ki sa i danzere, alor i dir zot: “Lemonn napa rezon pour ay zot, me i ay mwan, parski mon dir ki lemonn i fer sa ki move. Al sa lafet zot, pa konmela ki mon pou al lafet mwan, parski mon ler pa ankor arive.”—Zan 7:5-8.

Detrwa zour apre ki bann frer Zezi in ale avek bann dimoun ki pe vwayaze, Zezi ek son bann disip i al an sekre akoz i pa oule ki tou dimoun i vwar zot. Zot pas par Samari, ki sa larout pli direk olye sa larout ki pas o bor Larivyer Zourden ki laplipar dimoun i pran. Zezi ek son bann disip pou bezwen en landrwa reste Samari alor i anvoy serten son bann disip par devan zot



pour fer bann preparasyon. Bann dimoun sa lepok i abitye resevwar bann etranze avek lospitalite. Me dan sa landrwa, zot refize resevwar Zezi ek son bann disip akoz zot pe al Zerizalenm pour sa lafet Zwif. Zak ek Zan i ankoler, alor zot demande: “Senyer, eski ou anvi ki nou fer dife sorti dan lesyel pour ekstermin zot?” (Lik 9:54) Zezi i koz severman avek zot akoz zot in fer sa sizesyon e zot kontiny zot larout.

Ler zot pe ale lo semen, en profeser lalwa i dir Zezi: “Mon pou swiv ou partou kot ou ale.” Zezi i reponn: “Renar i annan zot trou e zwazo i annan zot nik, me Garson zonm napa okenn landrwa pour poz son latet.” (Matye 8:19, 20)





I pe fer resorti ki sa profeser lalwa pou ganny bann difikilte si i vin en disip Zezi e i paret ki sa profeser lalwa i tro fyer pour viv sa kalite lavi. Alor nou tou nou devret demann nou lekor, ‘Ki kantite sakrifis mon pare pour fer pour swiv Zezi?’

Zezi dir avek en lot zonn: “Vin mon disip.” Sa zonn i reponn: “Senyer, les mwan al anter mon papa avan.” Zezi i konn sirkonstans sa zonn alor i dir li: “Les bann mor anter bann mor, me ou ale e anons Rwayonm Bondye partou kote.” (Lik 9:59, 60) I paret ki papa sa zonn pa ankor mor. Si i ti’n mor, sa garson pa ti pou la pe koz avek Zezi. Sa zonn pa pare pour met Rwayonm Bondye premye dan son lavi.

Anmezir ki zot kontinyen desann Zerizalenm, en lot zonn i dir Zezi: “Mon pou swiv ou, Senyer, me les mwan al dir orevwar bann ki dan lakour avan.” Zezi i reponn: “Napa personn ki’n

tyonbo en zouti pour labour later e ki get deryer li ki diny pour Rwayonm Bondye.”—Lik 9: 61, 62.

Bann ki anvi vin vre disip Zezi i bezwen reste konsantre lo sa travay Rwayonm. Si sa zonn ki labour oubyen kas later pa get drwat devan li, i tre probab ki sa pti transe kot i pou senm lagrenn pou tord. Si i poz son zouti ater pour get en kou deryer li, i pa pou fini son travay dan sa plantasyon aler. Pareyman, si en dimoun i get deryer dan sa lemonn, i tre probab ki i pou ki sa semen ki anmenn ver lavi eternel.

- ◇ Ki pwennvi bann demi frer Zezi ti annan lo li?
- ◇ Akoz bann Samariten pa ti resevwar Zezi e ki Zak ek Zan ti anvi fer?
- ◇ Ki sa trwa konversasyon Zezi ti fer lo semen e ki Zezi ti fer resorti konsernan nou ladorasyon pour Bondye?









SEKSYON

# 4

## MINISTER ZEZI ZIDE

“SIPLIY MET REKOLT  
POUR ANVOY  
PLIS TRAVAYER.”

—LIK 10:2



# ZEZI I AL ZERIZALENM POUR LAFET BANN LATANT

ZAN 7:11-32

I fer detywa lannen depi ki Zezi in batize e en kantite dimoun in tann koz lo li. Plizyer milye Zwif in vwar son bann mirak e zot in koz lo la partou dan pei. Aprezan pandan Lafet bann Latant (oubyen Payot) Zerizalenm, en kantite dimoun pe rod Zezi.

Zot annan diferan lopinyon lo Zezi. Serten i dir: “I en bon dimoun.” Lezot i dir: “Non, i anbet dimoun.” (Zan 7:12) Bokou dimoun i koz lo la o konmansman sa lafet. Par kont, napa personn ki annan kouraz pour koz an byen lo Zezi akoz tou dimoun i per sa ki bann sef Zwif pou fer.

Ler i’n ariv lanmwatye lafet, Zezi i al dan tanp. En kantite dimoun i etonnen avek son fason ansennyen. I pa’n zanmen asiste bann lekol relizye, alor bann Zwif i demande: “Ki mannyer sa zonn i kapab annan en tel konnesans lo Lekritir vi ki i pa’n al etidye dan bann lekol?”—Zan 7:15.

Zezi i eksplike: “Sa ki mon ansennyen pa sorti kot mwan me kot sa enn ki’n anvoy mwan. Sa ki anvì fer Son lavolonte, pou konnen si sa lansennyman i sorti kot Bondye ou-swa si mon pe koz lo mon prop nide.” (Zan 7: 16, 17) Lansennyman Zezi i an armoni avek Lalwa Bondye, alor i devret evidan ki i anvì anmenn laglwar lo Bondye me pa lo li menm.

Apre Zezi i dir: “Pa Moiz in donn zot Lalwa? Me personn parmi zot pa obei Lalwa. Akoz zot anvì touy mwan?” Serten dan lafoul, petet bann ki pe vizite sorti an deor lavil, pa konnen ki tousala pe arive. Zot pa kapab konpran akoz en dimoun ti pou anvì touy en ansenyan parey li. Alor, zot mazinen ki i bezwen annan en keksoz mal avek Zezi

pour li dir sa. Zot dir: “Ou posede par en demon. Lekel ki oule touy ou?”—Zan 7:19, 20.

Anfet, enn an edmi pase bann sef Zwif ti anvì touy Zezi apre ki i ti’n geri en zonn zour Saba. Aprezan Zezi i servi en rezonnman pour fer zot reflexir e montre ki sa ki zot pe dir pa rezonnab. I dir ki dapre Lalwa, en pti garson i devret ganny sirkonsi wityenm zour apre son nesans, menm si sa i tonm en zour Saba. Apre i demande: “Si en garson i kapab ganny sirkonsi zour saba pour ki Lalwa Moiz pa ganny kase, akoz zot sitan ankoler avek mwan parski mon’n geri en zonn zour saba? Aret ziz par laparans, me ziz avek lazistis.”—Zan 7:23, 24.

Bann dimoun ki reste Zerizalenm e ki konnen ki pe arive, i dir: “Li menm li sa zonn ki zot pe rod touye, non? Me gete! la i la pe koz an piblik e zot pa dir li nanryen. Eski vremen bann sef in rekonnèt ki li menm li Kris?” Alor akoz bann dimoun pa krwar ki Zezi i Kris? Zot dir: “Nou konnen kot sa zonn i sorti, pourtan ler Kris i vini, personn pa pou konnen kot i sorti.”—Zan 7:25-27.

Lanmenm la dan tanp, Zezi i reponn: “Zot konn mwan e zot konnen kot mon sorti. Mon pa’n vin lo mwan menm me sa Enn ki’n anvoy mwan i reel e zot zot pa konn li. Mon konn li akoz mon son reprezantan e Li ki’n anvoy mwan.” (Zan 7:28, 29) Ler bann dimoun i tann sa, zot esey tyonbo Zezi, swa pour met li dan prizon oubyen pour touy li. Par kont, zot pa reisi tyonbo li parski i pa ankor ariv ler pour Zezi mor.

Kantmenm sa, i toutafe normal ki en kantite dimoun i annan lafwa dan Zezi. I’n mars lo



delo, kalmi divan, fer mirak pour donn pliyer milye dimoun manze avek zis detrwa dipen ek pwason, geri bann malad, fer bann bwate marse, fer bann aveg vwar kler, geri bann ki annan lalep e menm resisit bann dimoun ki'n mor. Zot annan rezon demande:

“Ler Kris i vini, i pa pou fer plis mirak ki sa zonn in fer, non?”—Zan 7:31.

Ler bann Farizyen i tann lafoul pe dir sa bann keksoz, bann Farizyen ek sef pret i anvoy bann zofisyé pour aret Zezi.

- ◇ Ler Zezi ti ariv kot lafet, ki dimoun ti pe dir lo li?
- ◇ Ki rezonnan Zezi ti servi pour montre ki i pa pe kas Lalwa Bondye?
- ◇ Akoz en kantite dimoun ti annan lafwa dan Zezi?

## “ZANMEN OKENN DIMOUN IN DEZA KOZ KOUMSA AVAN”

ZAN 7:32-52

Zezi i ankor Zerizalenm pour Lafet bann Lantant (oubyen Payot). I kontan ki ‘en kantite dimoun dan lafoul i konmans annan lafwa dan li,’ me bann sef relizye pa kontan. Zot anvoy bann zofisye ki parey bann gard pour aret li. (Zan 7:31, 32) Par kont, Zezi pa esey kasyet.

O kontrer, Zezi i kontinyen ansenny an piblik Zerizalenm. I dir: “Mon pou avek zot pour ankor en pti pe letan avan ki mon al kot sa Enn ki’n anvoy mwan. Zot pou rod mwan, me zot pa pou vwar mwan e kot mon ete, zot pa pou kapab vini.” (Zan 7:33, 34) Bann Zwif pa konpran, alor zot dir antre zot: “Me kot sa zonm pe mazin ale kot nou pa pou vwar li? I pa pe mazin al kot bann Zwif ki reste parmi bann Grek e ansenny bann Grek, non? Ki i pe esey dir ler i dir, ‘Zot pou rod mwan, me zot pa pou vwar mwan e kot mon ete, zot pa pou kapab vini?’” (Zan 7:35, 36) Par kont, Zezi pe koz lo son lanmor ek son rezireksyon dan lesyel kot son bann lennmi pa pou kapab swiv li.

Setyennm zour lafet i arive. Tou le bomaten pandan lafet, en pret in al pran delo dan Basen Siloam e vid li dan en basen pour sa delo koule ziska kot lotel dan tanp. Petet Zezi i fer bann dimoun rapel sa koutim ler i dir: “Si en dimoun i swaf, vin kot mwan e i a bwar. Sa ki annan lafwa dan mwan, parey lekritir in dir: ‘Delo lavi pou kontinyen koule sorti dan fon son leker.’”—Zan 7:37, 38.

Zezi pe koz lo sa ki pou arive ler son bann disip pou ganny swazir avek lespri sen pour al viv dan lesyel. Sa pou arive apre ki Zezi in mor. Zour Lapannkot lannen 33, delo lavi i konmans koule ler bann disip ki’n ganny





swazir gras a lespri sen i anons laverite avek bann dimoun.

Ler serten dimoun i tann lansennyman Zezi, zot dir: “Vreman li menm sa Profet.” I parret ki zot pe refer avek sa profet ki ti pou pli gran ki Moiz. Lezot dimoun i dir: “Li menm Kris.” Me serten i dir: “Kris pa sorti Galile li, non? Eski pa lekritir i dir ki Kris i sorti dan desandans David e i sorti Betleenm, vilaz David?”—Zan 7:40-42.

Alor lafoul pa tonm dakor. Menm si serten i anv i Zezi i ganny tyonbo, personn pa met lanmen lo li. Ler bann zofisye i re-tourn kot bann sef relizye san Zezi, bann sef pret ek bann Farizyen i demande: “Akoz zot pa’n anmenn li?” Bann zofisye i reponn: “Zanmen okenn dimoun in deza koz koumsa avan?” Dan zot lakoler, bann sef relizye i boufonn zot: “Pa dir mwan zot osi zot in ganny anbete? Napa ni en sef ouswa en Farizyen ki’n krwar dan li, non? Me sa lafoul ki pa konn nanryen dan Lalwa i bann dimoun modi.”—Zan 7:45-49.

Ler Nikodenm ki en Farizyen e en manm Sannedren i tann sa, i ganny kouraz pour defann Zezi. Apepre de-z-an edmi pase, Nikodenm ti al kot Zezi aswar e eksprim son lafwa dan li. Aprezan Nikodenm i dir: “Dapre nou Lalwa, nou pa ziz en zonm amwen ki nou ekout li premye e konnen ki i’n fer, non?” Ki

bann sef relizye i dir pour defann zot lekor? “Ou pa sorti Galile ou osi non? Al etidye Lekritir e ou a vwar ki napa okenn profet ki sorti Galile.”—Zan 7:51, 52.

Lekritir pa direktman dir ki en profet ti pou sorti Galile. Par kont, Parol Bondye i montre ki Kris pou sorti laba ler i ti predir ki zot ti pou vwar “en gran lalimyer,” dan rezyon “Galile kot lezot nasyon i reste.” (Izai 9:1, 2, NWT; Matye 4:13-17) Deplis, parey i ti’n ganny predir, Zezi ti ne Betleenm e i en desandans David. Menm si i posib ki bann Farizyen i konn sa, i tre probab ki zot menm ki’n fann bann rimer pour ki dimoun i annan en move pwennvi lo Zezi.



- ◇ Ki Zezi ti dir konsernan en koutim ki ti ganny fer tou le bomaten pandan sa lafet?
- ◇ Akoz bann zofisye pa ti tyonbo Zezi e ki mannyer bann sef relizye ti reazir?
- ◇ Kwa ki montre ki Kris ti pou sorti Galile?

## GARSON BONDYE I “LALIMYER LEMONN”

ZAN 8:12-36

Dernyen zour Lafet bann Latant, setadir setyennm zour, Zezi pe ansennyen dan tanp kot 'bwat kontribisyon i ete.' (Zan 8:20; Lik 21:1) Aparaman bwat ti dan Lakour bann Madanm.

Pandan sa lafet, tou le swar sa landrwa dan tanp i ganny byen eklere. I annan kat lalanp vreman gran e sakenn i annan kat gro resipyan ranpli avek delwil. Lalimyer sa bann lalanp i ekler byen lwen. Sa ki Zezi i dir aprezan i kapab fer bann dimoun ki pe ekout li mazin sa lalimyer. I dir: “Mwan menm lalimyer lemonn. Sa ki swiv mwan pa pou zannen mars dan fernwanr, me i pou ganny lalimyer ki donn lavi.”—Zan 8:12.

Bann Farizyen pa dakor avek parol Zezi e zot dir: “Ou rann temwanyaz lo ou prop lekor, alor nou pa kapab krwar sa ki ou dir.” Zezi i reponn: “Menm si mon rann temwanyaz lo mon prop lekor, sa ki mon dir i vre parski mon konnen kote mon sorti e kote mon pe ale. Me zot, zot pa konnen kote mon sorti e kote mon pe ale.” I osi dir: “Dan zot prop Lalwa in ganny ekrire: ‘Temwanyaz de dimoun i vre.’ Mwan mon rann temwanyaz lo mon prop lekor e mon Papa ki’n anvoy mwan osi i rann temwanyaz lo mwan.”—Zan 8:13-18.

Bann Farizyen pa aksepte sa largiman alor zot demann li: “Kote ou Papa i ete?” Zezi i donn zot sa larepons fran: “Zot pa konn ni mwan ni mon Papa. Si zot ti konn mwan, zot ti pou konn mon Papa osi.” (Zan 8:19) Menm si bann Farizyen i ankor anvi ki Zezi i ganny arete, personn pa tous li.

Zezi i repet en keksoz ki i’n deza dir: “Mon pe ale, zot pou rod mwan, me zot zot pou mor dan zot pese. Kot mon pe ale, zot pa kapab



vini.” Bann Zwif pe mal konpran sa ki Zezi in dir alor zot konmans demande: “I pa pou touy son lekor, non? Parski i dir ‘Kot mon pe ale, zot pa kapab vini.’” Zot pa konpran sa ki Zezi pe dir akoz zot pa konnen kote i sorti. I dir: “Zot zot sorti isi lo later, mwan mon sorti anler dan lesyel. Zot sorti dan sa lemonn, mwan mon pa sorti dan sa lemonn.”—Zan 8:21-23.

Zezi pe refer avek son lavi dan lesyel avan i vin lo later konman en imen e lo lefet ki i sa Mesi oubyen Kris ki bann sef relizye i devret pe espere. Par kont, zot napa en sou respe e zot demande: “Lekel ou?”—Zan 8:25.

Zezi i vwar ki zot in fini rezet li, alor i dir: “Tou fason akfer mon pe koz avek zot?” Me kantmenm sa, i ed zot pour konsantre lo son Papa e i eksplike akoz bann Zwif i devret ekout Garson Bondye. I dir: “Sa Enn ki’n anvoy mwan i koz laverite e bann keksoz ki mon’n tande avek li, sanmenm ki mon pe dir dimoun dan lemonn.”—Zan 8:25, 26.

Aprè sa, Zezi i eksprim son konfyans dan son Papa, en keksoz ki bann Zwif napa. I dir: “Aprè ki zot pou’n met Garson zonm anpandan lo poto, zot pou konnen ki mwan mon sa enn ki ti sipoze vini e ki mon pa fer nanryen ki mon’n deside mwan menm. Me zis parey mon Papa in ansenny mwan, mon dir sanmenm. Sa Enn ki’n anvoy mwan i avek mwan,

i pa’n les mwan tousel parski mon touzour fer sa ki fer li plezir.”—Zan 8:28, 29.

Par kont, serten Zwif i annan lafwa dan Zezi e Zezi i dir zot: “Si zot obei mon parol, zot vreman mon bann disip, zot pou konn laverite e laverite pou fer zot lib.”—Zan 8:31, 32.

Pour serten Zwif, sa ki Zezi i dir konsernan vin lib i paret drol. Zot dir: “Nou bann desandans Abraam e zanmen nou’n lesklav person. Akoz ou pe dir, ‘Zot pou lib?’” Bann Zwif i konnen ki i annan serten moman kot zot ti anba dominasyon en lot nasyon, me zot refize ganny apele lesklav. Me Zezi i fer resorti ki zot ankor lesklav: “Vreman mon dir zot laverite, tou sa ki fer pese i lesklav pese.”—Zan 8:33, 34.

I danzere pour sa bann Zwif akoz zot refize admet ki zot lesklav pese. Zezi i eksplike: “En lesklav pa reste dan lakour pour touzour, me garson ki reste dan lakour pour touzour.” (Zan 8:35) En lesklav napa drwa ganny en leritaz e i kapab ganny pouse nenport ler. Zis en garson ki’n ne oubyen ganny adopte dan en fanmir ki reste “pour touzour,” setadir otan ki i ankor vivan.

Alor, laverite lo Garson i laverite ki liber bann dimoun avek pese ki anmenn lanmor pour touzour. Zezi i dir: “Si Garson i liber zot, zot pou vreman lib.”—Zan 8:36.

- 
- ◇ Ki ti arive aswar pandan lafet e ki mannyer sa ti relye avek lansennyman Zezi?
  - ◇ Ki Zezi ti dir konsernan kote i sorti e ki sa ti montre konsernan son lidantite?
  - ◇ Dan ki sans bann Zwif ti bann lesklav me ki laverite ki ti kapab liber zot?



## ESKI ZOT PAPA I ABRAAM OUBYEN DYAB?

ZAN 8:37-59

Zezi i ankor Zerizalenm pour Lafet bann Lantant (oubyen Payot) e i ansenny bann laverite enportan. Serten Zwif ki la pandan sa lafet ti'n fek dir li: "Nou bann desandans Abraam e zanmen nou'n lesklav personn." Zezi i reponn: "Mon konnen zot desandans Abraam. Me zot pe rod touy mwan parski zot pa aksepte mon parol. Mon koz lo bann keksoz ki mon'n vwar ler mon ti avek mon Papa, me zot zot fer sa ki zot in tande avek zot papa."—Zan 8:33, 37, 38.

Sa ki Zezi i dir i senp: I napa menm Papa avek zot. Bann Zwif pa konpran sa ki Zezi pe dir alor zot repet menm zafer: "Abraam i nou papa." (Zan 8:39; Izai 41:8) Zot desandans Abraam alor zot krwar ki zot annan menm lafwa avek Abraam, zanmi Bondye.

Par kont, larepons Zezi i sirprann zot. I dir: "Si zot ti zanfan Abraam, zot ti pou azir parey Abraam." An realite, en garson i imit son papa. Zezi i osi dir: "Me la zot pe rod touy mwan akoz mon'n dir zot laverite ki mon'n aprann avek Bondye, Abraam pa ti fer sa li." Apre Zezi i dir en parol ki paret drol: "Zot pe azir parey zot papa."—Zan 8:39-41.

Me kantmenm sa, bann Zwif pa konpran lo lekel Zezi pe koze. Zot dir: "Nou pa bann zanfan ilezitim, nou annan en sel Papa, Bondye." Me eski Bondye i vreman zot Papa? Zezi i dir: "Si Bondye ti zot Papa, zot ti pou kontan mwan parski mon sorti kot Bondye e mon la. Mon pa'n vin lo mwan menm, me Bondye ki'n anvoy mwan." Zezi i demann en kestyon e i reponn li menm: "Akoz zot pa konpran sa ki mon pe dir? Parski zot pa oule aksepte mon parol."—Zan 8:41-43.

Zezi in esey fer zot konpran sa ki pou arive si zot rezet li. Me la i dir zot fran: "Zot sorti

kot zot papa Dyab e zot anv'i fer lavolonte zot papa." Ki mannyer zot papa i ete? Zezi i dir klerman: "I ti vin en mertriye ler i ti konmans koz manti. I ti kit laverite." Zezi i osi dir: "Sa enn ki sorti kot Bondye i ekout parol Bondye. Sanmenm rezon zot pa ekoute, akoz zot pa sorti kot Bondye."—Zan 8:44, 47.

Bann Zwif i ankoler ki Zezi in kondann zot e zot reponn: "Eski pa nou annan rezon ler nou dir, 'Ou en Samariten e ou posede par demon'?" Ler zot apel Zezi "en Samariten," sa i montre ki zot mepriz li. Me Zezi i inyor zot lensilt e i dir: "Mon pa posede par demon, me mon onor mon Papa e zot zot dezonor mwan." Nou vwar ki sa i en keksoz serye ler Zezi i fer sa promes: "Mon dir zot laverite, si en dimoun i obei mon parol, i pa pou zanmen mor." I pa pe dir ki bann zapot ek lezot ki swiv li pa pou zanmen mor. Par kont, zot pa pou zanmen ganny "dezyenm lanmor," setadir destriksyon eternel kot napa okenn lespwar pour ganny resisite.—Zan 8:48-51; Revelasyon 21:8.

Bann Zwif pa pe konpran ki Zezi pe koz dan en fason senbolik, alor zot dir: "La nou asire ki ou posede par en demon. Abraam in mor, bann profet osi, me ou ou dir, 'Si en dimoun i obei mon parol, i pa pou zanmen mor.' Ou pa pli gran ki nou papa Abraam ki'n mor, non? . . . Ki ou krwar ou ete?"—Zan 8:52, 53.

I evidan ki Zezi pe montre ki i Mesi. Me olye reponn zot kestyon konsernan son lidantite direkteman, i dir: "Si mon glorifye mon lekor, mon laglwar pa nanryen. Mon Papa ki glorifye mwan, sa enn ki zot dir i zot Bondye. Pourtan zot pa konn li, me mwan mon konn li. Si mon dir mon pa konn li, mon pou vin parey zot, mon pou en manter."—Zan 8:54, 55.



Aprezan Zezi i koz lo legzanp zot zanset: “Zot papa Abraam ti telman anvî vwar sa letan kot mon ti pou vini e i ti rezoui ler i ti pe reflexir lo la.” Abraam ti krwar dan promes Bondye e i ti pe esper Mesi vini. Bann Zwif pa oule krwar li e zot dir: “Ou pa ni menm annan 50 an e ou pe dir ou’n vwar Abraam?” Zezi i reponn: “Vreman mon dir zot laverite, mon ti

deza la avan Abraam ti vin an egzistans.” Zezi pe koz lo son lavi dan lesyel konman en lanz avan ki i ti vin lo later konman en imen.—Zan 8:56-58.

Bann Zwif i ankoler ki Zezi in dir ki i ti viv avan Abraam e zot anmas ros pour saboul li. Me Zezi i kit sa landrwa san ganny okenn dimal.

- 
- ◇ Ki manyer Zezi ti montre ki son Papa i diferan avek papa son bann lennmi?
  - ◇ Akoz i ti mal pour bann Zwif ensiste ki Abraam i zot papa?
  - ◇ Dan ki sans bann disip Zezi “pa pou zanmen mor”?

## ZEZI I GERI EN ZONM KI TI NE AVEG

ZAN 9:1-18

Zezi i ankor Zerizalenm zour Saba. Anmezir ki li ek son bann disip pe marse dan lavil, zot vwar en mandyan ki pa vwar kler depi son nesans. Bann disip i demann Zezi: “Ansenyan, lekel ki’n fer pese pour sa zonm ne aveg, li menm ouswa son paran?”—Zan 9:2.

Bann disip i konnen ki sa zonm pa ti’n deza egziste avan ki i ti ne, me i kapab ki zot anv konnen si petet sa dimoun ti fer en pese ler i ti dan vant son manman. Zezi i reponn: “I pa ni pese sa zonm, ni pese son paran ki’n fer li aveg, me sa in arive pour ki dimoun i vwar pwisans Bondye.” (Zan 9:3) Alor ni sa zonm, ni son paran pa ti’n fer en fot oubyen pese ki’n fer li aveg. Anfet, vi ki Adan in fer pese, nou tou nou enparfe e ler nou ne, nou kapab annan bann dezabilite. Par egzanzp, en dimoun i kapab ne aveg. Me lefet ki sa zonm i aveg i donn Zezi en loportinite pour montre pwisans Bondye, parey i’n deza fer ler i ti geri bann dimoun.

Zezi i montre ki i enportan pour fer sa bann mirak san tarde. I dir: “Nou devret fer travay sa Enn ki’n anvoy mwan ler i ankor lizour, aswar pe vini kot personn pa kapab travay. Tan ki mon dan lemond, mon lalimyer lemond.” (Zan 9:4, 5) Byento, ler Zezi i mor, i pou konmsi i dan fernwanr e i pa pou kapab fer nanryen. Antretan, i en sours lalimyer pour lemond.

Me eski Zezi pou geri sa zonm? Ki mannyer i pou fer sa? Zezi i kras ater e avek son lakras i fer labou. I met en pe lo lizye sa zonm ki aveg e dir: “Al lav ou lizye dan basen Siloam.” (Zan 9:7) Sa zonm i obei. Ler i fer sa, i kapab vwar kler! Zis mazin son lazwa ler i kapab vwar kler pour premye fwa!

Son bann vwazen ek lezot dimoun ki ti konnen ki i aveg i sirprann. Zot demande: “Sanmenm sa zonm ki ti abitye asize pe mandyan, non?” Serten i dir: “Li menm li.” Me lezot pa oule krwar e zot dir: “Non, me i parey li.” Sa zonm li menm i reponn: “Mwan menm sa.”—Zan 9:8, 9.

Alor zot demann li: “Me, ki mannyer ou’n vwar kler?” I reponn: “Sa zonm ki apel Zezi in fer en melanz labou, i’n met lo mon lizye e dir mwan, ‘Al lav ou lizye Siloam.’ Alor mon ti al lav mon lizye e apre mon ti vwar kler.” Apre zot demann li: “Oli sa zonm?” Sa mandyan i reponn: “Mon pa konnen.”—Zan 9:10-12.

Bann dimoun i anmenn li kot bann Farizyen e zot osi zot anv konnen ki mannyer sa zonm i vwar kler aprezan. I dir zot: “I ti met labou lo







mon lizye, mon ti lav mon lizye e aprezan mon kapab vwar kler.” Bann Farizyen i sipoze kontan ki sa mandyan in ganny geri. O kontrè, serten parmi zot i kritik Zezi. Zot dir: “Sa pa en zonn sorti kot Bondye parski i pa fer Saba.” Par kont, lezot i dir: “Ki manyer en dimoun ki annan en move lavi i kapab fer en mirak parey?” (Zan 9:15, 16) Alor zot pa tonm dakor avek kanmarad.

Vi ki zot annan diferan lopinyon, zot demann sa zonn: “Ki ou kapab dir lo li, vi ki i’n fer ou vwar kler?” Sa zonn napa okenn dout lo Zezi e i dir: “I en profet.”—Zan 9:17.

Bann Zwif i refize krwar sa. Petet zot krwar ki Zezi ek sa zonn in tonm dakor pour anbet dimoun. Alor zot deside ki sel fason pour vreman konn sa ki’n arive se demann paran sa mandyan si i ti vreman aveg.

- 
- ◆ Akoz sa zonn ti aveg?
  - ◆ Ki manyer bann dimoun ki ti konn sa zonn ti reazir ler i ti ganny geri?
  - ◆ Akoz bann Farizyen pa tonm dakor konsernan gerizon sa zonn?

# BANN FARIZYEN I KESTYONN SA ZONM KI TI AVEG

ZAN 9:19-41

Bann Farizyen pa oule aksepte ki Zezi in geri en zonm ki ti ne aveg, alor zot kriy son paran. Son paran i konnen ki zot kapab “ganny pou-se dan sinagog.” (Zan 9:22) Si sa ti arive, zot ti pou nepli kapab asosye avek lezot Zwif e sa ti pou afekte zot fanmir dan domenn sosyal e ekonomik.

Bann Farizyen i demann de kestyon: “Eski sa i zot garson ki zot dir i ti ne aveg? Ki mannyer i kapab vwar kler aprezan?” Son paran i reponn: “Nou konnen ki i nou garson e ki i ti ne aveg. Me nou pa konnen ki mannyer i’n kapab vwar kler aprezan ouswa lekel ki’n fer li vwar kler. I gran li. Li ki bezwen koze.”—Zan 9:19-21.

Alor ankor enn fwa, bann Farizyen i kriy sa zonm. Pour fer li per, zot dir li ki zot annan levidans kont Zezi. Zot dir li: “Dir laverite devan Bondye, nou konnen ki sa zonm i annan en move lavi.” Sa zonm ki ti aveg pa oule kontredir zot, alor i dir: “Si sa zonm i annan en move lavi, sa mon pa konnen. Me sa ki mon konnen se ki mon ti aveg, me aprezan mon vwar kler.”—Zan 9:24, 25.

Bann Farizyen pa oule les tonbe, alor zot dir: “Ki i’n fer avek ou? Ki mannyer i’n fer ou vwar kler?” Sa zonm i ganny en pe kouraz pour reponn: “Mon’n fini dir zot me zot pa’n ekoute. Akfer zot oule ki mon dir zot ankor? Pa dir mwan zot osi zot anvi vin son disip?” Sa i fer bann Farizyen ankoler e zot dir: “Ou en disip sa zonm, me nou nou disip Moiz. Nou konnen ki Bondye ti koz avek Moiz, me sa zonm, nou pa konnen kot i sorti.”—Zan 9:26-29.

Sa mandyan i sirprann e i dir: “I vreman drol ki zot pa konnen kot i sorti, kan li ki’n fer mwan vwar kler.” Apre sa, sa zonm i donn en

larepons ki lozik konsernan ki kalite dimoun Bondye i ekoute e donn son laprouvasyon: “Nou konnen ki Bondye pa ekout bann ki annan en move lavi, me si en dimoun i annan en gran respe pour Bondye e i fer son lavolonte, Bondye i ekout li. Nou pa’n zanmen tande ki en dimoun in deza fer en dimoun ki’n ne aveg vwar kler.” Sa zonm i fini par dir: “Si sa zonm pa ti sorti kot Bondye, i pa ti pou kapab fer nanryen.”—Zan 9:30-33.

Bann Farizyen pa konnen ki pour dir sa mandyan, alor zot maltret li e dir: “Ou’n ne dan ou ta pese e la ou pe vin ansenny nou?” Zot met li deor.—Zan 9:34.

Ler Zezi i tande ki’n arive, i rod sa zonm e demann li: “Eski ou annan lafwa dan Garson zonm?” Sa zonm i dir: “Msye, dir mwan lekel li pour ki mon kapab annan lafwa dan li?” Zezi i klerman dir li: “Anfet, ou’n vwar li, li menm ki pe koz avek ou.”—Zan 9:35-37.

Sa zonm i reponn: “Wi Senyer, mon annan lafwa dan li.” Sa zonm i demontre son lafwa ek respe par azenou devan Zezi e Zezi i dir li sa parol enportan: “Mon’n vin dan lemonn pour ki sa ki mon fer, i fer bann ki pa vwar kapab vwar e bann ki vwar vin aveg.”—Zan 9:38, 39.

Bann Farizyen i tann sa konversasyon e zot konnen ki zot pa aveg. Me ki rol zot sipoze zwe pour gid lezot spirityelman? Pour defann zot lekor zot demande: “Nou pa aveg nou osi, non?” Zezi i dir: “Si zot ti aveg, zot pese ti pou ganny pardonnen. Me la zot pe dir, ‘Nou vwar,’ zot pese pa pou ganny pardonnen.” (Zan 9:40, 41) Si zot pa ti bann ansenyan Lalwa, petet i ti pou pli fasil konpran akoz ki zot pa’n aksepte ki Zezi i Mesi. Me vi ki zot konn Lalwa, i en pese grav ki zot rezet Zezi.



- ◆ Akoz paran sa mandyan ki ti aveg ti per ler bann Farizyen ti kriy zot e ki mannyer zot ti reponn?
- ◆ Ki largiman lozik ki ti fer bann Farizyen vremen ankoler?
- ◆ Akoz bann Farizyen ti napa rezon pour rezet Zezi?



# ZEZI I ANVOY 70 DISIP PRESE

LIK 10:1-24

I ver lafen lannen 32, apepre trwa-z-an depi ki Zezi in batize. Pa tro lontan pase, Zezi ek son bann disip ti asiste Lafet bann Latant, Zerizalenm. I tre probab ki zot ankor dan zanmirant. (Lik 10:38; Zan 11:1) Anfet, Zezi pou pas laplipar sa sis mwan ki reste li dan son minister, dan rezyon Zide oubyen lot kote Larivyèr Zourden dan distrik Pere. Bann dimoun dan sa bann landrwa osi i bezwen tann son mesaz.

Avan sa, apre Lapak lannen 30, Zezi ti pran detrwa mwan pour pres Zide e travers Samari. Apre, ver Lapak lannen 31, bann Zwif Zerizalenm ti esey touy li. Pandan sa enn an edmi ki ti swiv, Zezi ti plizoumwèn ansenny dan nor, dan rezyon Galile. Pandan sa letan, en kantite dimoun ti vin son disip. Galile, Zezi ti form bann zapot e apre anvoy zot avek sa lenstriksyon: “Prese e dir: ‘Rwayonm lesyel in aprese.’” (Matye 10:5-7) Aprezan, i organiz en kanpany predikasyon Zide.


Pour konmans sa kanpany predikasyon, Zezi i swazir 70 disip e i anvoy zot de par de. Alor, i annan 35 per proklanmater Rwayonm ki ganny anvoye dan teritwar, kot “re-kolt i gran, me i annan en ptigin travayer.” (Lik 10:2) Zot sipoze al dan bann landrwa kot Zezi pou pase pli tar. Sa 70 disip i bezwen geri bann malad e anons sa menm mesaz ki Zezi pe proklanmen.

Zezi pa demann zot pour al ansennyen dan bann sinagog, me plito pour al kot lakour bann dimoun. I donn zot sa lenstriksyon: “Ler zot ariv kot en lakaz, premyèman dir: ‘Ki lape i avek zot.’ Si i annan en dimoun ki kontan lape laba, ki zot lape i reste avek li.” Ki mesaz

zot sipoze anonse? Zezi i dir: “Dir zot: ‘Rwayonm Bondye in aprese.’”—Lik 10:5-9.

Bann lenstriksyon ki Zezi i donn sa 70 disip i en pe parey sa ki i ti donn son 12 zapot ler i ti anvoy zot prese apepre enn an pase. I averti zot ki pa tou dimoun ki pou byen resevwar zot. Me sa ki zot pe fer pou ede pour prepar bann ki annan en bon leker. Ler Zezi i arive pa tro bokou letan apre, i pou annan en kantite dimoun ki pou enpasyon pour rankontre li e aprann avek li.

Pa bokou letan apre, sa 35 per proklanmater Rwayonm i retourn kot Zezi. Zot dan lazwa e zot dir: “Senyer, menm bann demon in soumet avek nou ler nou’n servi ou non.” Zezi i vremen kontan ler i tann sa bon rapor parski



i dir: “Mon vwar Satan pe tonbe parey zekler sorti dan lesyel. Gete! Mon’n donn zot lotorite pour kraz serpan ek skorpyon anba zot li-pye.”—Lik 10:17-19.

La Zezi pe asir son bann disip ki zot pou kapab ranport laviktwar lo bann keksoz ki kapab fer ditor, dan en sans senbolik, zot pou kapab kraz bann serpan ek skorpyon. Deplis, bann disip i kapab asire ki a lavenir Satan pou ganny pouse dan lesyel. Zezi i osi ed sa 70 disip pour konpran kwa ki vreman enportan a lafen dizour. I dir: “Pa bezwen rezouir

akoz bann demon in soumet avek zot, plito, rezouir akoz zot non in ganny ekrir dan lesyel.”—Lik 10:20.

Zezi i dan lazwa e i loue son Papa an piblik akoz l’n servi bann senp serviter dan en fason sitan pwisan. I vire e dir son bann disip: “Ere bann dimoun ki vwar sa bann keksoz ki zot pe vwar. Parski mon dir zot, en kantite profet ek lerwa ti anvi vwar sa bann keksoz ki zot pe vwar me zot pa ti vwar e zot ti anvi tann sa ki zot pe tande me zot pa ti tann sa bann keksoz.”—Lik 10:23, 24.

- 
- ◇ Kote Zezi ti prese pandan son dernyen sis mwan lo later e akoz i ti pres laba?
  - ◇ Ki mannyer sa 70 disip ti sipoze zwenn bann dimoun pour pres avek zot?
  - ◇ Menm si sa 70 disip ti fer en kantite, dapre Zezi, kwa ki pli enportan?



# EN BON SAMARITEN

LIK 10:25-37

Bann Zwif i vin kot Zezi vi ki i ankor dan zamirant Zerizalenm. Serten i anvi aprann avek li e lezot i anvi teste li. En dimoun ki konn byen Lalwa, i demann Zezi sa kestasyon: “Ansenyan, ki mon bezwen fer pour ganny lavi eternal?”—Lik 10:25.

Zezi i remarke ki sa zonm pa pe zis demann en kestasyon. I kapab ki i pe esey fer Zezi reponn dan en fason ki pou ofans bann Zwif. I realize ki sa zonm i deza annan son prop pwennvi. Alor avek lasazes, i demann sa zonm pour dir sa ki li i panse.

Zezi i demande: “Kwa ki’n ganny ekrir dan Lalwa? Ki ou konpran?” Sa zonm in etidye Lalwa Bondye alor son larepons i baze lo la. I sit Deteronnm 6:5 ek Levitik 19:18: “Ou devret kontan Zeova ou Bondye avek tou ou leker, avek tou ou nanm, avek tou ou lafors e avek tou ou lespri’ e ‘ou devret kontan ou prosen parey ou kontan ou prop lekor.’” (Lik 10:26, 27) Eski son larepons i bon?

Zezi i dir sa zonm: “Ou’n byen reponn, kontinyen fer sa e ou a ganny lavi.” Eski sa konversasyon i fini lanmenm? Sa zonm pa zis anvi en larepons pour son kestasyon, plito i anvi ‘montre ki i en zonm drwat.’ I anvi ki Zezi i dir li ki i annan en bon pwennvi e ki i annan rezon tret lezot parey i pe fer. Alor i demande: “Lekel vreman ki mon prosen?” (Lik 10:28, 29) Sa kestasyon i paret senp, me anfet i ase profon. Akoz?

Bann Zwif i krwar ki sa mo “prosen” i aplik zis avek bann ki swiv bann tradisyon Zwif e i kapab paret ki Levitik 19:18 i siport sa pwennvi. Anfet, en Zwif i menm kapab dir ki “i kont lalwa” pour frekant en dimoun ki pa Zwif. (Akt 10:28) Alor sa zonm e petet menm

serten disip Zezi i krwar ki zot pe fer sa ki byen ler zot tret lezot Zwif avek labonte. Me zot kapab tret bann ki pa Zwif dan en move fason parski zot pa vreman zot “prosen.”

Ki mannyer Zezi i kapab koriz sa fason pansan san ki i ofans sa zonm ek lezot Zwif? I konmans par rakont zot en zistwar: “En zonm ti pe desann Zeriko sorti Zerizalenm. Dan semen bann voler ti atak li, depouy li, bat li, kit li demi mor e ale. Par azar, en pret ti pe desann dan sa menm semen, me ler i ti vwar li i ti sanz kote semen. En Levit ti osi pas dan sa menm landrwa e ler i ti vwar li i ti sanz kote semen. Me ler en Samariten ki ti pe pas dan sa semen ti vwar li, son leker ti fermal.”—Lik 10:30-33.


Sa zonm ki Zezi pe rakont sa zistwar i konnen ki bokou pret ek Levit ki ede dan tanp i reste Zeriko. Pour retourn se zot sorti Zerizalenm, zot bezwen mars apepre 23 kilomet. Sa semen ki desann Zeriko i kapab danzere akoz i annan bann voler ki kasyet tou dilon semen pour atak dimoun. Si en pret ek en Levit i vwar en lot Zwif ki dan problemm, pa zot devret ed li? Dan sa zistwar, Zezi i dir ki zot pa ti ed sa dimoun. Me se en Samariten, en zonm ki sorti dan en nasyon ki bann Zwif pa ti kontan ki ed sa Zwif.—Zan 8:48.

Ki mannyer sa Samariten ti ed sa Zwif ki ti’n ganny blese? Zezi i dir: “I ti vin kot li, vid delwil ek diven lo son bann blesir e bann zot. Apre sa, i ti met li lo son prop bourik e anmenm li dan en pti lotel e pran swen avek li. Lannmen i ti pran de denye, i ti donn propriyeter sa pti lotel e dir: ‘Pran swen avek li e sa ki ou depanse an plis, mon ava pey ou ler mon retournen.’”—Lik 10:34, 35.



Aprè ki Zezi sa Gran Ansenyan in fini rakont sa zistwar, i demann sa zonm en kestyon pour fer li reflesir: “Lekel parmi sa trwa ki’n azir konman prosen sa zonm ki ti ganny atake par bann voler?” Petet sa zonm pa santi li konfortab pour dir: “Sa Samariten,” alor i dir: “Sa enn ki’n pran pitye pour sa zonm.” Aprè Zezi i met lanfaz lo sa leson byen kler dan sa zistwar par dir li, “ale e fer parey ou osi.”—Lik 10:36, 37.

Pa sa i en bon fason ansennyen! Si Zezi ti’n zis dir sa zonm ki bann ki pa Zwif osi i non prosen, eski sa zonm ek lezot Zwif ki ti pe ekout li ti pou’n aksepte sa? I tre probab ki non. Par kont, Zezi ti servi en zistwar senp avek bann detay ki sa bann dimoun ti konn byen pour reponn sa kestyon “Lekel vreman ki mon prosen?” En *bon prosen* i sa dimoun ki demontre lanmour ek labonte parey Labib i demann nou pour fer.



- ◇ Akoz en zonm ti vin demann Zezi ki i ti bezwen fer pour ganny lavi eternel?
- ◇ Dapre bann Zwif lekel zot prosen e akoz?
- ◇ Dapre Zezi lekel ki vreman nou prosen e akoz?

# LESON KONSERNAN LOSPITALITE EK LAPRIYER

LIK 10:38–11:13

Betani i en vilaz ki en zistans environ trwa kilomèt avèk Zerizalenm. I lo kote les Montanny Pye Zoliv. (Zan 11:18) Zezi i al kot lakaz de ser ki apel Mart ek Mari, Betani. Zot ek zot frer Lazar i zanmi Zezi e zot kontan pour resevwar li.

I en gran loner pour envit Mesi. Mart i vreman anvi fer tou sa ki i kapab pour Zezi, alor i konmans prepar en gran repa pour li. Pandan ki Mart pe travay, son ser Mari i asiz o bor Zezi pour ekout li. Avèk letan, Mart i dir Zezi: “Senyer, ou pa vwar li en problem ki mon ser in kit mwan tousel pe fer louvraz? Dir li vin ed mwan.”—Lik 10:40.

Olye kritik Mari, Zezi i konsey Mart pour aret enkyet konsernan bann keksoz materyel. I dir: “Mart, Mart ou pe trakase e fatig ou avèk bokou keksoz. Nou pa bezwen en kantite keksoz, zis en keksoz i ase. Mari in fer sa bon swa e sa pa pou ganny pran avèk li.” (Lik 10:41, 42) Zezi i fer resorti ki i pa nesese pour pas en ta letan pe prepar en kantite pla. En senp manze i ase.

Mart i annan en bon lentansyon. I anvi demontre lospitalite. Me i telman pe konsantre pour prepar sa repa, i pa ganny sans ekout lansennyman presye sorti kot Garson Bondye! Zezi i dir ki Mari in fer en bon swa ki pou benefisye li pour touzour e sa i en bon leson pour nou rapel.

En lot fwa, Zezi i ansenny en leson ki enportan osi. En disip i demann li: “Senyer, montre nou konman pour priye zis parey Zan ti montre son bann disip.” (Lik 11:1) Zezi ti’n fini fer sa apepre enn an pase pandan son Sermon lo Montanny. (Matye 6:9-13) Me i kapab ki sa disip pa ti la sa zour, alor Zezi i repet bann pwen prensipal. Apre sa, i donn en legzanp ki montre ki nou bezwen persevere dan lapriyer.

“Meton enn ant zot i annan en zanmi e ou al kot li minwi e dir li, ‘Mon zanmi, donn mwan trwa dipen, parski enn mon zanmi fek ariv kot mwan apre en gran vwayaz e mon napa nanryen pour donn li.’ Me sa met lakour ki ti annadan ti dir: ‘Aret fatig mwan. Laport i deza take e mon bann zanfan pe dormi lo lili avèk mwan. Mon pa kapab leve pour donn ou nanryen.’ Mon dir zot, menm si i pa pou leve e donn li nanryen akòz i son zanmi, me akòz i pe vreman persiste, i pou leve e donn li tou sa ki i bezwen.”—Lik 11:5-8.

Zezi pa pe dir ki Zeova i parey sa zanmi dan sa legzanp e ki i pa anvi reponn bann lapriyer. O kontrè, i pe montre ki si en zanmi ki pa anvi fer en keksoz i pare pour fer li si sa dimoun i persiste, definitivman nou Papa ki kontan nou pou reponn bann lapriyer senser son bann serviter fidel! Zezi i osi dir: “Mon dir zot, kontinyen demande e zot pou gannye, kontinyen rode e zot pou trouve, kontinyen tap laport e i pou ouver. Parski tou sa ki demande i gannye, tou sa ki rode i trouve e tou sa ki tap laport, laport pou ouver.”—Lik 11:9, 10.

Apre Zezi i met lanfaz lo sa pwen par fer en konparezon avèk bann papa: “Lekel sa papa parmi zot ki si son garson i demann li en pwason, i pou donn li en serpan olye en pwason? Oubyen si i demann li en dizef i pou donn li en skorpyon? Alor, si zot, menm si zot move, zot konn donn bann bon kado zot zanfan, pa zot Papa ki dan lesyel pou pli pare ankor pour donn lespri sen bann ki pe demann li!” (Lik 11:11-13) Pa sa i en zoli lasirans ki nou Papa dan lesyel i pare pour ekout nou lapriyer e donn nou sa ki nou bezwen!



- ◇ Ki diferan keksoz Mart ek Mari ti konsantre lo la e ki leson nou kapab aprann avek sa?
- ◇ Akoz Zezi ti repet son bann lenstriksyon lo lapriyer?
- ◇ Ki legzanp Zezi ti servi pour montre ki nou bezwen persevere dan lapriyer?



# ZEZI I MONTRE KWA KI VREMAN FER NOU ERE

LIK 11:14-36

Zezi fek repet son lenstriksyon konsernan la-priyer, me sa pa sa sel size ki i'n mansyonn pli-zyer fwa dan son minister. Ler i ti pe fer bann mirak Galile, Zezi ti ganny akize konmkwa i fer son bann mirak atraver pouvwar bann demon. La i ganny sa menm lakizasyon Zide.

Lafoul i enpresyonnen ler Zezi i sas en demon ki anpes en zonm koze. Me sa pa enpresyonnn bann dimoun ki kritik li. Zot fer sa menm fo lakizasyon: "Se avek pouvwar Belzebib, sef bann demon ki i sas demon." (Lik 11:15) Lezot dimoun ki pe rod plis levidans konsernan li-dantite Zezi i demann li pour fer en siny sorti dan lesyel.

Zezi i realize ki zot pe esey teste li, alor i reponn zot parey i ti fer ler i ti ganny kritike Galile. I dir ki si i annan en divizyon dan en rwayonm, i pa pou reisi. I rezonn avek zot: "Si Satan i annan divizyon dan li menm, ki mannyer son rwayonm pou kapab reisi?" Apre Zezi i dir zot klerman: "Si se par ledwa Bondye ki mon sas demon, zot pa'n realize ki Rwayonm Bondye in arive."—Lik 11:18-20.


Ler Zezi i mansyonn "ledwa Bondye," sa i devret fer sa bann dimoun mazin sa ki ti arive dan listwar Izrael. Bann ki ti dan lakour rwayal Faraon ler Moiz ti fer en mirak ti dir: "Sa i ledwa Bondye." I ti osi "ledwa" Bondye ki ti ekri sa Dis Komannman lo sa de plak ros. (Egzod 8:19, *NWT*; 31:18) Pareyman, se "ledwa Bondye," setadir i gras a lespri sen oubyen lafors aktif Bondye ki Zezi i kapab sas demon e geri bann dimoun malad. Alor, vreman Rwayonm Bondye in arive san ki son bann opozan in realize parski Zezi, sa Lerwa ki Bondye in swazir pour diriz son Rwayonm i la avek zot pe fer bann mirak.

Lefet ki Zezi i kapab sas bann demon i montre ki i annan pouvwar lo Satan, zis parey en zonm i kapab pli for e ranport laviktwar lo en zonm arme ki pe vey en pale. Ankor enn fwa Zezi i repet son legzanp konsernan en demon ki sorti dan en dimoun. Si sa dimoun pa ranpli sa lespas avek bann bon keksoz, sa demon pou tournen avek set lezot demon e finalman sityasyon sa dimoun i vin pli pir ki avan. (Matye 12:22, 25-29, 43-45) Sanmenm sa ki pe arive avek nasyon Izrael.

En madanm ki pe ekout Zezi i dir: "Ere sa madanm ki'n anmenn ou dan son vant e ki'n donn ou tete!" Bann madanm Zwif ti a swete vin manman en profet, sirtou manman Mesi. Alor sa madanm i kapab pe mazine ki Mari i bezwen vreman ere vi ki i manman en anse-nyan koumsa. Par kont Zezi i koriz sa madanm e montre li kwa ki vreman fer en dimoun ere: "Non, plito, ere sa bann ki tann parol Bondye e obei li!" (Lik 11:27, 28) Zezi pa'n zanmen dir ki Mari i devret ganny loner spesyal. O kontrer, en msye oubyen madanm i kapab vreman ere si i en serviter fidel Bondye, pa akoz son famir ouswa akoz sa ki i'n akonpli.

Parey Zezi ti fer Galile, i koz severman avek bann dimoun ki demann li en siny sorti dan lesyel. I dir ki zot pa pou ganny okenn siny eksepte "siny profet Zonas." Zezi pe koz lo ler Zonas ti pas trwa zour dan vant en pwason e ler i ti pres avek lardyes ki ti pous bann dimoun Niniv pour repantir. Zezi i dir: "Me la, i annan enn ki pli enportan ki Zonas." (Lik 11:29-32) Zezi i osi pli enportan ki Salomon, sa enn ki la-renn Seba ti vwayaze pour al ekout son lasazes.

Zezi i azoute: "Apre ki en dimoun i alim en lalanp, i pa kasyet li oubyen met li anba en



pannyen, me i met li anler lo en keksoz.” (Lik 11:33) Petet, Zezi pe esey dir ki ansenny e fer bann mirak pour sa bann dimoun rebel i parey kasyet en lalanp akoz zot pa pe konsantre lo sa ki enportan e zot pa konpran sinifikasyon son bann mirak.

Zezi fek sas en demon e i'n osi geri en zonn

ki pa ti kapab koze. Sa i devret pous sa bann dimoun pour glorifye Bondye e dir lezot sa ki Zeova pe akonpli. Alor i averti sa bann dimoun ki kritik li: “Fer sir ki lalimyer ki dan ou i pa fernwanr. Alor, si ou lekor antye i dan lalimyer e napa okenn parti ou lekor ki dan fernwanr, i pou briye parey en lalanp ki kler ou.”—Lik 11:35, 36.

- 
- ◇ Ki mannyer serten dimoun ti reazir ler Zezi ti geri en zonn?
  - ◇ Kisisa “ledwa Bondye” e ki mannyer Rwayonn Bondye ti'n arive san ki sa bann dimoun i realize?
  - ◇ Ki mannyer bann dimoun i kapab vreman ere?

# ZEZI I PRAN EN REPA AVEK EN FARIZYEN

LIK 11:37-54

Ler Zezi i Zide i aksepté lenvitasyon en Fari-zyen pour al pran en repa kot li. I tre probab ki sa i pandan lazournen. (Lik 11:37, 38) Avan bann Farizyen i manze, zot swiv sa tradisyon lav lanmen ziska kot koud. Me Zezi pa fer sa. (Matye 15:1, 2) I pa kont Lalwa pour lav lanmen ziska kot koud, me i pa en keksoz ki Bondye i demann zot pour fer.

Sa Farizyen i sirprann ki Zezi pa swiv sa tradisyon. Zezi i remark sa e i dir: “Zot bann Farizyen, zot netway an deor lakoup ek lasyet, me anndan i ranpli avek vorasite ek sa ki mal. Enbesil! Pa sa enn ki’n fer sa ki an deor in osi fer sa ki anndan?”—Lik 11:39, 40.

I pa en problem ki zot lav zot lanmen avan manze me i en problem ki zot ipokrit dan lafason ki zot ador Bondye. Bann Farizyen ek lezot i swiv sa tradisyon pour lav zot lanmen me zot pa pirifye zot move leker. Alor Zezi i konsey zot: “Ed bann pov avek tou zot leker koumsa zot a vin pir dan tou keksoz.” (Lik 11:41) Sa i vre! Nou devret ed lezot aköz nou kontan zot, pa aköz nou fer krwar ki nou fer sa ki byen pour enpresyonn lezot.

I pa konmsi sa bann Zwif pa zanmen donnen. Anfet, Zezi i dir: “Zot donn en dizyenm lanmant, dil ek tou lezot zepis, me zot inyor lazistis ek lanmour Bondye! Zot ti oblize fer sa bann keksoz, me zot pa ti merit inyor lezot keksoz osi.” (Lik 11:42) Dapre Lalwa bann Izraelit ti bezwen pey ladim (en dizyenm) sa ki zot rekolte. (Deteronnm 14:22) Lalwa ti demann zot pour donn lanmant ek dil. Sa ti bann zepis oubyen plant ki fer manze goute. Bann Farizyen ti fer sir ki zot pey en dizyenm sa bann zepis, me zot pa ti fer bann keksoz pli enportan dan Lalwa parey demon-

tre lazistis e azir dan en fason modes.—Mika 6:8.

Zezi i kontinyen par dir: “Maler lo zot, Fari-zyen, parski zot kontan asiz devan dan sinagog e ler dimoun i salye zot avek respe dan bazar! Maler lo zot aköz zot parey bann latonm ki pa fasil remarke ki dimoun i mars lo la san konnen!” (Lik 11:43, 44) Bann dimoun ti kapab mars lo sa bann latonm san realize e vin enpir dapre Lalwa. Zezi i servi sa legzanp pour montre ki menm si bann Farizyen i donn lenpresyon ki zot pir spirityelman an realite zot enpir.—Matye 23:27.


En zonn ki konn byen Lalwa i konplent: “Ansenyan, ou pe ensilte nou osi par sa ki ou pe dir.” Me sa bann zonn i bezwen realize ki zot pa pe ed bann dimoun. Zezi i dir: “Maler lo zot osi ki konn byen Lalwa, parski zot met bann pake lour lo zepol dimoun ki difisil pour anmennen, me zot, ni menm avek en ledwa zot pa pare pour tous sa bann pake! Maler lo zot, aköz zot fer latonm bann profet, me zot zanset ki ti touy zot!”—Lik 11:45-47.

Sa bann pake ki Zezi pe koz lo la i reprezant bann tradisyon e lafason ki bann Farizyen i enterpret Lalwa. Sa bann zonn pe fer lavi difisil pour bann dimoun ki pe esey ador Bondye. Zot ensiste ki tou dimoun i aplik sa bann lareg e sa i vin en fardo lour pour zot. Zot zanset ti touy bann profet Bondye e zot ti konmans par Abel. La apre zot fer konmsi zot pe onor bann profet par konstri bann latonm pour zot, me zot annan menm latid e fer menm keksoz ki zot zanset. Zot pe esey touy pli gran Profet ki Bondye in anvoye. Zezi i dir ki Bondye pou fer sa zenerasyon rann kont e sa ti arive apepre 38 an pli tar lannen 70.



Zezi i osi dir: “Maler lo zot ki konn byen Lalwa parski zot in pran lakle konnesans. Zot menm zot pa’n antre e zot esey anpes lezot antre!” (Lik 11:52) Sa bann zonm i devret eksplik Parol Bondye avek bann dimoun, me olye fer sa, zot anpes dimoun konn e konpran son Parol.

Ki mannyer bann Farizyen ek profeser lalwa i reazir? Ler Zezi pe kit sa landrwa, zot konmans ankoler, opoz li e demann li kestyon enn deryer lot. Zot pa pe demann li sa bann kestyon akoz zot anvi aprann. Non, zot anvi esey trik Zezi pour fer li dir en keksoz ki zot kapab servi kont li pour aret li.



- ◇ Akoz Zezi ti kondann bann Farizyen ek profeser lalwa?
- ◇ Ki fardo bann dimoun ti ganny forse pour anmennen?
- ◇ Ki pou arive avek bann dimoun ki ti opoz Zezi e esey touy li?

## ZEZI I DONN KONSEY KONSERNAN LARISES

LIK 12:1-34

Zezi pe pran en repa kot en Farizyen, plizyer milye dimoun i rasanble deor pour esper li. Sa in deza arive Galile osi. (Mark 1:33; 2:2; 3:9) La Zide, bokou dimoun i anvi vwar li e ekout li, kontrerman avek bann Farizyen ki pe manz avek li.

Sa premye keksoz ki Zezi i dir i annan en gran sinifikasyon pour son bann disip: “Fer atansyon lelven bann Farizyen, setadir lipokrizi.” Zezi in deza donn son bann disip sa laver-tisman, me sa ki i’n vwar pandan sa repa i montre ki kantite i irzan pour aplik sa konsey. (Lik 12:1; Mark 8:15) Bann Farizyen i kapab fer krwar ki zot byen relizye pour kasyet sa ki zot vreman ete, me zot en gran danze ki bezwen ganny devwale. Zezi i eksplike: “Napa en keksoz ki byen kasyet ki pa pou ganny revele e napa sekre ki pa pou ganny devwale.”—Lik 12:2.

I kapab ki laplipar dimoun dan lafoul i sorti Zide e zot pa’n tann Zezi ansennyen ler i ti Galile. Alor i repet bann pwen prensipal ki i ti’n dir avan. I dir zot: “Pa bezwen per sa bann ki kapab touy ou me ki pa kapab fer plis ki sa apre ki ou’n mor.” (Lik 12:4) Parey i’n fer avan, i fer resorti ki son bann disip i bezwen annan konfyans ki Bondye pou pran swen avek zot. Zot osi bezwen vin en disip Garson zonn e realize ki Bondye i kapab ed zot.—Matye 10:19, 20, 26-33; 12:31, 32.

Apre sa, en zonn dan lafoul i koz avek Zezi lo son problenm. I dir: “Ansenyan, dir mon frer partaz avek mwan leritaz ki nou papa in kite.” (Lik 12:13) Lalwa i dir ki garson premye ne i devret ganny de fwa plis ki lezot zanfan, alor i pa devret annan okenn problenm. (Deteronnm 21:17) Me i paret ki sa zonn i anvi

ganny plis ki i sipoze gannyen. Avek lasazes, Zezi pa pran okenn kote dan sa zafer. I deman-de: “Msye, lekel ki’n apwent mwan ziz ouswa sa enn ansarz pour partaz keksoz ant zot de?” —Lik 12:14.


Apre Zezi i donn tou dimoun sa konsey: “Gard zot lizye ouver e evit tou sort vorasite, parski menm ler en dimoun i annan en kantite keksoz, pa sa bann keksoz ki donn li lavi.” (Lik 12:15) Nenport ki kantite larises en dimoun i annan, pa en zour i pou mor e kit tou keksoz deryer? Zezi i servi en legzanp ki fasil pour rapel pour fer resorti sa pwen e ki montre lenportans pour annan en bon repitasyon devan Bondye.

“En zonn ris ti’n ganny en bon rekolt dan son plantasyon. Alor i ti mazin en dan li menm, ‘Ki mon devret fer la ki mon napa ankor landrwa pour met mon rekolt?’ Alor i ti dir, ‘Mon konnen ki mon pou fer: Mon pou kas mon bann stor e konstri bann pli gran. Mon pou met tou mon rekolt ek mon bann keksoz ladan e mon pou dir dan mwan menm: “Mon annan en kantite bon keksoz ki mon’n anmase pour plizyer lannen, aprezan mon pou profite, manze, bwar e anmize.”’ Me Bondye ti dir li, ‘En-besil, ozordi swar ou pou mor. Lekel alor ki pou ganny sa bann keksoz ki ou’n anmase?’ Sanmenm sa ki arive avek en dimoun ki anmas en trezor pour li menm, me ki pa ris devan Bondye.”—Lik 12:16-21.

Bann disip Zezi ek lezot ki pe ekout li i kapab tonm dan en latrap si zot tay deryer larises. Bann traka lavi i osi kapab vin en distrak-syon ki anpes zot servi Zeova. Alor Zezi i repet sa bon konsey ki i ti donner enn an edmi pase pandan Sermon lo Montanny:

“Aret trakase konsernan sa ki zot pou manze pour viv oubyen lenz ki zot pou mete. . . . Get byen bann korbo: Zot pa senm lagrenn, ni rekolte, zot napa ni langar, ni stor, pourtan Bondye i donn zot manze. Pa zot annan bokou plis valer ki bann zwazo? . . . Get byen lafason ki bann lis i pouse: Zot pa rente, ni koud lenz, me mon dir zot ki menm Salomon dan tou son laglwar pa ti abiye parey enn sa bann lis. . . . Alor, aret enkyet pour sa ki zot pou manze e bwar e aret trakas tro bokou, . . . zot Papa i konnen ki zot bezwen sa bann keksoz. . . . Kontinen rod son Rwayonm e i pou donn zot sa bann keksoz.—Lik 12:22-31; Matye 6:25-33.

Lekel ki pou rod Rwayonm Bondye? Zezi i dir ki dan en sans zis en pti group dimoun fidel oubyen en “pti troupo” ki pou fer sa. Pli tar, Zeova pou revele ki i pou annan zis 144,000 dimoun. Ki pou arive avek zot? Zezi i asir zot: “Zot Papa in deside pour donn zot Rwayonm.” Zot pa pou konsantre lo anmas trezor lo later kot bann voler i kapab vole. Plito, zot pou konsantre lo “trezor dan lesyel ki pa pou zanmen gate,” kot zot pou diriz ansanm avek Kris.—Lik 12:32-34.



- ◇ Ki manyer Zezi ti reponn en kestyon konsernan leritaz?
- ◇ Akoz nou devret reflexir lo sa legzanp ki Zezi ti donnen?
- ◇ Ki Zezi ti dir konsernan bann ki pou avek li dan Rwayonm?



## BANN ADMINISTRATER FIDEL I DEVRET MET ZOT PARE!

LIK 12:35-59

Zezi in eksplike ki zis en “pti troupo” ki pou ganny en plas dan Rwayonm lesyel. (Lik 12:32) Me ganny en zoli rekonpans koumsa pa devret ganny pran alalez. Anfet, apre sa Zezi i koz lo ki kantite i enportan pour en dimoun annan en bon latitud pour li kapab antre dan Rwayonm Bondye.

I pour sa rezon ki Zezi i demann son bann disip pour met zot pare pour son retour. I dir: “Met zot pare e gard zot lalanp alimen. Zot devret parey bann zonm ki pe esper zot met retournen sorti en maryaz, pour ki ler i vin tap laport, zot ava deswit kapab ouver laport pour li. Ere sa bann lesklav ki ler zot met i vini i vwar zot pe veye!”—Lik 12:35-37.

Bann disip i kapab fasilman konpran sa legzanp ki Zezi in servi. Sa bann serviter ki Zezi i koz lo la in pare e zot pe esper zot met retournen. Zezi i eksplike: “Si [sa met] i vin tar aswar [ant ne-v-er diswar ek minwi] ouswa menm apre minwi [ant minwi ek trwa-z-er bomaten] e vwar zot pare, zot devret ere!”—Lik 12:38.

Zezi pa pe zis donn kosey pour vin en bon serviter kot lakour son met. Sa i evidan ler Zezi i koz lo Garson zonm dan sa legzanp. I dir son bann disip: “Zot osi, met zot pare parski Garson zonm pe vin en ler ki zot pa pe ekspekte.” (Lik 12:40) Alor, Garson zonm setadir Zezi pou vini dan lavenir e i anvi ki son bann disip, sirtou bann ki form parti sa “pti troupo” i met zot pare.

Pyer i anvi byen konpran sa ki Zezi in dir, alor i demande: “Senyer, eski sa legzanp i zis pour nou ouswa pour tou dimoun osi?” Olye reponn Pyer direkteman, Zezi i donn en lot legzanp ki relye avek sa size: “Lekel vreman sa

administrater fidel ki pridan ki son met pou met li ansarz son bann serviter pour kontinyen donn zot zot rasyon manze dan sa moman apropiye? Ere sa lesklav si ler son met i vini i vwar li pe fer son louvraz! Vreman mon dir zot, i pou met li ansarz tou son byen.”—Lik 12:41-44.

Dan legzanp sa met ki sorti en maryaz, i kler ki sa “met” pe refer avek Zezi, Garson zonm. Alor i fer sans ki sa “administrater fidel” dan sa dezyenm legzanp pe refer avek bann dimoun ki form parti sa “pti troupo” ki Bondye pou donn zot Rwayonm. (Lik 12:32) La Zezi pe dir ki serten manm sa group pou donn “son bann serviter . . . zot rasyon manze dan sa moman apropiye.” Alor Pyer ek lezot disip ki Zezi pe ansennyen e nourri spirityelman i kapab konpran ki i pou annan en letan a lavenir kot Garson zonm pou vini. Ler Garson zonm pou vini, i pou annan en laranzman ki pou ganny met an plas pour donn manze spirityel “bann serviter” sa Met, setadir bann disip Zezi.

Zezi i met lanfaz lo lenportans pour son bann disip reste vizilan e vey byen zot latitud. Sa i akoz i fasil pour en dimoun aret veye oubyen menm opoz son bann frer ek ser. Zezi i dir: “Me si zanmen sa lesklav i dir dan li menm, ‘Mon met pe tarde’ e i konmans bat bann serviter ek servant, manze, bwar ziska i sou, alor, met sa lesklav pou vin en zour ki i pa pe ekspekte, en ler ki i pa konnen e i pou pini li severman e donn li en plas parmi bann enfidel.”—Lik 12:45, 46.

Zezi i osi dir ki i’n vin pour “alim en dife lo later.” Sanmenm ki’n arive ler i’n koz lo

bann size ki kree bann divizyon. Bann lansennyman Zezi i parey en dife ki'n bril bann fo lansennyman ek tradisyon. Sa i menm fer bann dimoun ki sipoze ini vir kont kanmarad, par egzanp, "papa kont garson, garson kont papa, manman kont fiy, fiy kont manman, belmer kont belfiy e belfiy kont belmer."—Lik 12:49, 53.

Zezi i dir sa espesyalman pour son bann disip. Apre, Zezi i vire e get lafoul. Laplipar

dimoun in konpletman refize aksepte levidans ki i Mesi, alor i dir zot: "Ler zot vwar nyaz dan was, deswit zot dir, 'En tanpet pe al deklare' e i arive. Ler vandsid pe souffle, zot dir, 'I pou annan gro lasaler' e i arive. Ipokrit, zot konn enterpret bann siny dan lesyel e lo later pour predir letan, me ki mannyer zot pa konn enterpret sa ki pe arive la konmela?" (Lik 12:54-56) I kler ki sa bann dimoun pa pare pour aksepte Mesi.



- ◇ Lekel sa "met" e lekel "sa administrater fidel"?
- ◇ Akoz bann disip ti kapab mazinen ki i ti pou annan en administrater fidel a lavenir e ki rol sa administrater ti pou annan?
- ◇ Akoz konsey Zezi pour "met zot pare" i sitan enportan?

## AKOZ DESTRIKSYON I PROS?

LIK 13:1-21

Zezi in servi diferan fason pour ankouraz bann dimoun pour reflesir lo zot relasyon avek Bondye. I ganny en lot lokazyon pour koz lo sa size apre son konversasyon avek bann dimoun an deor lakaz en Farizyen.

Serten parmi zot i koz lo en maler ki'n arive. Zot dir Zezi ki "[Gouverner Romen Pons] Pilat ti touy bann Galileen ler zot ti pe ofer zot sakrifis." (Lik 13:1) Ki zot pe esey dir?

Petet sa bann Galileen i sa bann ki ti ganny touye ler plizyer milye Zwif ti proteste aköz Pilat ti'n servi larzan dan bwat kontribisyon tanp pour konstri en pon (*aqueduct*) pour anmenn delo Zerizalenm. Petet Pilat ti'n ganny sa larzan avek led bann ki ti ansarz tanp. I posib ki bann dimoun ki pe rakont sa zistwar i krwar ki sa maler ti ariv lo bann Galileen aköz zot ti'n fer bann keksoz mal. Me Zezi pa dakor.

I demande: "Eski zot krwar ki sa bann Galileen ki ti mor dan sa fason, zot pese ti pli pir ki tou lezot Galileen?" Son larepons i non. Me i servi sa lensidan pour averti bann Zwif: "Tan ki zot pa repantir, zot tou zot pou osi ganny detrir." (Lik 13:2, 3) Apre sa, Zezi i koz lo en lot maler ki'n arive pa tro lontan e i posib ki sa i osi relye avek konstriksyon sa pon. I demande:

"Eski zot krwar ki sa 18 dimoun ki latour Siloam ti tonm lo zot e touy zot ti pli koupab ki tou lezot dimoun ki ti pe reste Zerizalenm?" (Lik 13:4) I kapab ki lafoul i krwar ki sa bann dimoun ti mor aköz zot ti'n fer en keksoz mal. Ankor enn fwa Zezi pa dakor. I konnen ki bann maler i kapab arive nenport ler e nenport landrwa e ki dan sa ka, sa maler ti en aksidan ki ti'n kapab ariv avek nenport ki. (Eklezyast 9:11) Me bann dimoun i devret aprann en leson avek sa levennman. Zezi i dir: "Tan ki zot pa repantir,

zot tou zot pou ganny detrir parey zot." (Lik 13:5) Be aköz i pe met lanfaz lo sa size apre-zan?

Nou kapab konpran aköz ler nou mazin en kantite letan i reste li avan son lanmor. Zezi i servi en legzanp pour eksplik sa. "En zonnm ti plant en pye fig dan son plantasyon rezen e ler i ti vin rod fri lo la i pa ti vwar ni enn. Alor i ti dir son zardinyen, 'Get sa, i fer trwa-z-an depi ki mon pe vin rod fri lo sa pye fig me mon pa'n zanmen vwar ni enn. Koup li! Akfer kit li la si i pa pe raport okenn fri?' Sa zardinyen ti dir son



met, 'Met, les li pour ancor enn an, mon ava fouy toultour li e met fimyen. Si apre sa i raport fri, sa i byen, me si non alor ou a koup li.'" —Lik 13:6-9.

I fer plis ki trwa-z-an depi ki Zezi pe esey ed bann Zwif devlop lafwa. Par kont, pa bokou dimoun ki'n vin son disip e ki kapab ganny konsidere konman bann fri ki Zezi in prodwir. La pandan katriyenm lannen son minister, i pe fer plis zefor ancor. I konmsi i pe fouy toultour sa pye fig ki reprezant sa nasyon Zwif e i pe met fimyen par pres e ansenny an Zide ek Pere. Ki rezilta sa in anmennen? Pa bokou Zwif ki aksept lansennyman Zezi. Konman en nasyon, bann Zwif i refize repantir e zot pou ganny detrir.





vin rod gerizon dan sa bann zour me pa zour Saba.” (Lik 13:14) Sa zofisye pa pe dir ki Zezi napa pwisans pour geri, me i pe kondann bann dimoun akoz zot in vin kot Zezi pour ganny geri zour Saba. Zezi i reponn dan en fason kler e lozik: “Ipokrit, pa sakenn ant zot ki la i delarg son toro oubyen bourik ki dan park pour anmenn li bwar delo zour Saba? Pa sa madanm ki en fiy Abraam e ki Satan in anmare pour 18 an i merit ganny delarge zour Saba?”—Lik 13:15, 16.

Bann dimoun ki pe opoz li i onte me lafoul i dan lazwa akoz tou bann keksoz merveye ki zot pe vwar Zezi fer. Apre lanmenm la Zide, i repet de legzanp profetik konsernan Rwayonm. Zezi ti’n fini koz lo sa de legzanp pli boner ler i ti dan en kannot lo Lanmer Galile.—Matye 13:31-33; Lik 13:18-21.

Pa bokou letan apre, en zour Saba, en lot keksoz i arive ki montre ki bann Zwif pa’n aksepté lansennyman Zezi. Zezi pe ansennyen dan en sinagog. I vwar en madanm ki kourbe depi 18 an akoz i posede par en demon. Zezi i pran pitye pour li e i dir: “Madanm, ou’n geri.” (Lik 13:12) I poz son lanmen lo li, deswit sa madanm i debout drwat e konmans glorifye Bondye.

Sa i fer zofisye sinagog ankoler e i dir: “I annan sis zour ki travay i devret ganny fer, alor



- ◇ Ki de maler Zezi i servi pour donn en lavertisman e ki lavertisman i donner?
- ◇ Ki mannyer sityasyon nasyon Zwif i parey legzanp sa pye fig ki pa raport fri?
- ◇ Akoz sa zofisye sinagog ti ankoler e ki mannyer Zezi ti montre ki sa zonm i en ipokrit?

# BON BERZE EK BERKAY

ZAN 10:1-21

Pandan ki Zezi i ankor pe ansennyen Zide, i koz lo en keksoz ki bann dimoun i kapab fasilman konpran. Sa i mouton ek berkay, me i koz lo la dan en fason senbolik. Petet bann Zwif i rapel parol David kot i ti dir: “[“Zeova,” *NWT*] i mon berze. Mon pa pou mank nanryen. I fer mwan repoz dan laplenn zerb ver.” (Psonm 23:1, 2) Dan en lot psonm, David ti donn nasyon Izrael sa lenvitasyon: “Annou azenou devan Zeova nou Kreater. Parski i nou Bondye e nou son troupo.” (Psonm 95:6, 7, *NWT*) Parey nou vwar, depi lontan bann Izraelit ki ti anba Lalwa ti ganny konpare avek en troupo mouton.

Sa bann “mouton” i dan en “berkay” akoz depi zot nesans, zot ti anba lalyans Lalwa Moiz. Lalwa ti parey en baraz ki ti protez zot kont bann move pratik ki bann dimoun ki pa ti swiv Lalwa ti fer. Me serten Izraelit pa ti tret troupo Bondye byen. Zezi i dir: “Vreman mon dir zot laverite, sa enn ki pa antre dan berkay par laport me ki grenp par en lot bor, sa dimoun i en voler e en bandi. Me sa enn ki antre par laport i berze bann mouton.”—Zan 10:1, 2.

Ler Zezi i dir sa, bann dimoun i kapab mazin bann zonm ki ti dir ki zot Mesi oubyen Kris. Zot parey bann voler ek bandi. Bann dimoun pa devret swiv sa bann anbeter. O kontrer, zot devret swiv “berze bann mouton.” La sa ki Zezi i dir konsernan sa berze:

“Gardyen i ouver laport pour li e bann mouton i ekout son lavwa. I apel son bann mouton par zot non e i anmenn zot an deor berkay. Ler i’n fer tou son mouton sorti, i pas par devan zot e son bann mouton i swiv li akoz zot konn son lavwa. Zot pa pou zanmen swiv en etranze, me zot pou tay lwen avek li akoz zot pa konn lavwa bann etranze.”—Zan 10:3-5.

Avan sa, Zan ki batize ti parey sa gardyen e i ti fer dimoun konnen ki Zezi i sa enn ki sa bann mouton senbolik ki anba Lalwa i devret swiv. Serten dimoun in rekonnet lavwa Zezi dan rezyon Galile ek Zide. Kote i pou “anmenn zot”? Ki pou arive si zot swiv li? Petet serten ki pe ekout sa legzanp i annan bann kesyon parski ‘zot pa konpran sa ki i pe dir zot.’—Zan 10:6.

Zezi i eksplike: “Vreman mon dir zot laverite, mwan menm laport pour bann mouton. Tou bann ki’n dir ki zot sa bon berze i bann voler ek bandi, me bann mouton pa’n ekout zot. Mwan menm sa laport, sa ki antre par mwan pou ganny sove, i pou antre sorti e i pou ganny zerb pour manze.”—Zan 10:7-9.

I kler ki Zezi pe entrodwi en keksoz nouvo la. Bann dimoun ki pe ekout li i konnen ki i pa laport pour lalyans Lalwa ki’n egziste pour plizyer syek. Alor i bezwen ki sa bann mouton ki Zezi i ‘anmenn an deor’ berkay pou antre dan en lot berkay. Ki pou arive apre?

Zezi i donn plis detay lo son rol: “Mon’n vini pour ki zot ganny lavi e zot pou ganny lavi eternal. Mwan mon sa bon berze, sa bon berze i donn son lavi pour son bann mouton.” (Zan 10: 10, 11) Avan sa, Zezi ti’n rekonfort son bann disip ler i ti dir zot: “Pa bezwen per pti troupo parski zot Papa in deside pour donn zot Rwayonm.” (Lik 12:32) Byensir, bann ki form parti sa “pti troupo” i sa bann ki Zezi pou anmenn dan en nouvo berkay pour ki zot kapab “ganny lavi e zot pou ganny lavi eternal.” Pa i en benediksyon pour bann ki form parti sa troupo!

Me Zezi pa fini la. I dir: “Mon annan lezot mouton ki pa dan sa berkay, sa bann osi mon



bezwen rasanble zot. Zot pou ekout mon lavwa e i pou annan en sel troupo ek en sel berze.” (Zan 10:16) Sa bann “lezot mouton . . . pa dan sa berkay.” Alor, i bezwen ki zot dan en lot berkay, enn ki diferan avek berkay sa “pti troupo” ki pou dan Rwayonm. Bann mouton dan sa de berkay pa pou ganny menm rekonpans. Kantmenm sa, bann mouton dan tou le de berkay pou benefisye avek sa ki Zezi pou fer. I dir: “Sanmenm rezon ki mon Papa i kontan mwan,

parski mon pare pour donn mon lavi.”—Zan 10:17.

En kantite dimoun dan lafoul i dir: “I posede par en demon e i’n perdi latet.” Par kont, lezot pe byen ekoute e zot anvri swiv sa Bon Berze. Zot dir: “Pa koumsa ki en zonm posede par demon i koze. En demon pa kapab fer dimoun aveg vwar kler, non?” (Zan 10:20, 21) I paret ki zot pe koz lo sa zonm ki ti ne aveg ki Zezi ti’n geri.

- 
- ◇ Ki bann Zwif ti kapab konpran ler Zezi ti koz lo mouton ek berkay?
  - ◇ Lekel ki Zezi ti dir i sa Bon Berze e kote i pou anmenn bann mouton?
  - ◇ Ki sa de berkay ki bann mouton Zezi pou ganny anmenn ladan?



## DAN KI SANS ZEZI EK SON PAPA I EN SEL?

ZAN 10:22-42

Zezi in vin Zerizalenm pour Lafet Pirifikasyon Tanp (ki osi ganny apele *Hanukkah*). Sa lafet i ganny selebre pour komemor ler tanp ti ganny dedye pour en dezyenm fwa. Plis ki en syek avansa, Lerwa Siryen Antyokis Epifann 4 ti konstri en lotel par lao sa gran lotel dan tanp Bondye. Pli tar, bann garson en pret Zwif ti rebran lavil Zerizalenm e dedye tanp pour Zeova en dezyenm fwa. Depi sa letan, zot ti fer en selebrasyon en fwa par an le 25 Kislev pour komemor sa levennman. Sa mwan ti koresponn avek lafen Novanm ek konmansman Desanm.

I pandan liver e i fer fre. Zezi pe marse dan tanp kot bann kolonn Salomon. Bann Zwif i antour li e demann li: “Ziska kan ou pou kit nou dan dout? Si ou menm Kris, dir nou fran.” (Zan 10:22-24) Ki mannyer Zezi pou reponn? I reponn: “Mon’n dir zot me kantmenm sa zot pa krwar.” Zezi pa’n dir zot *direkteman* ki i Kris, parey i ti dir sa madanm Samariten kot pwi. (Zan 4:25, 26) Me anfet, Zezi in fer zot konnen lekel li ler i’n dir: “Mon ti deza la avan Abraam ti vin an egzistans.”—Zan 8:58.

Zezi i anvii ki bann dimoun i vwar pour zot menm ki i Kris. Zot pou konpran sa si zot konpar sa ki Zezi pe fer avek sa ki bann profesii ti dir lo Kris. Sanmenm sa, i ti demann plizyer fwa son bann dispip pour pa dir personn ki i Mesi. Me la aprezan, i dir direkteman sa bann Zwif ki pe opoz li: “Sa ki mon pe fer o non mon Papa i rann temwannayaz lo mwan. Me zot pa krwar.”—Zan 10:25, 26.

Akoz zot pa krwar ki Zezi i Kris? I dir: “Zot pa krwar parski zot pa mon bann mouton. Mon bann mouton i ekout mon lavwa. Mon konn zot e zot swiv mwan. Mon donn zot lavi eternel e zot pa pou zanmen ganny detrir e personn pa pou aras zot dan mon lanmen. Sa ki mon Papa in donn

mwan i annan plis valer ki tou lezot keksoz.” Apre, Zezi i montre zot ki kantite i pros avek son Papa ler i dir: “Mwan ek mon Papa nou en sel.” (Zan 10:26-30) Zezi i la lo later e son Papa i dan lesyel, alor i pa kapab ki i pe dir ki li ek son Papa i vremen en sel dimoun. Plito, zot en sel dan sa sans ki zot annan menm lobzektif e zot ini.

Parol Zezi i fer bann Zwif telman ankoler ki ankorer enn fwa zot anmas bann ros pour touy li. Sa pa fer Zezi per, i dir: “Mon’n fer devan zot en kantite bon keksoz ki mon Papa in dir mwan fer. Pour ki bon keksoz ki mon’n fer ki zot pe saboul mwan?” Zot reponn: “Nou pe saboul ou, pa pour bann bon keksoz ki ou’n fer, me akoz ou pe dir bann keksoz mal kont Bondye. Parski . . . ou fer krwar ou en bondye.” (Zan 10:31-33) Zezi pa’n zanmen dir ki i en bondye, alor akoz zot pe fer sa lakizasyon?

Zezi pe dir ki i annan en pouvwar ki bann Zwif i krwar zis Bondye i annan. Par egzanp, Zezi fek dir zot: “Mon donn . . . lavi eternel” “mon bann mouton,” me pour bann Zwif, sa i en keksoz ki imen pa kapab fer. (Zan 10:28) Bann Zwif pa aksepté ki Zezi in dir an piblik ki i’n ganny lotorité avek son Papa.

Pour montre ki zot lakizasyon i fo, Zezi i demande: “Pa i’n ganny ekrir dan zot Lalwa [dan Psonm 82:6], ‘Mon’n dir, “Zot bann bondye”?’ Sa bann ki ti ganny kondannen i ganny apele ‘bann bondye’ dan parol Bondye. . . . Be mwan, mon Papa in sanktifie mwan e anvoy mwan dan lemonn, eski zot pe dir mwan, ‘Ou pe dir bann keksoz mal kont Bondye’ parski mon’n dir, ‘Mon Garson Bondye?’”—Zan 10:34-36.

Labib i menm refer avek bann ziz imen ki enparfe konman “bann bondye.” Alor ki mannyer sa bann Zwif i kapab vwar li mal ki Zezi i dir “Mon Garson Bondye”? I koz lo en keksoz ki devret



konvenk zot: “Si mon pa pe fer travay mon Papa, pa bezwen krwar mwan. Me si mon pe fer li, menm si zot pa krwar dan mwan, omwen krwar dan sa bann keksoz ki mon pe fer, koumsa zot a konnen e kontinyen krwar ki mon Papa i ini avek mwan e mwan mon ini avek mon Papa.” —Zan 10:37, 38.

Ankor enn fwa, zot esey tyonbo Zezi, me an-

kor enn fwa i sap zot. I kit Zerizalenm e al lot kote Larivyer Zourden kot Zan ti batiz dimoun apepre kat-r-an pase. I paret ki sa landrwa pa tro lwen avek sid Lanmer Galile.

Lafoul i vin kot Zezi e dir: “Zan pa ti fer ni menm en mirak, me tou sa ki Zan ti dir lo sa zonn i vre.” (Zan 10:41) Alor, bokou Zwif i annan la-fwa dan Zezi.

- ◇ Akoz Zezi ti montre lenportans bann travay ki i pe fer?
- ◇ Dan ki sans Zezi ek son Papa i en sel?
- ◇ Ki manyer sa verse dan Psonm ki Zezi ti site i montre ki i ti mal pour bann Zwif akiz Zezi konmkwa i pe fer son lekou vin en bondye oubyen egal avek Bondye?









SEKSYON

# 5

## MINISTER ZEZI DAN LES ZOURDEN

“EN KANTITE DIMOUN TI  
KONMANS ANNAN  
LAFWA DAN LI.”

—ZAN 10:42

## MINISTER ZEZI PERE

LIK 13:22-14:6

Zezi in ansenny e geri bann dimoun Zide ek Zerizalenm. Apre i kontinyen son minister dan bann lavil enn apre lot dan distrik Pere, lot kote Larivyer Zourden. Me i pa pou pran bokou letan avan i retourn Zerizalenm.


Ler Zezi i Pere, en zonn i demann li: “Senyer, zis en ptigin dimoun ki pou ganny sove?” Petet sa zonn i konnen ki bann sef relizye i kontan fer bann deba konsernan si bokou oubyen zis en ptigin dimoun ki pou ganny sove. Zezi i sanz konversasyon e olye koz lo konbyen dimoun ki pou ganny sove, i koz lo sa ki en dimoun i bezwen fer pour ganny sove. I dir: “Fer bokou zefor pour antre par laport etrwat.” Sa i montre nou ki nou bezwen fer zefor, nou bezwen lite pour antre par laport etrwat. Akoz? Zezi i eksplike: “Mon dir zot, bokou pou esey antre me zot pa pou kapab.”—Lik 13:23, 24.

Zezi i donn en legzanp pour montre akoz i enportan pour fer bokou zefor. I dir: “Kan met lakour i leve e tak laport, zot pou debout deor, tap laport e dir, ‘Senyer, ouver laport pour nou.’ . . . Me i pou dir zot, ‘Mon pa konnen lekel zot. Sorti la devan mwan, zot tou ki fer lemal!’”—Lik 13:25-27.

Sa legzanp i montre sityasyon en dimoun ki’n vin an retar petet akoz i’n vin sa ler ki bon pour li. Me ler i arive, laport in fermen e take. I ti’n devret vin pli boner, menm si sa pa sa pli bon moman pour li. Sanmenm sa ki’n arive avek bokou dimoun ki ti’n kapab benefisy e avek lansennyman Zezi. Zot pa’n sezi sa loportinite pour ki vre ladorasyon i vin en priorite dan zot lavi. Laplipar dimoun ki Zezi in ansennyen pa’n aksepte laranzman Bondye pour zot ganny sove. Zezi i dir ki zot pou “plere e grens zot ledan” ler zot ganny zet deor. Par kont, bann

dimoun “sorti dan les ek was, nor ek sid,” setadir dan tou nasyon, “pou vin atab dan Rwayonm Bondye.”—Lik 13:28, 29.

Zezi i eksplike: “Sa bann ki dernyen [setadir bann ki pa Zwif ek bann Zwif ki ganny konsidere bann dernyen dimoun] pou vin premye e bann ki premye [setadir bann sef relizye Zwif ki fyer akoz zot desandans Abraam] pou vin dernyen.”



(Lik 13:30) Sa bann dimoun ki mank lapresyasyon pour keksoz spirityel pou vin “dernyen” dan sa sans ki zot pa pou antre dan Rwayonm Bondye ditou.

Apre sa, serten Farizyen i vin kot Zezi e konsey li: “Kit sa landrwa parski Erod [Antipas] i anvi touy ou.” Petet Lerwa Erod li menm ki’n konmans sa rimer pour esey fer Zezi kit sa landrwa. Kekfwa Erod i per ki dan en fason ou en lot i pou enplike dan lanmor en lot profet, parey

i ti leka avek lanmor Zan ki batize. Me Zezi i dir bann Farizyen: “Al dir sa renar, ‘Gete, mon pe sas demon e geri bann dimoun ozordi ek demen e trwazyenm zour, mon pou’n fini fer tou sa ki mon annan pour fer isi.’” (Lik 13:31, 32) Ler Zezi i krey Erod “renar,” i posib ki i pe refer avek lefet ki bann renar i rize. Par kont, Zezi pa pou les Erod oubyen okenn lezot dimoun manipil li ouswa fer li kit sa landrwa vitman. I pou fer sa travay ki son Papa in donn li, dapre program Bondye, pa program zonn.

Zezi i kontiny son vwayaz ver Zerizalenm, parski parey i dir, “i pa kapab arive ki en profet i ganny met amor an deor Zerizalenm.” (Lik 13:33) Napa okenn profesi Labib ki dir ki Mesi i bezwen mor dan sa lavil, alor akoz Zezi i dir ki i pou ganny touye laba? Parski Zerizalenm i lavil prensipal. Se laba ki Sannedren i ete. Sannedren i lakour siprenm Zwif ki i annan 71 manm. Normalman, se sa lakour ki ziz bann dimoun ki’n ganny akize konman fo profet. Deplis, Zerizalenm i sa landrwa kot bann sakrifis zannimo i ganny ofer. Alor Zezi i realize ki i pa ti pou akseptab pour li ganny touye okenn lezot landrwa.

Zezi i osi dir: “Zerizalenm, Zerizalenm, lavil ki’n touy bann profet e ki’n saboul avek ros bann ki’n ganny anvoye kot li, konbyen fwa mon ti anv rasanble ou bann zanfan parey en mer poul i rasanble son bann piti anba son lezel! Me zot pa ti oule. Gete! Zot lakaz pou ganny



abandonnen.” (Lik 13:34, 35) Sa nasyon pe rezet Garson Bondye e zot pou bezwen pey konsekans zot aksyon!

Avan Zezi i ariv Zerizalenm, en sef bann Farizyen i envit li pour vin pran en repa kot li zour Saba. Bann dimoun ki’n ganny envite i vey tou sa ki Zezi pe fer pour gete si i pou geri en zonn ki annan en maladi ki fer delo akimile dan son lekor (souvandfwa dan lipye). Zezi i demann bann Farizyen ek bann eksper Lalwa: “Eski i kont lalwa pour geri en dimoun zour Saba?”—Lik 14:3.

Personn pa reponn. Zezi i geri sa zonn e apre i demann zot: “Lekel parmi zot ki si son garson ouswa son toro i tonm dan en pwi zour Saba ki pa pou deswit tir li?” (Lik 14:5) Ankore enn fwa, zot pa kapab dir nanryen.

- ◇ Dapre Zezi, ki dimoun i bezwen fer pour ganny sove? Akoz en kantite dimoun ti ganny take deor?
- ◇ Lekel sa bann dimoun ki “dernyen” ki pou vin “premye” e bann “premye” ki pou vin “dernyen”?
- ◇ Kwa ki ti kapab pe trakas Lerwa Erod?
- ◇ Akoz Zezi ti dir ki i ti pou ganny touye Zerizalenm?



# LENVITASYON POUR EN REPA

LIK 14:7-24

Zezi i ankor kot lakaz sa Farizyen apre ki i'n geri sa zonn malad. Zezi i get bann envite ki swazir bann pli bon plas e i servi sa konman en loportinite pour ansenny en leson lo limilite.

Zezi i dir: "Ler en dimoun i envit ou en resepsyon maryaz, pa bezwen asiz dan pli bon plas. I kapab ki en dimoun pli enportan ki ou in osi ganny envite. Apre, sa enn ki'n envit zot tou le de pou vin dir ou, 'Donn li ou plas.' Alor, avek laont ou pou bezwen al pran dernyen plas." —Lik 14:8, 9.

Apre sa Zezi i dir: "Ler ou ganny envite, al asiz dan dernyen plas pour ki ler sa dimoun ki'n envit ou i vini, i a dir ou, 'Mon zanmi, vin asiz dan sa pli bon plas.' Alor, ou pou ganny onore devan tou lezot envite." Sa pa zis pour demonstre lapolites akoz Zezi i eksplike: "En dimoun ki oule ganny onore pou ganny abese e sa enn ki abes son lekor pou ganny onore." (Lik 14:10, 11) Anfet, Zezi pe ankouraz bann dimoun ki pe ekout li pour devlop limilite.

Apre Zezi i eksplik en lot keksoz sa Farizyen ki'n envit li. I montre li ki mannyer pour demonstre lospitalite dan en fason ki fer plezir Bondye. I dir li: "Ler ou fer en dezennen oubyen en dinen, pa bezwen envit ou bann zanmi, frer, fanmir oubyen vwazen ris, akoz zot osi zot pou envit ou e i pou konmsi zot pe repey ou. Plito, ler ou fer en festen, envit bann pov, andikape, bwate, aveg e ou pou ere parski zot napa nanryen pour repey ou avek." —Lik 14:12-14.

I normal pour envit bann zanmi, fanmir oubyen vwazen pour en repa e Zezi pa pe dir ki i annan okenn keksoz mal avek sa. Me i met lanfaz ki zot kapab ganny en gran benediksyon si zot fer en repa pour bann ki dan bezwen,

parey bann ki pov, andikape oubyen aveg. Zezi i eksplik sa Farizyen: "Ou pou ganny rekonpanse zour rezireksyon bann dimoun drwat." En lot envite i dakor e i dir: "Ere sa enn ki manz dan Rwayonm Bondye." (Lik 14:15) Sa dimoun i vwar ki sa pou en gran privelez. Par kont, pa tou dimoun ki apresye sa privelez. Zezi i servi en legzanp pour montre sa:

"En zonn ti pe fer en gran dinen e i ti envit en kantite dimoun. . . . I ti anvoy son lesklav pour dir bann envite, 'Vini, parski tou keksoz in pare.' Me zot tou zot ti konmans rod leskiz. Sa enn premye ti dir, 'Eskiz mwan, mon pa pou kapab vini parski mon pe al get plantasyon ki mon'n aste.' En lot ti dir, 'Eskiz mwan, mon pa pou kapab vini akoz mon pe al get sa dis bef ki mon'n aste.' En lot ankor ti dir, 'Mon fek marye e se pour sa rezon ki mon pa kapab vini.'" —Lik 14:16-20.

Sa pa bann bon leskiz! Normalman en zonn i egzamin en plantasyon oubyen bann zannimo avan ki i aste zot, alor i pa irzan pour li al get zot apre. Sa trwazyenm zonn pa pe prepar li pour marye. I'n fini marye, alor sa pa devret anpes li aksepte en lenvitasyon enportan. Ler sa met i tann sa bann leskiz, i ankoler e i dir son lesklav:

"Al deswit dan bann gran semen ek lale dan sa lavil e anmenn bann dimoun pov, andikape, aveg e bwate isi." Apre ki sa lesklav in fer sa, i ankor annan plas. Alor sa met i dir son lesklav: "Al dan bann semen ek lari e persyad bann dimoun pour vini koumsa mon lakaz i a plen. Parski mon dir zot, napa enn parmi sa bann dimoun ki mon ti'n envite ki pou gout mon manze." —Lik 14:21-24.

Sa ki Zezi fek rakonte i en bon legzanp pour montre ki mannyer Zeova in servi Zezi pour envit bann dimoun pour antre dan Rwayonm le-syel. Bann Zwif sirtou bann sef relizye in ganny envite premye. Laplipar zot in rezet lenvitasyon Zezi tou dilon son minister. Me i pou annan le-zot ki pou ganny envite. I kler ki Zezi pe dir ki a lavenir i pou annan en dezyenm lenvitasyon

pour bann Zwif ki ganny meprize e bann ki'n konverti dan larelizyon Zwif. Apre sa, i pou annan en trwazyenm e deryen lenvitasyon pour bann dimoun ki dapre bann Zwif pa pou kapab ganny laprouvasyon Bondye.—Akt 10:28-48.

Sa ki Zezi pe dir i vremen konfirm sa ki en lot envite ti dir: “Ere sa enn ki manz dan Rwayonm Bondye.”



- ◇ Ki leson Zezi ti donner lo limilite?
- ◇ Ki mannyer en dimoun i kapab demontre lospitalite dan en fason ki fer plezir Bondye? Ki mannyer sa pou fer li ere?
- ◇ Ki pwèn Zezi ti fer resorti dan son legzanp konsernan en met ki ti fer en dinen?

## RESPONSABILITE EN DISIP KRIS

LIK 14:25-35

Zezi in ansenny bann keksoz enportan ler i'n pran en repa kot lakour en sef bann Farizyen. Anmezir ki Zezi i al Zerizalenm, en gran lafoul i swiv li. Akoz? Eski zot vreman anvi vin son vre disip e fer nenport kwa ki zot ganny demande?

Pandan zot vwayaz, Zezi i dir en keksoz ki kapab sok serten parmi zot: "Si en dimoun i vin kot mwan me i pli kontan son papa, manman, madanm, zanfan, frer, ser oubyen menm son prop lavi ki mwan, i pa kapab vin mon disip." (Lik 14:26) Me ki Zezi pe esey dir ler i dir sa?

Zezi pa pe dir ki son disip pa devret kontan zot fanmir. Plito, i pe dir ki zot devret kontan Zezi plis ki zot fanmir. Zot pa devret parey sa zonm ki ti'n ganny envite sa dinen me ki ti refiz sa lenvitasyon enportan akoz i ti'n fek marye. (Lik 14:20) Labib i dir ki Zakob, en zanset bann Zwif, "pa ti kontan" Lea me i ti kontan Rasel. Sa i vedir ki i ti pli kontan Rasel ki Lea son ser.—Zenez 29:31.

Remarke ki Zezi i dir ki en disip i devret pli kontan Zezi ki "menm son prop lavi." Sa i vedir ki en vre disip i menm pare pour mor si i nesaser. I kler ki i en gro responsabilite pour vin en disip Kris. I pa devret ganny pran alalezer san byen reflexir.

En dimoun i kapab ganny bann difikilte ek persekisyon ler i vin en disip, parski Zezi i dir: "Sa ki pa anmenn son poto martir e swiv mwan, i pa kapab vin mon disip." (Lik 14:27) Bann vre disip Zezi i bezwen pare pour anmenn zot poto setadir ki zot devret pare pour soufer zis parey Zezi. Zezi ti menm dir ki son bann lennmi pou touy li.

Alor lafoul ki pe swiv Zezi i bezwen reflexir seryezman lo sa ki enplike pour vin en disip Kris. Zezi i servi en legzanp pour fer sa pwen pli kler. I dir: "Par egzanp, lekel parmi zot ki oule konstri en lakaz ki pa premyerman asize e kalkile konbyen i pou kout li pour vwar si i annan ase larzan pour li fini li? Parski si non, i kapab fer son fondasyon me i pa arive fini li." (Lik 14:28, 29) Alor avan ki bann ki pe al



Zerizalenm avek li i vin son disip, zot devret determinen pour fer tou sa ki zot in deside pour fer. I met lanfaz lo sa pwen par servi en lot legzanp:

"Ki lerwa ki pe al lager kont en lot lerwa ki pa premyerman asize e rod konsey pour vwar si i kapab ranport laviktwar avek 10,000 solda kont sa enn ki annan 20,000 solda? Anfet, si i pa kapab fer li, letan ki sa lot lerwa i ankor lwen, i pou anvoy bann anbasader pour fer lape. Dan menm fason, zot kapab asire ki si en



dimoun pa abandonn tou son bann byen, i pa pou kapab vin mon disip.”—Lik 14:31-33.

Byensir, Zezi pa pe zis dir sa pour sa lafoul ki pe swiv li lo semen. Tou dimoun ki aprann konn Kris i bezwen pare pour fer sa ki Zezi in dir. Sa i vedir ki si zot anvri vin son disip, zot bezwen pare pour sakrifye tou sa ki zot annan, par egzanz zot byen materyel e menm zot lavi. Sa i en keksoz ki nou devret reflexir e priy lo la.

Aprezan Zezi i koz lo en keksoz ki i ti’n deza koz lo la dan son Sermon lo Montanny, ler i ti dir zot, “zot disel later.” (Matye 5:13) I tre probab ki i ti pe dir ki zis parey disel i prezerv en keksoz e anpes li gate, son bann disip i kapab ed lezot pour pa ganny kontaminen spirityelman oubyen moralman. La ver lafen son minister, Zezi i dir: “Nou asire ki disel i bon. Me si disel i nepli sale, ki mannyer i pou revin sale?” (Lik 14:34) Bann dimoun i konnen ki serten kalite disel pa pir e i kapab annan later ladan. Si sa disel pa vreman sale, alor i pa bon pour nanryen.

La Zezi pe montre ki menm si zot enn son disip depi en bon pe letan, zot bezwen fer sir ki zot pa perdi zot determinasyon pour reste son disip. Si sa arive, zot pou nepli itil, zis pa-



rey disel ki nepli sale. Deplis, dimoun i kapab boufonn zot, zot pa pou ganny laprouvasyon Bondye e zot menm kapab sali son non. Pour montre ki i vreman enportan pour pa les sa arive, Zezi i dir: “Sa enn ki annan zorey pour ekoute, ekoute.”—Lik 14:35.

- 
- ◇ Ki savedir ler Zezi i dir ki en disip i devret “pli kontan” li ki son fanmir oubyen menm ki “son prop lavi”?
  - ◇ Ki leson Zezi ti pe ansennyen ler i ti koz lo konstriksyon en lakaz e konsernan en lerwa ek son larme?
  - ◇ Ki pwèn Zezi ti pe fer resorti ler i ti koz lo disel?

# NOU KONTAN LER EN DIMOUN I REPANTIR

LIK 15:1-10

Plizyer fwa pandan son minister, Zezi in koz lo lenportans pour annan limilite. (Lik 14:8-11) I pe rod bann zonn ek fanm ki anv servi Bondye avek limilite. Ziska aprezan, i posib ki serten parmi zot i ankor pe fer bann pese grav.

Bann Farizyen ek profeser lalwa i remarke ki sa bann dimoun ki annan en move lavi i kontan Zezi ek son mesaj. Bann Farizyen ek profeser lalwa pa konsider sa bann dimoun diny pour resevwar sa mesaj e zot konplent: “Sa zonn i akeyir bann ki annan en move lavi e i manz avek zot.” (Lik 15:2) Zot krwar ki zot pli siperyer e zot tret bann dimoun ordiner pli ba ki later. Pour montre ki kantite zot mepriz sa bann dimoun, sa bann sef i apel zot ‘*am ha’ a’rets* an Ebre ki ve-dir bann “deryen dimoun.”

De lot kote, Zezi i tret tou dimoun avek dinyite, labonte ek konpasyon. Alor en kantite parmi sa bann dimoun, enkli bann ki renonnen pour zot move lavi i vremen anv ekout Zezi. Me ki mannyer Zezi i santi ler zot pe kritik li aköz i pe ed sa bann dimoun ordiner? Ki mannyer i reazir?

Nou vwar sa atraver en zoli legzanp ki Zezi i donnen, ki en pe parey sa enn ki i ti donnen Kapernaoum. (Matye 18:12-14) Dan tou le de legzanp, bann mouton ki sen e sof dan troupo Bondye i reprezant bann Farizyen ki krwar ki zot drwat e mouton perdi i reprezant bann dimoun ordiner. Zezi i dir:

“Lekel parmi zot ki annan 100 mouton ki si

i perdi enn i pa pou kit sa 99 deryer dan de-zer pour al rod sa enn ki’n perdi ziska ki i trouv li? Ler i’n trouv li, i byen kontan e i met li lo son zepol. Ler i ariv kot li, i kriy son bann zanmi ek vwazen e dir zot, ‘Vin rezouir avek mwan, parski mon’n trouv mon mouton ki ti’n perdi.’” —Lik 15:4-6.

Ki mannyer Zezi i aplik sa legzanp? I eksplike: “Mon dir zot ki i pou osi annan plis lazwa dan lesyel ler en dimoun ki annan en move lavi i repantir ki pour 99 dimoun drwat ki pa bezwen repantir.”—Lik 15:7.

I bezwen drol pour bann Farizyen ki Zezi i koz lo repantans. Dapre zot, zot bann dimoun drwat e alor zot pa bezwen repantir. Ler serten parmi zot ti kritik Zezi detrwa-z-an pase aköz i ti pe manz avek bann kolekter taks ek bann dimoun ki annan en move lavi, Zezi ti dir zot: “Mon’n vini, pa pour dimoun drwat me



pour bann ki annan en move lavi.” (Mark 2:15-17) Bann Farizyen ki krwar zot pli siperyer ki lezot pa vwar akoz zot bezwen repantir, alor napa lazwa dan lesyel. Sa i vreman diferan avek sa ki arive ler bann dimoun ki annan en move lavi i vreman repantir.

Zezi i donn en lot legzanp pour met plis lanfaz lo sa pwen ki i annan en gran lazwa dan lesyel ler en dimoun ki annan en move lavi i repantir. Son legzanp i baze lo sa ki arive kot lakour en fanmir. I dir: “Lekel sa madanm ki annan dis pyes larzan ki si i perdi enn, i pa pou alim en lalanp, balye son lakaz e rod li partou ziska ki i trouv li? Ler i'n trouv li, sa madanm i kriy son bann zanmi ek vwazen e dir zot, ‘Vin selebre avek mwan, parski mon'n trouv mon pyes larzan ki ti'n perdi.’”—Lik 15:8, 9.

Laplikasyon ki Zezi i fer i parey avek legzanp mouton perdi. Aprezan i dir: “Mon dir zot bann lanz Bondye osi i dan lazwa ler en dimoun ki annan en move lavi i repantir.”—Lik 15:10.

Zis mazin sa, bann lanz Bondye i vreman kontan ler bann dimoun ki annan en move lavi i repantir! Sa i enteresan parski sa bann dimoun ki repantir e antre dan Rwayonm Bondye dan lesyel pou annan en pozisyon pli o ki bann lanz. (1 Korentyen 6:2, 3) Par kont, bann lanz pa zalou. Alor ki mannyer nou devret santi ler en dimoun ki annan en move lavi i retour kot Bondye e repantir senserman?



- ◇ Akoz Zezi ti pas letan avek bann dimoun ki annan en move lavi?
- ◇ Ki pwennvi bann Farizyen ti annan lo bann dimoun ki annan en move lavi e lo lefet ki Zezi ti ed zot?
- ◇ Ki lesan Zezi ti ansennyen par servi de legzanp?





# GARSON PERDI I RETOURNEN

LIK 15:11-32

I tre probab ki Zezi i ankor Pere lo kote les Larivyer Zourden ler i donn legzanp mouton ek pyes larzan perdi. Tou le de legzanp i montre nou ki nou devret dan lazwa ler en dimoun ki annan en move lavi i repantir e retourn kot Bondye. Bann Farizyen ek profeser lalwa in kritik Zezi akoz i byen resevwar sa bann kalite dimoun. Me eski zot aprann en leson avek sa de legzanp Zezi? Eski zot konpran ki mannyer nou Papa dan lesyel i santi konsernan bann ki repantir? Aprezan Zezi i donn en zoli legzanp ki met lanfaz lo sa menm leson enportan.

Dan sa legzanp, Zezi i koz lo en papa ki annan de garson. Sa garson pli zenn i personnaz prensipal dan sa legzanp. Bann Farizyen ek profeser lalwa, ensi ki lezot dimoun i devret aprann en leson avek sa ki Zezi i dir lo sa garson pli zenn. Par kont, sa ki Zezi i dir lo latitud sa papa ek son pli gran garson i osi ansenny nou bann leson enportan. Alor reflexir lo sa trwa dimoun anmezir ki Zezi i rakont sa legzanp:



Zezi i konmans par dir: “En zonnm ti annan de garson. Sa enn pli zenn ti dir son papa, ‘Papa donn mwan bann byen ki sipoze vin pour mwan.’ Alor i ti partaz son byen avek zot.” (Lik 15:11, 12) Remarke ki sa enn pli zenn pa pe rod son leritaz akoz son papa in mor. Son papa i ankor vivan. Pourtan sa garson i anvi son par *la konmela* pour li kapab vin endependan e fer sa ki i oule. Ki i anvi fer?


Zezi i eksplike: “Detrwa zour pli tar, sa enn pli zenn ti pran tou son keksoz e al dan en pei byen lwen. Laba, i ti gaspiy tou son byen par viv en lavi dezordonnen.” (Lik 15:13) Olye reste kot li kot i ti an sekirite, avek son papa ki kontan son zanfan e pran byen swen avek zot, sa garson i al dan en lot pei. Laba i gaspiy tou son leritaz pour satisfere son bann dezir seksyel. Apre sa, i pas dan letan dir. Zezi i rakonte:

“Ler i ti’n fini depans tou sa ki i ti annan, en

gran lafanmin ti ravaz sa pei antye e i pa ti reste li nanryen. I ti nobou al travay pour enn bann sitwayen sa pei ki ti anvoy li dan lakanpanny pour vey son bann koson. I ti memm anvi manz manze koson, me personn pa ti donn li nanryen.”—Lik 15:14-16.

Dapre Lalwa Bondye, koson i en zannimo enpir, me sa garson i oblize sonny koson. I telman pe mor lafen ki i anvi manz manze koson ki i pe sonnyen. Dan sa sityasyon vreman difisil, sa garson i dezespere e i ‘realize sa ki i’n fer.’ Ki i fer alor? I dir dan li memm: “Ou a dir mwan konbyen travayer mon papa ki annan plis ki dekwa manze, tandis ki mwan mon pe mor lafen isi! Mon pou leve, retourn kot mon papa e dir li: ‘Papa, mon’n fer pese kont Bondye e kont ou. Mon nepli merite ganny apele ou garson. Tret mwan parey enn ou bann travayer.’” Apre i leve e al kot son papa.—Lik 15:17-20.

Ki mannyer son papa pou reazir? Eski i pou ankoler avek li e dispit avek li akoz i ti fer en desizyon bet ler i ti kit lakour? Eski sa papa pa pou antren li oubyen rezet li? Si ou ti sa papa, ki mannyer ou ti pou’n reazir? Ki ou ti pou’n fer si sa ti ou garson oubyen fiy?



- 
- ◇ Avek ki Zezi ti rakont sa legzanp e akoz?
  - ◇ Lelèl personnaz prensipal e ki ti arive avek li?





## GARSON PERDI I GANNY RETROUVE


Zezi i dekrir ki mannyer sa papa i santi e rezir: “Ler [sa garson] ti ankore en bon pti zistans dan semen, son papa ti vwar li e son leker ti fermal. Son papa ti tay kot li, may li e anbras li.” (Lik 15:20) Menm si sa papa in tande ki son garson in viv en lavi dezordonnen, i byen resevwar li. Atraver sa legzanp, eski bann sef Zwif ki dir zot konn e ador Zeova pou konpran ki mannyer nou Papa dan lesyel i santi konsernan bann dimoun ki repantir? Eski zot pou osi rekonnèt ki tou sa letan Zezi in demonstre sa menm leta lespri?

I tre probab ki ler sa papa i get lekspresyon lo figir son garson i remarke ki i'n repantir. Me kantmenm sa, vi ki sa papa in demontre lanmour e pran linisyativ pour al zwenn son garson, sa i fer li pli fasil pour sa garson admet son bann pese. Zezi i dir: “Aprè sa, sa garson ti dir li, ‘Papa mon'n fer pese kont Bondye e kont ou. Mon nepli merite ganny apele ou garson.’”—Lik 15:21.

Sa papa i donn son bann lesklav sa lord: “Depese! anmenn en lenz, sa enn pli zoli e met lo li, met en bag dan son ledwa ek en sandalet dan son lipye. Osi, anmenn sa pti bef byen gra, touy li, annou manze e selebre, parski mon garson ti'n mor, me i'n revin vivan, i ti'n perdi e i'n ganny retrouve.” Aprè sa, zot “konmans fete.”—Lik 15:22-24.

Antretan, pli gran garson i dan plantasyon. Zezi i dir sa lo li: “Letan i ti pe retourn kot lakaz, i ti tann lanmizik e dimoun pe danse. Alor i ti kriy enn bann serviter e demann li ki ti pe arive. I ti dir li, ‘Ou frer in retournen e ou papa in fer touy sa pti bef byen gra akoz i'n retournen sen e sof.’ Me sa pli gran garson ti ankoiler e i pa ti oule antre anndan. Aprè sa, son papa ti sorti e konmans sipli li pour vin anndan. I ti dir son papa, ‘Gete! Depi tou sa bann lannen mon'n rente pour ou e ni menm en fwa





mon pa'n dezobei ou lord, pourtan, zanmen ou'n deza donn mwan en pti kabri pour fete avek mon bann zanmi. Me dek ki ou garson ki'n gaspiy tou ou byen avek bann prostitye i arive, ou fer touy sa pti bef byen gra pour li.'” —Lik 15:25-30.

Lekel ki parey sa pli gran garson, ki kritik Zezi akoz i'n demontre konpasyon ek lanmour anver dimoun ordiner e bann ki annan en move lavi? Bann profeser lalwa ek Farizyen. Zezi in donn sa legzanp akoz zot in kritik li parski i byen resevwar bann dimoun ki annan en move lavi. Byensir, okenn dimoun ki kritik Bondye akoz i demontre konpasyon i devret pran sa leson aker.

Zezi i fini sa legzanp par rakont sa ki sa papa i dir avek son pli gran garson: “Mon gar-

son, ou'n touzour avek mwan e tou sa ki pour mwan i pour ou. Me, nou pa ti kapab pa selebre e rezoui parski ou frer ti'n mor me i'n revin vivan, i ti'n perdi e i'n ganny retrouve.” —Lik 15:31, 32.

Zezi pa dir ki sa pli gran garson i fer pli tar. Par kont, apre ki Zezi i mor e resisite, “bokou pret ti konmans annan lafwa.” (Akt 6:7) Petet serten sa bann dimoun ti tann Zezi donn sa legzanp byen tousan lo garson perdi. Menm bann sef relizye ti kapab realiz sa ki zot in fer, repantir e retourn kot Bondye.

Depi sa zour, bann disip Zezi i kapab e i bezwen pran aker bann leson ki annan dan sa zoli legzanp. Premye leson se ki i vreman saz pour reste parmi pep Bondye kot nou an sekirite, anba proteksyon nou Papa ki kontan nou e pran swen avek nou, olye tonm dan tantasyon, satisfere nou bann move dezir e perdi dan “en pei byen lwen.”

En lot leson se ki si okenn parmi nou i kit semen Bondye, nou devret annan limilite e retourn kot nou Papa pour nou kapab reganny son laprouvasyon.

Nou kapab aprann en lot leson ler nou vwar diferans ant sa papa ki ti pare pour resevwar e pardonn son garson e sa gran frer ki ti gard rankin e ki pa ti pare pour byen resevwar son frer. I kler ki bann serviter Bondye i devret anvri pardonn e byen resevwar okenn dimoun ki senserman repantir e retourn kot ‘lakaz son Papa.’ Nou devret zwaye ki nou frer ki ‘ti'n mor i'n revin vivan’ e ki sa enn ki ‘ti'n perdi i'n ganny retrouve.’

- 
- ◇ Ler sa garson ki pli zenn ti retournen, ki mannyer son papa ti reazir?
  - ◇ Ki mannyer sa papa ki ti annan konpasyon ti montre fason ki Zeova ek Zezi i reazir ler en dimoun i repantir?
  - ◇ Dan ki sans lafason ki sa gran garson ti reazir i parey lafason ki bann profeser lalwa ek Farizyen ti reazir?
  - ◇ Ki leson ou aprann dan legzanp Zezi?

## AZIR AVEK LASAZES LER OU MAZIN LAVENIR

LIK 16:1-13

Sa legzanp garson perdi ki Zezi fek rakonte ti'n devret ed bann kolekter taks, profeser la-lwa ek Farizyen pour konpran ki Bondye i pare pour pardonn bann ki repantir. (Lik 15:1-7, 11) Aprezan Zezi i koz avek son bann disip. I servi en lot legzanp, safwasi konsernan en zomris ki tande ki son administrater in mal azir.



Zezi i rakonte ki sa administrater in ganny akize konmkwa i gaspiy byen son met. Alor sa met i dir ki sa administrater pou ganny pou-se. Sa administrater i dir dan li menm: “Ki mon pou fer la ki mon met pe tir mwan konman administrater? Mon pa ase for pour mwan pyose e mon tro kanmi pour mwan mandyan.” Deswit i apel bann dimoun ki dwa son met e i demann zot: “Konbyen ou dwa mon met?”—Lik 16:3-5.

Sa enn premye i dir: “2,200 lit delwil zoliv.” I posib ki sa enn ki dwa sa delwil ti annan en gran plantasyon pye zoliv oubyen i ti en mar-

san ki vann delwil. Sa administrater i dir li: “Pran ou lagreman an ekri, asiz lanmenm e deswit ekri 1,100 lit.”—Lik 16:6.

Sa administrater i demann en lot dimoun ki dwa son met: “Me ou, konbyen ou dwa?” I reponn: “San bal dible.” Sa i apepre 22,000 lit dible. Sa administrater i dir sa enn: “Pran ou lagreman an ekri e ekri 80.” I tir 20 pousan lo sa ki i dwa.—Lik 16:7.

Sa administrater i ancor ansarz biznes son met, alor dan en sans i ancor ganny drwa diminyen sa ki lezot i dwa son met. Ler i fer sa, sa administrater pe fer zanmi avek bann ki kapab ed li apre ki i'n perdi son plas travay.

Pli tar, sa met i tande ki'n arive. Menm si i'n perdi larzan, i enpresyonnen avek sa ki sa administrater in fer e i felisit li, akoz “menm si i ti move,” i'n “azir avek lasazes.” Zezi i dir: “Bann zanfan sa lemonn i azir avek plis lasazes anver lezot ki bann zanfan lalimyer.”—Lik 16:8.

I pa konmsi Zezi i dakor avek sa ki sa administrater in fer e i pa ni pe ankouraz bann dimoun pour fer bann keksoz malonnet dan zot biznes. Alor ki Zezi pe esey dir? I dir son bann disip: “Servi larises sa move lemonn pour fer zanmi, pour ki ler larises i fini, zot bann zanmi pou kapab resevwar zot dan zot landrwa reste eternal.” (Lik 16:9) Leson se ki nou bezwen mazin lavenir e azir avek lasazes. “Bann zanfan lalimyer,” setadir bann serviter Bondye, i bezwen azir avek lasazes dan fason ki zot servi zot byen materyel e montre ki zot pe mazin lavi eternal ki zot pou gannyen a lavenir.


Zis Zeova ek son Garson ki kapab resevwar en dimoun dan Rwayonm lesyel oubyen dan

Paradi lo later ler Rwayonm pe dirize. Nou devret fer zefor pour vin zanmi avek Zeova ek son Garson par servi nou bann keksoz materyel pour siport bann lentere Rwayonm. Si nou fer sa, nou kapab asire ki nou pou ganny lavi eternal a lavenir ler lor, larzan ek lezot byen materyel pou'n disparet.

Zezi i osi dir ki bann dimoun ki fidel dan lafason ki zot pran swen oubyen servi nenport larises oubyen keksoz materyel pou osi fidel dan sa ki pli enportan. Alor Zezi i dir: "Si zot pa'n montre zot fidel dan lafason ki zot servi larises sa move lemonn, lekel ki pou konfye zot avek sa ki vre [parey bann lentere Rwayonm]?"—Lik 16:11.

Zezi pe montre son bann disip ki bokou pou ganny ekspekte avek zot, si zot pou antre dan "landrwa reste eternal." En dimoun pa kapab en vre serviter Bondye e an menm tan en lesklav larises sa move lemonn. Zezi i fini par dir: "Napa en serviter ki kapab lesklav de met, parski swa i pou ay enn e kontan lot, ouswa i pou atase avek enn e mepriz lot. Ou pa kapab lesklav Bondye ek Larises an menm tan."—Lik 16:9, 13.

- 
- ◇ Dan sa legzanp ki Zezi ti servi, ki mannyer sa administrater ti fer zanmi avek bann ki ti pou kapab ed li pli tar?
  - ◇ Kisisa "larises sa move lemonn" e ki mannyer en Kretyen i kapab servi zot "pour fer zanmi" avek Bondye?
  - ◇ Lekel ki kapab resevwar nou dan "landrwa reste eternal" si nou fidel dan lafason ki nou servi okenn "larises sa move lemonn" ki nou annan?
- 





## EN SANZMAN POUR SA ZONM RIS EK LAZAR

LIK 16:14-31

Zezi fek donn son bann disip bann bon konsey konsernan bann keksoz materyel. Me pa zis son bann disip ki pe ekoute. Bann Farizyen osi i la e zot devret pran aker konsey Zezi. Akoz? Parski zot “kontan larzan.” Ler zot tann sa ki Zezi pe dir, zot “konmans boufonn li.”—Lik 15:2; 16:13, 14.

Me sa pa fer Zezi per. I dir zot: “Zot fer krwar ki zot drwat devan dimoun, me Bondye i konn zot leker. Parski sa ki dimoun i konsider enportan, Bondye i vwar li degoutan.”—Lik 16:15.

I fer en kantite letan depi ki bann Farizyen i ganny konsidere konman “enportan,” me la i’n ariv ler pour keksoz sanze. Bann ki dimoun i konsider enportan akoz zot annan larises, pouvwar politik e relizye pou ganny abese. Bann dimoun ordiner ki rekonnet ki zot annan en bezwen spirityel pou vin enportan. Zezi i fer li kler ki i annan en gran sanzman ki pe arive. I dir:

“Lalwa ek lansennyman bann Profet ti ganny anonse ziska Zan. Depi sa letan, bon nouvel lo Rwayonm Bondye pe ganny anonse e tou sort kalite dimoun pe lite pour antre ladan. Anfet, i pli fasil pour lesyel ek later disparet ki pour en pwen lo en let ‘i’ dan Lalwa disparet san ki tou keksoz dan Lalwa i ganny akonplir.” (Lik 3:18; 16:16, 17) Ki mannyer parol Zezi i montre ki en sanzman pe arive?

Bann sef relizye Zwif i byen fyer pour dir ki zot swiv Lalwa Moiz. Rapel sa ki bann Farizyen orgeye ti dir ler Zezi ti geri sa zonm aveg Zerizalenm: “Nou nou disip Moiz. Nou konnen ki Bondye ti koz avek Moiz.” (Zan 9:13, 28, 29) En rezon ki Lalwa Moiz ti ganny donner i pour



ed dimoun ki annan limilite aksepte Mesi, setadir Zezi. Zan ki batize ti dir ki Zezi i Pti Mouton Bondye. (Zan 1:29-34) Depi lepok Zan, bann Zwif ki annan limilite, sirtou bann pov, in tann konsernan “Rwayonm Bondye.” I annan en “bon nouvel” pour tou bann ki anvi vin sitwayen Rwayonm Bondye e profit son bann byenfe.

Lalwa Moiz in ganny akonplir akoz i’n ed dimoun aksepte Mesi. Deplis, byento zot pou nepli oblize swiv Lalwa. Par egzanp, Lalwa ti permet bann dimoun pour divorce pour diferan rezon, me la aprezan Zezi i eksplike ki “en dimoun ki divors son madanm e marye avek en lot i komet adilter. En dimoun ki marye avek en madanm ki’n divorce avek son msye i komet adilter.” (Lik 16:18) Sa parol i fer bann Farizyen vreman ankoler akoz zot kontan met bann lareg pour tou keksoz!

Aprezan Zezi i donn en legzanp ki montre lenportans sa sanzman ki pe arive. I koz lo de zonn ki zot sityasyon i sanz net. Anmezir ki nou egzamin sa legzanp, mazine ki bann ki pe ekoute i bann Farizyen ki kontan larzan e ki dimoun i konsider enportan.

Zezi i dir: “I ti annan en zonn ris ki ti abitye met lenz mov byen ser e ki ti kontan profit son larises tou le zour. Me en mandyan ki ti apel Lazar, ki ti annan boubou partou lo li ti abitye ganny anmennen kot son baro. I ti anv i manz bann keksoz sorti lo latab sa zonn ris ki ti tonm ater. Menm lisyen ti vin lis son bann boubou.”—Lik 16:19-21.

Bann Farizyen i kontan larzan, alor i evidan ki sa “zonn ris” i reprezante. Bann sef relizye Zwif osi i kontan byen abiye avek bann lenz ser ki lanmod. An plis ki zot larises materyel, i paret ki zot ris lo plan spirityel akoz zot annan bokou loportinite ek privez pour servi Bondye. Zezi ti dir ki sa zonn ris ti’n met en lenz mov byen ser. Sa i montre ki zot annan en plas enportan e ki zot krwar ki zot pli byen ki lezot.—Danyel 5:7, NWT.

Ki mannyer sa bann sef ris e orgeye i konsider bann dimoun ordiner ki pov? Zot mank respe pour zot e apel zot ‘am ha-’a’rets ki vadir bann dernyen dimoun ki pa konn Lalwa e ki pa merit ganny ansennyen Lalwa. (Zan 7:49) Sa i parey sityasyon ki sa ‘mandyan ki apel Lazar’ i ladan. I telman lafen ki i

- 
- ◆ Ki diferans ti annan ant bann sef relizye Zwif ek bann dimoun ordiner?
  - ◆ Parey Zezi ti montre, ki sanzman ki’n arive depi konmansman minister Zan?
  - ◆ Dan legzanp Zezi, lekel ki parey sa zonn ris e lekel ki parey Lazar?



menm anvi manz sa ptigin “keksoz sorti lo lab tab sa zonm ris ki ti tonm ater.” Parey Lazar ki kouver avek boubou, bann dimoun ordiner i ganny meprize konmsi zot malad spirityelman.

Malerezman i fer en pe letan depi ki keksoz i koumsa, me Zezi i konnen ki’n ariv ler pour en gran sanzman pour bann ki parey sa zonm ris e pour bann ki parey Lazar.

#### EN SANZMAN POUR SA ZONM RIS EK LAZAR

Zezi i eksplike ki mannyer sa sityasyon i sanz net. I dir: “Avek letan, sa mandyan ti mor e bann lanz ti anmenn li akote Abraam. Sa zonm ris osi ti mor e zot ti anter li. Dan Latonm, i ti pe soufer en kantite, i ti get anler e vwar Abraam dan lwen ek Lazar dan son kote.”—Lik 16:22, 23.

Bann dimoun ki pe ekout Zezi i konnen ki i fer en kantite letan depi ki Abraam in mor e i dan Latonm. Labib i eksplik byen ki napa person ki dan Latonm ki kapab vwar oubyen koze. Sa i enkli Abraam. (Eklezyast 9:5, 10) Alor ki bann sef relizye i konpran avek legzanp Zezi? Ki i pe esey dir konsernan bann dimoun ordiner ek bann sef relizye ki kontan larzan?

Zezi fek koz lo en sanzman ki’n arive avek



konmansman minister Zan. I’n dir ki ‘Lalwa ek lansennyman bann Profet ti ganny anonse ziska Zan ki batize, me depi sa letan, bon nouvel lo Rwayonm Bondye pe ganny anonse.’ Alor ler Zan ek Zezi Kri in prese, sa in fer ki sityasyon Lazar ek sa zonm ris in sanze, dan en sans zot in mor e zot in ganny en nouvo pozisyon devan Bondye.



Sa sanzman in sirtou enportan pour bann pov ki annan limilite e ki pa’n ganny manze spirityel pour en bon pe letan. Me zot pe ganny ede e zot aksepte mesaz lo Rwayonm ki’n ganny prese par Zan ki batize e apre par Zezi. Avan sa, zot ti bezwen kontant zot avek sa ptigin ‘sorti lo lab tab spirityel [bann sef relizye] ki ti tonm ater.’ La aprezan zot pe ganny nouri avek bann laverite enportan sorti dan Lekritir, sirtou bann keksoz ekstraordiner ki Zezi pe eksplike. I konmsi alafendefen zot dan en pozisyon kot zot ganny laprouvasyon Zeova.

De lot kote, bann sef relizye ki ris e annan en gran lenfliyans i refize aksepte mesaz Rwayonm ki Zan ti anonse e ki Zezi pe prese partou dan zot pei. (Matye 3:1, 2; 4:17) Anfet sa mesaz i fer zot ankoler oubyen soufer en kantite akoz i koz konsernan en zizman ki



Bondye pou anmennen avek dife. (Matye 3: 7-12) I ti pou en soulazman pour bann sef relizye ki kontan larzan si Zezi ek son bann disip ti aret anons sa mesaz Bondye. Sa bann sef relizye i parey sa zonm ris dan sa parabol ki dir: “Papa Abraam, pran pitye pour mwan, anvoy Lazar tranp son bout ledwa dan delo pour rafresi mon lalang parski mon pe soufer bokou dan sa gro dife.”—Lik 16:24.

Me pa sa ki pou arive. Laplipar bann sef relizye pa pou sanze. Zot ti’n refize “ekout lansennyman Moiz ek bann Profet.” Sa bann profesi ti’n devret pous zot pour aksepte Zezi konman Mesi ek Lerwa Bondye. (Lik 16: 29, 31; Galat 3:24) Zot pa pare pour abes zot e les bann pov ki annan limilite ek laprouvasyon Bondye ed zot. Bann disip Zezi pa kapab fer konpromi oubyen kasyet laverite zis pour fer bann sef relizye plezir oubyen soulaz zot. Dan son legzanp, Zezi i dekrir sa par servi parol ki “Abraam” i dir sa zonm ris:

“Mon garson, mazine ki ou ti annan en kantite bon keksoz tou dilon ou lavi, me Lazar li i ti ganny sa ki move. Aprezan, i pe ganny rekonforte isi me ou ou pe soufer en kantite. Deplis, i annan en gran ranpar ki separ nou ek ou, pour ki bann ki anvi traverse sorti isi pour vin kot ou zot pa kapab e personn pa kapab traverse sorti kot ou pour vin kot nou.” —Lik 16:25, 26.

Pa sa i en bon sanzman! Se konmsi si-tyasyon in konpletman sanze pour bann sef

relizye orgeye ek bann dimoun ki annan limilite. Bann dimoun ki annan limilite in vin disip Zezi e finalman zot ganny lafors ek manze spirityel. (Matye 11:28-30) Sa sanzman pou pli evidan ankor dan detrwa mwan ler nouvo lalyans i ranplas lalyans Lalwa. (Zeremi 31: 31-33; Kolosyen 2:14; Ebre 8:7-13) Ler Bondye i donn son lespri sen zour Lapannkot lannen 33, i pou napa okenn dout ki se bann disip Zezi ki annan laprouvasyon Bondye, pa bann Farizyen ek lezot sef relizye.



- ◇ Ki mannyer Zezi ti montre ki i pou annan en sanzman?
- ◇ Ki mannyer bann sef relizye i reazir anver sa mesaz ki Zan ek Zezi ti anonse e ki legzanp Zezi ti servi pour montre sa?
- ◇ Ki bann sef relizye ti a kontan i arive, me akoz sa pa pou arive?
- ◇ Kan ki sa gran ranpar ki separ bann sef relizye ek bann disip Zezi in vin pli gran?

## ZEZI I ANSENNY DAN REZYON PERE LER I PE AL ZIDE

LIK 17:1-10 ZAN 11:1-16

Pour en pe letan, Zezi in reste Pere, en landrwa ki “lot kote Larivyer Zourden.” (Zan 10:40) Aprezan i al dan sid ver Zerizalenm.

Zezi pa tousel. Son bann disip i avek li e osi “en gran lafoul,” ki enkli bann kolekter taks ek bann ki annan en move lavi. (Lik 14:25; 15:1) Bann Farizyen ek profeser lalwa ki kritik sa ki Zezi pe dir e fer osi i la. Zot annan en kantite pour reflesir lo la apre ki zot in tann Zezi donn bann legzanp lo mouton perdi, garson perdi ek sa zonm ris ek Lazar.—Lik 15:2; 16:14.

Petet Zezi pe mazin bann kritik ek mokri son bann opozan. Sanmenm i koz avek son bann disip lo serten pwen ki i’n deza koz la avan, ler i ti Galile.

Par egzanp, Zezi i dir: “I pou toultan annan keksoz ki fer dimoun fer pese. Kantmenm sa, maler pour sa enn ki fer lezot fer pese! . . . Fer byen atansyon. Si ou frer i fer en pese, repri-mann li, si i repantir, pardonn li. Menm si i fer pese set fwa dan en zour kont ou e i re-tourn kot ou set fwa e dir, ‘Mon repantir,’ ou devret pardonn li.” (Lik 17:1-4) Sa dernyen frazi i kapab fer Pyer rapel sa kestyon ki i ti’n demande konsernan pardonn set fwa.—Matye 18:21.

Eski bann disip pou kapab aplik parol Zezi? Ler zot demann Zezi: “Donn nou plis lafwa,” i asir zot: “Si zot ti annan lafwa groser en lagrenn moutard, zot ti pou kapab dir avek sa pye miye, ‘Derasin ou e al plant ou dan lanmer!’ e i ti pou obei zot.” (Lik 17:5, 6) Wi, menm en pti gin lafwa i kapab akonpli bann gran keksoz.

Apre sa, Zezi i ansenny lenportans pour annan limilite ek en pwennvi rezonnab lo nou

lekor ler i dir son bann zapot: “Si ou annan en lesklav ki pe labour later dan plantasyon ouswa pe vey zannimo, lekel parmi zot ki ti pou dir li ler i sorti dan plantasyon, ‘Depe-se, vin atab pour manze?’ Plito, pa ou ti pou dir li, ‘Al prepar en keksoz pour mwan manze aswar, met ou tabliye e servi mwan ziska ki mon’n fini manze e bwar, apre sa, ou pou kapab manze e bwar.’ Ou pa pou remersye sa lesklav parski i’n fer sa ki i ti sipoze fer, pa i vre? Pareyman, ler zot fini fer tou sa ki zot in ganny demande pour fer, dir: ‘Nou bann lesklav bon nanryen. Sa ki nou’n fer, sanmenm ki nou ti’n devret fer.’”—Lik 17:7-10.

Sak serviter Bondye i devret konpran akoz i enportan pour met lentere Bondye premye. Deplis, nou tou nou devret rapel ki i en privelez pour ador Bondye konman en manm son fanmir.

I paret ki pa tro bokou letan apre sa, en mesaze ki Mari ek Mart in anvoye i arive. Zot bann ser Lazar e zot reste dan vilaz Betani, Zide. Sa mesaze i dir: “Senyer, sa enn ki ou kontan i malad.”—Zan 11:1-3.

Menm si Zezi i tande ki son zanmi Lazar i vreman malad, Zezi pa vreman sagren. O kontrer i dir: “Rezon ki Lazar i malad, se pa pour li mor, me se pour glorifye Bondye ek Garson Bondye.” I reste kot i ete pour de zour e apre i dir son bann disip: “Annou al Zide ankor.” Zot pa dakor e zot dir: “Ansenyan, pa tro lontan pase bann zabitan Zide ti pe rod saboul ou e la ou pe al laba ankor?”—Zan 11:4, 7, 8.

Zezi i reponn: “Pa i annan 12 erdtan lizour? Si en dimoun i mars lizour i pa pou bat dan nanryen parski i annan lalimyer pour kler li.

Me si en dimoun i mars aswar, i pou tonbe parski napa lalimyer pour kler li.” (Zan 11: 9, 10) I paret ki i pe dir ki sa letan ki Bondye in donn li pour son minister pa ankore fini. Alor, Zezi i bezwen byen servi sa ptigin letan ki reste li.

Zezi i osi dir: “Lazar nou zanmi in tonm dormi, me mon pe al lev li.” I paret ki son bann

disip i krwar ki Lazar pe zis repoze e ki i pou byen, alor zot dir: “Senyer, si i pe dormi, i pou byen apre.” Zezi i dir zot fran: “Lazar in mor. . . . Annou al kot li.”—Zan 11:11-15.

Toma i konnen ki i posib ki Zezi i ganny touye Zide, me an menm tan i oule siport li, alor i ankouraz lezot disip: “Annou ale nou osi pour ki nou a mor ansanm avek li.”—Zan 11:16.



- ◇ Kote Zezi ti prese?
- ◇ Ki lansennyman Zezi ti repete e ki legzanp i servi pour met lanfaz lo lenportans limilite?
- ◇ Ki nouvel Zezi ti gannyen e akoz Toma ti koz konsernan mor ansanm avek Zezi?



## “REZIREKSYON EK LAVI”

ZAN 11:17-37

Zezi i sorti Pere e la i ariv pre avek vilaz Beta-ni ki apepre trwa kilomet avek les Zerizalem. Mari ek Mart, i dan dey akoz zot frer Lazar fek mor pa tro lontan. I annan en kantite dimoun ki'n vin konsol zot.

Apre, en dimoun i dir Mart ki Zezi i pros pour arive e Mart i taye pour al zwenn li. Mart i dir Zezi sa ki li ek son ser ti pe probableman mazin en depi kat zour: “Senyer, si ou ti la, mon



frer pa ti pou'n mor.” Par kont, i pa konmsi i napa okenn lespwar. Mart i dir: “Mon konnen ki nenport kwa ki ou pou demann Bondye, Bondye pou donn ou.” (Zan 11:21, 22) I santi ki petet Zezi i ankor kapab ed zot frer.

Zezi i dir: “Ou frer pou resisite.” Mart i krwar ki Zezi pe koz lo sa rezireksyon ki pou arive lo later a lavenir, sa menm lespwar ki Abraam ek lezot ti annan. Mart i osi dir ki i krwar ki sa pou definitivman arive: “Mon konnen i pou resisite dernyen zour.”—Zan 11:23, 24.

Me eski Zezi i kapab soulaz zot deswit? I fer

Mart rapel ki Bondye in donn li pouvwar lo lan-mor ler i dir: “Sa enn ki demontre lafwa dan mwan, menm si i mor i pou reviv, tou sa ki viv e ki demontre lafwa dan mwan pa pou mor ditou.”—Zan 11:25, 26.

Zezi pa pe dir ki son bann disip ki vivan sa letan pa pou zanmen mor. Menm li i bezwen mor, parey i'n deza dir son bann zapot. (Matye 16:21; 17:22, 23) Zezi pe montre ki si en dimoun i demontre lafwa dan li i kapab ganny lavi eternel. Bokou dimoun pou ganny lavi eternel ler zot resisite. Par kont, serten dimoun fidel ki pou viv dan letan lafen sa move lemonn pa pou zanmen mor. An tou ka, tou dimoun ki demontre lafwa dan Zezi i kapab asire ki zot pa pou mor pour touzour.

Zezi fek dir: “Mwan menm rezireksyon ek lavi.” Eski i kapab resisit Lazar ki'n mor depi detrwa zour? Zezi i demann Mart: “Eski ou krwar sa?” I reponn: “Wi Senyer, mon krwar ki ou menm Kris, Garson Bondye, sa enn ki pe vin dan lemonn.” Mart i annan lafwa ki Zezi i kapab fer en keksoz sa menm zour, alor i tay dan lakour e dir son ser an prive: “Ansenyan i la e i pe rod ou.” (Zan 11:25-28) Ler Mari i tann sa, i kit lakour. Pa tro bokou letan apre, lezot osi i swiv li an krwayan ki i pe al kot tonbo Lazar.

Plito, Mari i al kot Zezi, tonm azenou devan li e i konmans plere. I repet menm parol ki son ser ti'n dir pli boner: “Senyer si ou ti la, mon frer pa ti pou'n mor.” Ler Zezi i vwar Mari ek lafoul pe plere, i vin emosyonnel, son leker i fermal e i konmans plere. Sa i fer tou dimoun tris. Me serten i demande: ‘Si Zezi ti kapab geri en zonm ki'n ne aveg, pa i ti a kapab an-pes sa enn mor?’—Zan 11:32, 37.



- ◇ Ki ti arive ler Zezi ti ariv pros avek Betani?
- ◇ Kwa ki ti fer Mart krwar dan rezireksyon?
- ◇ Ki manyer Zezi ti montre ki i kapab resisit Lazar?



## LAZAR I GANNY RESISITE

ZAN 11:38-54

Aprè ki Zezi i zwenn Mart e pli tar Mari o bor vilaz Betani, zot al kot latonm Lazar. Latonm Lazar i en kavern e en ros in ganny mete dan larantre. Zezi i dir zot: “Tir sa ros.” Mart i enkyet akoz i pa konnen ki Zezi pe mazin fer. I dir: “Senyer, i fer kat zour, son lekor i bezwen pi la.” Me Zezi i dir li: “Pa mon’n dir ou

ki si ou krwar ou pou vwar laglwar Bondye?” —Zan 11:39, 40.

Zot tir sa ros. Aprè sa, Zezi i get anler ver lesyel e i priye: “Papa, mon remersye ou ki ou’n tann mwan. I vre, mon konnen ou touzour ekout mwan, me mon’n koze pour ki sa lafoul otour mwan i a krwar ki ou’n anvoy





mwan.” Sa lapriyer ki Zezi i fer an piblik i montre bann ki la ki sa ki i pe al fer i gras a pwisans Bondye. Apre Zezi i kriye: “Lazar, sorti!” Lazar i sorti avek son lipye ek son lanmen anvlope dan bann bout latwal e son figi i kouver avek en bout latwal. Zezi i dir: “Tir sa bann bout latwal lo li e les li ale.” —Zan 11:41-44.

Bokou parmi bann Zwif ki'n vin rekonfort Mari ek Mart i vwar sa mirak e zot annan lafwa dan li. Me lezot i al rakont bann Farizyen sa ki Zezi in fer. Bann Farizyen ek sef pret i reini lakour siprenm Zwif ki apel Sannedren. Granpret Kaif osi i form parti Sannedren. Serten i konplent: “Ki nou pou fer, parski sa zonn pe fer en kantite mirak? Si nou les li, zot tou zot pou annan lafwa dan li e bann Romen pou vini e pran nou tanp ek nou nasyon.” (Zan 11:47, 48) Menm si sa bann zonn in tann temwanyaz bann dimoun ki'n vwar Zezi “pe fer en kantite mirak,” zot pa kontan sa ki Bondye pe akonpli gras a Zezi. Sa ki pli enportan pour zot i zot prop pozisyon ek lotorite.

Bann Sadiseen i vreman pa kontan ki Lazar in ganny resisite akoz zot pa krwar dan rezireksyon. Aprezan, Kaif, en Sadiseen i koze: “Zot pa konn nanryen, zot pa'n mazine ki i ti a pli bon pour en zonn mor

pour lepep ki en nasyon antye ganny detrir?” —Zan 11:49, 50; Akt 5:17; 23:8.

Lefet ki Kaif i granpret, Bondye i servi li pour dir sa, me i pa'n “dir sa akoz i ti son prop lide.” Kaif pe dir ki Zezi i devret ganny touye akoz i per ki bann dimoun pou aret ekout bann sef relizye Zwif. Par kont, profes Kaif i fer resorti ki ler Zezi i mor i pou pey en ranson, pa zis pour bann Zwif me pour tou “bann zanfan Bondye ki ti eparpiye partou.”—Zan 11:51, 52.

Kaif i reisi fer bann manm Sannedren fer en konplo pour touy Zezi. Nikodenm ki en manm Sannedren ti ase pros avek Zezi, eski i posib ki i'n dir Zezi konsernan sa konplo pour touy li? An tou ka, Zezi i kit Zerizalenm pour ki i pa ganny touye avan ler fikse par Bondye.



- ◇ Ki mannyer bann dimoun ki ti vwar Lazar ganny resisite ti reazir?
- ◇ Kwa ki montre ki bann manm Sannedren ti vreman pa bon?
- ◇ Malgre move lentansyon Kaif, ki Bondye ti servi li pour dir?

# DIS LEPRE I GANNY GERI ME ZIS ENN KI DEMONTRE REKONESANS

LIK 17:11-19

Zezi i al lavil Efraim ki dan nordes Zerizalenm pour li kapab sov bann manm Sannedren ki pe fer konplo pour touy li. I reste laba avek son bann disip, lwen avek son bann lennmi. (Zan 11:54) Par kont, lafet Lapak lannen 33 i pros, alor pa bokou letan apre Zezi i bezwen deplase. I al dan direksyon nor, pas atraver Samari e al Galile. Sa i dernyen fwa ki i vizit sa landrwa avan i mor.

O konmansman son vwayaz, ler Zezi pe pas dan bann vilaz, laba i rankontre dis zonn ki annan lalep. Sa maladi lapo i annan diferan staz kot ptitapti laser, ledwa, pous lipye ou-byen zorey i ganny manz manze. (Nonm 12:10-12) Lalwa Bondye i demande ki en dimoun ki annan lalep i kriye “Enpir! Enpir!” e ki i reste dan en landrwa izole.—Levitik 13:45, 46.

I pour sa rezon ki sa bann lepre i gard zot zistans avek Zezi. Par kont, zot kriye: “Ansenyan, Zezi, pran pitye pour nou!” Ler Zezi i vwar zot, i dir zot: “Al kot bann pret pour zot ganny egzaminen.” (Lik 17:13, 14) Dan sa fason i demontre respe pour Lalwa Bondye, ki donn bann pret lotorite pour deklare si bann lepre in ganny geri. Apre sa, zot pou kapab viv parmi bann dimoun ki an bonn sante.—Levitik 13:9-17.

Sa dis lepre i annan konfyans ki Zezi i kapab fer bann mirak. Zot al kot bann pret,

menm si zot pa ankor ganny geri. Ler zot pe ale, zot lafwa dan Zezi i ganny rekonpanse. Zot konmans remarke e santi ki zot in-ganny zot lasante!

Nef parmi sa dis lepre i kontinyen zot semen, me enn parmi zot ki en Samariten i retournen pour koz avek Zezi. Akoz? Sa zonn i vremen rekonesan pour sa ki Zezi in fer. Sa zonn ki ti en lepre avan pe “glorifye Bondye avek en lavwa for” akoz i realize ki an realite se Bondye ki’n redonn li son lasante. (Lik 17:15) Ler i vwar Zezi, i tonm azenou devan li e remersye li.

Zezi i dir avek bann ki otour li: “Pa tou le dis zonn in ganny geri? Me alor, oli sa nef lezot? Eski napa personn ankor ki’n vin rann glwar Bondye eksepte sa zonn sorti dan en lot nasyon?” Apre Zezi i dir sa Samariten: “Leve, ale, ou lafwa in fer ou byen.”—Lik 17:17-19.

Zezi in geri sa dis lepre, sa i montre ki i annan laprouvasyon Bondye. Enn parmi sa dis zonn in ganny geri me aprezan i osi kapab ganny lavi eternel. Nou pa pe viv dan en lepok kot Bondye pe servi Zezi pour fer sa bann gerizon. Par kont, ler nou demontre lafwa dan Zezi, nou osi nou kapab ganny lavi eternel. Parey sa zonn Samariten, eski nou montre ki nou rekonesan pour sa loportinite pour ganny lavi eternel a lavenir?

- 
- ◇ Kote Zezi ti al kasyet ler son bann lennmi ti esey touy li?
  - ◇ Akoz sa dis lepre i debout en zistans e akoz Zezi i demann zot pour al kot bann pret?
  - ◇ Ki nou aprann avek sa ki ti arive avek sa Samariten?





# GARSON ZONM POU GANNY REVELE

LIK 17:20-37

Zezi i ankor Samari ouswa Galile. Aprezan bann Farizyen i demann li kan Rwayonm pou vini. Zot ekspekte ki i pou annan bann gran seremoni ler sa i arive. Par kont, Zezi i dir: “Rwayonm Bondye pa pe vin dan en fason ki tou dimoun pou vwar, dimoun pa pou dir, ‘Gete, la i la!’ ouswa ‘La i laba!’ Parski Rwayonm Bondye i parmi zot.”—Lik 17:20, 21.


Serten i krwar ki Zezi pe dir ki Rwayonm pe diriz dan leker bann serviter Bondye. Me sa pa kapab leka akoz Rwayonm pa dan leker bann Farizyen ki Zezi pe koz avek. Par kont, i *parmi* zot parski Zezi, sa Lerwa ki Bondye in swazir pour diriz son Rwayonm i la avek zot.—Matye 21:5.

I tre probab ki apre ki bann Farizyen in ale, Zezi i donn son bann disip plis detay konsernan sa Rwayonm ki pe vini. Konsernan ler i pou konmans dirize dan sa Rwayonm, i averti zot: “Letan pou vini ler zot pou swete ki Garson zom ti pou la avek zot, me zot pa pou vwar li.” (Lik 17:22) Zezi pe montre ki Garson zom pou vin lerwa dan Rwayonm Bondye a lavenir. Avan sa letan i arive, i posib ki serten disip pou vremen anv vwar Garson zom pe dirize dan Rwayonm, me zot pou bezwen kontinyen espere ziska letan fikse Bondye pour Garson zom vini.

Zezi i kontinyen: “Bann dimoun pou dir zot, ‘Gete, la i la!’ ouswa ‘Gete, la i laba!’ Pa bezwen ale oubyen swiv zot. Parski zis parey zekler ki sorti dan en kote lesyel e i ganny vwar lot kote lesyel, koumsanmenm ki i pou ete ler Garson zom pou la.” (Lik 17:23, 24) Kwa ki pou ed bann disip Zezi pour pa tay deryer sa bann fo mesi? Zezi i dir ki ler sa vre Mesi pou la i pou parey zekler ki kapab ganny vwar byen lwen. I pou evidan ki Zezi pe dirize dan Rwayonm Bondye pour tou bann ki pe esper Rwayonm.

Apre sa, Zezi i servi sa ki ti arive dan lepase pour montre ki mannyer latitud bann dimoun pou ete dan sa letan a lavenir. I ti dir: “Deplis, zis parey i ti arive dan letan Noe, koumsanmenm i pou ete ler Garson zom pou la . . . Pareyman, zis parey i ti arive dan letan Lot: dimoun ti pe manze, bwar, aste, vann, plante e konstri. Me zour ki Lot ti kit Sodonm, dife ek souf sorti dan lesyel ti tonbe parey lapli e detri zot tou. Zour ki Garson zom pou ganny revele pou parey.”—Lik 17:26-30.

Zezi pa pe dir ki bann dimoun dan letan Noe e letan Lot ti ganny detrir akoz zot ti fer bann keksoz normal parey manze, bwar, aste, vann, plante e konstri. Noe ek Lot osi ti fer serten sa bann keksoz. Me sa bann dimoun pa ti pe fer lavolonte Bondye e zot pa ti pran kont sa



letan ki zot ti pe viv ladan. Alor, Zezi i ankou-raz son bann disip pou port latansyon lo lavolonte Bondye e pour fer li. Dan sa fason, i pe montre zot ki mannyer zot kapab ganny proteze e ganny zot lavi sove ler Bondye i anmenn destriksyon a lavenir.

Bann disip pou bezwen evite ganny distrer par bann keksoz lemond otour zot, 'bann keksoz ki zot in kit deryer.' Zezi i dir: "Sa zour, sa dimoun ki lo twa lakaz me ki son bann zafè i dan son lakaz pa devret desann pour al pran zot, pareyman, sa dimoun ki dan plantasyon pa devret retourn dan son lakaz pour pran bann keksoz ki i'n kit deryer. Rapel sa ki ti arive avek madanm Lot." (Lik 17:31, 32) I ti vin en stati disel.

Zezi i kontinyen dekrir mannyer keksoz pou ete ler Garson zonm pou dirize konman Lerwa. I dir: "Sa zour swar de dimoun pou lo en lili, enn pou ganny pran e lot pou ganny kit deryer." (Lik 17:34) Alor serten pou ganny sove, tandis ki lezot pou ganny kit deryer, setadir zot pou perdi zot lavi.

Bann disip i demande: "Kote sa pou arive Senyer?" Zezi i reponn: "Kot lekor mor i ete, lanmenm la ki bann leg pou rasanble." (Lik 17:37) Serten disip pou parey bann leg ki vwar byen lwen. Sa bann disip pou ralye ansanm avek sa vre Kris, Garson zonm. Dan sa letan a lavenir, Zezi pou donn son bann disip laverite ki sov lavi bann ki annan lafwa.

- 
- ◇ Ki mannyer Rwayonm ti parmi bann Farizyen?
  - ◇ Ki mannyer prezans Zezi pou parey zekler?
  - ◇ Akoz bann disip Zezi pou bezwen veye ler Garson zonm i vini?
- 



## I ENPORTAN POUR PRIYE E ANNAN LIMILITE

LIK 18:1-14

Zezi in fini donn son bann disip en legzanp konsernan lenportans pour persevere dan lapriyer. (Lik 11:5-13) I posib ki la i Samari oubyen Galile e ankor enn fwa i dir ki i enportan pour pa aret priye. I servi en lot legzanp pour met lanfaz lo sa pwen:

“Dan en serten lavil, i ti annan en ziz ki ti napa respe ni pour Bondye ni pour dimoun. I ti osi annan en vev dan sa lavil ki ti kontinyen al kot sa



ziz e dir, ‘Fer mwan ganny lazistis kont mon adverser.’ Pour en serten letan i pa ti oule ed li, me apre i ti dir dan li menm, ‘Menm si mon napa respe ni pour Bondye ni pour dimoun, me akoz sa vev pe kontinyen fatig mwan, mon pou fer sir ki i ganny lazistis pour ki i aret kontinyen vin fatig mwan avek sa zafer.’—Lik 18:2-5.

Zezi i fer sa laplikasyon: “Eski zot in tande ki sa ziz ti dir menm si i ti move? Sirman, pa Bondye pou rann lazistis bann ki i’n swazir ki kriy li lizour konman aswar, menm si i demontre pasyans anver zot?” (Lik 18:6, 7) Ki Zezi pe esey dir konsernan son Papa?

Definitivman Zezi pa pe dir ki Zeova i parey sa move ziz. Plito, i pe dir ki si en move ziz i

pare pour ed sa dimoun akoz i’n persiste, konbyen plis Bondye pou ekout nou ler nou kontinyen demande. Bondye i drwat, i bon e i pou reponn son pep si zot kontinyen priye. Nou kapab vwar sa dan sa parol ki Zezi i dir apre: “Mon dir zot, deswit i pou rann lazistis pour zot.”—Lik 18:8.

Normalman bann dimoun ordiner oubyen bann ki pov pa touzour ganny trete avek lazistis, tandis ki laplipar ditan dimoun i fer lapreferans pour bann ki annan pouvwar ek larzan. Me Bondye pa koumsa. Ler i’n ariv ler, i pou azir avek lazistis e fer sir ki bann move dimoun i ganny pini e ki son bann serviter i ganny lavi eternal.

Lekel ki annan lafwa parey sa vev? Konbyen dimoun ki vreman krwar ki Bondye pou ‘deswit rann lazistis pour zot’? Zezi fek donn en legzanp konsernan lenportans pour kontinyen priye. Aprezan i demann en kestyon konsernan bann ki annan lafwa dan pouvwar lapriyer: “Ler Garson zonm i arive, eski i pou trouv sa kalite lafwa lo later?” (Lik 18:8) I paret ki i pou napa bokou dimoun ki annan sa kalite lafwa ler Kris i arive.

Serten ki pe ekout Zezi i asire ki zot annan lafwa. Zot krwar ki zot drwat devan Bondye e zot mepriz lezot. Zezi i donn en legzanp pour sa bann dimoun:

“De zonm ti al dan tanp pour priye, enn ti en Farizyen e lot en kolekter taks. Sa Farizyen ti debout e konmans priye dan li menm, ‘Ar Bondye, mon remersye ou ki mon pa parey lezot dimoun ki vole, fer sa ki mal, komet adilter oubyen menm parey sa kolekter taks. De fwa par semenn mon zennen, mon donn en dizyenm tou sa ki mon gannyen.’”—Lik 18:10-12.

Bann Farizyen i renonmen konman bann dimoun ki fer keksoz an piblik pour fer krwar ki zot



drwat devan Bondye. Zot fer sa pour enpresyonn lezot. Normalman i annan plis dimoun dan bann gran bazar dan Lendi ek Zedi, alor bann Farizyen i zennen sa bann zour, en kekosz ki zot in enpoz lo zot menm, pour ki bokou dimoun i vwar zot. Zot donn egzakteman en dizyenm tou bann kekosz, menm bann pti plant. (Lik 11:42) Zis detrwa mwan pase, zot ti montre ki kantite zot mepriz bann dimoun ordiner ler zot ti dir: “Sa lafoul ki pa konn nanryen dan Lalwa [dapre pwennvi bann Farizyen] i bann dimoun modi.”—Zan 7:49.

Zezi i kontiny rakont son legzanp: “Me sa kolekter taks li ti pe debout en zistans e i pa ti ni menm oze get anler, me i ti kontinyelman tap

son lestoman e dir, ‘Ar Bondye, pran pitye pour mwan akoz mon fer pese.’” Sa kolekter taks i annan limilite e i aksepte son bann fot. Finalman, Zezi i dir: “Mon dir zot, sa zonnm ti retourn se li e i ti ganny trouve pli drwat ki sa Farizyen. Parski en dimoun ki oule ganny onore pou ganny imilye, me sa ki abes son lekor pou ganny onore.” —Lik 18:13, 14.

Alor Zezi i fer li kler ki nou bezwen annan limilite. Sa i bann bon konsej pour son bann disip, ki’n grandi dan en sosyete kot bann Farizyen ki krwar zot pli siperyer ki lezot in met bokou lanfaz lo pozisyon ek ran. Deplis, sa konsej i osi bon pour tou bann disip Zezi.



- ◇ Ki leson Zezi ti pe ansennyen dan son legzanp konsernan sa move ziz ki ti ed sa vev?
- ◇ Ki kalite lafwa Zezi pou rode ler i arive?
- ◇ Ki latitid ki ti popiler parmi bann Farizyen ki bann disip ti bezwen evite?

# ZEZI I KOZ LO DIVORS EK LANMOUR POUR ZANFAN

MATYE 19:1-15 MARK 10:1-16 LIK 18:15-17

Zezi ek son bann disip i kit Galile, al lot kote Larivyer Zourden e zot pas Pere pour al dan sid. Dernyen fwa ki Zezi ti al Pere, i ti'n dir bann Farizyen pwennvi Bondye lo divors. (Lik 16:18) Aprezan zot lev sa topik pour teste Zezi.

Moiz ti ekri ki en msye ti kapab divors son madanm si son madanm ti'n fer en "keksoz ki pa satisfè li." (Deterononm 24:1) I annan diferan lopinyon konsernan ki rezon en msye i kapab divors son madanm. Serten i menm krwar ki sa i kapab refer avek bann keksoz ki pa sitan grav. Alor bann Farizyen i demande: "Eski i kont lalwa pour en zonm divors son madanm pour nenport ki rezon?"—Matye 19:3.

Zezi pa baz son larepons lo lopinyon bann zonm, me i refer avek lafason ki Bondye ti oule maryaz i ganny fer. "Zot pa'n lir ki sa enn ki ti kree zot o konmansman ti fer zot zonm ek fanm e ti dir: 'Se pour sa rezon ki en zonm pou kit son papa ek son manman e i pou atase avek son madanm e zot de pou vin en sel,' pour ki zot nepli de me en sel? Alor, sa ki Bondye in ini ansanm zonm pa devret separe." (Matye 19:4-6) Ler Bondye ti entrodwi maryaz ant Adan ek Ev, zot maryaz pa ti sipoze fini.

Bann Farizyen i reponn Zezi: "Alor, akoz Moiz ti demann en zonm pour donn son madanm en sertifika divors pour divors li?" (Matye 19:7) Zezi i dir zot: "Akoz zot leker dir Moiz ti akseptè ki zot ti kapab divors zot madanm, me sa pa ti leka depi o konmansman." (Matye 19:8) Ler Zezi i dir "o konmansman," i pa pe refer avek letan Moiz me avek ler Bondye ti entrodwi maryaz dan zarden Edenn.

Aprè Zezi i dir en laverite enportan: "Mwan mon dir zot ki nenport zonm ki divors son ma-

danm, eksepte si i'n komet imoralite seksyel [Grek, *por-nei'a*] e i marye avek en lot i komet adilter." (Matye 19:9) Alor dapre Labib, imoralite seksyel i sa sel rezon ki en dimoun i kapab divorce.

Sa i pous bann disip pour dir: "Si maryaz ant en msye ek son madanm i koumsa, vomye pa marye." (Matye 19:10) I kler ki en dimoun ki pe mazin pour marye i devret konsider li konman en keksoz permanan!

Konsernan reste selibater, Zezi i eksplike ki serten i ne enpotan akoz en dezabilite, setadri zot pa kapab fer sèks. Lezot in vin enpotan e zot osi zot pa kapab fer sèks. Par kont, i annan serten ki kontrol zot dezir pour annan relasyon seksyel. Zot fer sa pour pli byen konsantre lo bann keksoz ki annan pour fer avek Rwayonm. Zezi i ankouraz bann ki pe ekout li: "Si en dimoun i kapab fer sa [reste selibater], fer li."—Matye 19:12.

Aprezan bann dimoun i konmans anmenn zot zanfàn kot Zezi. Par kont, bann disip i reprimann zot, petet akoz zot pa oule ki zot deranz Zezi. Ler Zezi i vwar sa i mekontan e i dir zot: "Les sa bann zanfàn vin kot mwan, pa bezwen anpes zot vini, parski Rwayonm Bondye i pour bann ki parey sa bann zanfàn. Laverite mon dir zot, sa ki pa akseptè Rwayonm Bondye parey en zanfàn pa pou zanmen antre dan sa Rwayonm."—Mark 10:14, 15; Lik 18:15.

Pa sa i en bon leson! Pour antre dan Rwayonm Bondye, nou bezwen annan limilite e pare pour aprann, zis parey bann zanfàn. Aprezan Zezi i montre ki i kontan bann zanfàn. I pran zot dan son lebra e beni zot. Zezi i kontan tou bann ki "akseptè Rwayonm Bondye parey en zanfàn."—Lik 18:17.



- ◇ Ki mannyer bann Farizyen ti teste Zezi konsernan divors?
- ◇ Dapre Zezi, ki standar Bondye konsernan divors?
- ◇ Akoz serten disip i kapab swazir pour reste selibater?
- ◇ Ki leson Zezi ti ansennyen atraver lafason ki i ti tret bann zanfan?



## ZEZI I REPONN EN ZENN DIRIZAN RIS

MATYE 19:16-30 MARK 10:17-31 LIK 18:18-30

Zezi i ankor dan rezyon Pere pe al Zerizalenm. En zenn onm ris i tay kot li e tonm azenou devan li. Sa zonn i “en sef Zwif,” petet i pe servi konman en zofisye sinagog oubyen en manm Sannedren. I dir: “Bon Ansenyan, ki mon devret fer pour ganny lavi eternal?”—Lik 8:41; 18:18; 24:20.

Zezi i reponn: “Akoz ou apel mwan bon? Napa person ki bon eksepte Bondye.” I tre probab ki sa zenn onm i servi sa mo “bon” konman en tit, parey bann ansenyan Zwif i annan labitid fer. Menm si Zezi i en bon ansenyan, i fer sa zonn konnen ki sa tit “Bon” i devret ganny servi zis pour Bondye.

Zezi i donn li sa kosey: “Me si ou anv i ganny lavi, kontinyen obei bann komannman.” Alor sa zenn onm i demande: “Ki komannman?” Zezi i sit senk parmi sa Dis Komannman, konsernan mert, adilter, vole, fo temwannayaz e onor son paran. Apre i mansyonn en lot komannman pli enportan ankor: “Ou devret kontan ou prosen parey ou kontan ou prop lekor.”—Matye 19:17-19.

Sa zonn i reponn: “Mon’n fer tousala, kwa ki mon devret fer ankor?” (Matye 19:20) I kapab ki i krwar ki i bezwen fer en keksoz ekstraordiner pour demontre ki i bon e kouraze pour li ganny lavi eternal. Zezi i santi ki son demann i senser e i “kontan” sa zonn. (Mark 10:21) Par kont, i annan en lobstak ki anpes sa zonn progresse.

Sa zonn i kontan son bann byen materyel, alor Zezi i dir li: “I ankor annan en keksoz ki ou bezwen fer: Ale, vann tou sa ki ou annan e donn sa larzan bann pov e ou pou ganny trezor dan lesyel e apre vin mon disip.” Sa zonn ti kapab partaz son larzan avek bann pov ki pa kapab



rann li e vin en disip Zezi. I tre probab ki Zezi i pran pitye pour li ler i vwar li leve e ale dan sa-grinasyon. Vi ki sa zonm i kontan tou son bann “byen,” setadir son larises, sa i fer li pa vwar sa vre trezor. (Mark 10:21, 22) Zezi i dir: “I pou vreman difisil pour sa bann ki annan larzan antre dan Rwayonm Bondye!”—Lik 18:24.

Bann disip i etonnen ler zot tann sa parol e sa ki Zezi i dir apre: “Anfet, i pli fasil pour en samo pas dan trou en zegwir ki pour en zonm ris antre dan Rwayonm Bondye.” Sa i pous bann disip pour demande: “Be lekel ki vreman kapab ganny sove?” Eski i telman difisil pour en dimoun ganny sove ki sa i preski enposib? Zezi i get zot dan zot figir e i dir: “Sa ki enposib pour zonm i posib pour Bondye.”—Lik 18:25-27.

Pyer i fer resorti ki zot in fer en swa diferan avek sa zonm ris. I dir: “Gete! Nou’n kit tou sa ki nou ti annan e nou’n swiv ou, alor ki nou pou gannyen?” Zezi i dir ki i pou arive a lavenir aköz zot in fer sa bon swa: “Ler Bondye pou fer tou keksoz nouvo, Garson zonm pou asiz lo son tronn glorye e zot ki’n swiv mwan pou asiz lo 12 tronn pour ziz sa 12 tribi Izrael.”—Matye 19:27, 28.

I kler ki Zezi pe mazin sa letan a lavenir ler tou keksoz lo later pou’n vin nouvo parey i ti ete dan zarden Edenn. Pyer ek lezot disip pou ganny zot rekonpans pour renny avek Zezi lo

sa Paradi lo later. I vreman vo lapenn pour fer bann sakrifis pour en rekonpans koumsa.

Par kont, i pa zis a lavenir ki zot pou ganny en rekonpans. Bann disip i ganny serten benediksyon la konmela menm. Zezi i dir: “Napa personn ki’n kit lakaz, madanm, frer, paran ou-byen zanfan aköz Rwayonm Bondye ki pa pou ganny bokou plis konmela menm e dan sa lemonn ki pe vini, lavi eternel.”—Lik 18:29, 30.

Nenport landrwa kot bann disip pou ale, zot pou kapab vin plis pros avek lezot disip Zezi ki avek zot prop fanmir. Malerezman, i paret ki sa zenn dirizan ris pa pou ganny sa benediksyon e osi sa rekonpans pour ganny lavi dan lesyel dan Rwayonm Bondye.

Zezi i osi dir: “Me bokou ki premye pou vin dernyen e sa ki dernyen pou vin premye.” (Matye 19:30) Ki sa i vedir?

Sa zenn dirizan ris i parmi bann “premye” aköz i en sef relizye Zwif. Sa zonm i swiv bann komannman Bondye, alor i paret ki i ti’n kapab vin en disip Zezi e fer en kantite bon keksoz pour li. Par kont, i pe donn larises ek bann byen materyel premye plas dan son lavi. De lot kote, bann dimoun ordiner i vwar ki Zezi pe ansenny zot konman pour ganny lavi eternel ek laverite. Dan en sans, zot “dernyen” me la apreman zot pe vin “premye.” Dan lavenir, zot pou asiz lo bann tronn avek Zezi dan lesyel e diriz later ki’n vin en paradi.

- 
- ◇ Lekel ki ti vin kot Zezi?
  - ◇ Aköz Zezi pa ti dakor ki i ti ganny apele “bon”?
  - ◇ Ki rekonpans Zezi ti promet pour donn son bann disip?
  - ◇ Ki mannyer bann “premye” pou vin “dernyen” e bann “dernyen” pou vin “premye”?

# LEGZANP BANN TRAVAYER DAN PLANTASYON REZEN

MATYE 20:1-16

Zezi fek dir bann dimoun ki pe ekout li dan rezyon Pere ki “bokou ki premye pou vin dernyen e sa ki dernyen pou vin premye.” (Matye 19:30) I servi en legzanp konsernan bann travayer dan en plantasyon rezen pour met lanfaz lo sa pwen:

“Rwayonm lesyel i parey en met lakour ki ti al rod bann travayer granmaten pour travay dan son plantasyon rezen. Apre ki i ti’n tonm dakor avek bann travayer pour pey zot en denye pour en zournen, i ti anvoy zot dan son plantasyon rezen. Dan bann 9 er bomaten, i ti sorti ankore enn fwa e kot bazar i ti vwar bann dimoun ki ti napa travay. I ti dir zot, ‘Zot osi al travay dan mon plantasyon rezen e mon pou donn zot en bon lapey.’ Alor zot ti ale. I ti sorti ankore enn fwa apepre midi e osi apepre 3 er apremidi e i ti fer parey. Finalman, apepre 5 er apremidi, i ti sorti e i ti vwar lezot ki ti pe debout nanryen fer, i ti dir zot, ‘Akoz zot in debout la lazournen antye e zot pa pe travay?’ Zot ti reponn, ‘Parski person pa’n anploy nou.’ I ti dir zot, ‘Zot osi al dan plantasyon rezen.’”—Matye 20:1-7.

I tre probab ki ler dimoun i tann li koz lo “rwayonm lesyel” ek “met lakour,” zot mazin Zeova. Labib i koz lo Zeova konman propriyeter en plantasyon rezen ki ti reprezant nasyon Izrael. (Psonm 80:8, 9; Izai 5:3, 4) Bann dimoun ki anba lalyans Lalwa i ganny konpare avek bann travayer dan en plantasyon rezen. Me Zezi pa pe koz lo lepase, me i pe dekrir en sityasyon ki egziste dan son letan.

Bann sef relizye, parey bann Farizyen ki’n teste li lo size divors resaman, i sipoze pe kontinyen travay dir dan servis Bondye. Zot parey bann travayer ki’n travay lazournen antye e ki ekspekte en lapey konplet, setadir en denye pour en zournen.

Bann pret ek lezot sef relizye i mazine ki bann Zwif ordiner pe servi Bondye mwens, parey bann travayer ki pa’n fer en lazournen dan plantasyon. Dan legzanp Zezi, zot parey sa bann zonm ki’n ganny anploye “9 er bomaten” oubyen pli tar dan lazournen, swa midi, 3 er oubyen 5 er apremidi.

Bann zonm ek fanm ki swiv Zezi i ganny konsidere konman “bann dimoun modi” par bann sef relizye. (Zan 7:49) Zot in travay konman bann peser oubyen labourer tou dilon zot lavi. Alor, lotonn lannen 29, “propriyeter sa plantasyon” ti anvoy Zezi kriy sa bann dimoun ordiner pour vin travay pour Bondye konman bann disip Kris. Zot sa “bann dernyen” ki Zezi i mansyonnen ki vin travay ver 5 er apremidi.

Finalman, Zezi i dekrir sa ki arive a lafen lazournen travay: “Ler fernwanr ti fer, propriyeter sa plantasyon rezen ti dir sa zonm ansarz, ‘Apel bann travayer e pey zot zot saler, konmans avek bann ki’n vin dernyen e fini avek bann ki’n vin premye.’ Bann travayer ki ti konmans travay 5 er apremidi ti vini e sakenn ti ganny en denye. Alor, ler sa bann ki ti konmans travay premye ti vin pran zot lapey, zot ti krwar ki zot ti pou ganny plis, me zot osi zot ti ganny en denye. Ler zot ti pran zot lapey, zot ti konmans konplent kont met lakour e dir, ‘Sa bann zonm ki’n vin travay dernyen in travay enn erdtan, kantmenm sa ou’n tret zot parey nou ki’n rente lazournen antye dan sa gro ker soley!’ Me i ti dir enn parmi zot, ‘Msye, mon pa’n fer ou dit. Ou ti dakor pour ganny peye en denye, non? Pran sa ki pour ou e ale. Mon anvi donn sa bann ki’n vin travay dernyen parey ou. Eski mon napa drwa fer sa ki mon oule avek mon prop keksoz? Eski ou zalou aköz mon en bon dimoun?’





Koumsanmenm ki bann dernyen pou vin premye e bann premye pou vin dernyen.”—Matye 20:8-16.

Bann disip i kapab pe mazinem ki dernyen bout sa legzanp i vedir. Ki mannyer bann sef relizye Zwif ki krwar ki zot “premye” pou vin “dernyen”? Ki mannyer bann disip Zezi pou vin “premye”?

Bann disip Zezi ki ganny konsidere konman “dernyen” pou pas “premye” e zot pou ganny en rekonpans konplet. Ler Zezi i mor, nasyon Izrael pou ganny rezete e Bondye pou swazir

“Izrael Bondye” konman son nouvo nasyon. (Galat 6:16; Matye 23:38) Zan ki batize ti koz lo bann ki ti pou form parti sa nouvo nasyon ler i ti koz lo batenm avek lespri sen ki ti pou arive pli tar. Bann ki “dernyen” pou parmi bann premye ki ganny sa batenm e ganny sa privelez pour vin bann temwen Zezi “ziska dan bann landrwa pli elwannen lo later.” (Akt 1:5, 8; Matye 3:11) Si bann disip i arive konpran sa gran sanzman ki Zezi pe koz lo la, zot kapab osi mazinem ki kantite bann sef relizye ki pou vin “dernyen” pou ay zot.

- 
- ◇ Akoz i fer sans pour konpran ki Zeova i “propriyeter sa plantasyon” e lekel “bann travayer” ki travay ladan?
  - ◇ Ki gran sanzman Zezi ti pe koz lo la atraver sa legzanp?
  - ◇ Kan ki sa sanzman ti pou vin evidan?

## BANN ZAPOT I ROD POZISYON ANKOR ENN FWA

MATYE 20:17-28 MARK 10:32-45 LIK 18:31-34


Zezi ek son bann disip in preski fini zot vwayaz dan direksyon sid, Pere, pour al Zerizalenm. Zot travers Larivyèr Zourden o bor Zeriko. I annan lezot ki pe vwayaz avek zot pour Lapak lannen 33.

Zezi pe mars par devan son bann disip akoz i determinen pour ariv Zerizalenm pour Lapak. Me bann disip i per. Pa bokou letan pase, ler Lazar ti mor e Zezi ti pe kit Zide pour al Pere, Toma ti'n dir lezot disip: "Annou ale nou osi pour ki nou a mor ansanm avek li." (Zan 11:16, 47-53) I danzere pour zot al Zerizalenm, sanmenm bann disip i per.

Zezi i pran son bann zapot akote pour prepa zot pour sa ki pe al arive. I dir zot: "Nou pe mont Zerizalenm e laba Garson zonn pou ganny livre avek bann sef pret ek profeser la-lwa. Zot pou kondann li amor, zot pou livre li avek dimoun lezot nasyon, boufonn li, fwet li e klout li lo poto e trwazyenm zour i pou resisite."—Matye 20:18, 19.

Sa i fer trwazyenm fwa ki Zezi i koz avek son bann disip lo son lanmor ek rezireksyon. (Matye 16:21; 17:22, 23) Par kont, safwasi i dir ki i pou ganny touye lo poto. Son bann disip i ekout li me zot pa konpran ki i pe dir. Petet zot pe ekspekte ki rwayonn Izrael pour ganny retabli lo later e zot anvi ganny laglwar ek loner avek Kris dan en rwayonn lo later.

Salome, ki aparaman manman zapot Zak ek Zan osi pe vwayaz avek zot. Zezi in donn sa de zapot en non ki vèdir "Bann Garson Loraz," san dout akoz zot ti annan tandans pran lakoler. (Mark 3:17; Lik 9:54) I fer en pe letan depi ki sa de i anvi ganny en bon plas



dan Rwayonm Kris. Zot manman i konn sa. La aprezan, i apros Zezi lo zot par, i tonm azenou devan li e demann li en faver. Zezi i reponn: “Ki ou anvi mon fer pour ou?” I dir: “Fer ki mon de garson i asiz, enn lo ou kote drwat e lot lo ou kote gos dan ou Rwayonm.” —Matye 20:20, 21.

Anfet, sa demann i sorti kot Zak ek Zan. Lefet ki Zezi fek koz lo sa laont ek imilyasyon ki i pou gannyen, i dir zot: “Zot pa konnen ki zot pe demande. Zot kapab bwar sa lakoup ki mon pe al bwar?” Zot reponn: “Wi nou kapab.” (Matye 20:22) Kantmenm sa, i tre probab ki zot pa vreman konpran ki sa i vedir pour zot.

Me pourtan Zezi i dir zot: “Wi, zot pou bwar mon lakoup, me pour asiz lo mon kote drwat e lo mon kote gos, sa pa mwan ki deside me i pour sa bann ki mon Papa in swazir.” —Matye 20:23.

Ler sa dis lezot zapot i tande ki Zak ek Zan in fer sa demann, zot byen mekontan. Eski i posib ki Zak ek Zan ti’n byen ardyese dan sa largiman ki bann zapot ti’n annan pli boner? (Lik 9:46-48) An tou ka, sa demann i montre

ki sa 12 zapot pa’n aplik sa konsey ki Zezi in donnen konsernan devlop limilite. Zot ancor anvi ganny pozisyon.

Zezi i deside pour rezourd sa sityasyon aköz sa i kree bann problemn parmi son bann zapot. I kriy sa 12 zapot e avek lanmour i konsey zot. I dir zot: “Zot konnen ki bann ki ganny konsidere konman dirizan bann nasyon i annan lotorite lo lepep e bann dimoun enportan i domin zot. I pa devret koumsa parmi zot, me sa ki anvi vin enportan parmi zot i devret vin zot serviter e sa ki anvi vin premye parmi zot i devret lesklav tou lezot.” —Mark 10:42-44.

Aprezan Zezi i koz lo sa legzanp ki zot devret swiv, setadir son legzanp. I dir: “Garson zonm ti vini, pa pour ganny servi, me pour servi e donn son lavi konman en ranson pour liber bokou dimoun.” (Matye 20:28) I fer apepre trwa-z-an depi ki Zezi pe servi lezot. I pou kontinyen fer sa e i pou menm pare mor pour limanite! Bann disip i bezwen parey Kris e anvi servi lezot olye ki lezot i servi zot. Zot devret vin en dimoun ki mwen enportan olye rod pozisyon.

- 
- ◇ Ki Zezi ti fer pour prepar son bann disip pour sa ki pe al arive?
  - ◇ Ki de zapot ti demann Zezi e ki mannyer bann lezot zapot ti reazir?
  - ◇ Ki mannyer Zezi ti reazir ler son bann zapot ti rod pozisyon?



## ZEZI I GERI DE ZONM AVEG E ED ZASE

MATYE 20:29-34 MARK 10:46-52 LIK 18:35-19:10

Zezi ek bann ki pe vwayaz avek li i ariv Zeriko. I pran apepre en zournen pour marse sorti Zeriko pour al Zerizalenm. Anfet, Zeriko i de diferan lavil. I annan en zistans anviron 1.6 kilomet ki separ sa vye lavil avek sa nouvo lavil Romen. Ler Zezi ek lafoul pe kit enn ant sa de lavil pour al sa lot, de mandyan aveg i tann bann dimoun pe pase. Enn sa mandyan i apel Bartime.

Ler Bartime ek son zanmi i tande ki Zezi pe pase, zot konmans kriye: “Senyer, Garson David, pran pitye pour nou!” (Matye 20:30) Serten dan lafoul i koz severman avek sa bann mandyan e demann zot pour reste tranquil, me zot kriy ankor pli for. Ler Zezi i tann sa ki pe arive, i arete. I demann bann ki avek li pour fer sa bann ki pe kriye vin kot li. Zot al kot bann mandyan e dir avek enn ant


zot: “Pran kouraz! Leve, i pe apel ou.” (Mark 10:49) Sa zonm i byen kontan, deswit i zet son manto ater, leve e al kot Zezi.

Zezi i demande: “Ki zot oule mon fer pour zot?” Tou le de zonm i sipliye: “Senyer, fer nou vwar kler.” (Matye 20:32, 33) Leker Zezi i fermal, alor i tous zot lizye e avek enn sa bann zonm, i dir: “Ale. Ou lafwa in fer ou byen.” (Mark 10:52) Sa de mandyan aveg i vwar kler e san dout zot tou le de zot konmans glorifye Bondye. Ler bann dimoun i vwar sa ki’n arive, zot osi zot konmans loue Bondye. Sa de zonm ki ti aveg i konmans swiv Zezi.

I annan en gran lafoul otour Zezi anmezir ki i pas Zeriko. Tou dimoun i anv i vwar sa enn ki’n geri sa de zonm aveg e en kantite dimoun i antour li, me serten pa ni menm kapab vwar li. Parmi sa bann ki anv i vwar Zezi i annan en kolekter taks ki apel Zase. I sef bann kolekter taks Zeriko e dan zalantour. Vi ki i kourt, i pa kapab vwar sa ki pe arive. Alor Zase i tay par devan e mont lo en pye fig maron (oubyen pye sikomor) ki lo sa semen ki Zezi pe pran. Anler lo sa pye fig, Zase i kapab vwar byen tou sa ki pe pase. Anmezir ki Zezi i aprise e vwar Zase dan sa pye, i dir: “Zase, depese, desann parski ozordi mon bezwen reste kot ou.” (Lik 19:5) Zase i desann e tay kot li pour resevwar son viziter.

Ler bann dimoun i vwar sa ki pe arive, zot konmans konplent. Zot santi ki i mal pour Zezi al kot en zonm ki dapre zot i annan en move lavi. Zase in vin ris akoz i malonnet e i’n pran larzan dimoun ler i pe anmas taks.

Anmezir ki Zezi i antre dan lakaz Zase, bann dimoun i dir: “I’n aksepte lenvitasyon



kot lakaz en zonm ki annan en move lavi.” Par kont, Zezi i vwar Zase konman en dimoun ki kapab repantir e Zezi i annan rezon akoz Zase i debout e dir li: “Gete Senyer! Lanmwatye mon byen mon pe donn bann pov e sa ki mon’n vol avek lezot, mon pe al rann zot kat fwa plis.”—Lik 19:7, 8.

Pa sa i en bon fason pour Zase montre ki i’n senserman repantir! I tre probab ki dapre son bann dokiman taks i kapab kalkile konbyen i’n gannyen avek bann Zwif e i promet pour rann zot kat fwa plis. Sa i menm plis ki lalwa Bondye i demande. (Egzod 22:1; Levitik 6:2-5) Deplis, Zase i promet ki i pou donn bann pov lanmwatye son bann byen.

Zezi i kontan pour vwar laprev ki Zase in repantir e i dir li: “Ozordi sa zonm ek son famir in ganny sove parski li osi i en desandans Abraam. Parski Garson zonm in vin rod e sov sa bann ki’n perdi.”—Lik 19:9, 10.

Pa bokou letan pase, Zezi in servi legzanp garson “perdi” pour montre sityasyon bann dimoun ki’n kit Zeova. (Lik 15:11-24) Zase i en bon legzanp en dimoun ki ti’n preski perdi me ki’n ganny sove. Bann sef relizye ek lezot i konplent e kritik Zezi akoz i enterese avek bann dimoun parey Zase. Me kantmenm sa, Zezi i kontinyen rod sa bann garson Abraam ki’n perdi e ed zot retourn kot Bondye.

- 
- ♦ Aparaman kote Zezi ti zwenn sa de mandyan avek e ki i ti fer pour zot?
  - ♦ Lekel Zase e ki mannyer i ti montre ki i’n repantir?
  - ♦ Ki lesou nou kapab aprann avek lafason ki Zezi ti tret Zase?
- 



## LEGZANP SA DIS MIN

LIK 19:11-28

I vre ki Zezi pe al Zerizalenm, me i paret ki i ankor kot lakour Zase avek son bann disip. Zot krwar ki tre byento “Rwayonm Bondye” pou ganny etabli e ki Zezi pou vin Lerwa. (Lik 19:11) Zot osi pa arive konpran ki Zezi i bezwen mor. Alor i servi en lot legzanp pour ed zot vwar ki bokou letan i bezwen pase avan ki Rwayonm i ganny etabli.

I dir: “En zonm ki ti ne dan en fanmir rwayal ti al dan en pei byen lwen pour li vin lerwa e apre retournen.” (Lik 19:12) I ti pou pran letan pour fer sa. I kler ki Zezi i sa “zonm ki ti ne dan en fanmir rwayal” ki al “dan en pei byen lwen,” setadir lesyel, kot son Papa pou fer li vin lerwa.

Dan sa legzanp, avan ki sa “zonm ki ti ne dan en fanmir rwayal” i ale, i kriy dis parmi son bann lesklav e donn sakenn en bon somn larzan e dir zot: “Fer profi avek sa larzan ziska ki mon retournen.” (Lik 19:13) Sa zonm ti donn sak lesklav en min. Sa i apepre lapey en dimoun ki travay lo laferm pour trwa mwan.

I posib ki bann disip i konnen ki zot parey sa dis lesklav dan sa legzanp, akoz Zezi in deza konpar zot avek bann travayer rekolt. (Matye 9:35-38) Byensir i pa’n demann zot pour partisip dan en vre rekolt. Plito, zot bezwen partisip dan en rekolt senbolik pour rasanble lezot disip ki kapab ganny en plas dan Rwayonm Bondye. Bann disip i servi tou zot letan, lafors, lenerzi ek byen materyel pour ed lezot antre dan sa Rwayonm.

Kwa ankor ki Zezi i dir dan sa legzanp? I dir ki bann sitwayen sa pei “ti ay [sa zonm ki ti ne dan en fanmir rwayal] e zot ti anvoy bann anbasader pour dir, ‘Nou pa oule sa zonm vin nou lerwa.’” (Lik 19:14) Bann disip i konnen ki


bann Zwif pa aksepte Zezi e serten i menm anvi touy li. Apre ki Zezi i mor e al dan lesyel, bann Zwif an zeneral pou persekit son bann disip e sa i montre ki mannyer zot konsider Zezi. Sa bann ki opoz Zezi i fer li kler ki zot pa anvi ki Zezi i vin zot Lerwa.—Zan 19:15, 16; Akt 4:13-18; 5:40.

Me ki mannyer sa dis lesklav i servi zot larzan ziska ki sa “zonm ki ti ne dan en fanmir rwayal” i “vin lerwa” e apre retournen? Zezi i dir: “Ler i ti finalman retournen apre ki i ti’n vin lerwa, i ti apel sa bann lesklav pour vwar ki profi zot ti’n fer avek son larzan. Alor premye ti vini e dir, ‘Senyer, mon’n ganny ankor dis avek sa ki ou ti donn mwan.’ I ti dir li, ‘Ou’n byen fer, ou en bon lesklav. Vi ki ou’n montre ou fidel dan en pti keksoz, mon pou donn ou lotorite lo dis lavil.’ Dezyenm ti vini e dir, ‘Senyer, mon’n ganny ankor senk avek sa ki ou ti donn mwan.’ I ti dir sa enn osi, ‘Ou osi ou pou ansarz senk lavil.’”—Lik 19:15-19.

Si bann disip i konpran ki zot parey sa bann lesklav ki byen servi tou sa ki zot annan pour fer plis disip, zot kapab asire ki Zezi pou kontan. Zot osi kapab asire ki i pou rekonpans zot pour zot travay dir. Byensir, pa tou bann disip Zezi ki annan menm sikonstans lavi, loportinite ek abilite. Pourtan, Zezi ki’n “vin lerwa” pou vwar e beni zot zefor senser pour fer disip.—Matye 28:19, 20.

Me ekout sa ki Zezi i dir a lafen son legzanp: “Me en lot [lesklav] ti vini e dir, ‘Senyer, la ou larzan ki mon ti’n kasyet dan en sifon. Ou konnen, mon ti per ou, akoz ou en dimoun dir, ou pran larzan ki ou pa’n met labank e ou rekolte sa ki ou pa’n senmen.’ I ti dir li, ‘Move lesklav, par ou prop parol mon ziz ou. Ou ti konnen ki





mon en dimoun dir, ki mon pran larzan ki mon pa'n met labank e mon rekolte sa ki mon pa'n senmen. Alor, akoz ou pa ti met mon larzan labank? Ler mon retournen mon ti a'n kapab ganny mon larzan avek lentere.' Alor i ti dir sa bann ki ti pe debout la, 'Pran sa larzan avek li e donn sa enn ki'n ganny dis an plis.'—Lik 19:20-24.

Vi ki sa lesklav pa'n travay pour ogmant larises son met, sa lesklav i perdi sa ki i annan. Bann zapot pe esper sa letan kot Zezi pou dirize dan Rwayonm Bondye. Alor dapre

sa ki Zezi i dir konsernan sa dernyen lesklav, i tre probab ki zot konpran ki si zot pa travay dir, zot pa pou ganny en plas dan sa Rwayonm.

Parol Zezi i devret pous son bann disip fidel pour fer plis zefor. I dir: "Mon dir zot, sa ki annan pou ganny plis ankor, me sa ki napa, menm sa ptigin ki i annan pou ganny pran avek li." I azoute ki son bann lennmi ki pa oule ki i "vin zot lerwa," pou ganny met amor. Apre sa, Zezi i kontinyen son larout ver Zerizalenm.—Lik 19:26-28.

- ◇ Akoz Zezi ti donn sa legzanp konsernan sa dis min?
- ◇ Lekel sa "zonm ki ti ne dan en fanmir rwayal" e ki sa pei kot i ti ale?
- ◇ Lekel sa bann lesklav e lekel bann sitwayen ki ay sa fitir lerwa?
- ◇ Ki diferans i annan ant bann lesklav ki ganny rekonpanse ek sa lesklav ki perdi son min?







SEKSYON

# 6

## LAFEN MINISTER ZEZI

“OU LERWA  
PE VIN KOT OU.”

—MATYE 21:5



## EN REPA KOT LAKOUR SIMON, BETANI

MATYE 26:6-13 MARK 14:3-9 ZAN 11:55-12:11

Zezi i kit Zeriko pour al Betani. Pour ariv laba, i bezwen mont apepre 20 kilomet lo bann semen ki pa tro tro bon. Zeriko i anviron 250 met *anba* nivo lanmer e Betani i anviron 610 met *par lao* nivo lanmer. Lazar ek son de ser i reste Betani ki en pti vilaz ki anviron trwa kilomet avek Zerizalenm. Betani i lo kote les Montanny Pye Zoliv.

En kantite Zwif in fini ariv Zerizalenm pour Lapak. Zot in ariv boner “pour pirifye zot lekor” an ka zot in tous en lekor mor oubyen fer en lot keksoz ki fer zot enpir. (Zan 11:55; Nonm 9:6-10) Serten parmi bann ki’n ariv boner i rasanble kot tanp. Zot diskite antre zot pour esey konnen si Zezi pou asiste Lapak. —Zan 11:56.

I annan diferan lopinyon lo Zezi. Serten sef relize y e anv i tyonbo li pour met li amor. Anfet, zot in donn lord ki si okenn dimoun i konnen kote Zezi i ete, zot devret dir “pour ki zot tyonbo li.” (Zan 11:57) Sa bann sef ti deza esey touy Zezi apre ki i ti resisit Lazar. (Zan 11:49-53) Alor nou kapab konpran akoz serten pa tro krwar ki Zezi pou vin an piblik.

Zezi i ariv Betani Vandredi, “sis zour avan lafet Lapak.” (Zan 12:1) En nouvo zour (Saba, le 8 Nizan) i konmans apre soley kouse. Alor i ariv Betani avan konmansman Saba. Dapre lalwa Zwif, i pa ti pou’n kapab vwayaze sorti Zeriko zour Saba, setadir depi soley kouse Vandredi ziska soley kouse Sanmdi. I tre probab ki Zezi i al kot Lazar parey i’n deza fer avan.

Simon, ki osi reste Betani i envit Zezi ek son bann konpanyon, enkli Lazar, pour vin manze kot li Sanmdi swar. Simon i ganny



apele “sa lepre,” petet akoz i ti en lepre ki Zezi ti geri. Parey son labitid, Mart pe debrouye e servi bann envite. Mari pe donn en latansyon spesyal Zezi, me pa tou dimoun ki pou kontan.

Mari i ouver en boutey ki annan “en lit delwil parfimen, delwil nar pir byen ser.” (Zan 12:3) Sa delwil i vreman ser, i kout 300 denye ki apepre lapey en dimoun pour enn an! Mari i vid sa delwil lo latet ek lipye Zezi e apre i eswiy son lipye avek son seve. Sa delwil parfimen i anvoy loder partou dan lakaz.

Bann disip i ankoler e zot demande: “Akoz sa delwil parfimen in ganny gaspiye?” (Mark 14:4) Zida Iskaryot i dir: “Akoz sa delwil parfimen pa ti ganny vann pour 300 denye e donn sa larzan bann pov?” (Zan 12:5) Zida pa vreman enterese avek bann pov akoz li ki



responsab bwat larzan bann disip e i abitye vole.

Zezi i defann Mari e dir: “Akoz zot pe esey fer problemm avek sa madanm? I’n fer en bon aksyon anver mwan. Parski bann pov pou touzour avek zot, me mwan mon pa pou touzour avek zot. Ler i’n vid sa delwil parfimen lo mon lekor, i’n fer sa pour prepar mwan pour mon lanterman. Laverite mon dir zot, nenport kote dan lemonn kot sa bon nouvel i ganny anonse, sa ki sa madanm in fer pou

ganny rakonte an son memwar.”—Matye 26: 10-13.

I fer plis ki en zour depi ki Zezi i Betani e sa nouvel i fann partou. I annan en kantite Zwif ki vin kot lakour Simon pour vwar Zezi me osi pour vwar Lazar “ki Zezi ti’n resisite.” (Zan 12:9) Bann sef pret i fer konplo pour touy Zezi e osi Lazar. Sa bann sef relizye i panse ki lefet ki Lazar in ganny resisite, sa i rezon aköz bokou dimoun i annan lafwa dan Zezi. Pa sa bann sef relizye i vremen pa bon!

- ◇ Ki bann Zwif kot tanp ti pe diskite?
- ◇ Aköz i bezwen ki Zezi ti ariv Betani Vandredi olye Sanmdi?
- ◇ Kwa ki ti fer bann dimoun ankoler e ki mannyer Zezi ti defann Mari?
- ◇ Kwa ki montre ki bann sef pret ti vremen pa bon?

## LERWA I ANTRE ZERIZALENM LO EN PTI BOURIK

MATYE 21:1-11, 14-17 MARK 11:1-11 LIK 19:29-44 ZAN 12:12-19

Son lannmen, Dimans le 9 Nizan, Zezi i kit Betani avek son bann disip e al ver Zerizalenm. Ler zot pe apros Betfaze ki lo Montanny Pye Zoliv, Zezi i dir de son disip:

“Al dan sa vilaz ki zot vwar laba, enn fwa ki zot in arive zot pou vwar en bourik ek piti en bourik o bor li, delarg zot e anmenn zot kot mwan. Si en dimoun i dir zot keksoz, zot devret dir, ‘Senyer i bezwen zot.’ Ler zot pou dir sa, deswit i pou les zot ale.”—Matye 21: 2, 3.

Bann disip pa konpran ki lenstriksyon Zezi i annan pour fer avek en profesu Labib. Me pli tar, zot pou konpran lakonplisman profesu Zekarya. I ti predir ki sa Lerwa ki Bondye ti’n promet ti pou antre Zerizalenm “konman en dimoun senp, lo en bourik, en pti bourik, piti en femel bourik.”—Zekarya 9:9.

Ler bann disip i ariv Betfaze e pran sa pti bourik ki en mal ek son manman, bann dimoun ki pe debout lanmenm i demande: “Akoz zot pe delarg sa bourik?” (Mark 11:5) Me ler zot tande ki se Senyer ki bezwen sa de bourik, zot les bann disip pran zot pour anmenn kot Zezi. Bann disip i met zot lenz lo sa bourik ek son piti, me Zezi i asiz lo sa pti bourik.

Plis dimoun i rasanble anmezir ki Zezi i al ver Zerizalenm lo sa bourik. En kantite dimoun i tal zot lenz lo semen. Lezot i koup bann brans oubyen “bann fey dan lakanpanny” e tal zot ater. Zot kriye: “Nou priye, sov li. Beni sa enn ki vin o non Zeova! Beni Rwayonm nou papa David ki pe al ganny etablir!” (Mark 11:8-10) Bann Farizyen ki dan lafoul i ankoler ki bann dimoun pe dir sa. Zot dir Zezi: “Ansenyan, reprimann ou bann disip.” Zezi i reponn: “Mon

dir zot, si zot ti reste trankil, bann ros ti pou kriye.”—Lik 19:39, 40.

Ler Zezi i vwar Zerizalenm, i konmans plere e dir: “Si ou osi ou ti’n konpran ozordi sa ki ou bezwen fer pour ganny lape, me la sa in ganny kasyet avek ou.” Bann dimoun Zerizalenm pou bezwen peye pour zot dezobeisans. Zezi i predir: “Ou bann lenmi pou konstri en gran baraz avek bann poto pwent toultour ou, zot pou anserkle ou e atak ou dan tou kote. Zot pou kraz ou e detri ou bann zanfan, zot pa pou kit en ros lo en lot dan ou.” (Lik 19:42-44) Zis parey Zezi ti dir, Zerizalenm i ganny detrir lannen 70.

Ler Zezi i antre Zerizalenm, i ‘annan en kantite tapaz dan lavil e dimoun i demande: “Lekel sa?” Lafoul i dir: “Zezi sa, sa profet ki sorti Nazaret, Galile!” (Matye 21:10, 11) Lezot dan lafoul ki ti’n vwar Zezi resisit Lazar i rankont bann dimoun sa mirak. Ler bann Farizyen i vwar tousala, zot konplent ki zot pa kapab fer nanryen. Zot dir kanmarad: “Lemonn antye pe swiv li.”—Zan 12:18, 19.

Parey son labitid ler i vizit Zerizalenm, Zezi i al kot tanp pour ansennyen. Laba i geri bann avek ek bann ki bwete. Bann sef relizye ek bann profeser lalwa i ankoler ler zot vwar sa ki i pe fer e tann bann garson pe kriye dan tanp, “Nou priye, sov Garson David!” Bann sef relizye i demann Zezi: “Eski ou tande ki zot pe dir?” Zezi i reponn: “Zot pa’n deza lir sa, ‘Ou’n fer bann zanfan ek bann pti baba loue ou?’” —Matye 21:15, 16.

Zezi i get partou dan tanp. Vi ki i deza tar, i kit Zerizalenm avek son bann zapot. Avan Dimans le 10 Nizan i konmanse, i retourn Betani kot i pas lannwit.





- ◇ Kan e ki mannyer Zezi ti antre Zerizalenm konman Lerwa?
- ◇ Ki mannyer Zezi ti santi li ler i ti vwar Zerizalenm e ki profesi i ti donnen?
- ◇ Ki ti arive ler Zezi ti al kot tanp?

## ZEZI I PIRIFYE TANP ANKOR ENN FWA

MATYE 21:12, 13, 18, 19 MARK 11:12-18 LIK 19:45-48 ZAN 12:20-27

Zezi ek son bann disip in pas trwa lannwit Betani depi ki zot in arive sorti Zeriko. La aprezan, granmaten Lendi le 10 Nizan, zot al Zerizalenm. Zezi i lafen, alor ler i vwar en pye fig, i al gete si i annan fig dan pye.

I ver lafen mwan Mars, me sezon fig i apeare Zen. Toudmenm, sa pye i annan fey, alor Zezi i krwar ki i kapab ki sa pye in raport fri boner. Me ler Zezi i ariv kot sa pye, i vwar ki napa fri. Bann fey in donn en fo lenpresyon. Apre sa, Zezi i dir: “Personn pa pou zanmen manz ou fri ankor.” (Mark 11:14) Deswit sa pye fig i sek. Son lannmen bomaten, bann disip pou konpran ki sa i vedir.

Finalman, Zezi ek son bann disip i ariv Zerizalenm. Zezi i al kot tanp ki i ti’n enspekte son lavey dan apremidi. Ozordi i pa zis enspekte tanp, i fer preski menm keksoz ki i ti fer trwa-z-an pase pandan Lapak lannen 30. (Zan 2:14-16) Safwasi Zezi i pous ‘bann ki pe aste e vann dan tanp.’ I osi savir latab ‘bann ki pe sanz larzan ek ban bann ki pe vann bann kolonm.’ (Mark 11:15) I pa ni menm les personn pas dan lakour tanp pour anmenn keksoz lot kote lavil.

Akoz Zezi i fer en keksoz koumsa kont bann ki pe sanz larzan e vann zannimo dan tanp? I dir: “Pa i’n ganny ekrire, ‘Mon lakaz pou ganny apele en lakaz lapriyer pour tou nasyon’? Me zot, zot in fer li vin en lakaz voler.” (Mark 11:17) Rezon ki Zezi i dir sa bann dimoun ki zot voler, i akoz zot sarz tro bokou larzan bann dimoun ki’n vin aste zannimo pour fer bann sakrifis. Pour Zezi i konmsi zot pe vole.

Byensir, ler bann sef pret, profeser lalwa ek bann sef lepep i tande ki Zezi in fer, zot rod

fason pour touy li. Par kont, i annan en problenm. Zot pa konnen ki manyer pour touy li parski en kantite dimoun i vin ekout li.

I pa zis bann Zwif ki’n vin asiste Lapak, me osi bann ki’n konverti dan larelizyon Zwif. Parmi zot i annan bann Grek ki’n vin ador Bondye pandan sa lafet. Zot vin kot Filip, petet akoz i annan en non Grek e demande pour vwar Zezi. I paret ki Filip pa tro asire si sa i apropiye, alor i koz avek Andre. Prezan, zot de zot al koz avek Zezi ki aparaman i ankor kot tanp.

Zezi i konnen ki i pou mor dan detrwa zour, alor la i pa letan pour fer plezir bann ki kirye oubyen pour li esey vin popiler. I servi en legzanp pour reponn sa de zapot. I dir: “Ler in arive pour Garson zonn ganny glorifye. Vreman mon dir zot laverite, tan ki en lagrenn dible pa tonm dan later e mor, i pou reste zis en lagrenn. Me si i mor, apre sa i pou raport bokou fri.”—Zan 12:23, 24.

I kapab paret ki en lagrenn dible napa bokou valer. Par kont, si sa lagrenn i ganny met dan later e “mor,” i kapab zermen e avek letan pouse e vin en tiz avek bokou lagrenn lo la. Pareyman, Zezi i en zonn parfe. Kantmenm sa, lafet ki Zezi pou reste fidel avek Bondye ziska son lanmor, sa pou fer li posib pour bann ki annan sa menm leta lespri sakrifis ganny lavi eternel. Alor Zezi i dir: “Sa ki kontan son lavi pou perdi li, me sa ki ay son lavi dan sa lemonn pou ganny lavi eternel.”—Zan 12:25.

Zezi pa zis pe mazin son lekor parski i dir: “Si en dimoun i oule vin mon serviter, fodre i swiv mwan e kot mon ete mon serviter pou la osi. Si en dimoun i oule vin mon serviter, mon Papa pou beni li.” (Zan 12:26) Pa sa i en gran





rekonpans! Bann ki ganny onore par son Papa pou diriz ansanm avek Kris dan Rwayonm.

Ler Zezi i mazin kantite ki i pe al soufer e sa lanmor fermal ki i pe al pas atraver, i dir: “La mon lespri i fatige, ki mon pou dir? Papa tir

mwan dan sa leprev.” Me Zezi i anvi fer lavolonte Bondye. Alor i dir: “Pourtan, se pour fer fas avek sa leprev ki mon’n vin lo later.” (Zan 12:27) Zezi i dakor avek tou sa ki Bondye i anvi fer, enkli sakrifye son lavi pour limanite.

- 
- ◇ Akoz Zezi ti pe ekspekte vwar bann fri dan pye fig menm si i pa ti son sezon?
  - ◇ Akoz Zezi ti apel bann ki ti pe vann dan tanp bann “voler”?
  - ◇ Dan ki sans Zezi ti kapab ganny konpare avek en lagrenn dible e ki mannyer i ti santi konsernan sa soufrans ek lanmor ki i ti pe al pas atraver?
-



# ESKI BANN ZWIF POU EKOUT E DEMONTRE LAFWA DAN BONDYE?

ZAN 12:28-50

I Lendi le 10 Nizan e Zezi i kot tanp pe koz lo son lanmor ki pe aprozé. Zezi i enkyet ki Bondye pou ganny en move repitasyon alor i dir: “Papa glorifye ou non.” En lavwa for sorti dan lesyel i dir: “Mon’n glorifye li e mon pou glorifye li ankor.”—Zan 12:27, 28.

Bann dimoun ki la pa konpran ki pe arive. Serten i krwar ki zot in tann loraz. Lezot i dir: “En lanz in koz avek li.” (Zan 12:29) Par kont, se lavwa Zeova ki zot fek tande! Sa i pa premye fwa ki bann dimoun i tann lavwa Bondye depi ki Zezi in konmans son minister lo later.

Trwa-z-an edmi pase, ler Zezi ti batize, Zan ki batize ti tann Bondye dir sa parol lo Zezi: “Sa i mon Garson ki mon kontan ki mon’n aprouve.” Pli tar, apre Lapak lannen 32, laparans Zezi ti sanze devan Zak, Zan ek Pyer. Sa trwa zonm ti tann Bondye dir: “Sa i mon garson ki mon kontan, sa enn ki mon’n aprouve. Ekout li.” (Matye 3:17; 17:5) Me la sa trwazyenm fwa, Zeova pe koz dan en fason kot bokou dimoun i kapab tande!

Zezi i dir: “Sa lavwa in koze pa pour mwan, me pour zot.” (Zan 12:30) Sa i laprev ki i vremen Garson Bondye, sa Mesi ki’n ganny predir.

Deplis, lavi fidel Zezi i en legzanp pou nou swiv. I osi montre ki Satan, sef sa lemonn i devret ganny detrir. Zezi i dir: “La lemonn pe ganny zize, sef sa lemonn pou ganny zet deor.” Lanmor Zezi ki pe aprozé pa pou en defet, me en laviktwar. Dan ki sans? Zezi i eksplike: “Pourtan mwan, ler mon ganny met anpandan lo poto, tou sort kalite dimoun pou swiv mwan.” (Zan 12:31, 32) Ler Zezi i mor lo

en poto, i pou atir lezot ver li e fer li posib pour zot ganny lavi eternel.

Ler Zezi i dir ki i pou “ganny met anpandan,” lafoul i dir: “Nou’n tande dapre Lalwa ki Kris pou viv pour touzour. Ki mannyer ou kapab dir ki Garson zonm i devret ganny met anpandan lo poto? Leklé li sa Garson zonm?” (Zan 12:34) Malgre tou levidans, enkli tann lavwa Bondye li menm, laplipar zot pa aksepté Zezi konman sa vre Garson zonm, sa Mesi ki’n ganny promet.

Parey i’n deza fer, Zezi i koz lo son lekor konman en “lalimyer.” (Zan 8:12; 9:5) I donn lafoul sa lankourazman: “Lalimyer pou parmi zot pour ankor en pti pe letan. Marse tan ki i ankor annan lalimyer pour ki fernwanr pa domin zot, . . . Tan ki zot annan lalimyer, demontre lafwa dan sa lalimyer pour ki zot a kapab vin bann zanfan lalimyer.” (Zan 12:35, 36) Apre Zezi i ale aköz le 10 Nizan pa sa zour ki i merit mor. I sipoze “ganny met anpandan,” setadir kloute lo poto, le 14 Nizan, zour Lapak.—Galat 3:13.

Ler nou egzamin minister Zezi e nou vwar ki bann Zwif pa ti annan lafwa dan li, i evidan ki bann profesè ti pe ganny akonplir. Izai ti predir ki bann dimoun ti pou aveg e zot leker ti pou dir. Zot pa ti pou repantir e ganny geri. (Izai 6:10; Zan 12:40) Parey nou’n vwar, laplipar bann Zwif i antete e zot rezet levidans ki Zezi i sa Enn ki’n ganny promet pour delivre zot e donn zot lavi.

Nikodenm, Zozef sorti Arimate ek plizyer lezot sef i “konmans annan lafwa” dan Zezi. Me eski zot pou demontre zot lafwa oubyen kasyet zot lafwa, swa aköz zot per ki zot pou

ganny pouse dan sinagog oubyen akoz zot “kontan laglwar zonn?”—Zan 12:42, 43.

Zezi li menm i eksplike ki savedir met lafwa dan li, i dir: “Sa ki annan lafwa dan mwan, i annan lafwa pa zis dan mwan, me osi dan sa enn ki’n anvoy mwan. Sa ki vwar mwan, i osi vwar sa Enn ki’n anvoy mwan.” Sa laverite ki Bondye in demann Zezi pour ansennyen e ki Zezi i ankor pe anonse, i sitan enportan ki Zezi i kapab dir: “Sa ki rezet mwan e ki pa aksepté mon

parol, i annan enn ki pou ziz li. Se mon parol ki pou ziz li deryen zour.”—Zan 12:44, 45, 48.

Zezi i fini par dir: “Mon pa’n koz lo mwan menm, me mon Papa ki’n anvoy mwan ki’n donn mwan lord lo ki pour dir e koz lo la. Mon konnen ki son lord i donn lavi eternel.” (Zan 12:49, 50) Zezi i konnen ki byento i pou vers son prop disan konman en sakrifis pour bann imen ki demontre lafwa dan li.—Romen 5:8, 9.



- ◇ Kan Zezi ti lo later, ki sa trwa fwa ki dimoun ti tann lavwa Bondye?
- ◇ Lekel bann sef ki ti konmans annan lafwa dan Zezi, me petet akoz zot pa ti montre sa an piblik?
- ◇ Lo ki baz bann dimoun pou ganny zize “deryen zour”?

# ZEZI I SERVI EN PYE FIG POUR ANSENNY EN LESON KONSERNAN LAFWA

MATYE 21:19-27 MARK 11:19-33 LIK 20:1-8

Zezi i kit Zerizalenm Lendi apremidi e retourn Betani ki lo kote les Montanny Pye Zoliv. I tre probab ki i pas lanwit kot lakour son bann zanmi Lazar, Mari ek Mart.

Aprezan i bomaten le 11 Nizan. Zezi ek son bann disip i lo semen ankor enn fwa. Zot pe retourn Zerizalenm kot Zezi pou al kot tanp pour dernyen fwa. Deplis, i osi dernyen zour son minister an piblik avan ki i selebre Lapak, entrodwir Memoryal son lanmor e apre ganny zize e met amor.

Ler zot lo Montanny Pye Zoliv sorti Betani pour al Zerizalenm, Pyer i remark sa pye fig ki Zezi ti modi son lavey. I dir: “Ansenyan, gete! sa pye fig ki ou ti modi in sek.”—Mark 11:21.

Me akoz Zezi ti fer sa pye fig sek? Nou vwar larepons dan sa ki i dir: “Laverite mon dir zot, si zot annan lafwa e zot pa doute, zot pou kapab fer sa ki mon’n fer avek sa pye fig, me pa zis sa, menm si zot dir avek sa montanny, ‘Bouze e al dan lanmer,’ sa pou arive. Si zot annan lafwa, tou sa ki zot demande dan lapriyer, zot pou gannyen.” (Matye 21:21, 22) Ankor en fwa Zezi i koz lo sa pwen ki i’n deza masyonnen avan, si en dimoun i annan lafwa i kapab bouz en montanny.—Matye 17:20.

Alor, ler Zezi in fer sa pye fig sek, sa in montre son bann disip lenportans pour annan lafwa dan Bondye. I dir: “Tou sa ki zot priy lo la e demande, annan lafwa ki zot in fini ganny li e zot pou ganny li.” (Mark 11:24) Sa i en leson enportan pour tou bann disip Zezi! I sirtou enportan pour bann zapot akoz zot pe al pas atraver bann leprev vremen difisil. Me i annan ankor en lot leson pour aprann konsernan nou lafwa atraver sa pye fig ki’n sek.

Nasyon Izrael i parey sa pye fig. Bann dimoun dan sa nasyon in fer en lalyans avek Bondye e i posib ki zot donn lenpresyon ki zot pe swiv son Lalwa. Me an realite, sa pa vre. Akoz an zeneral, sa nasyon in montre ki zot mank lafwa e zot pa prodwi bann bon fri. Zot menm rezet Garson Bondye li menm! Alor, ler Zezi in fer sa pye fig ki pa ti raport fri vin sek, i’n montre sa ki pou arive avek sa nasyon ki mank lafwa e ki pa prodwi fri.

Pa bokou letan apre, Zezi ek son bann disip i ariv Zerizalenm. Parey son labitid, Zezi i al kot tanp e konmans ansennyen. Kekfwa bann sef pret ek ansyen i ankor pe mazin sa ki Zezi ti fer son lavey ler i ti pous bann ki sanz larzan. Alor zot demann li: “Ou annan drwa fer sa bann keksoz? Lekel ki’n donn ou sa drwa?”—Mark 11:28.

Zezi i reponn: “Mon pou demann zot en kes-tyon. Reponn mwan e mon ava dir zot lekel ki’n donn mwan sa drwa pour fer sa bann keksoz. Lekel ki ti donn Zan drwa pour batiz dimoun, Bondye oubyen zonm? Reponn mwan.” La aprezan zot ki bezwen reponn kes-tyon. Bann pret ek ansyen i konmans diskite antre zot lo ki mannyer zot pou reponn: “Si nou dir ‘Bondye,’ i pou dir, ‘Be, akoz zot pa ti krwar li?’ Me eski nou pou kapab dir, ‘Zonm?’” Zot mazin koumsa akoz zot per lafoul, “akoz [sa lafoul] ti vremen konsider Zan konman en profet.”—Mark 11:29-32.

Bann ki pe opoz Zezi napa en bon larepons, alor zot dir: “Nou pa konnen.” Zezi i reponn: “Mwan osi mon pa pe dir zot lekel ki’n donn mwan drwa fer sa bann keksoz.”—Mark 11:33.





- ◇ Akoz le 11 Nizan ti enportan?
- ◇ Ki leson Zezi ti ansennyen konsernan sa pye fig ki'n sek?
- ◇ Ki mannyer Zezi ti reponn bann ki ti demande lekel ki'n donn li drwa fer sa bann keksoz?

# DE LEGZANP LO PLANTASYON REZEN

MATYE 21:28-46 MARK 12:1-12 LIK 20:9-19

Kot tanp, Zezi fek reponn bann sef pret ek anyen ki'n demann li lekel ki donn li drwa fer sa bann keksoz. Larepons Zezi i fer zot reste tran-kil. Apre sa, i donn en legzanp ki montre ki ka-lite dimoun zot vreman ete.

Zezi i rakonte: "En zom ti annan de garson. I ti dir sa enn premye, 'Mon garson, al travay dan plantasyon rezen ozordi.' I ti reponn, 'Mon pa pou ale,' me apre, i ti regrete e i ti ale. I ti dir son dezyenm garson menm zafer. I ti reponn son papa, 'Wi, mon pou ale,' me i pa ti ale. Lekel ant sa de ki'n fer lavolonte son papa?" (Matye 21:28-31) Larepons i kler, sa premye garson i sa enn ki'n finalman fer lavolonte son papa.

Alor Zezi i dir bann ki opoz li: "Laverite mon dir zot, bann kolekter taks ek bann prostitye pe antre dan Rwayonm Bondye avan zot." Bann kolekter taks ek bann prostitye pa ti servi Bondye o konmansman. Par kont, parey sa premye garson, pli tar zot in repantir e apre-zan zot pe servi li. De lot kote, bann sef reli-zye i parey sa dezyenm garson, zot dir ki zot pe servi Bondye me ki an realite zot pa pe fer li. Zezi i dir: "Zan [ki batize] ti vin kot zot pour montre zot sa ki drwat, me zot zot pa ti krwar li. Par kont, bann kolekter taks ek bann prostitye ti krwar li e kantmenm zot zot ti vwar sa, zot pa ti regrete e krwar li."—Matye 21:31, 32.

Zezi i donn en lot legzanp. Safwasi, Zezi i montre ki bann sef relizye pa pe zis neglig zot ladorasyon pour Bondye, me zot pe osi fer bann move keksoz. Zezi i dir: "En zom ti plant en plantasyon rezen e i ti met en baraz toul-tour, i ti fouy en trou pour fer en preswar di-ven e i ti konstri en latour, apre i ti lwe li avek

bann fermye e i ti al aletranze. Pandan sezon rekolt, i ti anvoy en lesklav kot bann fermye pour ganny son par fri dan sa plantasyon rezen. Me zot ti tyonbo li, bat li e fer li retourn lanmen vid. I ti anvoy en lot lesklav kot zot e zot ti tap li lo son latet e maltret li. I ti anvoy en lot ankor e sa enn zot ti touye. I ti anvoy bokou lezot ankor, serten zot ti bate e serten zot ti touye."—Mark 12:1-5.

Eski bann ki pe ekout Zezi pou konpran sa legzanp? I posib ki zot rapel sa ki Izai ti dir: "Plantasyon rezen Zeova bann larme i pep Izrael. Bann dimoun sorti Zida i sa plantasyon ki i ti kontan. I ti kontinyen annan lespwar ki i ti pou annan lazistis me gete, i ti annan len-zistis." (Izai 5:7) Sa legzanp ki Zezi in donner i en pe parey. Propriyeter sa plantasyon rezen i Zeova. Sa plantasyon i reprezant nasyon Izrael ki ganny proteze par Lalwa Bondye ki parey en baraz. Zeova ti anvoy bann profet pour ens-tri son pep e ed zot prodwi bann bon fri.

Par kont, "bann fermye" i maltret e touy bann "lesklav" ki ti ganny anvoye kot zot. Zezi i eksplike: "I ti reste [propriyeter sa plantasyon rezen] zis son garson, sa enn ki i ti kontan. I ti anvoy li dernyen akoz i ti mazine: 'Zot pou respekte mon garson.' Me sa bann fermye ti dir antre zot, 'La zeritye. Vini, annou touy li e son leritaz i ava vin pour nou.' Alor zot ti tyon-bo li [e] touy li."—Mark 12:6-8.

Aprezan Zezi i demande: "Ki propriyeter sa plantasyon pou fer?" (Mark 12:9) Bann sef relizye i reponn: "Parski zot move, i pou anmenn en destriksyon lo zot e i pou lwe sa plantasyon avek lezot fermye, ki pou donn li son par fri ler sezon rekolt i vini."—Matye 21:41.





Alor, san realize zot pas zizman lo zot lekor, akoz zot menm sa “bann fermye” ki Zeova in mete pour travay dan son “plantasyon rezen,” setadir nasyon Izrael. Raport fri ti vedir annan lafwa dan Mesi oubyen Garson Bondye. Zezi i get bann sef relizye dan zot figir e dir: “Eski zot pa’n deza lir sa dan lekritir: ‘Sa ros ki bann konstrikter ti rezete in vin ros prensipal. Sa ros i sorti kot Zeova e i en keksoz merveye dan nou lizye?’” (Mark 12:10, 11) Apre Zezi i dir zot

fransman: “Pour sa rezon mon dir zot, Rwayonm Bondye pou ganny pran avek zot e i pou ganny donner avek en nasyon ki raport fri.” —Matye 21:43.

Bann profeser lalwa ek sef pret i konnen ki Zezi “ti pe koz lo zot ler i ti pe donn sa legzanp.” (Lik 20:19) Alor, sa i fer zot pli determinen pour touy sa vre “zeritye.” Me zot per lafoul ki konsider Zezi konman en profet, alor zot pa esey touy li lanmenm la.

- ◇ Ki sa de garson dan legzanp Zezi i reprezante?
- ◇ Dan sa dezyenm legzanp, lekel ki ganny reprezante par sa “propriyeter plantasyon,” sa “plantasyon rezen,” “bann fermye,” bann “lesklav” ek sa “zeritye”?
- ◇ Ki pou arive avek sa “bann fermye” a lavenir?



# EN LERWA I ENVIT DIMOUN EN RESEPSYON MARYAZ

MATYE 22:1-14

Zezi i pros pour fini son minister, me i kontinyen servi legzanp pour montre ki kalite dimoun bann profeser lalwa ek sef pret i ete. I pour sa rezon ki zot anvui touy li. (Lik 20:19) Me Zezi pa ankor fini avek zot. I donn zot en lot legzanp:

“Rwayonm lesyel i kapab ganny konpare avek en lerwa ki ti fer en resepsyon maryaz pour son garson. I ti anvoy son bann lesklav pour kriy bann ki ti’n ganny envite pour sa resepsyon maryaz, me zot pa ti oule vini.” (Matye 22:2, 3) Zezi i konmans son legzanp par koz lo “Rwayonm lesyel.” I fer sans alor ki sa “lerwa” i reprezant Zeova. Me lekel garson sa lerwa ek bann ki’n ganny envite sa resepsyon maryaz? Ankor enn fwa, i pa difisil pour vwar ki garson sa lerwa i Garson Zeova, ki la avek zot pe donn sa legzanp. Nou osi konpran ki sa bann ki’n ganny envite i sa bann ki pou diriz ansanm avek Garson Bondye dan Rwayonm lesyel.

Lekel sa bann ki ganny envite premye? I sa

bann ki Zezi ek son bann zapot in pres avek konsernan Rwayonm Bondye, setadir bann Zwif. (Matye 10:6, 7; 15:24) Sa nasyon ti aksepté lalyans Lalwa an 1513 avan Kris, alor zot ti premye pour ganny sa loportinite pour vin “en rwayonm pret.” (Egzod 19:5-8) Me kan zot ti ganny envite pour vin “sa resepsyon maryaz”? I fer sans pour dir ki sa lenvitasyon ti ganny donnen lannen 29, ler Zezi ti konmans pres lo Rwayonm lesyel.

Me ki mannyer laplipar Izraelit in konsider sa lenvitasyon? Parey Zezi ti dir, “zot pa ti oule vini.” Laplipar sef relizye ek lepep pa ti aksepté Zezi konman Mesi e sa Lerwa ki Bondye in swazir.

Me Zezi i montre ki bann Zwif ti pou ganny en lot loportinite: “Ankor enn fwa, [lerwa] ti anvoy lezot lesklav e dir zot, ‘Dir bann envite: “Ekoute! Mon’n prepar manze, mon bann toro ek zannimo byen gra in ganny touye e tou keksoz in pare. Vin resepsyon maryaz.”’ Me zot



pa ti fatig zot avek sa e zot ti ale, sa enn dan son plantasyon, lot dan son biznes, me lezot ti tyonbo son bann lesklav, bat zot e touy zot.” (Matye 22:4-6) Sa i montre sa ki ti pou arive ler kongregasyon Kreyen i ganny etabli. Sa le-tan, bann Zwif ti ankor annan loportinite pour antre dan Rwayonm, me laplipar dimoun pa ti aksepte sa lenvitasyon e zot ti menm maltret ‘bann lesklav sa lerwa.’—Akt 4:13-18; 7:54, 58.

Ki pou arive avek sa nasyon? Zezi i dir: “Lerwa ti vreman ankoler, i ti anvoy son larme pour touy bann ki ti touy son bann lesklav e bril zot lavil.” (Matye 22:7) Sa ti arive lannen 70, ler bann Romen ti detri “zot lavil” setadir Zerizalenm.

Vi ki zot in refiz lenvitasyon lerwa, eski sa i verdir ki napa personn ankor ki pou ganny envite? Pa dapre legzanp Zezi. I dir: “Apré [lerwa] ti dir son bann lesklav, ‘Resepsyon maryaz in pare, me bann ki ti’n ganny envite pa ti merite vin sa resepsyon. Alor, al dan bann semen ki al

an deor lavil e envit nenport dimoun ki zot trouve pour vin resepsyon maryaz.’ Bann lesklav ti ale e envit tou sa ki zot ti vwar lo semen, dimoun bon konman move e lasal maryaz ti ranpli avek bann envite ki ti pe manze.”—Matye 22: 8-10.

Pli tar, zapot Pyer ti konmans ed bann dimoun lezot nasyon pour vin bann vre Kreyen, setadir bann ki pa ti Zwif oubyen konverti dan larelizyon Zwif. Lannen 36, en zofisyse larme Romen ki apel Korney ek son fanmir ti ganny les-pri sen e zot ti ganny sa loportinite pour ganny en plas dan Rwayonm lesyel parey Zezi ti’n dir.—Akt 10:1, 34-48.

Zezi i dir ki pa tou dimoun ki asiste sa resepsyon ki pou ganny laprouvasyon sa “lerwa.” I dir: “Kan lerwa ti vin vwar bann envite, i ti vwar en zonm ki pa ti’n met en resanz maryaz. Alor i ti dir li, ‘Sa msye, ki mannyer ou’n antre isi san en resanz maryaz?’ Sa zonm ti napa nanryen pour dir. Alor lerwa ti dir son bann serviter, ‘Anmar son lanmen ek son lipye e zet li deor dan fernwanr. Se laba kot i pou plere e grens son ledan aköz dezespwar.’ Parski bokou in ganny envite, me en ptigin ki ganny swazir.”—Matye 22:11-14.

Petet sa bann sef relizye ki pe ekout Zezi pa vreman konpran tou sa ki Zezi pe dir. Me kantmenm sa, zot pa kontan e zot determinen pour touy sa enn ki pe anbaras zot.

- 
- ♦ Dan legzanp Zezi, lekel sa “lerwa,” “son garson” e lekel sa bann ki ganny envite sa resepsyon maryaz premye?
  - ♦ Kan ki bann Zwif ti ganny sa lenvitasyon e lekel ki ti ganny envite pli tar?
  - ♦ Ki nou kapab konpran vi ki bokou in ganny envite me zis en ptigin ki’n ganny swazir?



## ZOT ESEY MET ZEZI DAN PYEZ

MATYE 22:15-40 MARK 12:13-34 LIK 20:20-40

Bann lennmi Zezi i ankoler avek li. I fek servi bann legzanp ki montre ki zot bann move dimoun. Aprezan, bann Farizyen i fer konplo pour esey met li dan pyez. Zot esey fer li dir en keksoz ki zot kapab servi kont li pour anmenn li kot gouverner Romen e zot pey serten zot bann dimoun pour fer sa.—Lik 6:7.

Zot dir: “Ansenyan, nou konnen ki ou koz e ansenny laverite, ou pa fer lapreferans me ou ansenny sa ki vre konsernan lavolonte Bondye: Dapre lalwa, eski i byen pour pey taks Sezar oubyen non?” (Lik 20:21, 22) Zezi pa les li ganny anbete par sa bann flatri akoz i konnen ki zot bann ipokrit ki pe esey trik li. Si i dir,

‘Non, i pa byen pour pey sa taks,’ zot kapab akiz li konmkwa i kont gouvernman Romen. Me si i dir, ‘Wi, pey sa taks,’ bann dimoun ki pa kontan dominasyon Romen i kapab mal konpran li e vir kont li. Alor ki mannyer Zezi i reponn?

I dir: “Ipokrit, akoz zot oule met mwan dan en pyez? Montre mwan sa pyes larzan ki zot pey taks avek.” Zot donn li en denye e i demann zot: “Figir ek tit lekel ki lo la?” Zot reponn: “Sezar.” Alor avek bokou lasazes, Zezi i donn zot lenstriksyon: “Rann sa ki pour Sezar avek Sezar, me sa ki pour Bondye avek Bondye.”—Matye 22:18-21.





Bann dimoun i etonnen ler zot tann sa. Vi ki zot napa nanryen pour dir, zot ale. Me lazournen pa ankor fini, zot pou esey trik li ankor. Menm si bann Farizyen pa'n reisi, bann sef en lot group relizye i vin kot Zezi.

Bann Sadiseen ki pa krwar dan rezireksyon i demann en kestyon konsernan rezireksyon ek maryaz bofrer. Zot demande: "Ansenyan, Moiz ti dir: 'Si en zonn i mor san zannfan, son frer i devret marye avek son madanm pour ki son frer ki'n mor i ganny en desandans.' Aprezan, i ti annan set frer isi parmi nou. Premye ti marye e i ti mor san okenn zannfan, son frer ti marye avek son madanm. Menm zafer ti ariv avek sa enn dezyenm, sa trwazyenm e avek tou le set. Finalman, sa madanm ti mor. Alor, ler zot pou resisite, i pou madanm lekel parmi sa set frer? Parski i ti madanm tou le set."—Matye 22: 24-28.

Bann Sadiseen i aksepte bann liv Moiz, alor Zezi i servi sa pour reponn zot. I dir: "Eski pa sanmenm sa rezon ki zot dan lerer, parski zot pa konn ni Lekritir ni pwisans Bondye? Parski ler dimoun pou resisite, bann zonn pa pou marye e bann madanm pa pou ganny donner an maryaz, me zot pou parey bann lanz dan lesyel. Me konsernan bann mor ki pou resisite, zot pa'n lir dan liv Moiz, dan sa resi lo sa brousay kot Bondye ti dir li: 'Mwan mon Bondye Abraam, mon Bondye Izaak ek Bondye Zakob?' I pa Bondye bann mor, me Bondye bann

vivan. Zot vreman dan lerer." (Mark 12:24-27; Egzod 3:1-6) Lafoul i etonnen ler zot tann sa larepons.

Zezi in fer bann Farizyen ek bann Sadiseen reste trankil. La aprezan zot zwenn ansanm pour esey teste li ankor. En profeser lalwa i demande: "Ansenyan, lekel sa komannman dan Lalwa ki pli enportan?"—Matye 22:36.

Zezi i reponn: "Premye se, 'Ekoute O Izrael, Zeova nou Bondye i en sel Zeova, ou devret kontan Zeova ou Bondye avek tou ou leker, avek tou ou nanm, avek tou ou lespri e avek tou ou lafors.' Dezyenm se, 'Ou devret kontan ou prosen parey ou kontan ou prop lekor.' Napa en lot komannman pli gran ki sa de."—Mark 12:29-31.

Ler sa profeser lalwa i tann son larepons, i dir: "Ansenyan, ou'n byen koze, i vre sa ki ou'n dir. 'Bondye i en sel e napa en lot apard ki li.' Kontan li avek tou ou leker, avek tou ou lente-lizans, avek tou ou lafors e kontan ou prosen parey ou kontan ou prop lekor i annan bokou plis valer ki tou lofrann brile ek sakrifis." Ler Zezi i remarke ki sa profeser lalwa in byen reponn, i dir li: "Ou pa lwen avek Rwayonm Bondye."—Mark 12:32-34.

I fer trwa zour (le 9, 10 ek 11 Nizan) depi ki Zezi pe ansennyen kot tanp. Serten, parey sa profeser lalwa in kontan pour ekout li. Me i pa le ka avek bann sef relizye e aprezan zot napa "kouraz pour demann li ankor okenn kestyon."

- 
- ◇ Ki manyer bann Farizyen ti esey trik Zezi me ki ti arive?
  - ◇ Ler bann Sadiseen ti esey trik Zezi, ki Zezi ti fer?
  - ◇ Ler Zezi ti pe reponn kestyon en profeser lalwa, kwa ki Zezi ti dir i vreman enportan?

## ZEZI I KONDANN BANN OPOZAN RELIZYE

MATYE 22:41-23:24 MARK 12:35-40 LIK 20:41-47

Bann sef relizye pa arive fer bann dimoun rezet Zezi. Zot pa kapab trik li pour zot livre li avek bann Romen. (Lik 20:20) La ler zot ancor kot tanp le 11 Nizan, Zezi i konmans demann zot bann kestasyon li osi e revel son vre lidanti-te. I pran linisyativ e demann zot: “Ki zot panse lo Kris? I Garson lekel li?” (Matye 22:42) Tou dimoun i konnen ki Kris, setadir Mesi, i sipoze en desandans David e sanmenm sa larepons ki zot donnen.—Matye 9:27; 12:23; Zan 7:42.

Zezi i demande: “Ki mannyer alor, David anba lenfliyans lespri sen, ti apel li Senyer ler i ti dir, ‘Zeova ti dir avek mon Senyer: “Asiz lo mon kote drwat ziska ki mon met ou bann lennmi anba ou lipye”?’ Alor, si David ti apel li Senyer, ki mannyer i kapab son garson?”—Matye 22:43-45.

Bann Farizyen i reste tranquil, akoz zot krwar ki i pou annan en desandans David ki pou liber zot anba dominasyon bann Romen. Me Zezi i servi parol David dan Psonm 110:1, 2 pour montre ki Mesi pa pou zis en dirizan imen. Li menm ki Senyer David e apre ki’n asiz lo kote drwat Bondye, i pou konmans dirize. Alor, personn pa kapab dir Zezi nanryen.

Son bann disip ek plizyer lezot pe ekout li. Aprezan Zezi i koz avek zot e averti zot konsernan bann profeser lalwa ek Farizyen. I dir zot ki sa bann zonm “in pran plas Moiz” pour ansenny Lalwa Bondye. Zezi i donn bann ki pe ekout li sa lenstriksyon: “Tou sa ki zot dir fer, fer e pratik li, me pa fer sa ki zot fer, parski zot dir me zot pa fer sa ki zot dir.”—Matye 23:2, 3.

Apre sa, Zezi i donn bann legzanp ki montre zot lipokrizi. I dir: “Zot agrandi bann filakter.” Serten Zwif ti met sa bann pti bwat ki zot ti met bann verse Lalwa ladan lo zot fron oubyen

zot lebra. Sa bann bwat i apel bann filakter. Bann Farizyen i fer zot filakter pli gro pour donn lenpresyon ki zot vremen kontan Lalwa. Deplis, zot “fer franz zot lenz pli long.” Dapre Lalwa, bann Izraelit ti bezwen fer bann franz lo zot lenz, me bann Farizyen i fer sir ki pour zot i byen long. (Nonm 15:38-40) Zot fer tousala “pour dimoun vwar zot.”—Matye 23:5.

Menm bann disip Zezi i kapab devlop sa dezir pour vin pli enportan, alor i donn zot sa konsej: “Pa les personn apel zot Ansenyan, parski i annan en sel Ansenyan e zot tou zot frer. Deplis, pa apel personn lo later papa parski zot annan en sel Papa, sa Enn ki dan lesyel. Osi pa apel personn sef, parski zot annan en sel Sef, Kris.” Alor ki mannyer bann disip i devret konsider zot lekor e konport zot? Zezi i dir: “Sa ki pli gran parmi zot i bezwen vin zot serviter. Sa ki oule ganny onore pou ganny abese e sa ki abes son lekor pou ganny onore.”—Matye 23:8-12.

Apre sa, Zezi i anons diferan maler lo bann profeser lalwa ek Farizyen ipokrit: “Maler lo zot, profeser lalwa ek Farizyen, ipokrit! akoz zot ferm baro Rwayonm lesyel dan figir dimoun, parski zot zot pa antre e zot anpes bann ki anvi antre pour antre.”—Matye 23:13.

Zezi i kondann bann Farizyen akoz zot pa pran an konsiderasyon sa ki pli enportan dapre pwennvi Zeova e sa i evidan dapre bann lareg ki zot fer. Par egzanp: “Si en dimoun i fer en serman par tanp, i pa oblize gard son parol, me si i fer serman par lor ki dan tanp, i oblize gard son parol.” Alor zot montre ki zot aveg spirityelman, akoz zot met plis lanfaz lo lor tanp ki lo lefet ki tanp i sa landrwa kot zot ador Zeova e kot zot kapab vin pros avek li. Zot



in osi “inyor bann pwen pli enportan dan Lalwa, tel ki lazistis, konpasyon ek fidelite.”—Matye 23:16, 23; Lik 11:42.

Zezi i dir sa bann Farizyen “bann gid aveg, zot paste zot bwar pour tir bigay me zot anval samo!” (Matye 23:24) Zot paste en bigay ki

dan zot diven aköz dapre Lalwa sa zensek i enpir. Par kont, fason ki zot inyor bann keksoz pli enportan dan Lalwa i konmsi zot pe anval en samo, ki li osi i en zannimo enpir dapre Lalwa me ki bokou pli gro ki en bigay.—Levitik 11:4, 21-24.

- 
- ◇ Ler Zezi ti kestyonn bann Farizyen konsernan sa ki David ti dir dan Psonm 110, aköz zot ti reste trankil?
  - ◇ Aköz bann Farizyen ti fer zot filakter pli gro e franz zot lenz pli long?
  - ◇ Ki konsey Zezi ti donn son bann disip?



# ZEZI I AL KOT TANP POUR EN DERNYEN FWA

MATYE 23:25–24:2 MARK 12:41–13:2 LIK 21:1-6

Zezi i dan tanp pour dernyen fwa e i kontinyen devwal lipokrizi bann profeser lalwa ek bann Farizyen. Devan tou dimoun, i dir ki zot bann ipokrit. I konpar zot avek sa legzanp: “Zot netway an deor lakoup ek lasyet, me anndan i ranpli avek vorasite ek mank kontrol lo zot prop dezir. Farizyen aveg, netway dan lakoup ek lasyet avan, koumsa an deor osi i a vin prop.” (Matye 23:25, 26) Bann Farizyen i fer byen atansyon ki zot swiv bann tradisyon konsernan lapropte ek laparans, me zot neglig sa dimoun ki zot ete anndan e zot pa pirifye zot leker senbolik.

Nou osi vwar zot lipokrizi akoz zot pare pour konstri e dekor bann latonm pour bann profet. Par kont, parey Zezi i mansyonnen, zot menm “zot garson sa bann ki ti touy bann profet.” (Matye 23:31) Sa i osi evidan akoz zot pe esey touy Zezi.—Zan 5:18; 7:1, 25.

Aprè sa, Zezi i fer resorti sa ki pou arive avek sa bann sef relizye si zot pa repantir: “Serpan, piti serpan, ki mannyer zot pou kapab sap zizman Zeenn?” (Matye 23:33) Zeenn oubyen Vale Inonm ki o bor lavil Zerizalenm i en landrwa ki ganny servi pour bril salte. Sa i en bon legzanp pour montre ki sa bann move profeser lalwa ek Farizyen pou konpletman ganny detrir.

Bann disip pou reprezant Zezi e zot pou vin “bann profet . . . , bann dimoun saz ek bann ansenyan ki ansenny an piblik.” Eski zot pou byen ganny resevwar? Zezi i dir bann sef relizye: “Serten sa bann dimoun, zot pou touye e klout lo poto e lezot ankò zot pou fwete dan zot sinagog e persekit zot dan en lavil apre lot. Alor, zot pou responsab pour disan bann dimoun drwat ki’n ganny verse lo later, depi disan Abel ziska disan Zekarya . . . ki zot ti touye.” I avèrti zot: “Laverite mon dir zot, tou sa

bann keksoz pou ariv lo sa zenerasyon.” (Matye 23:34-36) Sa ti pou arive lannen 70 ler lar-me Romen ti detri Zerizalenm e plizyer milye Zwif ti perdi lavi.

Ler Zezi i mazin destriksyon Zerizalenm, sa i fer li tris. I dir: “Zerizalenm, Zerizalenm, lavil ki’n touy bann profet e ki’n saboul avek ros bann ki’n ganny anvoye kot li, konbyen fwa mon ti anvi rasanble ou bann zanfan parey en mer poul i rasanble son bann piti anba son lezel! Me zot pa ti oule. Gete! Zot lakaz pou ganny abandonnen.” (Matye 23:37, 38) I bezwen ki bann ki pe ekout Zezi pe mazinen ki “lakaz” i pe koz lo la? Eski i pe koz lo sa zoli tanp Zerizalenm ki zot krwar Bondye pe proteze?

Aprè sa, Zezi i dir: “Mon dir zot, vreman zot pa pou vwar mwan ankò apartir ozordi ziska ki zot dir, ‘Beni sa enn ki vin o non Zeova!’” (Matye 23:39) Zezi pe sit sa profesè dan Psonm 118:26 (NWT) ki dir: “Beni sa enn ki pe vin o non Zeova! Nou beni zot dan lakaz Zeova.” I kler ki ler sa tanp Zerizalenm i ganny detrir, person pa pou al kot tanp o non Bondye.

Aprèzan Zezi i al dan en landrwa dan tanp kot i annan bann bwat kontribisyon. Sa bann bwat i dan laform en tronpet. Bann dimoun i kapab met zot kontribisyon dan sa pti trou anler. Zezi i vwar bann Zwif pe fer bann kontribisyon, bann ris “pe met bokou larzan.” Aprè sa, Zezi i vwar en pov vev ki met “de pti sou ki napa bokou valer.” (Mark 12:41, 42) San dout, Zezi i konnen ki Bondye i apresye son kado en kantite.

Zezi i kriy son bann disip e dir zot: “Laverite mon dir zot ki sa pov vev in met plis ki tou lezot dimoun ki ti met larzan dan bwat kontribisyon.” Ki mannyer sa? I eksplike: “Zot tou zot

in met sa ki zot ti annan an plis, me li, menm si i dan bezwen, i'n met tou sa ki i ti annan, tou sa ki i ti annan pour viv.” (Mark 12:43, 44) Pa fason panse sa vev e sa ki i fer i vreman dife-ran avek bann sef relizye!

Le 11 Nizan i preski fini, Zezi i kit tanp pour dernyen fwa. Enn son bann disip i dir: “Anse-nyan, pa sa bann batiman ek miray ros i vre-man zoli!” (Mark 13:1) Serten sa bann ros dan miray tanp i vreman gro e sa i donn lenpresyon

ki tanp i solid e dirab. Alor i bezwen paret vre-man drol ler Zezi i dir: “Zot vwar sa bann zoli batiman? Ni menm en ros lo en lot pa pou res-te, tou pou ganny zet ater.”—Mark 13:2.

Apre ki i'n dir sa bann keksoz, Zezi ek son bann zapot i al lot kote Vale Kidronn e zot mont ziska dan en landrwa lo Montanny Pye Zoliv. Fi-nalman, Zezi i avek kat son bann zapot, Pyer, Andre, Zak ek Zan. Kot zot ete, zot kapab vwar sa zoli tanp anba.



- ◇ Ki Zezi ti fer pandan son dernyen vizit kot tanp?
- ◇ Ki Zezi ti dir ti pou arive avek tanp a lavenir?
- ◇ Akoz Zezi ti dir ki sa vev ti kontribye plis ki bann ris?



## BANN ZAPOT I DEMANN EN SINY

MATYE 24:3-51 MARK 13:3-37 LIK 21:7-38





I Mardi apremidi le 11 Nizan, lazournen i pros pour fini. Zezi in byen okipe sa dernyen detrwa zour e son letan lo later i pros pour fini. Pandan lazournen, i'n ansennyen dan tanp e aswar i'n al reste an deor lavil. En kantite dimoun in vreman enterese avek lansennyman Zezi e zot in "vin kot li granmaten pour ekout li kot tanp." (Lik 21:37, 38) La aprezan, Zezi pe asize avek kat son bann zapot lo Montanny Pye Zoliv. I avek Pyer, Andre, Zak ek Zan.

Sa kat zapot in vin kot li an prive. Zot enkyet konsernan tanp akoz Zezi fek predir ki ni menm en ros lo en lot pa pou reste. Me zot pa pe mazin zis sa. Pli boner Zezi ti'n donn zot sa lankourazman: "Met zot pare parski Garson zonm pe vin en ler ki zot pa pe ekspekte." (Lik 12:40) I ti'n osi koz konsernan sa "zour ki Garson zonm pou ganny revele." (Lik 17:30) Eski tousala i annan pour fer avek sa ki Zezi fek dir konsernan tanp? Bann zapot i vreman anvi konn plis. Alor zot dir: "Dir nou, kan tou sa bann keksoz pou arive e ki siny ki pou montre ki ou la e ki lafen sa lemond i pros pour arive?"—Matye 24:3.

Petet zot pe mazin destriksyon sa tanp ki la devan zot. Zot osi demann kekyon konsernan ler Garson zonm pou la. I kapab ki zot rapel ki Zezi ti donn en legzanp konsernan "en zonm ki ti ne dan en fanmir rwayal" ki ti "al dan en pei byen lwen pour li vin lerwa e apre retournen." (Lik 19:11, 12) Finalman, zot osi anvi konnen ki "lafen sa lemond" pou enplike.

Dan son larepons, Zezi i donn zot en kantite lenformasyon. I donn zot en siny ki montre kan sistenm Zwif pou terminen e kan tanp pou ganny detrir. Me larepons Zezi i enplik plis ki sa. Sa siny pou osi ed bann Kretyen dan nou lepok pour konnen ki zot pe viv pandan letan 'ki Zezi i la' (prezans Zezi) e ki lafen sa lemond i pros.

Diran bann lannen ki pase, bann zapot i vwar profesi Zezi pe ganny akonplir. En kantite keksoz ki Zezi ti'n predir i arive pandan ki zot ancor vivan. Alor, 37 an pli tar, lannen 70, bann Kretyen ki pe kontinyen veye in prepare e pare pour destriksyon sistenm Zwif ek son tanp. Par kont, pa tou sa ki Zezi ti predir ki arive diran sa bann lannen avan e pandan lannen 70. Alor, kwa ancor ki pou montre ki Zezi i la pe dirize dan Rwayonm? La sa ki Zezi i dir bann zapot.

Zezi i predir ki i pou annan "lager kot zot reste e dan diferan landrwa" e ki "nasyon pou lager kont nasyon e rwayonm kont rwayonm." (Matye 24:6, 7) I osi dir ki i "pou annan bann gran tranblemandter, i pou annan mankman manze ek lepidemi." (Lik 21:11) Zezi i averti son bann disip: "Dimoun pou aret zot e persekit zot." (Lik 21:12) I pou annan bann fo profet e zot pou anbet en kantite dimoun. I pou annan en kantite pese e lanmour lamazortite dimoun pou diminyen. An plis, i dir ki "sa bon nouvel Rwayonm pou ganny anonse partou lo later pour donn en temwanyaz avek

- 
- ◇ Kwa ki ti pous bann zapot pour demann bann kekyon konsernan sa ki pou arive a lavenir? Kwa ancor ki zot ti kapab annan antet?
  - ◇ Kan ki profesi Zezi ti konmans ganny akonplir e ki mannyer?
  - ◇ Kwa ki ti pou montre ki Kris i la konman Lerwa dan lesyel?

tou nasyon e apre sa, lafen pou arive.”—Matye 24:14.

Menm si i annan serten laspe dan profesè Zezi ki ganny akonplir avan e pandan ki bann Romen i detri Zerizalenm, eski i posib ki Zezi pe koz lo en pli gran lakonplisman ki pou arive pli tar? Eski ou vwar levidans ki sa profesè enportan ki Zezi ti donnen pe ganny son pli gran lakonplisman dan nou letan?

Zezi i osi koz lo “sa keksoz degoutan ki anmenn destriksyon” ki pou aparet ler i pou la konman Lerwa dan lesyel. (Matye 24:15) Lannen 66, sa keksoz degoutan ti aparet ler “bann kan larme” Romen avek zot bann zidol ek paviyon ti antour Zerizalenm e konmans kas son miray. (Lik 21:20) Alor sa letan, “sa keksoz degoutan” ti la kot i pa devret ete, setadir kot tanp, sa landrwa ki bann Zwif ti konsider konman “sen.”

Zezi i osi predir: “I pou annan en gran ladetres, enn ki pa’n zanmen arive depi konmansman lemond ziska prezan e i pa pou zanmen ariv ankor.” Lannen 70, bann Romen ti detri Zerizalenm. Ler ‘lavil sen’ bann Zwif ek son tanp i ganny konkerir e detrir, plizyer milye Zwif i ganny touye. Sa i en gran ladetres pour zot. (Matye 4:5; 24:21) Sa i pli gran destriksyon ki sa lavil ek pep Zwif in deza eksperyanse e i met en lafen avek sistenm Zwif ek zot la-dorasyon ki ti ganny organize Zerizalenm pour plizyer santenn lannen. Alor, nou kapab asire ki pli gran lakonplisman parol Zezi pou vremen terib.

#### ANNAN KONFYANS PANDAN LETAN LAFEN

Zezi pa ankor fini koz avek son bann zapot konsernan sa siny ki pou montre ki i la pe dirize dan Rwayonm e ki lafen sa lemond i pros. Aprezan i averti son bann disip konsernan bann “fo Kris ek bann fo profet.” I dir

ki serten pou esey “anbet dimoun, si posib, menm bann ki’n ganny swazir.” (Matye 24:24) Me sa bann ki’n ganny swazir pa pou ganny anbete. Bann dimoun pou kapab vwar bann fo Kris me dimoun pa pou vwar Zezi ler i la pe dirize dan Rwayonm akoz i pou envizib.

Zezi i koz lo en pli gran ladetres ki pou arive ler lafen sa lemond i konmans. I dir: “Soley pou vin sonm, lalin pa pou klere, bann zewal pou tonbe sorti dan lesyel e bann lafors dan lesyel pou ganny sekwe.” (Matye 24:29) Ler bann zapot i tann sa deskripsyon efreyan, zot pa konnen kwa egzakteman ki pou arive, me i pou vremen enkrwayab.

Ki mannyer sa bann levennman soka pou afekte limanite? Zezi i dir: “Dimoun pou tonm feb akoz lafreyer ek lenkyetid pour sa ki pe al arive lo later, parski bann lafors dan lesyel pou ganny sekwe.” (Lik 21:26) Zezi pe dekrir sa moman pli terib ki pou arive lo later.

Zezi i ankouraz son bann zapot par dir ki pa tou dimoun ki pou dan sagrinasyon ler ‘Garson zonn i vini avek gran laglwar ek pwisans.’ (Matye 24:30) Zezi ti’n deza dir ki Bondye ti pou entervenir “akoz bann ki’n ganny swazir.” (Matye 24:22) Alor ki sa bann disip fidel i devret fer konsernan sa bann keksoz ki Zezi pe dir? Zezi i ankouraz son bann disip: “Ler sa bann keksoz pou konmans arive, debout drwat e lev zot latet akoz zot delivrans pe aproz.”—Lik 21:28.

Me ki mannyer bann disip Zezi ki viv pandan sa letan pou kapab konnen ki lafen i pros? Zezi i donn en legzanp konsernan en pye fig: “Desito ki son bann pti brans i vin tann e bourzonnen, zot konnen ki lete i pros. Pareyman zot osi, ler zot vwar sa bann keksoz pe arive, konnen ki i la devan laport. Laverite mon dir zot, sa zenerasyon pa pou disparet avan ki tou sa bann keksoz i sirman arive.”—Matye 24:32-34.

Alor, ler bann disip i vwar bann diferan laspe sa siny pe ganny akonplir, zot devret realize ki lafen i pros. Zezi i averti son bann disip ki pou viv pandan sa moman terib. I dir:

“Konsernan sa zour ek sa ler, personn pa konnen kan i pou arive, ni bann lanz dan lesyel, ni Garson, me zis Papa tousel ki konnen. Parski ler Garson zonn pou la, i pou parey dan letan Noe. Parski parey dan letan avan Deliz, dimoun ti pe manze e bwar, bann zonn ti pe marye e bann madanm ti pe ganny donner an maryaz, ziska zour ki Noe ti antre dan lars e zot pa ti pran kont nanryen ziska ki Deliz ti vini e balye zot tou. I pou parey ler Garson zonn pou la.” (Matye 24:36-39) Zezi i konpar letan lafen avek Deliz dan lepok Noe ki ti annan en lefe lo later antye.

I bezwen ki bann zapot ki lo Montanny Pye Zoliv i konpran ki zot bezwen reste eveye. Zezi i dir: “Fer byen atansyon pour ki zot pa vin lour akoz manze e bwar tro bokou, akoz traka lavi e ki en sel kou sa zour i ariv lo zot parey en pyez. Parski sa pou ariv lo tou zabitan later. Alor, reste eveye, toultan sipliy Bondye pour ki zot a kapab sap tou sa bann keksoz ki devret arive e debout devan Garson zonn.”—Lik 21:34-36.

Ankor enn fwa, Zezi pe montre ki sa ki i pe predir pou annan en pli gran lakonplisman. I pa pe predir konsernan bann levennman ki ti pou zis arive dan 30 oubyen 40 an e ki ti pou

afekte zis Zerizalenm oubyen sa nasyon Zwif. O kontrè, i pe koz lo bann keksoz ki ti “pou ariv lo tou zabitan later.”

I dir ki son bann disip pou bezwen reste eveye e met zot pare. Zezi i servi en lot legzanp pour met lanfaz lo sa lavertisman: “Mazin sa: Si en met lakour ti’n konnen ki ler voler ti pe vini dan lannwit, i ti pou’n reste eveye e i pa ti pou les voler kas son lakaz. Pareyman, zot osi fer sir zot in pare, parski Garson zonn pe vini en ler ki zot pa pe ekspekte.”—Matye 24:43, 44.

Aprè sa, Zezi i donn son bann disip rezon akoz zot devret reste pozitif. I asir zot ki ler sa bann profesi pe ganny akonplir, i pou annan en “lesklav” ki pou reste eveye e aktif. Zezi i servi en legzanp ki fasil pour bann zapot mazin: “Lekel vreman sa lesklav fidel e pridan ki son met in met li ansarz son bann serviter pour donn zot manze dan sa moman apropiye? Ere sa lesklav si ler son met i vini i vwar li pe fer son louvraz! Laverite mon dir zot, i pou met li ansarz tou son byen.” Me si sa “lesklav” i devlop en move latitud e maltret lezot, sa met pou “pini li severman.”—Matye 24:45-51; konpar Lik 12:45, 46.

Par kont, Zezi pa pe dir ki en group son bann disip pou devlop en move latitud. Alor ki leson Zezi pe ansenny son bann disip? I anvii ki zot reste eveye e aktif. I fer sa pwenn resor-ti dan en lot legzanp.

- 
- ◇ Ki mannyer en “keksoz degoutan” ti aparet e ki i ti arive apre sa?
  - ◇ Ki mannyer bann dimoun pou reazir ler zot vwar profesi Zezi ganny akonplir?
  - ◇ Ki legzanp Zezi ti donn son bann disip pour ed zot vwar ki lafen i pros?
  - ◇ Kwa ki montre ki profesi Zezi pou annan en lakonplisman lo later antye?
  - ◇ Ki lavertisman Zezi ti donn son bann disip ki pe viv pandan letan lafen sa lemonn?



## LEGZANP BANN VYERZ I MONTRE KI I ENPORTAN POUR KONTINYEN VEYE

MATYE 25:1-13

Zezi i lo Montanny Pye Zoliv pe reponn kesyon son bann zapot konsernan sa siny ki pou montre ki i la konman lerwa e ki lafen sa lemonn i pros. Avek sa antet, Zezi i servi en lot legzanp pour averti zot. Bann dimoun ki pou viv ler Zezi i la konman lerwa pou vwar sa arive.

I konmans son legzanp par dir: “Rwayonm lesyel i kapab ganny konpare avek dis vyerz ki ti pran zot lalanp e al zwenn nouvo marye. Senk zot ti bet e senk ti pridan.”—Matye 25: 1, 2.

Zezi pa pe dir ki lanmwatye son bann disip ki pou al dan Rwayonm lesyel pou bet e ki

sa lot lanmwatye pou pridan. Anfet Zezi pe montre ki sak disip i kapab swazir pour kontinyen veye oubyen les li ganny distrer. Me Zezi napa okenn dout ki tou son bann servirer i kapab reste fidel e ganny benediksyon son Papa.

Dan sa legzanp, tou le dis vyerz i al zwenn sa nouvo marye e met zot pare pour al resepsyon maryaz. Ler nouvo marye i arive, bann vyerz pou kler semen avek zot lalanp. Sa pou onor li anmezir ki i anmenn nouvel marye kot sa lakaz ki’n ganny prepare pour li. Finalman, ki arive?

Zezi i eksplike: “Sa senk vyerz bet ti an-



menn zot lalanp, me zot pa ti anmenn delwil avek zot, tandis ki sa senk vyerz pridan ti anmenn zot boutey delwil ansanm avek zot lalanp. Vi ki nouvo marye ti pe tarde, zot tou zot ti konmans ansonmey e zot ti tonm dormi.” (Matye 25:3-5) Sa nouvo marye pa ariv sa ler ki zot ti ekspekte. I paret ki bann vyerz in bezwen esper en kantite letan akoz zot in tonm dormi. Petet bann zapot i rapel ki Zezi ti koz lo en zonn ki sorti dan en fanmir rwayal ki ti vwayaze e “*finalman* retournen apre ki i ti’n vin lerwa.”—Lik 19:11-15.

Dan son legzanp sa dis vyerz, Zezi i dekrir sa ki arive ler finalman nouvo marye i arive: “Dan milye lannwit en dimoun ti kriye: ‘Gete, la nouvo marye! Al zwenn li.’” (Matye 25:6) Eski bann vyerz in pare pe veze?

Zezi i dir: “Alor, tou bann vyerz ti leve e met pare zot lalanp. Bann vyerz bet ti dir avek bann vyerz pridan, ‘Donn nou en pe zot delwil parski nou lalanp i pros pour tennyen.’ Zot ti reponn: ‘Petet i pou napa ase pour nou e pour zot. Plito, al kot sa bann ki vann e aste en pe pour zot.’”—Matye 25:7-9.

Sa senk vyerz bet pa pe veze e zot pa’n pare pour ler nouvo marye i arive. Zot napa ase delwil pour zot lalanp e zot bezwen al

rode. Zezi i dir: “Ler zot ti pe al aste delwil, nouvo marye ti vini. Sa bann vyerz ki ti pare ti al avek li kot resepsyon maryaz e laport ti ganny fermen. Apre sa, sa senk lezot vyerz osi ti vini e zot ti dir, ‘Msye, Msye, ouver laport pour nou!’ Me i ti reponn, ‘Laverite mon dir zot, mon pa konn zot.’” (Matye 25:10-12) Pa i tris sa ki ariv bann vyerz bet akoz zot pa’n pare e zot pa’n kontinyen veze.

Bann zapot i kapab konpran ki sa nouvo marye i Zezi. I pa premye fwa ki i konpar li avek en nouvo marye. (Lik 5:34, 35) Lekel sa bann vyerz saz? Ler Zezi ti pe koz lo sa “pti troupo” ki ti pou al dan Rwayonn Bondye, i ti dir: “Met zot pare e gard zot lalanp alimen.” (Lik 12:32, 35) Dan sa legzanp bann vyerz, bann zapot i kapab konpran ki Zezi pe koz lo zot ek lezot disip ki form parti sa pti troupo. Ki Zezi pe sey dir atraver sa legzanp?

Zezi i klerman dir: “Alor, kontinyen veze akoz zot pa konn ni zour ni ler.”—Matye 25:13.

I kler ki Zezi pe averti son bann disip fidel ki ler i pou la konman Lerwa, zot pou bezwen “kontinyen veze.” Zezi pou vini e zot pou bezwen pare e kontinyen veze parey sa senk vyerz pridan pour ki zot pa perdi zot lespwar ek rekonpans.

- 
- ◇ Dan ki sans sa senk vyerz pridan ti diferan avek sa senk ki bet?
  - ◇ Lekel sa nouvo marye e lekel sa bann vyerz?
  - ◇ Ki lesan Zezi ti ansennyen avek legzanp sa dis vyerz?

# LEGZANP BANN TALAN I MONTRE KI I ENPORTAN POUR TRAVAY DIR

MATYE 25:14-30

Zezi i ankor avek son kat zapot lo Montanny Pye Zoliv e i donn zot en lot legzanp. Detrwa zour avan, ler i ti Zeriko, i ti donn legzanp bann min pour montre ki Rwayonm pou vin a lavenir. Sa legzanp ki Zezi i donnen i en pe parey e i form parti larepons sa kestyon konsernan ler i pou la e lafen sa lemonn. Sa legzanp i montre ki bann disip i bezwen travay dir avek sa ki Zezi in konfyte zot.

Zezi i konmans par dir: “I zis parey en zonn ki ti pe al en vwayaz aletranze ki ti apel son bann lesklav e i ti konfyte zot son byen.” (Matye 25:14) Vi ki Zezi ti’n fini konpar son lekor avek en zonn ki’n al dan en lot pei “pour li vin lerwa,” bann zapot i kapab fasilman vwar ki Zezi i sa “zonn” ki i pe koz lo la.—Lik 19:12.

Avan ki sa zonn dan sa legzanp i vwayaz aletranze, i donn son bann lesklav bann byen ki annan bokou valer. Pandan sa trwa-z-an edmi ki Zezi in pase dan son minister, i’n konsantre lo pres sa bon nouvel Rwayonm Bondye e i’n form son bann disip pour fer sa travay. La aprezan i pe ale e i annan konfyans ki zot pou kontinyen fer sa ki i’n montre zot.—Matye 10:7; Lik 10:1, 8, 9; konpar Zan 4:38; 14:12.

Dan sa legzanp, ki mannyer sa zonn i partaz son bann byen? Zezi i dir: “I ti donn enn senk talan, en lot i ti donn li de e en lot ankor i ti donn li enn. I ti donn sakenn dapre son abilite e i ti al aletranze.” (Matye 25:15) Ki sa bann lesklav pou fer avek sa ki i’n konfyte zot? Eski zot pou travay dir e servi larzan zot met pour ganny ankor plis larzan? Zezi i dir bann zapot:

“Deswit, sa enn ki ti’n ganny senk talan ti al fer biznes avek sa senk talan e i ti ganny senk an plis. Pareyman, sa enn ki ti’n ganny de ti ganny de ankor an plis. Me sa lesklav ki ti’n ganny zis enn ti ale, fouy en trou dan later e kasyet larzan son met.” (Matye 25:16-18) Ki pou arive ler sa met i retournen?

Zezi i dir: “Apre en bon pe letan, met sa bann lesklav ti retournen e demann zot pour rann kont avek li.” (Matye 25:19) Sa de premye ti fer tou sa ki zot kapab, “sakenn dapre son abilite.” Sa de lesklav ti serye, travay dir e zot ti ganny plis larzan avek sa ki zot ti’n ganny konfyte. Sa enn ki ti ganny senk talan ti double lakantite e sa enn ki ti ganny de talan osi ti fer parey. (Sa letan, en travayer ti pou bezwen travay pour apepre 19 an pour ganny zis en talan.) Sa met i donn menm felisitasyon tou le de lesklav, i dir: “Ou’n byen






fer, ou en lesklav ki bon e fidel! Ou'n fidel dan en ptigin, mon pou met ou ansarz bokou keksoz. Rezoui avek ou met.”—Matye 25:21.

Me keksoz i diferan avek sa lesklav ki ti ganny en talan. I dir: “Met, mon ti konnen ki ou en dimoun ki ekspekte bokou, ou rekolte kot ou pa'n senmen e ou anmas kot ou pa'n vannen. Alor, mon ti per, mon ti al kasyet ou talan anba later. La sa ki pour ou.” (Matye 25: 24, 25) I pa'n ni menm met sa larzan dan labank pour ganny en pe profi pour son met. Anfet, i'n fer son met perdi larzan.

I apropiye ki sa met i dir li ki i en “lesklav move e pares.” Sa ki sa move lesklav i annan i ganny pran e donner avek sa lesklav ki pare pour travay dir. Sa met i donn sa prensip: “Sa ki annan pou ganny plis ankor e i pou annan en kantite menm. Me sa ki napa, menm sa ptigin ki i annan pou ganny pran avek li.” —Matye 25:26, 29.

Bann disip Zezi i annan en kantite pour mazin lo la, menm an rapor avek sa legzanp. Zot kapab vwar ki sa ki Zezi in konfyete zot, setadir sa gran privez pour fer disip, i annan en gran valer. Deplis, Zezi i ekspekte ki zot travay dir pour byen servi sa privez. Zezi i konnen ki zot tou pa pou kapab fer menm kantite dan sa travay predikasyon ki i'n konfyete zot.



Parey sa legzanp i montre, sakenn i devret fer tou sa ki i kapab “dapre son abilite.” Par kont, sa pa vdir ki Zezi pou kontan si enn son bann disip i “pares” e i pa fer son mye pour promot lentere son Met.

Me nou kapab asire ki bann zapot i kontan ler Zezi i asir zot: “Sa ki annan pou ganny plis ankor!”

- 
- ◇ Dan legzanp bann talan, lekel sa met e lekel bann lesklav?
  - ◇ Ki leson Zezi i ansenny son bann disip?

# LER KRIS I VINI I POU ZIZ BANN MOUTON EK KABRI

MATYE 25:31-46

Lo Montanny Pye Zoliv, Zezi fek donn legzanp sa dis vyerz ek talan. Ki Zezi i dir ankor pour reponn kestyon bann zapot konsernan siny ki pou montre ki i la konman Lerwa ek lafen sa lemonn? I servi en dernyen legzanp lo bann mouton ek kabri.

Zezi i konmans par dir zot: “Ler Garson zonn i vini dan son laglwar avek tou bann lanz, alor i pou asiz lo son tronn glorye.” (Matye 25:31) Zezi i fer li kler ki i sa personnaz prensipal dan sa legzanp. Plizyer fwa, i ti’n dir ki li menm “Garson zonn.”—Matye 8:20; 9:6; 20:18, 28.

Kan sa legzanp pou ganny akonplir? I ler Zezi i “vini dan son laglwar” avek son bann lanz e asiz “lo son tronn glorye.” I ti’n deza koz lo “Garson zonn pe vini lo nyaz dan lesyel avek gran laglwar ek pwisans” e avek son bann lanz. Kan sa pou arive? “Deswit apre sa letan la-detres.” (Matye 24:29-31; Mark 13:26, 27; Lik 21:27) Alor sa legzanp pou ganny akonplir a lavenir ler Zezi i vini dan son laglwar. Ki i pou fer apre?

Zezi i eksplike: “Ler Garson zonn i vini . . . , tou nasyon pou ganny rasanble devan li e i pou separ zot avek kanmarad, parey en berze i separ mouton ek kabri. I pou met mouton lo son kote drwat me kabri lo son kote gos.”—Matye 25:31-33.

Zezi i met bann mouton dan son kote drwat ki montre ki zot annan son laprouvasyon. I dir zot: “Apre sa, Lerwa pou dir sa bann ki lo son kote drwat: ‘Zot ki mon Papa in beni, vini e zot a ganny donnen sa Rwayonn ki’n ganny prepare pour zot depi o konmansman lemonn.’” (Matye 25:34) Akoz bann mouton i ganny laprouvasyon Lerwa?



Lerwa i eksplike: “Mon ti lafen e zot ti donn mwan en keksoz pour manze, mon ti swaf e zot ti donn mwan en keksoz pour bwar. Mon ti en etranze e zot ti byen resevwar mwan. Mon ti touni e zot ti donn mwan lenz. Mon ti tonm malad e zot ti okip mwan. Mon ti dan prizon e zot ti vizit mwan.” Ler sa bann mouton, setadir “bann ki drwat,” i demande dan ki sans zot in fer sa bann bon keksoz, i dir zot: “Ler zot ti fer sa pour enn ki pli pti parmi mon bann frer, se pour mwan ki zot ti fer li.” (Matye 25:35, 36, 40, 46) Zot pa fer sa bann bon keksoz dan lesyel, parski napa dimoun malad oubyen lafen dan lesyel. Sa i bezwen bann keksoz ki ganny fer pour bann frer Kris lo later.

Ki arive avek bann kabri ki ganny mete lo son kote gos? Zezi i dir: “Apre sa, [sa Lerwa] pou dir sa bann ki lo son kote gos: ‘Zot ki’n ganny modi, sorti la o bor mwan e al dan sa dife eternal ki’n ganny prepare pour Dyab ek son bann lanz. Parski mon ti lafen, me zot pa ti donn mwan nanryen pour manze e mon ti swaf me zot pa ti donn mwan nanryen pour bwar. Mon ti en etranze, me zot pa ti byen resevwar mwan e mon ti touni, me zot pa ti donn mwan lenz. Mon ti malad e dan prizon, me zot pa ti okip mwan.’” (Matye 25:41-43) Zot merit sa zizman parski sa bann kabri pa’n tret bann frer Kris ki lo later avek labonte parey zot ti sipoze.



Bann zapot i aprann ki sa zizman ki pou ganny fer a lavenir pou permanan e eternal. Zezi i dir zot: “Apre [Lerwa] pou [dir] zot: ‘Laverite mon dir zot, ler zot pa ti fer sa pour enn ki pli pti parmi mon bann frer, se pour mwan ki zot pa ti fer li.’ Alor, sa bann pou ganny lanmor eternal, me bann ki drwat pou ganny lavi eternal.”—Matye 25:45, 46.

Sa larepons ki Zezi in donn son bann zapot i fer son bann disip reflexir en kantite e sa i ed zot egzamin zot latitid ek aksyon.

- 
- ◇ Dan legzanp mouton ek kabri, lekel sa “Lerwa” e kan sa legzanp i ganny akonplir?
  - ◇ Akoz bann mouton i ganny laprouvasyon Zezi ler zot ganny zize?
  - ◇ Lo ki baz serten dimoun i ganny zize konman kabri? Ki pou arive avek bann mouton ek kabri a lavenir?



## DERNYEN LAFET LAPAK KI ZEZI I SELEBRE I APROSE

MATYE 26:1-5, 14-19 MARK 14:1, 2, 10-16 LIK 22:1-13

Zezi in fini ansenny son kat zapot lo Montanny Pye Zoliv. I'n reponn zot kestyon konsernan ler i pou la konman Lerwa e lo lafen sa lemonn.

En kantite keksoz in arive sa zour le 11 Nizan! Petet i ler zot pe retourn Betani pour pas lannwit ki Zezi i dir son bann zapot: "Zot konnen ki ankor dan de zour i pou annan lafet Lapak e Garson zonn pou ganny livre pour li ganny met amor lo en pototo."—Matye 26:2.

I paret ki Zezi i pas son lannmen, setadir Merkredi, trankil avek son bann zapot. Son Mardi, i ti'n reprimann bann sef relizye e kondann zot an piblik. Vi ki zot pe rod touy li, i pa al an piblik le 12 Nizan pour ki nanryen pa anpes li selebre Lapak avek son bann zapot apre soley kouse son lannmen, ler le 14 Nizan i konmanse.

Me bann sef pret ek ansyen pa pe reste trankil avan Lapak. Zot rasanble dan lakour lakaz Granpret Kaif. Akoz? Zot ankoler akoz Zezi in kondann zot. Aprezan, zot fer konplo pour rod en mwayen "pour tyonbo Zezi e touy li." Kan e ki mannyer zot pou fer sa? Zot dir: "Me selman pa pandan lafet pangar lepep i revolte." (Matye 26:4, 5) Zot per parski en kantite dimoun i kontan Zezi.


Antretan, i annan en dimoun ki al vvar bann sef relizye. Zot pa ti ekspekte ki enn bann zapot Zezi, Zida Iskaryot, ti pou vin kot zot. Satan in met sa nide dan lespri Zida pour trai son Met! Zida i demann zot: "Ki zot pou donn mwan pour ki mon livre li avek zot?" (Matye 26:15) Zot kontan pour tann sa, alor zot "dakor pour donn li larzan." (Lik 22:5) Konbyen? Zot dakor pour donn li 30 pyes



larzan. Sa letan, pri en lesklav ti 30 pyes larzan. (Egzod 21:32) Sa i montre ki kantite bann sef relizye i mepriz Zezi akoz pour zot i napa valer. Aprezan, Zida i konmans “rod en loportinite pour trai li ler napa dimoun.”—Lik 22:6.

Le 13 Nizan i konmans Merkredi apre soley kouse. Sa i sa sizyenm e dernyen swar ki Zezi i pase Betani. Son lannmen, zot pou bezwen fer bann dernyen preparasyon pour Lapak. Zot bezwen rod en pti mouton, touy li e roti li antye le 14 Nizan. Kote zot pou pran sa repa e lekel ki pou prepar li? Zezi pa’n donn tou sa detay. Alor, Zida pa kapab donn bann sef pret sa lenformasyon.

Probableman byen boner Zedi apremidi, zot ankor Betani. Zezi i anvoy Pyer ek Zan e dir zot: “Al prepar repa Lapak pour nou manze.” Zot dir: “Kote ou oule nou al prepare?” Zezi i eksplike: “Ler zot ariv dan lavil, en zonm ki pe anmenn en resipyan delo pou zwenn zot. Swiv li ziska kot sa lakaz ki sa zonm i antre. Dir avek met sa lakour, ‘Ansenyan i demann ou: “Kote lasanm envite i ete pour mwan kapab manz repa Lapak avek mon bann disip?”’ Sa zonm pou montre zot en gran lasanm anler ki annan sa ki nesaser. Met tou keksoz pare laba.”—Lik 22:8-12.



San dout, met sa lakour i en disip Zezi. Petet i ti konnen ki Zezi i kapab demande pour servi son lakaz pour sa lokazyon. Ler sa de zapot i ariv Zerizalenm, zot vwar tou keksoz parey Zezi ti’n dir zot. Alor zot fer sir ki sa pti mouton e tou lezot keksoz in pare pour ki sa 13 dimoun, setadir Zezi ek son 12 zapot, i kapab selebre Lapak.

- 
- ◇ Aparaman ki Zezi ti fer Merkredi le 12 Nizan e akoz?
  - ◇ Akoz bann sef relizye ti zwenn ansanm e akoz Zida ti al vwar zot?
  - ◇ Son Zedi, lekel ki Zezi ti anvoy Zerizalenm e ki zot ti fer laba?

## EN LESON LO LIMILITE PANDAN DERNYEN LAPAK

MATYE 26:20 MARK 14:17 LIK 22:14-18 ZAN 13:1-17


Parey Zezi in demande, Pyer ek Zak in fini al Zerizalenm pour fer bann preparasyon pour Lapak. Pli tar, Zezi ek sa dis lezot zapot i al Zerizalenm. I lo tar apremidi e soley pe konmans kouse dan was anmezir ki Zezi ek son bann disip i desann lo Montanny Pye Zoliv. Sa i dernyen fwa ki Zezi i pas la pandan lazournen ziska son rezireksyon.

I pa pran bokou letan pour Zezi ek son bann disip ariv dan lavil e al kot sa lakaz kot zot pour pran repa Lapak. Zot mont peron e al dan en gran lasanm anler. Tou keksoz in pare pour Zezi pran sa repa avek son bann zapot. Zezi i vreman kontan pour zwenn avek son bann disip akoz i dir: “Mon’n telman anvi manz sa repa Lapak avek zot avan mon soufer.”—Lik 22:15.

Plizyer lannen pase, sa koutim pour pas plizyer lakoup diven pandan repa Lapak ti ganny entrodwir. Apre, Zezi i pran lakoup ki zot in donn li, i remersye Bondye e dir: “Pran sa e pas avek kanmarad, parski mon dir zot ki depi konmela menm, mon pa pou bwat ankor diven ziska ki Rwayonm Bondye i vini.” (Lik 22:17, 18) I devret evidan pour bann zapot ki Zezi i pros pour mor.

Pandan repa Lapak, en keksoz drol i arive. Zezi i leve, tir son manto e pran en servyet. Apre sa, i met delo dan en kivet ki la. Normalman, i sa enn ki’n envit bann dimoun ki fer sir ki lipye son bann envite i ganny lave. Petet en serviter ki fer sa. (Lik 7:44) Me la personn pa’n envit zot, alor Zezi i rann zot sa servis. Enn son bann zapot ti’n kapab fer sa, me ni enn ant zot pa’n fer li. Eski sa i akoz zot ankor pe rode lekel ki pli enportan? An tou ka, zot anbarase ki Zezi pe lav zot lipye.

Ler Zezi i ariv kot Pyer, Pyer i dir: “Mon pa



pou zanmen les ou lav mon lipye.” Zezi i dir: “Si mon pa lav ou lipye, ou napa nanryen pour fer avek mwan.” Avek bokou santiman, Pyer i reponn: “Senyer, pa lav zis mon lipye, me lav mon lanmen ek mon latet osi.” I bezwen ki i sirprann ki Zezi i dir: “Sa ki’n fini bennyen, son lekor i prop, i zis bezwen lav son lipye. Zot prop zot, me pa zot tou.”—Zan 13:8-10.

Zezi i lav lipye son douz zapot, enkli lipye Zida Iskaryot. Apre ki i’n remet son manto e revin atab, Zezi i demande: “Eski zot konpran sa ki mon fek fer? Zot apel mwan ‘Ansenyan’ ek





‘Senyer’ e zot annan rezon parski sanmenm ki mon ete. Alor, si mwan, zot Senyer ek Ansenyan, mon lav zot lipye, zot osi zot devret lav lipye kanmarad. Mon’n kit en legzanp pour zot, pour ki parey mon’n fer avek zot, zot osi zot devret fer parey. Vreman mon dir zot laverite, en lesklav pa pli gran ki son met, ni sa enn ki’n ganny anvoye pli gran ki sa enn ki’n anvoy li. Si zot konn sa bann keksoz, ere si zot fer li.”—Zan 13:12-17.

Pa sa i en zoli leson pour ankouraz nou pour servi lezot avek limilite! Bann disip Zezi

pa devret rod premye plas, an krwayan ki zot enportan e ki zot devret ganny servi. O kontrer, zot devret swiv legzanp Zezi. Sa pa vedit ki zot devret partisip dan bann seremoni lav lipye, me ki zot devret pare pour servi lezot avek limilite e san fer lapreferans.

- ◇ Pandan repa Lapak, ki Zezi ti dir son bann zapot ki montre ki i ti pros pour mor?
- ◇ Akoz i ti drol pour Zezi lav lipye bann zapot?
- ◇ Ler Zezi ti lav lipye son bann zapot, ki leson i’n ansennyen?

## REPA SENYER

MATYE 26:21-29 MARK 14:18-25 LIK 22:19-23 ZAN 13:18-30

Pli boner sa zour swar, Zezi ti lav lipye son bann zapot pour montre zot lenportans limilite. La aprezan, aparaman apre repa Lapak, i sit sa parol profetik ki David ti dir: “Sa zomn ki ti anpe avek mwan, ki mon ti annan konfyans dan li, ki ti pe manz mon dipen in vir kont mwan.” Apre sa, i eksplike: “Enn parmi zot pou trai mwan.”—Psonm 41:9, NWT; Zan 13:18, 21.

Bann zapot i get kanmarad e enn par enn zot demande: “Pa mwan sa, non?” Menm Zida Iskaryot i demann sa. Pyer i demann Zan ki atab o bor Zezi pour rode lekel ki pou trai li. Alor Zan i kabann deryer e demann Zezi: “Senyer lekel?”—Matye 26:22; Zan 13:25.

Zezi i reponn: “I sa enn ki mon pou donn sa morso dipen ki mon’n tranpe.” Zezi i tranp sa dipen dan en bol lo lata, apre i donn Zida e

i dir: “Garson zomn pe kit zot, zis parey i’n ganny ekrir konsernan li, me maler pour sa enn ki pou trai Garson zomn! I ti pou’n pli bon si sa zomn pa ti’n ne.” (Zan 13:26; Matye 26:24) Apre sa, Satan i antre dan li. Zida ti deza pe fer sa ki mal, me la i les Dyab pran kontrol lo li pour fer son lavolonte e i vin “sa enn ki pou ganny detrir.”—Zan 6:64, 70; 12:4; 17:12.

Zezi i dir Zida: “Sa ki ou annan pour fer, fer li deswit.” Bann zapot i krwar ki vi ki bwat larzan i avek Zida, Zezi pe dir li: “‘Aste sa ki nou bezwen pour lafet’ ouswa ki i ti devret donn en keksoz bann pov.” (Zan 13:27-30) Me Zida i kit sa landrwa pour al trai Zezi.

Sa menm zour swar apre repa Lapak, Zezi i entrodwir en lot repa konpletman diferan. I pran en dipen, fer lapriyer, kas li e donn son bann zapot pour manze. I dir: “Sa i reprezant





mon lekor ki pou ganny donner pour zot. Kontinyen fer sa pour montre ki zot pe mazin mwan.” (Lik 22:19) Bann zapot i pas sa bout dipen avek kanmarad e zot manze.


Aprezan, Zezi i pran en lakoup diven, fer la-priyer e pas avek son bann zapot. Zot tou zot bwar dan sa lakoup. Zezi i dir: “Sa lakoup i re-prezant sa nouvo lalyans gras a mon disan ki pou ganny verse pour zot.”—Lik 22:20.

Alor Zezi i fer laranzman pour ki son bann disip i selebre memoryal son lanmor tou le-z-an le 14 Nizan. Sa pou fer zot rapel sa ki Zezi ek

son Papa in fer pour dimoun ki annan lafwa ganny libere anba kondannasyon pese ek lanmor. Sa selebrasyon i pli enportan ki Lapak ki bann Zwif ti selebre parski i montre ki Zezi in mor pour liber pour touzour bann imen ki krwar dan li.

Zezi i dir ki son disan “pou ganny verse pour ki pese bokou dimoun i ganny pardonnen.” Bokou dimoun pou ganny pardonnen zot pese, sa i enkli bann zapot fidel ek lezot disip. Zot sa bann ki pou avek li dan Rwayonm son Papa.—Matye 26:28, 29.

- 
- ◇ Ki profesè Zezi ti site e ki mannyer i ti aplik sa verse lo Zida?
  - ◇ Ki Zezi ti demann Zida pour fer, me ki lezot zapot ti krwar Zezi pe dir?
  - ◇ Ki nouvo lafet Zezi ti entrodwi e ki bi sa lafet?





# BANN ZAPOT I DISPIT KONSERNAN LEKEL KI PLI GRAN

MATYE 26:31-35 MARK 14:27-31 LIK 22:24-38 ZAN 13:31-38

Pandan son dernyen repa avek son bann zapot, Zezi in donn zot en leson konsernan limi-lite ler i ti lav zot lipye. Akoz sa i apropiye? Parski sa i en febles ki bann zapot i annan. Zot devoue anver Bondye, me i ankor enportan pour zot konnen lekel ki pli gran parmi zot. (Mark 9:33, 34; 10:35-37) Sa zour swar, zot montre ki zot annan sa febles ankor enn fwa.

‘En gro dispit i leve antre [bann zapot] konsernan lekel parmi zot ki pli gran.’ (Lik 22:24) Nou kapab zis mazine ki kantite Zezi ti tris pour vwar zot pe dispit ankor enn fwa. Ki Zezi i fer?

Olye dispit avek son bann zapot akoz zot la-titid ek konportman, Zezi i demontre pasyans e rezonn avek zot: “Lerwa i annan lotorite lo bann nasyon e dimoun i apel Onorab bann ki domin lepep. Me zot, zot pa devret koumsa. . . . Parski lekel ki pli gran, sa enn ki pe asiz atab ouswa sa enn ki pe servi?” Apre, Zezi i rapel zot ki i’n toultan en bon legzanp pour zot. I dir: “Me mwan mon parmi zot konman sa enn ki pe servi.”—Lik 22:25-27.

Malgre zot lenperfeksyon bann zapot in toultan la avek Zezi dan bokou sityasyon difisil. Alor i dir: “Mon fer en lalyans avek zot pour donn zot en rwayonm, zis parey mon Papa in fer en lalyans avek mwan pour donn mwan en rwayonm.” (Lik 22:29) Sa bann zonm i bann dispit fidel Zezi. Alor Zezi i fer en lalyans avek son bann zapot pour asir zot ki zot pou diriz ansanm avek li dan Rwayonm.

Menm si sa bann zapot i annan sa zoli lespar, zot ankor bann imen enparfe. Zezi i dir zot: “Satan in demande pour li triy zot parey ferme i triy dible,” ki fann fannen anmezir ki i ganny triye. (Lik 22:31) I osi donn zot sa

lavertisman: “Zot tou zot pou abandonn mwan ozordi swar, parski i’n ganny ekrire: ‘Mon pou touy berze e mouton dan troupo pou disperse.’”—Matye 26:31; Zekarya 13:7.

Me Pyer i dir avek lasirans: “Kantmenm tou lezot pou abandonn ou, mwan mon pa pou zanmen abandonn ou!” (Matye 26:33) Zezi i dir Pyer ki avan en kok i sant de fwa sa zour swar, Pyer pou dir ki i pa konn li. Par kont, Zezi i osi dir: “Mon’n sipli Bondye pour ou pour ki ou lafwa pa afebli konpletman. Enn fwa ki ou’n retournen, fortifye ou bann frer.” (Lik 22:32) Kantmenm sa, Pyer i ensiste: “Mon pa pou zanmen dir ki mon pa konn ou, menm si fodre mon mor avek ou.” (Matye 26:35) Lezot zapot osi i dir menm zafer.

Zezi i dir son bann disip: “Mon pou avek zot pour en pti pe letan ankor. Zot pou rod mwan e zis parey mon’n dir bann Zwif, mon pe dir zot osi, ‘Kot mon pe ale zot pa kapab vini.’” Apre i azoute: “Mon pe donn zot en nouvo komannman, kontan kanmarad. Parey mwan mon’n kontan zot, zot osi kontan kanmarad. Par sa, tou dimoun pou konnen ki zot mon disip, si zot annan lanmour antre zot.”—Zan 13:33-35.

Ler Pyer i tann Zezi dir ki i pou avek zot pour en pti pe letan ankor, i demande: “Senyer, kote ou pe ale?” Zezi i reponn: “Kot mon pe ale, ou pa kapab swiv mwan la konmela, me pli tar ou pou swiv mwan.” Pyer i en pe konfize, alor i dir: “Senyer, akoz ki mon pa kapab swiv ou la konmela? Mon pare pour donn mon lavi pour ou.”—Zan 13:36, 37.

Aprezan Zezi i koz lo sa letan ler i ti anvoy son bann zapot dan en kanpany predikasyon Galile san portmonnen ek sak manze. (Matye 10:5, 9, 10) I demann zot: “Zot pa ti mank



nanryen, non?” Zot dir: “Non.” Me ki zot devret fer dan sa bann zour ki vini? Zezi i dir zot: “Sa ki annan en portmonnen, anmenn li, anmenn osi en sak manze e ki sa enn ki napa en lepe i vann son lenz pour aste enn. Parski mon dir zot, sa ki’n ganny ekrir i devret ganny akonplir lo mwan, setadir, ‘I ti ganny kondannen parey en kriminel.’ Parski sa pe ganny akonplir lo mwan.”—Lik 22:35-37.

Zezi pe koz lo sa letan kot i pou ganny kloute lo poto o bor bann malfeter oubyen bann kriminel. Apre sa, son bann disip pou fer fas avek bann gro persekisyon. Zot santi ki zot in deza pare, alor zot dir: “Senyer gete! i annan de lepe la.” I reponn zot: “I ase.” (Lik 22:38) Lefet ki zot annan de lepe avek zot pou donn Zezi en loportinite pour ansenny zot en lot leson enportan.

- ◇ Akoz bann zapot ti pe dispit e ki Zezi ti fer?
- ◇ Ki bi sa lalyans ki Zezi ti fer avek son bann disip fidel?
- ◇ Ki manyer Zezi ti reazir ler Pyer ti dir ki i pa pou zanmen abandonn Zezi?

## ZEZI I SEMEN, LAVERITE EK LAVI

ZAN 14:1-31

Zezi i ankor dan sa lansanm anler avek son bann zapot apre repa memoryal. Zezi i ankouraz zot: “Pa bezwen enkyet. Demontre lafwa dan Bondye e osi dan mwan.”—Zan 13:36; 14:1.

Zezi i eksplik son bann zapot fidel aköz zot pa devret enkyet ler i ale: “Dan lakaz mon Papa, i annan en kantite landrwa reste. . . . Si mon ale e prepar en plas pour zot, mon pou retournen e mon pou resevwar zot kot mwan, pour ki la kot mon ete zot osi zot pou lanmenm.” Me bann zapot pa konpran ki i pe koz lo al dan lesyel. Toma i demande: “Senyer, nou pa konnen kote ou pe ale. Ki manner nou kapab konn semen?”—Zan 14:2-5.

Zezi i reponn: “Mwan menm semen, laverite ek lavi.” Sel fason ki en dimoun i kapab antre dan lakaz son Papa dan lesyel se pour aksepté Zezi e son bann lansennyman e imit

son fason viv. Zezi i dir: “Napa personn ki ariv kot mon Papa san pas par mwan.”—Zan 14:6.

Filip pe ekout byen e i demande: “Senyer, montre nou ou Papa e sa pou ase pour nou.” I paret ki Filip i anvi vwar Bondye dan en vizyon parey Moiz, Eliya ek Izai ti vwar. Par kont, bann zapot i annan en keksoz ki pli bon ki sa bann vizyon. Zezi i dir: “Tou sa letan mon avek zot, Filip, ou pa ankor konn mwan? Sa ki’n vwar mwan, i’n vwar mon Papa osi.” Zezi i imit personnalite son Papa parfetman, alor ler zot in viv avek Zezi e obzerv li, sa i konmsi zot ti pe vwar son Papa. Byensir, Papa i pli siperyer ki son Garson, parski Zezi i dir: “Sa ki mon dir zot mon pa pe dir lo mwan menm.” (Zan 14:8-10) Bann zapot i kapab vwar ki Zezi i rekonnet ki tou sa bann lansennyman i sorti kot son Papa.





Bann zapot in vwar bann keksoz ekstraordiner ki Zezi in fer e zot in tann li anons sa bon nouvel lo Rwayonm Bondye. Aprezan i dir zot: “Sa ki demontre lafwa dan mwan pou osi fer sa ki mon fer e i pou fer plis ki sa.” (Zan 14:12) Zezi pa pe dir ki zot pou fer bann mirak pli ekstraordiner ki li. Par kont, zot minister pou dire pour pli lontan, kouver en pli gran teritwar e zot pou pres avek bokou plis dimoun.

Zot pa pou tousel ler Zezi i ale, parski i promet zot: “Mon pou fer nenport kwa ki zot demande an mon non.” Deplis, i dir: “Mon pou demann mon Papa e i pou donn zot en lot led ki pou reste avek zot pour touzour, sa i lespri sen laverite.” (Zan 14:14, 16, 17) Sa led i lespri sen ki Zezi in promet. Sa i arive zour Lapannekot.

Zezi i dir: “Dan en pti pe letan, lemond pa pou vwar mwan ankor, me zot zot pou vwar mwan aköz mon pe viv e zot pou viv.” (Zan 14:19) Apre ki i’n resisite, Zezi pou aparet parey en imen avek son bann disip, me pli tar i pou resisit zot avek en lekor spirityel e zot pou al dan lesyel kot Zezi i ete.

Aprezan, Zezi i dir en laverite senp: “Sa ki kontan mwan i aksepte mon bann komannman e obei zot. Pareyman, sa ki kontan mwan, mon Papa pou kontan li, mon pou kontan li e mon pou fer li konn mwan byen.” Ler i dir sa,

zapot Zida, ki osi apel Tade, i demande: “Seyner, pour ki rezon ou oule fer nou konn ou byen me pa lemond?” Zezi i reponn: “Si en dimoun i kontan mwan, i pou obei mon parol e mon papa pou kontan li. . . . Sa ki pa kontan mwan pa obei mon parol.” (Zan 14:21-24) Kontreman avek son bann disip, lemond pa konsider Zezi konman semen, laverite ek lavi.

Zezi pe ale, alor ki mannyer son bann disip pou kapab rapel tou sa ki i’n ansenny zot? Zezi i eksplike: “Sa led, lespri sen ki mon Papa pou anvoye an mon non, sa enn pou ansenny zot tou bann keksoz e fer zot rapel tou bann keksoz ki mon’n dir zot.” Bann zapot in vwar bann mirak ki Zezi in fer gras a lespri sen, alor sa lasirans i rekonfortan. Zezi i azoute: “Mon kit lape avek zot, mon donn zot mon lape. . . . Pa bezwen enkyet oubyen per.” (Zan 14:26, 27) Alor bann disip i annan rezon pour pa enkyet aköz Papa Zezi pou gid e protez zot.

Byento, zot pou vwar levidans proteksyon Bondye. Zezi i dir: “Sef sa lemond pe vini e i napa kontrol lo mwan.” (Zan 14:30) Dyab ti antre dan Zida e kontrol li. Me Zezi napa okenn febles ki Satan i kapab servi pour fer li vir kont Bondye e fer pese. Deplis, Dyab napa pouvwar pour anpes Zezi ganny resisite. Aköz non? Zezi i dir: “Mon pe fer sa ki mon Papa in donn mwan lord pour fer.” I asire ki son Papa pou resisit li.—Zan 14:31.

- 
- ◇ Kote Zezi ti pe ale e ki lasirans Toma ti gannyan konsernan sa semen?
  - ◇ Aparaman ki Filip ti anv i Zezi i fer pour zot?
  - ◇ Ki mannyer bann disip Zezi ti pou fer plis ki sa ki Zezi ti fer?
  - ◇ Aköz i rekonfortan pour konnen ki Papa i pli gran ki Zezi?

# BANN DISIP I BEZWEN RAPORT FRI E VIN ZANMI ZEZI

ZAN 15:1-27

Aprè sa repa, Zezi in koz avek son bann zapot fidel dan en fason vreman ankourazan. I tar, petet minwi in fini sonnen. Aprezan Zezi i donn zot en zoli legzanp:

I konmans par dir: “Mwan menm vre pye rezen e mon Papa i sa fermye.” (Zan 15:1) Son legzanp i en pe parey sa ki ti’n ganny dir plizyer santenn lannen avan konsernan nasyon Izrael ki ti ganny apele plantasyon pye rezen Zeova. (Zeremi 2:21; Osea 10:1, 2) Me la Zeova pe rezet nasyon Izrael. (Matye 23:37, 38) Alor Zezi pe entrodwi en nouvo lansennyman. Zezi i sa pye rezen ki son Papa pe kiltive depi ki i ti swazir li avek lespri sen lannen 29. Me Zezi i montre ki sa pye rezen pa reprezant zis li tousel akoz i dir:

“Tou brans lo mwan ki pa raport fri, [mon Papa] i koupe, tou brans ki raport fri, i taye pour ki zot raport plis fri ancor. . . . Zis parey en brans pa kapab raport fri lo li menm amwen ki i lo pye rezen, zot osi zot pa pou kapab raport fri amwen ki zot reste ini avek mwan. Mwan menm pye rezen e zot zot bann brans.”—Zan 15:2-5.

Zezi in promet son bann disip fidel ki apre ki i ale, i pou anvoy lespri sen konman en led. Senkanteen zour pli tar, ler bann zapot ek le-zot i ganny lespri sen, zot vin bann brans sa pye rezen. Tou sa bann “brans” pou bezwen reste ini avek Zezi. Pour ki rezon?

I eksplike: “Sa ki reste ini avek mwan e mwan mon reste ini avek li pou raport bokou fri, akoz san mwan zot pa pou kapab fer nanryen.” Sa bann “brans,” setadir son bann disip fidel, ti pou raport bokou fri ler zot imit bann kalite Zezi, koz lo Rwayonm Bondye avek devouman e fer plis disip. Ki pou arive si en dimoun pa

reste ini avek Zezi e pa raport fri? Zezi i eksplike: “Si en dimoun pa reste ini avek mwan, i pou parey en brans ki ganny zete.” Par kont, “si zot reste ini avek mwan e mon parol i reste dan zot leker, tou sa ki zot demande zot pou gannyen.”—Zan 15:5-7.

La aprezan, Zezi i rekoz lo en keksoz ki i’n deza mansyonnen de fwa. Sa i konsernan gard son bann komannman. (Zan 14:15, 21) I koz lo en fason vreman enportan ki bann disip i kapab montre ki zot pe fer sa: “Si zot obei mon bann komannman, zot pou reste dan mon lanmour, zis parey mon’n obei komannman mon Papa e mon reste dan son lanmour.” Par kont, zot bezwen fer plis ki kontan Zeova ek son Garson. Zezi i dir: “La mon komannman, ki zot kontan kanmarad parey mwan mon’n kontan zot. Person napa en pli gran lanmour ki sa, ki en dimoun i pare pour donn son lavi pour son bann zanmi. Zot mon zanmi si zot obei mon komannman.”—Zan 15:10-14.

Dan detrwa erdtan, Zezi pou demontre son lanmour par donn son lavi pour tou bann ki demontre lafwa dan li. Son legzanp i devret pous son bann disip pour fer sakrifis pour demontre lanmour anver kanmarad. Parey Zezi ti dir pli boner, sa lanmour pou montre ki son bann disip i diferan. I ti dir: “Par sa, tou dimoun pou konnen ki zot mon disip, si zot annan lanmour antre zot.”—Zan 13:35.

Zezi i apel son bann zapot son “zanmi” e i dir zot akoz: “Mon apel zot zanmi akoz mon’n fer zot konn tou keksoz ki mon’n tandé avek mon Papa.” Son bann zapot i kapab vin son zanmi pros e konnen ki son Papa in dir Zezi, pa sa i en relasyon vreman presye! Me pour zot kapab gard sa relasyon avek Zezi, zot bezwen


“kontinyen raport fri.” Si zot fer sa, Zezi i dir, “nenport kwa ki zot demann mon Papa an mon non, i pou donn zot.”—Zan 15:15, 16.

Sa lanmour ant sa bann “brans,” setadir son bann disip, pou ed zot andir sa ki pou arive. I averti zot ki lemonn pou ay zot, me i rekonfort zot ler i dir: “Si lemonn i ay zot, zot konnen ki i’n ay mwan avan ki i’n ay zot. Si zot ti form parti sa lemonn, sa lemonn ti pou kontan sa ki pour li. Me lefet ki zot pa form parti sa lemonn, . . . pour sa rezon lemonn i ay zot.”—Zan 15:18, 19.

Zezi i kontinyen eksplik zot aköz lemonn pou ay zot. I dir: “Bann dimoun pou fer tou sa bann keksoz kont zot aköz zot port mon non, parski sa bann dimoun pa konn sa Enn ki’n anvoy mwan.” Zezi i dir ki dan en sans, son bann mirak i kondann bann ki ay li: “Si mon pa ti’n fer sa bann mirak ki person pa’n deza fer devan zot, zot pa ti pou’n fer pese, me aprezan zot in vwar mwan e zot in ay mwan e osi mon Papa.” Anfet, lefet ki zot ay Zezi, sa i akonpli bann profes. —Zan 15:21, 24, 25; Psonm 35:19; 69:4.

Ankor enn fwa, Zezi i promet pour anvoy lespri sen konman en led. Tou son bann disip i kapab ganny sa lafors pwisan e i kapab ed zot raport fri, setadir “rann temwanyaz.”—Zan 15:27.

- 
- ◇ Dan legzanp Zezi, lekel sa fermye, sa pye rezen ek sa bann brans?
  - ◇ Ki kalite fri Bondye ti anvi bann brans i raporte?
  - ◇ Ki manyer bann disip Zezi ti kapab vin son zanmi e kwa ki ti pou ed zot fer fas avek laenn sa lemonn?
- 





# “PRAN KOURAZ! MON’N RANPORT LAVIKTWAR LO LEMONN!”

ZAN 16:1-33

Zezi ek son bann zapot i pros pour kit sa lasanm anler kot zot in pran repa Lapak. Zezi in donn zot bokou konsey e la i dir: “Mon’n dir zot sa bann keksoz pour ki zot pa tonbe.” Akoz sa lavertisman i apropiye? I dir zot: “Dimoun pou pous zot dan sinagog. Anfet, letan pe vini kot sa bann ki touy zot pou krwar ki zot pe servi Bondye.”—Zan 16:1, 2.

Sa i kapab trakas bann zapot. Menm si pli boner Zezi ti’n dir zot ki lemonn pou ay zot, i pa ti’n dir zot direkteman ki zot ti pou ganny touye. Akoz? Zezi i dir: “Mon pa’n dir zot sa bann keksoz o konmansman parski mon ti avek zot.” (Zan 16:4) Me la i pe averti zot avan i ale. Sa i kapab ed zot pou pa dekouraze pli tar.

Zezi i osi dir: “Mon pe al kot sa Enn ki’n anvoy mwan, me pourtan, ni enn ant zot pa demann mwan, ‘Kote ou pe ale?’” Pli boner sa zour swar, zot ti demann Zezi kote i pe ale. (Zan 13:36; 14:5; 16:5) Me la zot per akoz sa ki Zezi fek dir zot lo persekasyon e zot byen sagren. Alor zot pa demann li okenn kestasyon konsernan laglwar ki i pou gannye dan lesyel e ki benediksyon sa pou anmennen pour bann vre adorater. Zezi i fer sa remark: “Aprezan zot vremen sagren parski mon’n dir zot sa bann keksoz.”—Zan 16:6.

Aprè Zezi i eksplike: “I dan zot lavantaz ki mon ale. Parski si mon pa ale, zot pa pou ganny sa led, me si mon ale, mon pou anvoy li pour zot.” (Zan 16:7) Zezi i bezwen mor e al dan lesyel pour ki son bann disp i ganny lespri sen ki pou en led pour son pep nenport landrwa ki zot ete lo later.

Lespri sen “pou donn levidans konkret lo pese lemonn, lo ladrwatir ek zizman Bondye.” (Zan 16:8) I pou vin evidan ki lemonn pa’n

demontre lafwa dan Garson Bondye. Ler Zezi i al dan lesyel, sa pou donn levidans konkret ki sa ki i ti fer ti byen e sa pou montre akoz ki Satan, “sef sa lemonn” i devret ganny zize.—Zan 16:11.

Zezi i osi dir: “I annan ankò en kantite keksoz pour mwan dir zot, me zot pa pou kapab konpran tousala la konmela.” Ler Zezi i donn zot lespri sen, sa pou ed zot konpran “tou sa ki vre” e zot pou kapab viv an armoni avek laverite.—Zan 16:12, 13.

Bann zapot pa arive konpran sa ki Zezi i dir apre: “Dan en pti pe letan, zot pa pou vwar mwan ankò e apre sa, dan en pti pe letan, zot pou vwar mwan ankò.” Zot demann kanmarad ki sa i vdir. Zezi i realize ki zot anvoy demann li kestasyon lo sa size, alor i eksplike: “Vremen mon dir zot laverite, zot pou plere e fer leokri, me lemonn pou dan lazwa, zot zot pou tris, me zot latristes pou vin lazwa.” (Zan 16:16, 20) Ler Zezi i ganny touye son lannmen apremidi, bann sef relizye pou dan lazwa, me bann disp pou tris. Apre sa, zot latristes pou vin lazwa ler Zezi pou ganny resisite. Zot kontinyen dan lazwa ler zot ganny lespri sen Bondye.

Zezi i konpar sityasyon bann zapot avek sityasyon en madanm ansent ki pe ganny douler lakousman. I dir: “Letan en madanm pe al ganny pti baba, i dan douler akòz son ler in arive, me apre ki i’n fini ganny pti baba, i pa rapel sa douler akòz i dan lazwa parski en zanfan in ne dan lemonn.” Zezi i ankouraz son bann disp par dir: “La zot osi zot tris, me mon pou revwar zot, zot pou dan lazwa e personn pa pou kapab anpes zot zwaye.”—Zan 16:21, 22.

Ziska aprezan, bann zapot pa’n zanmen demann Bondye okenn keksoz o non Zezi. La



aprezan i dir: “Sa zour zot pou demann keksoz avek mon Papa an mon non.” Akoz zot devret fer sa? Pa akoz son Papa pa tro anvri reponn. Anfet, Zezi i dir: “Mon Papa li menm i kontan zot parski zot kontan mwan . . . konman reprezentan Bondye.”—Zan 16:26, 27.

Bann parol Zezi in bezwen ankouraz son bann zapot, sanmenm zot dir: “Pour sa rezon, nou krwar ki ou sorti kot Bondye.” Zot konviksyon pou ganny teste byento. Anfet, Zezi i dekrir sa ki pou arive: “Ekoute! Sa ler pe vini e i’n

fini arive kot zot pou disperse sakenn kot son lakaz e zot pou kit mwan tousel.” Par kont, i asir zot: “Mon’n dir zot sa bann keksoz pour ki atraver mwan zot kapab ganny lape. Zot pou bezwen soufer dan sa lemonn, me pran kouraz! Mon’n ranport laviktwar lo lemonn!” (Zan 16: 30-33) Non, Zezi pa pe abandonn zot. I asire ki zot osi zot kapab ranport laviktwar lo lemonn si zot fidelman fer lavolonte Bondye malgre tou sa ki Satan ek son lemonn i fer pour esey kas zot lentegrite.

- 
- ◇ Ki lavertisman Zezi ti donnen ki ti fer bann zapot per?
  - ◇ Akoz bann zapot pa ti demann Zezi plis keston?
  - ◇ Ki legzanp Zezi ti servi pour montre ki bann zapot pou aret sagren e zot pou dan lazwa?

## DERNYEN LAPRIYER ZEZI DAN LASANM ANLER

ZAN 17:1-26

Zezi i vreman kontan son bann zapot, se pour sa ki i pe prepar zot akoz i pros pour li ale. Aprezan i get anler dan lesyel e priy son Papa: “Glorifye ou garson pour ki ou garson i kapab glorifye ou, zis parey ou’n donn li lotorite lo tou dimoun pour kapab donn lavi eternel tou sa bann ki ou’n donn li.”—Zan 17:1, 2.

I kler ki Zezi i rekonnèt ki sa ki pli enportan se pour donn Bondye laglwar. Me pa i ankou- razan pour mazin sa lespwar lavi eternel ki Zezi in koz lo la! Vi ki Bondye in donn Zezi “lotorite lo tou dimoun,” i kapab fer tou limanite benefisye avek sa ranson. Par kont, pa tou dimoun ki pou ganny sa bann byenfe. Akoz? Akoz sa bann byenfe i zis pour bann ki azir an armoni avek sa ki Zezi i mansyonnen apre. I dir: “Pour ganny lavi eternel, zot bezwen aprann konn ou, sa sel vre Bondye e sa enn ki ou’n anvoye Zezi Kri.”—Zan 17:3.

En dimoun i bezwen aprann konn byen tou le de Papa ek Garson e annan en bon relasyon avek zot. I bezwen annan menm pwennvi ki zot. I osi bezwen fer zefor pour imit zot bann kalite dan lafason ki i tret lezot. Deplis, i bezwen rekonnèt ki sa ki pli enportan se pa ganny lavi eternel, me ki Bondye i ganny glorifye. Apre sa, Zezi i rekonmans koz lo sa size enportan e i dir:

“Mon’n fini sa travay ki ou’n donn mwan pour fer e mon’n glorifye ou lo later. Alor, Papa, glorifye mwan akote ou pour ki mon a reganny sa laglwar ki mon ti annan akote ou avan ki le- monn ti egziste.” (Zan 17:4, 5) Zezi i demann Bondye pour ganny resisite pour li reganny la- glwar ki i ti annan dan lesyel.

Par kont, Zezi pa’n oubliy sa ki i’n akonpli pandan son minister. I priye: “Mon’n fer konn ou non avek bann ki ou’n donn mwan dan

lemonn. Zot ti pour ou e ou’n donn zot avek mwan e zot in obei ou parol.” (Zan 17:6) Pan- dan son minister, Zezi pa’n zis servi non Bon- dye, setadir Zeova. Me i’n ed son bann zapot pour konn Zeova ek son bann kalite e lafason ki i pran swen avek bann imen.

Bann zapot in aprann konn Zeova, rol son Garson ek bann keksoz ki Zezi in ansennyen. Avek limilite, Zezi i dir: “Mon’n dir zot bann keksoz ki ou’n dir mwan. Zot in aksepte sa bann keksoz, zot in arive konnen ki mon’n vin konman ou reprezantan e zot in krwar ki ou’n anvoy mwan.”—Zan 17:8.

Apre sa, Zezi i fer resorti diferans ki i an- nan ant son bann disip ek lezot dimoun dan le- monn: “Mon priy pour zot, mon pa priy pour le- monn, me pour sa bann ki ou’n donn mwan, parski zot pour ou e tou sa ki pour mwan i pour ou. . . . Papa sen, vey lo zot akoz sa non ki ou’n donn mwan, pour ki zot kapab en sel, pa- rey nou nou en sel. . . . Mon’n protez zot e ni enn parmi zot pa’n perdi eksepte sa enn ki pou ganny detrir.” Zezi ti pe koz lo Zida Iskaryot ki ti pe al trai li.—Zan 17:9-12.

Zezi i kontinyen priye: “Lemonn in ay zot. . . . Mon pa pe demann ou pour tir zot dan lemonn, me plito ki ou vey lo zot akoz sa enn move. Zot pa form parti lemonn, parey mwan mon pa form parti lemonn.” (Zan 17:14-16) Bann zapot ek lezot disip i viv dan sa lemonn, setadir par- mi bann imen dirize par Satan, me zot bezwen reste separe avek sa lemonn e tou sa ki move dan sa lemonn. Ki mannyer zot kapab fer sa?

Zot bezwen reste sen, setadir separe pour servi Bondye. Zot bezwen met an pratik sa ki dan Lekritir Ebre ek bann laverite ki Zezi li menm in ansennyen. Zezi i priye: “Fer zot vin




sen gras a laverite, ou parol i laverite.” (Zan 17:17) Pli tar, serten bann zapot pou ganny enspire pour ekri bann liv ki pou dan Labib ki pou form parti sa “laverite” ki kapab ed en dimoun pour vin sen.

Me pli tar, i pou osi annan lezot dimoun ki pou aksepte “laverite.” Alor Zezi “pa priy zis pour zot [sa 11 zapot], me osi pour bann ki pou annan lafwa dan [li] apre ki zot in ekout zot parol.” Ki Zezi i demann son Papa pour fer pour sa bann dimoun? I dir: “Mon priye pour ki zot tou zot kapab vin en sel, parey ou, Papa, ou ini avek mwan e mwan mon ini avek ou, pour ki zot osi zot kapab ini avek nou.” (Zan 17:20, 21) Zezi ek son Papa pa en sel bondye. Zot en sel dan sa sans ki zot tonm dakor lo tou keksoz. Zezi i priye ki son bann disip osi i kapab vin en sel dan sa menm sans.

Pa bokou letan avan sa, Zezi ti’n dir Pyer ek lezot ki i ti pe al prepar en plas pour zot, setadir en plas dan lesyel. (Zan 14:2, 3) Aprezan Zezi i rekoz lo sa pwen dan son lapriyer: “Papa, mon anv i sa bann ki ou’n donn mwan i avek mwan kot mon ete, pour ki zot kapab vwar sa laglwar ki ou’n donn mwan, parski ou’n kontan mwan depi o konmansman lemonn.” (Zan 17:24) Zezi i konfirmen ki bokou letan pase, avan menm ki Adan ek Ev ti fer zanfan, Bondye ti kontan son sel Garson, Zezi Kri, ki pli tar ti vin lo later.

Pour fini son lapriyer, Zezi i remet lanfaz lo non son Papa e lo lanmour ki Bondye i annan pour bann zapot ek lezot ki pou aksepte “laverite.” I dir: “Mon’n fer zot konn ou non e mon pou kontinyen fer li, pour ki zot kapab kontan lezot parey ou’n kontan mwan e mwan mon ava ini avek zot.”—Zan 17:26.



- ◇ Ki savedir aprann konn Bondye ek son Garson?
- ◇ Dan ki fason Zezi in fer lezot konn non Bondye?
- ◇ Dan ki sans Bondye, son Garson ek tou bann vre adorater i en sel?

## ZEZI I VREMAN TRIS E I PRIYE

MATYE 26:30, 36-46 MARK 14:26, 32-42 LIK 22:39-46 ZAN 18:1

Zezi in fini priye avek son bann zapot fidel. Apre ‘ki zot in sant louanz, zot al lo Montanny Pye Zoliv.’ (Mark 14:26) Zot al dan direksyon les ver en zarden ki apel Zetsemane, kot Zezi i abitye ale.

Zot ariv dan sa zoli landrwa parmi bann pye zoliv. Wit son zapot i reste o bor larantre sa zarden akoz Zezi i dir zot: “Asiz la pandan ki mon al priye laba.” I pran trwa son zapot, Pyer, Zak ek Zan e zot al en pti pe pli lwen dan zarden. Son lespri i fatige e i dir sa trwa zapot: “Mon sitan dan en gran latristes konmsi mon pe mor. Reste la e kontinyen veye avek mwan.”—Matye 26:36-38.

Zezi i al en pti pe pli lwen e i ‘tonm azenou lafas anba e konmans priye.’ Dan sa moman vreman difisil, lo kwa i pe priy Bondye? I priye: “Papa, tou keksoz i posib pour ou, pa les mwan bwar sa lakoup. Pourtan, pa sa ki mon oule, me sa ki ou oule.” (Mark 14:35, 36) Ki sa i vedir? Eski Zezi nepli pare pour mor e donn son lavi konman en ranson? Non, pa sa ki i vedir.

Ler Zezi ti dan lesyel, i ti vwar sa kantite douler ki lezot ti pas ladan ler bann Romen ti met zot amor. Konman en imen, Zezi i kapab per oubyen enkyet e i osi kapab santi douler, alor i konnen ki sa ki i pe al pas atraver pa pou fasil. Me Zezi i vreman angwase akoz i santi ki i pe al mor konman en kriminel e sa i kapab sali non son Papa. Dan detrwa erdtan, i pou ganny akize ki i’n koz an mal lo Bondye e ganny kloute lo poto.

Apre ki Zezi in priy pour en bon pe letan, i retourn kot son trwa zapot e i vwar zot pe dormi. I dir avek Pyer: “Zot pa’n kapab kontinyen veye ni menm pour enn erdtan

avek mwan? Kontinyen veye e kontinyen priye pour ki zot pa tonm dan tantasyon.” Zezi i realize ki bann zapot osi i anba bokou presyon e i tar dan lannwit. I azoute: “Lespri i anvi fer sa ki byen, me lekor enparfe i feb.”—Matye 26:40, 41.

Apre Zezi i al priye ankor en dezyenm fwa e demann Bondye pour pran “sa lakoup” avek li. Ler i retournen, ankor enn fwa i vwar sa trwa zapot pe dormi olye priye pour pa ganny tante. Ler Zezi i koz avek zot, zot pa “konnen ki pour dir li.” (Mark 14:40) Zezi i tonm azenou e pour en trwazyenm fwa i priye.

Zezi i vreman trakase akoz i pou mor konman en kriminel e sa pou sali non son Papa. Me Zeova pe ekout lapriyer son Garson e i anvoy en lanz pour ankouraz li. Kantmenm sa, Zezi pa aret sipliy son Papa, i kontinyen “priy avek plis lentansite ankor.” I anba en kantite presyon. Zezi i santi sa gro responsabilite ki lo li. I realize ki son prop lavi eternel i enplike

### SON TRANSPIRASYON I VIN PAREY GOUT DISAN

Lik ki ti en dokter pa eksplike ki mannyer transpirasyon Zezi “ti vin parey gout disan.” (Lik 22:44) Petet Lik i servi sa konman en legzanp pour eksplike ki transpirasyon Zezi ti paret parey disan ki pe koule ler en dimoun in ganny blese. Dokter William Edwards ti donn en lot leksplikasyon dan en zournal (*The Journal of the American Medical Association*). I ti dir: “Menm si sa fenomenn i vreman rar, en dimoun i kapab transpir disan (*hematidrosis* . . . ) ler i anba en kantite presyon oubyen stres . . . Son bann pti lavenn i pete e disan i melanze avek transpirasyon, sa i kapab donn lenpresyon ki sa dimoun pe transpir disan.”



e ki lavi bann imen ki krwar dan li i depan lo li. Anfet, ‘son transpirasyon i vin parey gout disan ki pe tonm ater.’—Lik 22:44.

Ler Zezi i retourn kot son bann zapot pour trwazyenm fwa i wvar zot pe dormi. I dir: “Dan

en letan koumsa, zot pe dormi e pe repoze! La ler in arive pour Garson zonn ganny livre dan lanmen bann ki annan en move lavi. Leve, an-nou ale. Gete! Sa enn ki pou trai mwan in arive.”—Matye 26:45, 46.

- 
- ◇ Apre ki zot ti kit sa lasanm anler, kote Zezi ti anmenn bann zapot?
  - ◇ Ki trwa zapot ti fer ler Zezi ti pe priye?
  - ◇ Lefet ki transpirasyon Zezi ti vin parey bann gout disan, ki sa i montre konsernan son santiman?



# KRIS I GANNY TRAIR E ARETE

MATYE 26:47-56 MARK 14:43-52 LIK 22:47-53 ZAN 18:2-12

Lontan minwi in sonnen. Bann pret in dakor pour pey Zida 30 pyes larzan pour trai Zezi. Alor Zida i anmenn en lafoul bann Farizyen ek sef pret e zot al rod Zezi. I osi annan en group solda Romen arme ek en komandan militer avek zot.

I paret ki ler Zezi ti fer Zida ale apre repa Lapak, i'n al direkteman kot bann sef pret. (Zan 13:27) Zot in rasanble zot prop zofisye e osi en group solda. I posib ki avan sa, Zida ti'n anmenn zot dan sa lasanm kot Zezi ek son bann zapot ti selebre Lapak. Me la sa lafoul in travers Vale Kidronn pour zot al kot sa zarden. Zot in anmenn bann zarm, flanbo ek lalanp akoz zot determinen pour aret Zezi.

Anmezir ki Zida i gid sa lafoul lo Montanny Pye Zoliv, i asire ki i konnen kote Zezi i ete. Pandan sa dernyen semenn, Zezi ek son bann zapot ti ale vini ant Betani ek Zerizalenm, zot ti souvandfwa pas dan zarden Zetsemane. Me la i aswar e i posib ki bann pye zoliv dan sa zarden i fer li difisil pour zot vwar Zezi. Alor ki mannyer sa bann solda, ki petet pa'n zanmen vwar Zezi avan, pou kapab rekonnet li? Zida i donn zot en siny. I dir zot: "Sa enn ki mon anbrase, li menm li sa enn, aret li e fer gard anmenn li."—Mark 14:44.

Ler Zida i anmenn sa lafoul dan zarden, i vwar Zezi ek son bann zapot e i al direk kot li. Zida i dir: "Bonzour Ansenyan!" e i anbras li avek tandres. Zezi i demann li: "Akoz ou la ou?" (Matye 26:49, 50) Zezi i reponn son prop kestyon e dir: "Zida, eski ou pe trai Garson zonn par anbras li?" (Lik 22:48) Me Zezi nepli trakas li avek Zida ki'n trai li.

Aprezan Zezi i avans devan dan lalimyer bann flanbo ek lalanp e i demande: "Lekel

ki zot pe rode?" En dimoun dan lafoul i reponn: "Zezi sa Nazareen." Avek kouraz Zezi i dir: "Mwan menm sa." (Zan 18:4, 5) Zot sirprann e zot tonm ater.

Olye profite pour sov dan fernwanr, ankor enn fwa Zezi i demande lekel zot pe rode? Ankor enn fwa zot dir, "Zezi sa Nazareen" e Zezi i dir dan en fason kalm: "Mon'n dir zot ki se mwan menm sa. Alor si zot pe rod mwan, les sa bann zonn ale." Menm pandan sa moman vreman difisil, Zezi i rapel sa ki i'n dir avan, ki i pa pou perdi ni menm enn. (Zan 6:39; 17:12) Zezi in protez son bann zapot fidel e ni enn parmi zot pa'n perdi "eksepte sa enn ki pou ganny detrir" setadir Zida. (Zan 18:7-9) Sanmenm sa ki aprezan Zezi i dir zot les son bann disip fidel ale.

Ler bann zapot i vwar bann solda leve e al ver Zezi, zot realize ki pe arive. Zot demande: "Senyer, eski nou devret servi lepe?" (Lik 22:49) Avan ki Zezi i ganny sans reponn, Pyer i pran enn dan sa de lepe ki avek bann zapot. I atak Malkis, en lesklav granpret e sot son zorey kote drwat.

Zezi i tous zorey Malkis e geri sa blesir. Apre sa, i ansenny en leson enportan ler i donn Pyer sa lord: "Remet ou lepe dan son plas, parski tou sa ki servi lepe pou mor par lepe." Zezi i pare pour ganny tyonbo parski i eksplike: "Ki mannyer sa Lekritir ki dir i devret ariv koumsa pou akonpli?" (Matye 26:52, 54) Zezi i osi dir: "Ou pa krwar ki mon devret bwar sa lakoup ki mon Papa in donn mwan?" (Zan 18:11) Zezi i dakor pour fer sa ki Bondye i oule menm si i bezwen mor.

Zezi i demann lafoul: "Eski zot in vin aret mwan avek lepe ek mayos konmsi mon en

voler? Zour apre zour, mon ti abitye asize e ansennyen dan tanp, pourtan zot pa ti vin aret mwan. Me tousala in arive pour ki sa ki bann profet in ekri i ganny akonplir.”—Matye 26:55, 56.

Sa group solda, sa komandan militer ek

bann zofisyè Zwif i tyonbo Zezi e anmar li. Ler bann zapot i vwar sa, zot taye. Par kont, “en serten zenn onm,” petet dispip Mark, i reste parmi lafoul pour li kapab swiv Zezi. (Mark 14:51) Bann dimoun dan lafoul i rekonnet li e zot esey tyonbo li, alor i taye e kit son lenz linenn deryer.



- ◇ Akoz Zida ti rod Zezi dan zarden Zetsemane?
- ◇ Dan pe sey defann Zezi, ki Pyer ti fer, me ki Zezi ti dir konsernan sa?
- ◇ Ki mannyer Zezi ti montre ki i ti dakor pour fer lavolonte Bondye?
- ◇ Ler bann zapot ti abandonn Zezi, lekel ki ti reste e ki ti arive apre?

## ZEZI I GANNY ANMENNEN KOT ANAS E APRE KOT KAIF

MATYE 26:57-68 MARK 14:53-65 LIK 22:54, 63-65 ZAN 18:13, 14, 19-24

Zot in anmar Zezi parey en kriminel e anmenn li kot Anas. Anas ti granpret ler Zezi ti fer bann ansenyan dan tanp etonnen a laz 12 an. (Lik 2:42, 47) Pli tar, serten bann garson Anas ti servi konman granpret e la aprezan son zann Kaif ki pe servi konman granpret.

Ler Zezi i kot lakaz Anas, Kaif i annan ase letan pour rasanble Sannedren. Dan sa lakour Sannedren, i annan 71 manm enkli granpret ek lezot ki ti servi konman granpret avan.

Anas i kestyonn Zezi “konsernan son bann disip ek son lansennyman.” Zezi i reponn senpleman par dir: “Mon’n koz devan tou dimoun

an piblik. Mon’n toultan ansenny dan sinagog e dan tanp kot tou bann Zwif i rasanble, mon pa’n zanmen dir nanryen an sekre. Akoz ou kestyonn mwan? Kestyonn sa bann ki’n tann sa ki mon’n dir.”—Zan 18:19-21.

En zofisy e ki pe debout la i donn Zezi en kalot dan son figir e i dir: “Koumsa ki ou reponn sef pret?” Me Zezi i konnen ki i pa’n fer nanryen mal, alor i dir: “Si mon’n dir en keksoz mal, dir mwan kwa ki mal, me si mon’n dir sa ki byen, akoz ou tap mwan?” (Zan 18:22, 23) Apre sa, Anas i fer laranzman pour Zezi ganny anmennen kot son zann Kaif.





Aprezan, Sannedren antye in rasanble. Sa i enkli granpret sa lannen, bann ansyen ek bann profeser lalwa. Zot zwenn kot lakaz Kaif. I ilegal pour ziz en dimoun zour Lapak, me sa pa anpes zot pour fer li aköz zot move lentansyon.

I evidan ki sa lakour pa anvı ziz Zezi dan en fason zis. Apre ki Zezi ti resisit Lazar, Sannedren ti decide ki Zezi ti devret mor. (Zan 11:47-53) Deplis, zis detrwa zour pase, bann sef relizye ti fer konplo pour tyonbo Zezi e touy li. (Matye 26:3, 4) Alor menm avan Zezi i konmans ganny zize, i konmsi i'n fini ganny kondannen amor!

Bann sef pret ek lezot manm Sannedren pa'n zis zwenn ilegalman, me zot osi pe esey rod bann temwen ki pou fer bann fo lakizasyon kont Zezi. Zot ganny bokou dimoun, me zot bann temwanyaz pa annakor avek kanmarad. Finalman, de temwen i vin dir: "Nou ti tann li dir, 'Mon pou detri sa tanp ki'n ganny fer avek lanmen e dan trwa zour mon pou rekonstri en lot ki pa'n ganny fer avek lanmen.'" (Mark 14:58) Par kont, menm sa bann zonn pa tonm dakor konpletman.

Kaif i demann Zezi: "Ou napa nanryen pour dir? Eski ou tande ki sa bann zonn pe dir kont ou?" (Mark 14:60) Zezi pa dir nanryen menm si sa bann temwen pe rakont bann fo zistwar ki pa an armoni avek kanmarad. Alor Granpret Kaif i esey en lot taktik.

Kaif i konnen ki bann Zwif i fasilman anko-ler ler en dimoun i dir ki i Garson Bondye. Avan sa, ler Zezi ti dir ki Bondye i son Papa, bann Zwif ti anvı touy li aköz zot ti krwar ki i ti pe esey fer "konmsi i egal avek Bondye." (Zan 5:17, 18; 10:31-39) Kaif i konnen ki mannyer zot santi, alor i esey trik Zezi par demann li: "Fer serman par Bondye vıvan pour dir laverite e dir nou si ou menm Kris, Garson Bondye!" (Matye 26:63) Byensir, Zezi in deza dir ki i Garson Bondye. (Zan 3:18; 5:25; 11:4) Si i pa reponn sa kestyon, zot kapab pran sa konman levidans ki i pa Garson Bondye ek Kris. Sanmenm sa Zezi i dir: "Mwan menm e zot pou vwar Garson zonn pe asize lo kote drwat sa Enn Pwisan e pe vin lo nyaz dan lesyel."—Mark 14:62.

Ler Kaif i tann sa, i desir son lenz e dir: "Sa zonn pe koz kont Bondye! Eski nou vremen bezwen lezot temwen ankor? Zot vwar! Zot menm zot in tann li pe koz kont Bondye! Ki zot dir?" Sannedren i pas zot zizman enzis e dir: "I merit lanmor."—Matye 26:65, 66.

Zot konmans monk Zezi e donn li koudpwen. Lezot i kalot li dan son figir e kras lo li. Apre ki zot in kouver son figir, zot kalot li e boufonn li: "Profetize! Lekel ki'n tap ou?" (Lik 22:64) La Garson Bondye pe ganny maltrete pli ba ki latter apre ki i'n ganny zize ilegalman pandan lannwit!

- 
- ◇ Kote Zezi ti ganny anmennen premye e ki ti arive avek li laba?
  - ◇ Kote Zezi ti ganny anmennen apre sa? Ki mannyer Kaif ti arive fer Sannedren kondann Zezi amor?
  - ◇ Dan ki fason Zezi ti ganny maltrete ler i ti ganny zize?

## KOT LAKAZ KAIF PYER I DIR I PA KONN ZEZI

MATYE 26:69-75 MARK 14:66-72 LIK 22:54-62 ZAN 18:15-18, 25-27

Ler Zezi i ganny tyonbo dan zarden Zetsemane, bann zapot i per e zot abandonn li. Par kont, de parmi zot i aret taye e zot swiv Zezi. Sa i Pyer “ensi ki en lot disip,” aparaman zapot Zan. (Zan 18:15; 19:35; 21:24) Petet zot swiv Zezi anmezir ki i pe ganny anmennen kot lakaz Anas. Ler Anas i anvoy Zezi kot Granpret Kaif, Pyer ek Zan i swiv li dan lwen. Petet zot per pour zot prop lavi e an menm tan zot enkyet pour sa ki kapab arive avek zot Met.

Granpret i konn Zan, alor i ganny permisyon pour antre dan lakour lakaz granpret. Pyer i reste deor kot baro ziska ki Zan i retournen e koz avek en servant ki vey baro. Apre sa, Pyer i ganny permisyon pour antre.

I fer fre sa zour swar, alor bann dimoun ki dan lakour in alim en dife. Pyer i asiz avek zot pour sof li anmezir ki i espere ‘pour vwar ki arive’ apre ki Zezi in ganny zize. (Matye 26:58) La aprezan dan laklerte dife, sa servant ki’n donn Pyer permisyon antre i ganny sans get li pli byen. I demande: “Pa ou osi ou en disip sa zonn ou?” (Zan 18:17) Pa zis sa servant ki rekonn Pyer e dir li ki i ti ansanm avek Zezi. —Matye 26:69, 71-73; Mark 14:70.

Pyer pa kontan sa ditou. I dir ki i pa ti avek Zezi. I dir: “Mon pa ni konn li, ni konpran ki ou pe dir.” (Mark 14:67, 68) I pe esey fer sir ki person pa rekonn li e i menm al deor kot lantre. I osi fer serman e dir “ki i devret ganny modi si i pe koz manti.”—Matye 26:74.

Antretan, Zezi pe ganny zize aparaman dan en landrwa kot lakaz Kaif ki par lao lakour.


I posib ki Pyer ek lezot ki pe espere anba i kapab vwar bann diferan temwen ki pe ale vini pour donn zot temwanyaz.

Zot konnen ki Pyer pa’n dir laverite lo Zezi e anfet i koz avek en aksan en dimoun ki sorti Galile. An plis, i annan en dimoun dan sa group ki trouv fanmir avek Malkis, sa zonn ki Pyer ti sot son zorey. Alor zot akiz Pyer: “Pa mon ti vwar ou dan zarden avek li mwan?” Ler Pyer i demanti pour en trwazyenm fwa, en kok i sante parey i ti’n ganny predir.—Zan 13:38; 18:26, 27.

I paret ki ler sa i arive, Zezi i lo sa balkon par lao sa lakour. Senyer i vire e get Pyer anba, sa in bezwen kas leker Pyer. I rapel sa ki Zezi ti dir li pli boner ler zot ti dan sa lasanm anler. Zis mazine ki mannyer Pyer i santi ler i realize sa ki i’n fer! Pyer i al deor e i plere asodlarm.—Lik 22:61, 62.

Ki mannyer sa in kapab arive? Ki mannyer Pyer, ki ti sitan asire ki i for spirityelman e fidel anver son Met, in kapab dir ki i pa konn Zezi? I paret ki tou sa ki’n arive in sirprann Pyer. Sa bann dimoun i devir parol Zezi e fer li pas pour en kriminel. Ler Pyer i kapab defann en zonn inosan, i vir son ledo avek sa Enn ki annan “parol lavi eternel.”—Zan 6:68.

Move leksperyans Pyer i montre ki menm en dimoun ki annan lafwa ek devosyon i kapab perdi son lekilib si i pa byen prepare pour bann tantasyon ek bann difikilte ki i pa ekspekte. Sa ki’n ariv avek Pyer i devret en laverisman pour tou serviter Bondye!



- ◇ Ki manyer Pyer ek Zan ti ganny permisyon pour antre dan lakour lakaz Kaif?
- ◇ Ler Pyer ek Zan ti dan lakour lakaz Kaif, ki ti pe arive anndan?
- ◇ Dapre Matye 26:74, ki Pyer ti fer?
- ◇ Ki lesan enportan nou aprann atraver leksperyans Pyer?



# ZEZI I GANNY ZIZE PAR SANNEDREN E APRE I GANNY ANMENNEN KOT PILAT

MATYE 27:1-11 MARK 15:1 LIK 22:66-23:3 ZAN 18:28-35

Lizour i pros pour fer ler Pyer i dir ki i pa konn Zezi pour en trwazyenm fwa. Bann manm Sannedren in fini avek zot swadizan zizman e zot in ale. Zot rezwenn ansanm Vandredi granmaten pour donn lenpresyon ki sa zizman ki zot in fer pandan lannwit i legal. Zezi i ganny anmennen devan Sannedren.

Ankor enn fwa zot demande: “Dir nou si ou menm ou Kris.” Zezi i reponn: “Menm si mon ti dir zot, zot pa ti pou zanmen krwar mwan. Deplis, si mon ti demann zot kestyon, zot pa ti pou reponn.” Par kont, avek kouraz Zezi i fer zot konnen ki i sa enn ki’n ganny predir dan Danyel 7:13. I dir: “Konmansman ozordi, Garson zonn pou asiz lo kote drwat Bondye pwisan.”—Lik 22:67-69; Matye 26:63.

Zot ensiste menm: “Eski ou menm ou Garson Bondye?” Zezi i reponn: “Zot menm zot pe dir ki mon Garson Bondye.” Pour zot, Zezi pe

koz an mal lo Bondye e i merit lanmor. Zot demande: “Akfer nou bezwen plis temwen?” (Lik 22:70, 71; Mark 14:64) Alor zot anmar lanmen Zezi e anmenn li kot Gouverner Romen Pons Pilat.

Petet Zida Iskaryot i vwar ler zot pe anmenn Zezi kot Pilat. Ler i realize ki Zezi in ganny kondannen, i santi en nespes regre ek dezespwar. Par kont, olye senserman repantir e retourn ver Bondye, i al rann sa 30 pyes larzan. Zida i dir bann sef pret: “Mon’n fer pese kan mon’n livre disan en inosan.” Me zot pa pran okenn pitye pour li e zot dir: “Sa pa konsern nou. Gete ou menm!”—Matye 27:4.

Zida i zet sa 30 pyes larzan dan tanp e i esey touy son lekor ki en lot keksoz mal ankor. I esey pann son lekor, me i paret ki sa brans ki’n anmar son lakord lo la i kase. Son lekor i pete ler i tonm anba lo ros.—Akt 1:17, 18.



I ankor granmaten ler Zezi i ganny anmenen kot pale Pons Pilat. Me bann Zwif ki anmen li laba i refize antre dan pale. Zot krwar ki zot pou vin enpir si zot annan okenn kontak avek bann dimoun lezot nasyon. Si zot ti enpir, zot pa ti pou kapab pran sa repa le 15 Nizan ki tonm premye zour Lafet Dipen san Lelven e ki pour zot, i form parti lafet Lapak.

Pilat i sorti deor e demann zot: “Ki lakizasyon zot annan kont sa zonn?” Zot reponn: “Si sa zonn pa ti en kriminel, nou pa ti pou’n amenn li kot ou.” Petet Pilat i santi ki zot pe esey met presyon lo li, alor i dir: “Pran li e ziz li zot menm dapre zot lalwa.” Bann Zwif i montre ki zot anv i Zezi i ganny touye. Zot dir: “I kont lalwa pour nou touy en dimoun.”—Zan 18:29-31.

Anfet, si bann Zwif i touy Zezi pandan lafet Lapak, i tre probab ki sa pou fer bann dimoun revolte kont zot. Par kont, bann Romen i ganny drwa met amor en dimoun. Si zot kapab fer bann Romen touy Zezi akoz i’n komet en krim kont gouvènmman Romen, bann dimoun pa pou kapab blanm bann Zwif.

Bann sef relizye pa dir Pilat ki zot in kondann Zezi akoz i’n koz an mal lo Bondye. La apre zot fer lezot fo lakizasyon: “Nou’n trouv sa zonn [1] pe fer dezord dan pei, [2] i defann nou pey taks Sezar e [3] i pe dir ki li menm li Kris, en lerwa.”—Lik 23:2.

Konman en reprezantan Ronm, Pilat i per ki sa ki bann Zwif pe dir lo Zezi i kapab vre e

ki Zezi i kapab pe esey vin en lerwa ki kont lotorite Ronm. Alor Pilat i retourn dan son pale, i kriy Zezi e demande: “Eski ou menm Lerwa bann Zwif?” Andotmo, ‘Eski ou’n kas lalwa lanpir Romen par dir ki ou en lerwa ki kont Sezar?’ Petet pour konnen ki kantite Pilat in fini tande lo li, Zezi i demande: “Ou menm ki pe demann sa ouswa lezot ki’n dir sa lo mwan?”—Zan 18:33, 34.

Pilat i dir ki i pa konn nanryen lo Zezi me ki i ti a kontan konnen. I dir: “Mon pa en Zwif mwan, non?” I azoute: “Ou prop nasyon ek bann sef pret ki’n livre ou avek mwan. Ki ou’n fer?”—Zan 18:35.

Zezi pa per pour reponn son kestyon konsernan si i en lerwa oubyen non. San dout, lafason ki i reponn i vreman sirprann Gouverner Pilat.

**LATER DISAN** Bann sef pret pa asire ki pou fer avek sa larzan ki Zida in zet dan tanp. Zot dir: “I kont lalwa pour met sa avek larzan tanp, akoz sa i larzan disan.” Alor zot servi sa larzan pour aste later sa potye pour servi konman en landrwa pour anter bann etranze. Sa i fer ki sa landrwa i ganny apele “Later Disan.”—Matye 27:6-8.



- ◇ Akoz Sannedren ti rezwenn granmaten?
- ◇ Ki manyer Zida ti mor e ki ti arive avek sa 30 pyes larzan?
- ◇ Lo ki sarz bann Zwif ti anv i Pilat i met Zezi amor?

# PILAT EK EROD I TROUV ZEZI INOSAN

MATYE 27:12-14, 18, 19 MARK 15:2-5 LIK 23:4-16 ZAN 18:36-38

Zezi pa per pour dir Pilat ki i vreman en lerwa. Me kantmenm sa, son Rwayonm pa en danze pour Ronm. Zezi i dir: “Mon Rwayonm pa form parti sa lemonn. Si mon Rwayonm ti form parti sa lemonn, mon bann dimoun ti pou’n lager pour ki mon pa ganny livre avek bann Zwif. Me parey ou vwar, mon Rwayonm pa sorti dan sa lemonn.” (Zan 18:36) Zezi i annan en Rwayonm, me i pa sorti dan sa lemonn.

Pilat pa les keksoz fini koumsanmenm, i demande: “Be, alor, eski ou en lerwa?” Zezi i fer Pilat konnen ki i’n tonm lo sa bon konklizyon. I dir: “Ou menm ou pe dir ki mon en lerwa. Se pour sa ki mon’n ne e ki mon’n vin dan lemonn pour rann temwanyaz lo laverite. Tou sa ki dan kote laverite i ekout mwan.”—Zan 18:37.

Pli boner, Zezi ti’n dir Toma: “Mwan menm semen, laverite ek lavi.” La aprezan menm Pilat i tande ki Zezi in ganny anvoye lo later pour rann temwanyaz konsernan “laverite,” sirtou laverite konsernan son Rwayonm. Zezi i determinen pour reste fidel avek sa laverite menm si sa i kout li son lavi. Pilat i demande: “Kisisa laverite?” me i pa esper larepons. I santi ki i’n tann ase pour li pas son zizman.—Zan 14:6; 18:38.

Pilat i retourn kot sa lafoul ki pe espere an deor pale. I paret ki Zezi pe debout dan son kote ler i dir bann sef pret ek bann ki avek zot: “Mon pa vwar sa zonn koupab pour okenn krim.” Lafoul i ankoler ler zot tann sa e zot existe: “Sa ki i pe ansennyen i fer dimoun dan Zide antye, depi Galile ziska isi revolte.”—Lik 23:4, 5.

Pilat i bezwen sirprann ler i vwar ki bann Zwif i bann fanatik ki i pa kapab rezonn avek.

Anmezir ki bann sef pret ek ansyen i kontinyen kriye, Pilat i demann Zezi: “Ou pa tande sa kantite keksoz ki zot pe temwanyan kont ou?” (Matye 27:13) Zezi pa reponn zot. Lefet ki i reste kalm ler zot pe fer tou sa bann fo lakizasyon lo li i vreman sirprann Pilat.

Bann Zwif i dir ki Zezi in konmans ansenny ‘Galile.’ Ler Pilat i tann sa, i konpran ki Zezi i en Galileen. Sa i donn Pilat en nide pour pa ziz Zezi. Erod Antipas (garson Erod Legran) i dirizan Galile e i’n vin Zerizalenm akoz bann Zwif pe selebre Lapak. Alor Pilat i anvoy Zezi kot Erod. Li menm li Erod Antipas ki ti fer sot latet Zan ki batize. Apre sa, ler Erod ti tande ki Zezi pe fer bann mirak, i ti per ki Zezi i Zan ki’n ganny resisite.—Lik 9:7-9.

Erod i vreman kontan ki i pou ganny sans vwar Zezi. Sa i pa akoz i anvi ed Zezi oubyen akoz i vreman anvi esey vwar si sa bann lakizasyon kont Zezi i vre. Erod i zis anvi vwar Zezi e i “swete vwar li fer mirak.” (Lik 23:8) Par kont, Zezi pa fer sa ki Erod pe ekspekte. Anfet, ler Erod i demann Zezi kekyon i pa dir li ni menm en mo. Sa i dezapwent Erod e li ek son bann solda i “maltret li.” (Lik 23:11) Zot met en zoli lenz lo li e boufonn li. Apre Erod i reanvoy Zezi kot Pilat. Erod ek Pilat ti bann gran lennmi, me la zot in vin bon dalon.

Ler Zezi i retournen, Pilat i rasanble bann sef pret, bann dirizan Zwif ek lepep e i dir: “Mon’n kekyonn li devan zot me mon pa’n vwar li koupab pour okenn sa bann zafer ki zot in akiz li. Anfet Erod osi pa’n trouv li koupab parski i’n fer li retourn kot nou e parey zot vwar i pa’n fer nanryen ki merit lanmor. Alor, mon pou pini li e larg li.”—Lik 23:14-16.





Pilat i anvi larg Zezi akoz i realize ki bann pret in anmenn Zezi kot li akoz zot zalou. Ler Pilat pe esey rod en fason pour larg Zezi, i ganny plis rezon ankor pour fer li. Ler i pe asiz dan sez ziz, son madanm i anvoy li en mesaz: “Pa bezwen annan nanryen pour fer avek sa

zonm drwat, parski mon latet i fatige en kantite ozordi akoz en rev [aparaman en rev sorti kot Bondye] ki mon’n gannyen akoz li.”—Matye 27:19.

Ki mannyer Pilat i kapab larg sa zonm inosan parey i sipoze?

- ◇ Ki mannyer Zezi ti dir “laverite” konsernan son rwayonm?
- ◇ Ki konklizyon Pilat ti tonm lo la konsernan Zezi, ki mannyer bann dimoun ti reazir e ki Pilat ti fer?
- ◇ Akoz Erod Antipas ti kontan pour vwar Zezi e ki i ti fer avek li?
- ◇ Akoz Pilat ti anvi larg Zezi?

## PILAT I DIR: “GETE! LA SA ZONM!”

MATYE 27:15-17, 20-30 MARK 15:6-19 LIK 23:18-25 ZAN 18:39-19:5

Pilat in dir sa lafoul ki anvi Zezi i ganny met amor: “Mon pa’n vwar li koupab pour okenn sa bann zafer ki zot in akiz li. Anfet Erod osi pa’n trouv li koupab.” (Lik 23:14, 15) Pilat i esey en lot metod pour larg Zezi. I dir avek lepep: “Zot annan en koutim ki mon devret larg en zonn zour lafet Lapak. Alor, eski zot oule ki mon larg Lerwa bann Zwif?”—Zan 18:39.

Pilat i konnen ki i annan en prizonnyen ki apel Barabas, ki tou dimoun i konnen ki i en voler, i rebel kont gouvènmàn e i en mertriye. Alor Pilat i demande: “Lekel ki zot anvi mon large, Barabas ouswa Zezi sa swadizan Kris?” Bann sef pret i persyad lafoul pour demande ki Barabas i ganny large, pa Zezi. Ankor enn fwa Pilat i demande: “Lekel ant sa de zot anvi mon large?” Lafoul i kriye: “Barabas.”—Matye 27:17, 21.

Pilat pa oule krwar e i demande: “Be save-dir, ki mon devret fer avek Zezi sa swadizan Kris?” Bann dimoun i kriy pli for ankor: “Klout li lo poto!” (Matye 27:22) Pa i en laont ki zot

oule tou en dimoun inosan. Pilat i redemann zot: “Akoz? Ki sa zonn in fer mal? Mon pa’n trouv nanryen ki fer li merit lanmor. Alor mon pou pini li e apre larg li.”—Lik 23:22.

Malgre tou sa zefor ki Pilat in fer, dan zot gran lakoler sa lafoul i kontinyen kriye: “Klout li lo poto!” (Matye 27:23) Bann sef relizye in telman eksit lafoul ki zot zis anvi touy Zezi. Zot pa anvi touy en kriminel oubyen mertriye, me en zonn inosan ki zis senk zour pase ti ganny akeyir Zerizalenm konman en Lerwa. Si bann disip Zezi i la, zot reste trankil pour person pa rekonnèt zot.

Pilat i vwar ki tou son zefor pa’n abouti dan nanryen. Bann dimoun pe konmans revolte, alor i pran en pe delo e lav son lanmen devan bann dimoun. I dir zot: “Mon pa responsab disan sa zonn. Zot, gete ki zot pou fer.” Menm sa pa sanz latitud bann dimoun. O kontrè, zot dir: “Nou ek nou zanfan ki pou responsab pour son disan.”—Matye 27:24, 25.

Gouverner i pli anvi fer bann Zwif plezir ki

**BANN FWET ROMEN** Dan en zournal (*The Journal of the American Medical Association*) Dokter William Edwards i eksplike ki mannyer bann Romèn ti abitye fwet dimoun:

“Normalman zot ti servi en pti fwet (ki apel *flagrum* oubyen *flagellum* an Latèn) ki ti annan plizyer lakord lapo oubyen plizyer lakord lapo trese diferan longer. I ti annan bann pti boul feray oubyen bann bout lezo mouton pwent tou dilon sa bann lakord. . . . Anmezir ki bann solda Romèn ti kontinyelman fwet ledò sa dimoun avek tou zot lafors, sa ti lev bann gro bos ble kot bann boul feray ti tap li. Bann lakord lapo ek bann lezo mouton ti koup koup lapo ek laser sa dimoun. Apre, anmezir ki sa dimoun ti kontinyen ganny fwete, sa fwet ti sizle son bann misk. Finalman, i ti annan bann bout laser anpandan e sa dimoun ti senny en kantite.”



fer sa ki i konnen i byen. Alor, annakor avek zot demann, Pilat i larg Barabas. Zot tir lenz Zezi lo li e fwet li.

Apres ki bann solda in bat e tortir Zezi, zot anmenn li kot pale gouverner. Tou bann solda i rasanble otour li e zot kontinyen fer li martir. Zot tres en kouronn pikan pour imilye li e pez li lo son latet. Bann solda i osi met en baton dan lanmen drwat Zezi e met en lenz mov lo li ki bann lerwa i abitye mete. Zot boufonn li: “Bonzour Lerwa bann Zwif!” (Matye 27:28, 29) An plis ki sa, zot kras lo Zezi e tap li kalot dan son figir. Zot pran sa baton e tap li lo son latet. Sa i anfans sa “kouronn” pikan pli dan fon dan son latet.

Menm si Zezi i pas dan tou sa martir, i reste kalm e i kontinyen demontre en kouraz ekstraordiner. Tousala i enpresyonn Pilat e ankor enn fwa i esey pa pran responsabilite pour lanmor Zezi. I dir: “Gete! La mon pe anmenn li deor kot zot pour zot konnen ki mon pa vwar nanryen mal avek li.” Petet Pilat pe mazine ki ler i anmenn Zezi deor kot zot apre ki i’n ganny tortire e pe sennyen, zot pou pran lapenn pour Zezi. Ler Zezi i debout devan sa lafoul ki napa en sou pitye, Pilat i dir: “Gete! La sa zonn!”—Zan 19:4, 5.

Menm si Zezi in ganny bate, i reste trankil e kalm. I bezwen ki Pilat in remark sa akoz sa ki i dir i montre respe ek pitye anver Zezi.

- 
- ◇ Ki mannyer Pilat ti esey fer Zezi ganny large e pa pran responsabilite pour lanmor Zezi?
  - ◇ Sa letan, ki mannyer en dimoun ti ganny fwete?
  - ◇ Apre ki Zezi ti ganny fwete, ki mannyer i ti ganny maltrete?
- 





# ZEZI I GANNY ANMENNEN POUR GANNY MET AMOR

MATYE 27:31, 32 MARK 15:20, 21 LIK 23:24-31 ZAN 19:6-17

Menm si Zezi in vreman ganny maltrete e boufonnen, Pilat pa'n kapab sanz nide bann sef pret ek lezot ki dan zot kote pour larg Zezi. Zot pa anv i ki okenn keksoz i anpes Zezi ganny met amor. Zot kontinyen kriye: "Klout li lo poto! Klout li lo poto!" Pilat i reponn: "Pran li zot menm e met li amor parski mwan mon pa'n vwar nanryen mal avek li."—Zan 19:6.

Bann Zwif pa reisi konvenk Pilat ki Zezi i devret ganny met amor akoz i'n fer en keksoz kont gouvènmàn, me eski zot kapab konvenk li ki i'n kas en lalwa relizye? Parey zot ti fer devan Sannedren, zot akiz Zezi ki i'n koz kont Bondye. Zot dir: "Nou annan en lalwa e dapre sa lalwa i merit lanmor parski i'n dir ki i Garson Bondye." (Zan 19:7) Sa i premye fwa ki Pilat i tann sa lakizasyon.

I retourn dan son pale e esey rod en fason pour larg sa zonn ki'n reste ferm malgre tou sa martir ki i'n pas ladan e osi ki son madanm in rev li. (Matye 27:19) Ki Pilat pou fer konsernan sa nouvo lakizasyon ki bann Zwif pe fer kont sa prizonnyen, setadir ki i "Garson Bondye"? Pilat i konnen ki Zezi i sorti Galile. (Lik 23:5-7) Me selman i demann Zezi: "Kot ou sorti?" (Zan 19:9) Eski i posib ki Pilat pe esey rode si Zezi in viv dan lesyel avan e si i ti en bondye?

Pilat in tann Zezi li menm dir ki i en lerwa me ki son Rwayonn pa form parti sa lemonn. Zezi pa bezwen donn plis detay lo sa ki i'n dir pli boner, alor i reste trankil. Pilat i ankoler ki Zezi pa'n reponn e i dir li: "Ou pa oule koz avek mwan? Ou pa konnen ki mon annan lotorite pour larg ou e lotorite pour met ou amor?"—Zan 19:10.

Zezi i senpleman dir: "Ou ti pou napa okenn lotorite lo mwan si Bondye pa ti'n donn ou sa lotorite. Se pour sa rezon ki sa zonn ki'n livre mwan avek ou in fer en pli gro pese ki ou." (Zan 19:11) I tre probab ki Zezi pa pe mazin zis en dimoun spesifikman. Plito i pe dir ki Kaif, bann ki'n ed li ek Zida Iskaryot i pli kou-pab ki Pilat.

Pilat i enpresyonnen avek lafason ki Zezi i konport li e koze. Alor i konmans pli per ankor ki Zezi i vreman en bondye e ankor enn fwa i esey larg li. Me bann Zwif i servi en lot taktik pour fer per Pilat. Zot dir: "Si ou larg sa zonn ou pa en zanmi Sezar. Tou sa ki dir i en lerwa i koz kont Sezar."—Zan 19:12.

Gouvèner i anmenn Zezi deor ankor enn fwa e asiz lo sez ziz e dir lepep: "Gete! La zot lerwa!" Me bann Zwif pa le les tonbe. Zot kriye: "Touy li! Touy li! Klout li lo poto!" Pilat i dir zot ankor: "Eski mon devret touy zot lerwa?" Pour en bon pe letan, bann Zwif pa'n kontan ki zot anba dominasyon Romen, me la bann sef pret i kontan pour dir: "Nou napa okenn lerwa apard Sezar."—Zan 19:14, 15.

Bann Zwif in telman met presyon lo Pilat ki finalman i sede e i livre Zezi avek zot pour li ganny met amor. Bann solda i tir sa lenz mov lo Zezi e remet son manto lo li. Anmezir ki Zezi i ganny anmenn en potò martir.

I pros midi, Vandredi le 14 Nizan. Zezi pa'n dormi depi ki i'n leve Zedi granmaten e i'n pas dan tou sort kalite martir. I nepli annan okenn lafors pour anmenn sa potò ki vreman lour. Alor bann solda i fors Simon sorti Sirenn, Lafrik, ki pe pase pour anmenn sa potò martir



ziska kot i pou ganny touye. En kantite dimoun i swiv zot e serten pe tap zot lestoman e fer leokri akoz sa ki pe arive.

Zezi i dir avek bann madanm ki pe plere: “Fiy Zerizalenm, aret plere pour mwan. Plito pler pour zot menm ek zot zanfan, parski en zour dimoun pou dir, ‘Ere bann madanm steril. Ere bann madanm ki pa’n donn nesans e ki pa’n donn tete pti baba!’ Sa letan zot pou konmans dir bann montanny, ‘Tonm lo nou!’ e bann pti montanny ‘Kouver nou!’ Si zot fer sa

bann keksoz ler sa pye dibwa i ver, ki i pou arive ler i sek?”—Lik 23:28-31.

Zezi pe refer avek nasyon Zwif. Sa nasyon i parey en pye dibwa ki pe mor, me ki pa ankor sek konpletman akoz bann Zwif ki krwar dan Zezi e Zezi li menm i ankor la. Ler Zezi i mor e son bann disip i sorti dan larelizyon Zwif, sa nasyon pou sek spirityelman parey en pye dibwa mor. Zot pou annan rezon fer leokri ler Bondye i servi larme Romen pour detri sa nasyon Zwif!

- 
- ◇ Ki lakizasyon bann sef relizye ti fer kont Zezi?
  - ◇ Akoz Pilat ti konmans per?
  - ◇ Ki mannyer bann sef pret ti reisi fer Zezi ganny met amor?
  - ◇ Ki i vedir ler Zezi ti dir ki sa pye dibwa i “ver” e apre i pou vin “sek”?

## EN LERWA INOSAN I SOUFER LO POTO

MATYE 27:33-44 MARK 15:22-32 LIK 23:32-43 ZAN 19:17-24

Zezi i ganny anmennen en landrwa ki pa tro lwen avek lavil kot li ek de voler pou ganny met amor. Sa landrwa i apel Golgota, ki vedir Koksis e i en landrwa ki dimoun i kapab vwar “dan lwen.”—Mark 15:40.

Zot tir lenz sa trwa zonm ki’n ganny kondannen. Apre sa, zot ganny ofer diven melanze avek lamir ek en keksoz anmer. Aparaman, bann madanm Zerizalenm ki’n prepar sa melanze e bann Romen pa anpes bann ki pe ganny met amor pran sa pour apez zot douler. Me ler Zezi i gout sa diven, i refize bwar. Akoz? I pa anv i okenn sibstans i anpes li konpran tou sa ki pe pase pandan sa gran leprev akoz i anv i konsyan e fidel ziska son lanmor.

Zot met Zezi lo poto. (Mark 15:25) Bann solda i tap klou dan son lanmen ek lipye e sa i pers son laser ek ligaman. Sa i vreman fermal. Ler zot met sa poto debout, Zezi i dan bokou plis douler ankor akoz pwa son lekor i desir kot klou in perse. Malgre tousala, Zezi pa ankoler avek bann solda. I priye: “Papa, pardonn zot, parski zot pa konnen ki zot pe fer.”—Lik 23:34.

Normalman bann Romen i met en lansenny ki montre ki sa kriminel in fer. Safwasi, Pilat in fer en lansenny ganny mete ki dir: “Zezi sa Nazareen Lerwa bann Zwif.” Sa lansenny in ganny ekri an Ebre, Laten ek Grek pour ki laplipar dimoun i kapab lir li. Sa i montre ki Pilat i vreman mepriz bann Zwif ki’n ensiste pour ki Zezi i ganny met amor. Bann sef pret pa kontan e zot dir: “Pa bezwen ekri, ‘Lerwa bann Zwif,’ me ki i ti dir, ‘Mwan menm Lerwa bann Zwif.’” Toudmenm, Pilat pa anv i fer tou sa ki zot dir li, alor i dir: “Sa ki mon’n ekri, mon’n fini ekri.”—Zan 19:19-22.

Bann pret ankoler i repet sa menm fo lakizasyon ki zot ti fer pli boner ler Sannedren ti pe ziz Zezi. I pa drol ki dimoun ki pe pase i sakouy latet e maltret li par dir: “Arya! Ou ki ti pou detri tanp Bondye e rekonstri li dan trwa zour, sov ou lekor, sorti lo sa poto martir.” Dan menm fason osi, bann sef pret ek profeser la-lwa i dir avek kanmarad: “I Kris ek Lerwa Izrael, les li sorti lo sa poto martir la konmela pour ki nou vwar e krwar.” (Mark 15:29-32) Menm sa de voler ki dan kote gos e kote drwat Zezi i ensilte li, menm si Zezi i inosan.



Sa kat solda Romen osi i boufonn Zezi. Aparaman zot pe bwar vineg. Pour boufonn Zezi, zot fer konmsi zot pe al donn li en pe osi, me evidaman Zezi pa arive pran en pe pour li bwar. Bann Romen i servi sa ki lo sa lansenny par lao latet Zezi e zot monk li: “Si ou Lerwa bann Zwif, sov ou lekor.” (Lik 23:36, 37) Zis mazinen, san okenn rezon, zot boufonn e maltret sa zonm ki semen, laverite ek lavi. Par



kont, Zezi i aksepté tousala san kondann bann Zwif ki pe gete, bann solda Romen ki pe boufonn li oubyen sa de kriminel ki'n ganny kloute lo poto akote li.

Sa kat solda in pran manto Zezi e zot desir li an kat. Zot tir osor pour gete lekel ki pou ganny ki bout. Me son lenz par anndan i pli bon kalite parski i 'napa koutir, akoz i en sel pyes latwal depi anler ziska anba.' Bann solda i mazinen: "Annou pa desir sa enn me tir osor pour deside lekel ki pou ganny sa lenz." Sa i akonpli sa ki lekritir i dir: "Zot ti partaz mon lenz antre zot e zot ti tir osor pour mon lenz." —Zan 19:23, 24; Psonm 22:18.

Pli tar, enn sa bann kriminel i realize ki Zezi i bezwen en lerwa. I koz severman avek sa lot kriminel e dir li: "Eski ou napa okenn respe pour Bondye la ki ou osi ou'n ganny menm zizman? Parski nou nou'n ganny sa ki nou merite pour bann keksoz ki nou'n fer, me sa zonm pa'n fer nanryen mal." Apre sa, i dir Zezi: "Mazin mwan ler ou vin Lerwa." —Lik 23:40-42.

Zezi i reponn: "Laverite mon dir ou ozordi, ou pou avek mwan dan Paradi," pa dan son Rwayonm, me "dan Paradi." (Lik 23:43) Sa promes i diferan avek sa ki Zezi in dir son bann zapot, setadir, ki zot pou asiz lo bann tronm avek li dan son Rwayonm. (Matye 19:28; Lik 22:29, 30) Par kont, i posib ki sa kriminel



ki ti Zwif in deza tann koz lo Paradi lo later ki Zeova ti'n donn Adan ek Ev e zot desandans. La aprezan sa voler i kapab mor avek sa lespwar.

- 
- ◇ Akoz Zezi ti refize bwar sa diven ki'n ganny ofer?
  - ◇ Ki lansenny ki ti ganny mete par lao latet Zezi e ki mannyer bann Zwif ti reakte?
  - ◇ Ki mannyer sa ki zot ti fer avek lenz Zezi i akonpli en profesy?
  - ◇ Ki lespwar pour lavenir Zezi ti donn enn sa bann kriminel?

## “VREMAN SA ZONM TI GARSON BONDYE”

MATYE 27:45-56 MARK 15:33-41 LIK 23:44-49 ZAN 19:25-30

La i midi le 14 Nizan. ‘Depi midi ziska trwa-z-er apremidi, pei antye i dan fernwanr.’ (Mark 15:33) Sa fernwanr i fer per me i pa en leklips soley. Normalman en leklips soley i selman ariv dan letan nouvellin, me la i plennlin akoz i lafet Lapak. Deplis, sa fernwanr pa dir pour zis detrwa minit parey en leklips soley. Alor i evidan ki se Bondye ki’n fer sa fernwanr arive!

Zis mazin en ki lefe sa i bezwen annan lo bann ki pe monk Zezi. Pandan sa fernwanr, kat madanm i vin kot poto martir. Sa i manman Zezi, Salome, Mari Magdalenn ek Mari manman Pti Zak ki en zapot.

Zapot Zan i ansanm avek manman Zezi ki vremen tris “lanmenm o bor poto martir.” Mari pe get son garson ki i’n elve depi pti baba pe soufer lo poto. Pour li, i konmsi i’n ganny perse avek “en gran lepe.” (Zan 19:25; Lik 2:35) Pourtan, dan tou son douler, Zezi i mazin byennet son manman. I bouz son latet dan direksyon Zan e i dir avek son manman: “Madanm, gete! La ou garson.” Apre i bouz son latet dan direksyon Mari e i dir Zan: “Gete! La ou manman!”—Zan 19:26, 27.

**“KLOUT LI LO POTO”** Bann lennmi Zezi i kriye: “Klout li lo poto!” (Zan 19:15) Sa mo Grek ki’n ganny tradwir konman “poto” dan bann Levanzil i *stau-ros*. Sa liv *History of the Cross* i dir: “*Stauros* i vedir en gro ‘poto drwat.’ I parey sa ki bann fermye ti servi pour fer bann gran baraz. Sa mo napa okenn lezot sinifikasyon.”

Zezi pe donn sa zapot ki i kontan sa responsabilite pour pran swen avek son manman, ki aparaman i en vev aprezan. Zezi i konnen ki son bann demi frer, setadir bann lezot garson Mari, pa ankor annan lafwa dan li. Alor i pe fer laranzman pour ki en dimoun i pran swen avek son manman fizikman e spirityelman. Pa sa i en bon legzanp!

Ver 3 er apremidi, Zezi i dir: “Mon swaf.” Ler i dir sa parol, sa i akonpli sa ki’n ganny rikorde dan lekritir. (Zan 19:28; Psonm 22:15) Zezi i santi ki son Papa pa pe protez li pour ki son lentegrite i ganny konpletman teste. Kris i kriye petet dan en dyalek Arameen ki zot koze Galile: “*Eli, Eli, lama sabaktani?*” ki vedir, “Mon Bondye, mon Bondye, akoz ou’n abandonn mwan?” Serten parmi bann ki pe debout la i dir: “Ekoute! I pe kriy Eliya.” En dimoun i taye e met en leponz ki’n ganny tranpe dan vinneg lo bout en baton e donn Zezi pour bwar. Me lezot i dir: “Les li! Annou gete si Eliya i vini pour tir li lo sa poto.”—Mark 15:34-36.

Apre sa, Zezi i kriye: “I’n ganny akonplir!” (Zan 19:30) Zezi in akonpli tou sa ki son Papa in anvoy li pour fer lo later. Finalman Zezi i dir: “Papa, mon met mon lavi dan ou lanmen.” (Lik 23:46) Koumsa Zezi i donn Zeova son lavi e i annan en konfyans total ki Bondye pou resisit li. Apre sa, Kris i bes son latet e mor.


Ler sa i arive, i annan en gro tranblemandter ki fann bann ros. I sitan for ki bann latonm an deor Zerizalenm i ouver e bann lekor mor i sorti an deor latonm. Me ler bann ki pe pase i vwar bann lekor mor an deor latonm, zot al dan “lavil sen” e rakont sa ki zot fek vwar.—Matye 12:11; 27:51-53.

Ler Zezi i mor, sa gran rido lour ki separ Sen avek Tre Sen dan tanp Bondye i desir an de, depi anler ziska anba. Sa levennman etonan i arive akoz Bondye i ankoler avek bann ki'n touy son Garson e i montre ki aprezan i posib pour antre dan Tre Sen, setadir lesyel.—Ebre 9:2, 3; 10:19, 20.

Nou kapab konpran akoz bann dimoun i konmans vreman per. Sa zofisyè larme ki ansarz sa legzekisyon i dir: “Vreman sa zomn ti Garson Bondye.” (Mark 15:39) Petet i ti la ler Zezi ti pe ganny zize devan Pilat e zot ti pe diskite si i Garson Bondye oubyen non. La apre-zan i asire ki Zezi i en dimoun drwat e ki i vreman Garson Bondye.

Lezot i sirprann ler zot vwar sa bann keksoz ekstraordiner ki pe arive, zot al kot zot e zot “tap zot lestoman” akoz zot tris e onte. (Lik 23:48) Parmi bann ki pe gete dan lwen i annan en kantite madanm ki disip Zezi e ki par ler ti vwayaz avek li. Sa bann keksoz ki'n arive i osi annan en gran lefe lo zot.

- 
- ◇ Akoz sa fernwanr ki ti dire pour trwa-z-erdtan pa ti en leklips soley?
  - ◇ Ki bon legzanp Zezi ti donnen konsernan pran swen avek bann paran aze?
  - ◇ Ki ti arive ler i ti annan sa tranblemandter? Akoz sa rido dan tanp ti desir an de?
  - ◇ Ki lefe lanmor Zezi ek bann keksoz ki ti arive ti annan lo bann ki ti la?
- 





## LEKOR ZEZI I GANNY PREPARE E METE DAN LATONM

MATYE 27:57–28:2 MARK 15:42–16:4 LIK 23:50–24:3 ZAN 19:31–20:1

I tar apremidi Vandredi le 14 Nizan. Ler soley i kouse, Saba le 15 Nizan pou konmanse. Zezi in fini mor, me sa de voler akote li i ankòr vivan. Dapre Lalwa, en “lekor pa devret reste lo poto lannwit antye.” I devret ganny antere “menm zour.”—Deteronnm 21:22, 23, NWT.

An plis ki sa, Vandredi apremidi i apel zour Preparasyon akòz bann dimoun i kwi manze e zot fini fer lezot louvraz ki pa pou kapab ganny fer apre Saba. Apre soley kouse, en “gran Saba” i konmanse akòz de Saba i tonm menm zour. (Zan 19:31) Le 15 Nizan pou tonm premye zour sa Lafet Dipen san Lelven ki dire

pour set zour. Premye zour sa lafet in toutan en Saba. (Levitik 23:5, 6) Safwasi, sa premye zour i tonm menm zour avek Saba ki ganny fer setyenm zour tou le semenn.

Alor bann Zwif i demann Pilat pour fer Zezi ek sa de voler akote li mor pli vit. Ki mannyer? Par kas zot lazanm. Sa pou fer li enposib pour zot servi zot lipye pour lev zot lekor anler pour ki zot kapab respire. Bann solda i al kas lazanm sa de voler. Me i paret ki Zezi in fini mor, alor zot pa kas son lazanm. Sa i akonpli Psonm 34:20 ki dir: “I vey lo tou son bann lezo; napa enn ki pou ganny kase.”



Pour fer sir ki Zezi in vreman mor, en solda i pik li dan son kote avek en lans. I pik kot son leker i ete. ‘Deswit disan ek delo i koule.’ (Zan 19:34) Sa i akonpli en lot verse dan Labib: “Zot pou get sa enn ki zot ti perse.”—Zekarya 12:10, *NWT*.

Zozef, “en zonm ris sorti Arimate” e en manm respektab dan Sannedren i osi la ler Zezi i ganny met amor. (Matye 27:57) I ganny dekrir konman “en zonm drwat e en bon dimoun” ki “pe esper Rwayonm Bondye.” Anfet, vi ki i ‘en disip Zezi me an sekre akoz i per bann Zwif,’ i pa dakor avek sa zizman ki lakour in fer kont Zezi. (Lik 23:50; Mark 15:43; Zan 19:38) Avek kouraz, Zozef i demann Pilat si i kapab pran lekor Zezi. Pilat i apel sa zofisye larme ki ansarz pour konfirmen ki Zezi in mor. Alor Pilat i donn Zozef permisyon pour pran lekor Zezi.

Zozef i aste latwal linenn fen e prop e tir lekor Zezi lo poto. I anvlop son lekor dan sa latwal linenn pour prepar li pour ganny mete dan latonm. Nikodenm, “ki ti’n al kot Zezi pour premye fwa en zour swar” i ede fer bann preparasyon. (Zan 19:39) I anmenn en melanz apepre 30 kilo lamir ek lalwes ki byen ser. Zot anvlop lekor Zezi dan bann latwal ki annan sa bann zepis parey i abitye ganny fer dapre koutim bann Zwif avan ki en dimoun i ganny mete dan latonm.

Zozef i annan en latonm ki pa’n deza ganny servi. Sa latonm in ganny fouye dan ros pa tro lwen e zot met lekor Zezi ladan. Apre sa, en gro ros i ganny mete devan larantre sa latonm. Zot fer sa vitman, avan Saba i konmanse. Petet Mari Magdalenn ek Mari manman Pti Zak in ede prepar lekor Zezi. Aprezan zot depese e al kot zot “pour al prepar bann zepis santi bon ek delwil parfimen,” pour zot kontinyen prepar lekor Zezi apre Saba. —Lik 23:56.

Son lannmen i Saba e bann sef pret ek Farizyen i al kot Pilat e dir: “Nou rapel byen, ler i ti ankor vivan, sa manter ti dir, ‘Apre trwa zour mon pou ganny resisite.’ Alor, donn lord pour ki sa latonm i ganny veye ziska trwazyenm zour, pour ki son bann disip pa vin vol son lekor e apre dir avek lezot, ‘I’n ganny resisite!’ Parski si non, sa mansonz pou pli pir ki sa enn premye.” Pilat i reponn zot: “Zot kapab ganny en gard. Ale, fer veye parey zot oule.” —Matye 27:63-65.

Byen boner Dimans bomaten, Mari Magdalenn, Mari manman Zak ek lezot madanm i anmenn bann zepis kot latonm pour okip lekor Zezi. Zot dir avek kanmarad: “Lekel ki pou roul sa ros ki dan larantre latonm pour nou?” (Mark 16:3) Me i ti annan en tranblemandter. Deplis, lanz Bondye in tir sa ros, bann gard in ale e i paret ki latonm i vid!

- 
- ◇ Akoz Vandredi ti ganny apele zour Preparasyon e akoz sa ti en “gran” Saba?
  - ◇ Ki Zozef ek Nikodenm ti fer avek lekor Zezi e ki relasyon zot ti annan avek Zezi?
  - ◇ Ki bann pret ti anvi fer e ki ti arive Dimans granmaten?

## LATONM I VID PARSKI ZEZI I VIVAN!

MATYE 28:3-15 MARK 16:5-8 LIK 24:4-12 ZAN 20:2-18

Bann madanm pa oule krwar ki latonm i vid! Mari Magdalenn i tay kot 'Simon Pyer ek sa disip ki Zezi i kontan,' setadir zapot Zan. (Zan 20:2) Par kont, lezot madanm ki'n reste kot latonm i vwar en lanz. I osi annan en lot lanz dan latonm dan "lenz blan."—Mark 16:5.

Enn sa bann lanz i dir zot: "Pa bezwen per, parski mon konnen zot pe rod Zezi ki ti ganny met amor lo poto. I pa la, akoz i'n ganny resisite zis parey i ti dir. Vini, vin get landrwa kot i ti ete. Apre sa, depese e al dir son bann disip ki i'n ganny resisite parski la i pe al esper zot Galile." (Matye 28:5-7) Sa bann madanm pa oule krwar e zot tranble, alor zot taye pour al rakont bann disip.—Mark 16:8.

Pandan sa letan, Mari in zwenn Pyer ek Zan. I dir: "Zot in tir Senyer dan latonm e nou pa

konnen kote zot in met li." (Zan 20:2) Pyer ek Zan i taye. Zan i tay pli vit e i ariv kot latonm premye. I get dan latonm e vwar bann latwal, me i reste deor.

Ler Pyer i arive, i al direk anndan. I vwar bann latwal linenn ek sa latwal ki zot ti met lo latet Zezi. Zan li, i antre dan latonm e i krwar sa ki Mari in dir. Malgre sa ki Zezi ti dir avan, ni enn parmi zot pa konpran ki i'n ganny resisite. (Matye 16:21) Zot tou le de zot pa konpran sa ki'n arive e zot retourn dan lakour. Me Mari, ki'n retourn kot latonm i reste lanmenm.

Antretan, lezot madanm i lo semen pe al kot bann disip pour dir zot ki Zezi in resisite. Ler zot pe taye pour al dir zot, Zezi i zwenn zot e dir: "Bonzour!" Zot "tonm azenou devan li." Apre sa, Zezi i dir: "Pa bezwen per! Al dir





mon bann frer pour ki zot al Galile e zot a vwar mwan laba.”—Matye 28:9, 10.

Pli boner, ler i ti annan sa tranblemandter e bann lanz ti aparet, bann solda kot latonm “ti tranble e vin parey bann zonm mor.” Ler zot ti’n reganny zot lafors, zot ti antre dan lavil e “raport avek bann sef pret tou sa ki ti’n arive.” Apre sa, bann pret i diskrit avek bann ansyen ki Zwif. Zot deside donn bann solda gous pour kasyet sa ki’n arive e pour dir: “Son bann disip ti vini pandan lannwit e vol son lekor ler nou ti pe dormi.”—Matye 28:4, 11, 13.

Bann solda Romen i kapab ganny touye si zot tonm dormi ler zot pe veye, alor bann pret i promet: “Si sa [mansonz ki zot ti’n tonm dormi] i tonm dan zorey gouverner, nou pou eksplik li, me zot, pa bezwen trakase.” (Matye 28:14) Bann solda i aksepté sa gous e fer sa ki bann pret in demann zot. Alor sa fo zistwar konmkwa lekor Zezi in ganny vole i fannen partou parmi bann Zwif.

Mari Magdalenn i ancor dan latristes kot latonm Zezi. Ler i get dan latonm, i vwar de lanz dan lenz blan! Enn i asiz kot latet Zezi ti ete e sa lot kot son lipye ti ete. Zot demande: “Madanm, akoz ou pe plere?” Mari i reponn:

“Zot in pran mon Senyer e mon pa konnen kote zot in met li.” Ler Mari i vire i vwar en lot dimoun. Li osi i demann menm kestyon ki sa lanz in demande e i dir: “Madanm, akoz ou pe plere? Lekel ki ou pe rode?” Mari i krwar ki sa zonm i zardinyen, i dir: “Msye, si ou’n tir son lekor la, dir mwan kote ou’n met li e mon ava pran li.”—Zan 20:13-15.

Me an realite, Mari pe koz avek Zezi ki’n resisite, me i pa rekonnét li. Par kont, ler i dir, “Mari!” Mari i rekonnét ki sa i Zezi akoz i koumsa ki Zezi i abitye koz avek li. Avek lazwa, Mari i dir: “*Rabouni!*” (ki veditir “Ansenyan!”) Me vi ki Mari i per ki Zezi pe al dan lesyel, i tyonbo li. Alor Zezi i dir li: “Larg mwan parski mon pa ancor mont kot mon Papa. Me al kot mon bann frer e dir zot, ‘Mon pe al kot mon Papa e zot Papa, kot mon Bondye e zot Bondye.’”—Zan 20:16, 17.

Mari i tay kot bann zapot ek lezot disip ki’n zwenn ansanm. Zot in ekout bann madanm pe rakonte sa ki zot in vwar. Mari i dir: “Mon’n vwar Senyer!” e i rakont zot sa ki i’n vwar. (Zan 20:18) Par kont, sa ki sa bann madanm i dir ‘pa paret fer sans pour’ bann disip.—Lik 24:11.

- 
- ◇ Apre ki Mari Magdalenn ti vwar latonm vid, ki ti arive avek li ek lezot madanm?
  - ◇ Ki Pyer ek Zan ti fer ler zot ti vwar latonm vid?
  - ◇ Lekel ki bann madanm ti rankontre ler zot ti pe al vwar bann disip e ki ti arive ler Mari Magdalenn ti retourn kot latonm?
  - ◇ Ki mannyer bann disip ti reazir ler zot ti tann sa ki sa bann madanm ti dir?

## ZEZI I RESISITE E I APARET AVEK EN KANTITE DIMOUN

LIK 24:13-49 ZAN 20:19-29

Dimans le 16 Nizan, bann disip i vremen deouraze. Zot pa konpran aköz latonm i vid. (Matye 28:9, 10; Lik 24:11) Pli tar dan lazournen, Kleopas ek en lot disip i kit Zerizalenm pour al Emais, ki en zistans apepre 11 kilomet.

Anmezir ki zot marse, zot diskrit lo sa ki'n arive. Apre sa, en dimoun ki zot pa konnen i konmans mars avek zot. I demande: "Ki zot ti pe diskrit lo la pandan ki zot ti pe marse?" Kleopas i reponn: "Eski ou en etranze ki pe reste tousel Zerizalenm e ki pa konn bann keksoz ki'n pase laba sa detrwa zour?" Sa dimoun i demande: "Ki keksoz?"—Lik 24:17-19.

Zot dir: "Bann keksoz konsernan Zezi sa Nazareen. . . . Nou ti swete ki i ti sa enn ki ti pou delivre Izrael."—Lik 24:19-21.

Kleopas ek sa lot disip ki avek li i rakont bann keksoz ki'n arive pandan lazournen. Zot dir ki serten madanm ti al kot sa latonm kot lekor Zezi ti'n ganny mete, zot ti vwar li vid e sa bann madanm ti vwar de lanz ki ti dir ki Zezi i vivan. Zot dir ki lezot dimoun ti al kot latonm e "tou keksoz ti parey sa ki sa bann madanm ti'n dir."—Lik 24:24.

I kler ki sa de disip pa konpran tou sa ki'n arive. Sa dimoun ki pe mars avek zot i koriz zot move fasonpanse ki pe anpes zot krwar ki Zezi in resisite. I dir zot: "Zot pa konpran! Zot leker i tarde pour krwar tou bann keksoz ki bann profet in dir! Pa i ti nesaser ki Kris i soufer e ganny glorifye?" (Lik 24:25, 26) Apre sa, i eksplik zot en kantite pasaz Labib ki koz lo Kris.

Finalman, zot ariv pros Emais. Sa de disip i anv i tann plis, alor zot demann sa dimoun: "Reste avek nou, parski tar pe fer e sa lazournen i preski fini."

I dakor pour reste e zot pran en repa. Ler sa dimoun i fer lapriyer, kas dipen e donn zot, zot rekonnet li me apre sa, i disparet. (Lik 24:29-31) La aprezan zot asire ki Zezi i vivan!

Sa de disip i byen eksite e zot koz lo sa ki'n pase. Zot dir: "Pa nou leker ti pe brile ler i ti pe koz avek nou dan semen, ler i ti pe eksplik nou Lekritir?" (Lik 24:32) Zot depese e retourn Zerizalenm kot zot al vwar bann zapot ek lezot disip. Avan ki Kleopas ek sa disip ki avek li i kapab rakont sa ki'n arive, zot tann lezot dir: "I vre ki Senyer in resisite e i'n aparet avek Simon!" (Lik 24:34) Apre, sa de disip i rakonte ki zot osi zot in vwar Zezi.

La aprezan tou dimoun i sirprann aköz Zezi i aparet dan sa lasanm kot zot ete! Sa i enkrwayab parski zot in tak laport aköz zot per bann Zwif. Me kantmenm sa, Zezi pe debout la parmi zot. Byen kalm, Zezi i dir: "Ki lape i avek zot." Me zot per. Parey avan, zot krwar ki zot "pe vwar en vizyon."—Lik 24:36, 37; Matye 14:25-27.

Pour prouve ki i pa en vizyon oubyen zis en keksoz ki zot pe imazinen, me ki Zezi i vremen annan en lekor fizik, Zezi i montre zot son lanmen ek lipye e dir: "Akoz zot per e annan dout dan zot leker? Get mon lanmen ek mon lipye, mwan menm sa, tous mwan e gete, parski si mon ti en vizyon, mon pa ti pou annan laser ek lezo parey zot vwar mwan la." (Lik 24:36-39) Zot vremen etonnen e dan lazwa menm si zot vwar li difisil pour zot krwar.

Pour ed zot vwar ki i vremen reel, i demande: "Eski zot annan en keksoz la pour manze?" I aksepté en bout pwason griye e i manze.

Apré sa i dir: “Sanmenm ki mon ti dir zot ler mon ti ankor avek zot, ki tou sa ki’n ganny ekri lo mwan dan Lalwa Moiz, liv bann Profet ek bann Psonm i devret ganny akonplir.”—Lik 24:41-44.

Zezi ti ed Kleopas ek sa lot disip ki ti avek li pour konpran Lekritir e la i osi ed tou bann ki’n rasanble. I dir: “Se sa ki’n ganny ekri: ki Kris ti pou soufer e ganny resisite trwazyenm zour e ki gras a son non, mesaz lo repantans pour ki pese i ganny pardonnen pou ganny anonse dan tou nasyon e sa pou konmans Zerizalenm. Zot bezwen rann temwanyaz lo sa bann keksoz.”—Lik 24:46-48.

Zapot Toma pa la sa zour. Me pli tar, lezot i kontan pour dir li: “Nou’n vwar Senyer!” Toma i reponn: “Tan ki mon pa vwar mark sa bann klou dan son lanmen, tous mark sa bann klou avek mon ledwa e tous son kote, mon pa pou zanmen krwar.”—Zan 20:25.

Wit zour pli tar, bann disip i zwenn ansanm ankor e zot tak laport. Safwasi Toma osi i la. Zezi i aparet avek zot dan en lekor imen e i dir: “Ki lape i avek zot.” Zezi i vire e get Toma e dir: “Get mon lanmen e met ou ledwa la. Tous mon kote avek ou lanmen e aret doute me zis



krwar.” Toma i dir: “Mon Senyer, mon Bondye!” (Zan 20:26-28) Aprezan i napa okenn dout ki Zezi i vivan konman en lespri pwisan e ki i en reprezantan Zeova.

Zezi i dir: “Eski ou krwar parski ou’n vwar mwan? Ere bann ki krwar menm si zot pa’n vwar.”—Zan 20:29.

- 
- ◇ Ki en dimoun ki zot pa konnen ti demann de disip ki pe al Emais?
  - ◇ Akoz zot leker ti pe brile?
  - ◇ Ler Kleopas ek sa lot disip i retourn Zerizalenm, ki nouvel eksitan zot tande e ki arive apre?
  - ◇ Ki manyer Toma i finalman arive krwar ki Zezi i vivan?



# LO LANS LANMER GALILE

ZAN 21:1-25

Dernyen zour swar ki Zezi ti pase avek bann zapot, i ti dir zot: “Apre ki mon pou’n ganny resisite, mon pou al esper zot Galile.” (Matye 26:32; 28:7, 10) Aprezan en kantite son bann disip i vwayaze pour al laba, me ki zot devret fer Galile?

Apre sa, Pyer i dir avek sis zapot: “Mon pe al lapés.” Tou le sis i dir: “Nou pe vin avek ou.” (Zan 21:3) Lannwit antye zot pa atrap nanryen. Anmezir lizour i fer, Zezi i aparet lo lans, me zot pa realize lekel sa. Zezi i kriye: “Zanfan, zot napa nanryen pour manze zot?” Zot reponn: “Non!” Zezi i dir zot: “Zet zot lasenn lo kote drwat kannot e zot a ganny en pe.” (Zan 21: 5, 6) Zot telman atrap en kantite pwason ki zot pa ni menm kapab redi zot lasenn dan bato.

Zan i dir avek Pyer: “Senyer sa!” (Zan 21:7) Pyer i taye e met son lenz lo li ki i’n tire pour li lapés. I sot dan delo e naz apepre 90 met ziska lo lans. Me lezot i swiv par deryer dousman dan kannot pe trenn sa lasenn ranpli avek pwason.

Ler zot ariv lo lans zot vwar “pwason lo labrez e dipen.” Zezi i dir: “Anmenn en pe pwason ki zot fek lapés.” Pyer i redi lasenn ater ki ranpli avek 153 gro pwason! Zezi i dir: “Vin pran brekfas.” Ni enn parmi zot napa kouraz pour demande “Lekel ou?” parski zot konnen ki i Zezi. (Zan 21:10-12) I fer trwazyenm fwa ki Zezi i aparet avek son bann disip konman en group.

Zezi i donn zot tou en bout dipen ek pwason pour manze. Apre, petet i get bann pwason ki zot in atrape e i demande: “Simon garson Zan, eski ou kontan mwan plis ki sa ki la?” Eski Pyer i pli kontan son biznes lapés ki sa travay ki Zezi i anvi i fer? Pyer i reponn: “Wi Senyer, ou konnen mon kontan ou.” Alor Zezi i ankouraz li: “Donn manze mon bann pti mouton.”—Zan 21:15.

Ankor enn fwa Zezi i demande: “Simon garson Zan, eski ou kontan mwan?” Petet Pyer i en pe konfize la e i reponn senserman: “Wi Senyer, ou konnen mon kontan ou.” Zezi i donn preski menm larepons ki avan: “Pran swen avek mon bann pti mouton.”—Zan 21:16.

Pour en trwazyenm fwa, Zezi i demande: “Simon garson Zan, eski ou kontan mwan?” Aprezan eski Pyer i demann son lekor si Zezi i krwar ki i pa fidel. Pyer i dir: “Senyer ou konn tou keksoz, ou konnen ki mon kontan ou.” Ankor enn fwa Zezi i dir Pyer sa ki i bezwen fer: “Donn manze mon bann pti mouton.” (Zan 21:17) Bann ki responsab dan kongregasyon i bezwen ed bann ki form parti troupo Bondye.

Zezi ti ganny arete e touye akoz i ti fer sa travay ki Bondye ti donn li pour fer. Aprezan i fer Pyer konnen ki menm keksoz pou arive avek li. Zezi i dir: “Ler ou ti pli zenn, ou ti abitye sanze e al kot ou anvi. Me ler ou vin pli vye, ou pou lev ou lebra e en lot dimoun pou met ou ou lenz e anmenn ou kot ou pa anvi ale.” Par kont Zezi i ankouraz li: “Kontinyen swiv mwan.”—Zan 21: 18, 19.

Pyer i vwar zapot Zan e i demande: “Senyer, be sa zonn?” I anvi konnen ki pou arive a lavenir avek sa zapot ki Zezi i kontan? Zezi i reponn: “Si i mon lavolonte ki i reste ziska ki mon vini, ki sa i konsern ou?” (Zan 21:21-23) Pyer i bezwen swiv Zezi e pa trakase avek sa ki pou arive avek lezot. Be kantmenm sa, Zezi pe montre ki Zan pou viv pli lontan ki bann lezot zapot e ki i pou ganny en vizyon kot i pou vwar Zezi vini dan Rwayonm Bondye.

Byensir, i annan bokou lezot keksoz ki Zezi ti fer, ki menm en kantite roulo pa ti pou ase pour ekri tou.



- ◇ Kwa ki montre ki bann zapot pa ti asire ki pour fer Galile?
- ◇ Ki mannyer bann zapot ti kapab rekonnet Zezi kot Lanmer Galile?
- ◇ Ki Zezi ti dir bann ki responsab dan kongregasyon i devret fer?
- ◇ Ki Zezi ti dir konsernan lanmor Pyer?

# PLIZYER SANTENN I VWAR LI AVAN LAFET LAPANNKOT

MATYE 28:16-20 LIK 24:50-52 AKT 1:1-12; 2:1-4

Aprè ki Zezi in ganny resisite, i fer laranzman pour son 11 zapot zwenn li lo en montanny Galile. I annan lezot disip osi ki la, apepre 500 zot. Parmi zot, i annan serten ki ti annan dout o konmansman. (Matye 28:17; 1 Korentyen 15:6) Me sa ki Zezi i dir i ed zot pour asire ki i vremen vivan.

Zezi i eksplike ki Bondye in donn li tou lotorite dan lesyel e lo later. Zezi i demann zot: “Al kot bann dimoun dan tou nasyon e fer zot vin mon disip, batiz zot o non Papa, o non Garson e o non lespri sen, ansenny zot pour obei tou sa ki mon’n donn zot lord pour fer.” (Matye 28: 18-20) Zezi i vivan e i oule ki sa bon nouvel i ganny anonse.

Tou bann disip Zezi, zonn, fanm ek zanfan, i ganny sa menm lord pour fer disip. Bann ki opoz zot pou esey fer zot aret anons sa mesaz lo Rwayonn e ansenny bann dimoun, me Zezi i asir zot: “Mon’n ganny tou lotorite dan lesyel e lo later.” Ki sa i vedir pour son bann disip? I dir zot: “Mazinen! mon avek zot tou le zour ziska lafen sa lemonn.” Zezi pa pe dir ki tou dimoun ki anons sa bon nouvel pou kapab fer bann mirak. Me kantmenm sa, zot pou ganny lafors lespri sen.

An tou, apre ki Zezi in resisite, i aparet avek son bann disip “pandan 40 zour.” I aparet dan diferan lekor imen e i montre ‘zot ki i vivan atraver en kantite laprev konkret.’ I osi donn zot bann lenstriksyon “konsernan Rwayonn Bondye.”—Akt 1:3; 1 Korentyen 15:7.

Aparaman ler bann zapot i ankor Galile, Zezi i demann zot pour retourn Zerizalenm. Ler i zwenn zot dan sa lavil, i dir: “Pa bezwen kit Zerizalenm, me kontinyen esper sa ki mon Papa in promet parey mon ti dir zot. Parski

Zan ti batiz dimoun dan delo, me zot zot pou ganny batize avek lespri sen dan ankor detrw zour.”—Akt 1:4, 5.

Pli tar, Zezi i zwenn avek son bann zapot ankor enn fwa. I anmenn zot “ziska Betani” ki lo kote les Montanny Pye Zoliv. (Lik 24:50) Malgre tou sa ki Zezi in dir zot konsernan lefet ki i pe ale, zot ankor krwar ki dan en fason ou en lot son Rwayonn pou lo later.—Lik 22:16, 18, 30; Zan 14:2, 3.

Bann zapot i demann Zezi: “Senyer, eski ou pe al retabli rwayonn Izrael la konmela?” I senpleman dir: “I pa nesese pour zot konn letan ek lepok ki zis mon Papa i annan drwa deside kan i pou arive.” Apre sa, i remet lanfaz lo sa travay ki zot bezwen fer e dir: “Zot pou ganny pwisans ler lespri sen pou desann lo zot. Zot pou vin mon bann temwen Zerizalenm, partou dan Zide ek Samari e ziska dan bann landrwa pli elwanyen lo later.”—Akt 1: 6-8.

Bann zapot i avek Zezi lo Montanny Pye Zoliv ler i konmans mont dan lesyel. Apre en nyaz i kouver li e zot nepli kapab vwar li. Apre son rezireksyon, Zezi in aparet dan diferan lekor imen. Me la Zezi i kit sa lekor ki i pe servi e i mont dan lesyel konman en lespri. (1 Korentyen 15:44, 50; 1 Pyer 3:18) Bann zapot fidel pe get Zezi ki pe mont dan lesyel e la “de zonn dan lenz blan” i aparet akote zot. Zot bann lanz ki’n pran lekor imen e zot demande: “Zonn sorti Galile, akoz zot la pe get dan lesyel? Sa Zezi ki ti avek zot e ki’n mont dan lesyel pou vini dan menm fason ki zot in vwar li al dan lesyel.”—Akt 1:10, 11.

Ler Zezi ti kit later, pa tou dimoun ki ti vwar li me zis son bann disip fidel ki ti vwar li.



I pou retourn “dan menm fason,” parski zis son bann disip fidel ki pou rekonnet ki i la pe dirize dan Rwayonm.

Bann zapot i retourn Zerizalenm. Pandan bann zour ki swiv, zot zwenn ansanm avek le-zot disip, enkli “Mari, manman Zezi ek bann frer Zezi.” (Akt 1:14) Ansanm zot priy en kantite. Zot priy Bondye pour ed zot swazir en disip ki pou ranplas Zida Iskaryot pour ki i annan 12 zapot ankor enn fwa. (Matye 19:28) Zot anvi swazir en disip ki’n vwar bann keksoz ki Zezi in fer e son rezireksyon. Zot tir osor pour zot konn lavolonte Bondye. Sa i deryen fwa ki tir osor i ganny mansyonnen dan Labib. (Psonm 109:8; Proverb 16:33) Matyas ki petet i enn parmi sa 70 disip ki Zezi ti anvoy prese, i ganny swazir e i “ganny konte ansanm avek sa 11 zapot.”—Akt 1:26.

Dis zour apre ki Zezi in mont dan lesyel, bann dimoun i selebre Lafet Lapannkot lannen 33. Sa i en lafet Zwif. I annan apepre 120 disip ki’n rasanble dan en lasanm anler, Zerizalenm. En sel kou, zot kapab tann en tapaz parey en gro divan partou dan lakaz. Zot vwar sa ki resanble bann lalang dife apoz lo latet sakenn antre zot ki la. Tou bann disip i konmans koz diferan langaz. Sa i sa lespri sen ki Zezi ti promet pour donn zot!—Zan 14:26.

- 
- ◇ Lekel ki ti la ler Zezi ti donn bann lenstriksyon lo en montanny Galile e ki i ti dir?
  - ◇ Konbyen letan Zezi ti aparet avek son bann disip apre son rezireksyon? Ki i ti fer?
  - ◇ Ki mannyer Zezi pou retournen e akoz?
  - ◇ Ki ti arive zour lafet Lapannkot lannen 33?
- 



## KRIS LO KOTE DRWAT BONDYE

AKT 7:56

Dis zour apre ki Zezi ti mont dan lesyel, bann disip ti ganny lespri sen zour Lapannkot. Sa ti montre ki Zezi i dan lesyel. I annan lezot keksoz ki arive ki montre ki sa i vre. Zis avan disip Etyenn ti ganny saboule amor akoz son fidelite, i ti dir: “Gete! Mon vwar lesyel ouver e Garson zonn lo kote drwat Bondye.”—Akt 7:56.


Pandan ki Zezi ti avek son Papa dan lesyel, i ti pou esper en lord spesifik ki ti’n ganny predir dan Parol Bondye. David ti ganny enspire pour ekri: “[“Zeova,” NWT] ti dir avek mon senyer lerwa [Zezi]: Asiz lo mon kote drwat, ziska ki mon met ou bann lennmi anba ou lipye.” Ler sa letan ki Zezi ti bezwen espere ti pou’n fini, i ti pou “domin lo [son] bann lennmi.” (Psonm 110:1, 2, nou ki’n met an italik.) Me ki Zezi ti pou fer dan lesyel anmezir ki i pe esper sa letan pour pran aksyon kont son bann lennmi?

Kongregasyon Kreyen ti vin an egzistans Lapannkot lannen 33. Dan lesyel, Zezi ti konmans diriz oubyen renny lo bann disip ki’n ganny swazir avek lespri sen. (Kolosyen 1:13) I ti gid zot dan sa travay predikasyon e prepar zot pour zot rol a lavenir. Ki rol sa? Bann ki reste fidel ziska lanmor ti pou ganny resisite pli tar e servi konman bann lerwa ansanm avek Zezi dan Rwayonn Bondye.

Sol i en bon legzanp enn sa bann dimoun ki ti pou vin lerwa ansanm avek Kris a lavenir. Laplipar dimoun i konn li konman Pol dapre son non Romen. I ti en Zwif ki ti vremen devoue pour Lalwa Bondye. Me i ti’n telman ganny anbete par bann sef relizye Zwif ki i ti menm dakor ki Etyenn i ganny saboule avek ros. Apre sa, Sol ti al lo semen Damas

akoz i ti “ankor ankoler avek bann disip Senyer.” Granpret Kaif ti donn li lotorizasyon pour tyonbo bann disip Zezi e anmenn zot Zerizalenm. (Akt 7:58; 9:1) Me ler Sol ti lo semen, en gro lalimyer ti klere toultour li e i ti tonm ater.

I ti tann en lavwa ki i pa ti konnen kot i sorti



dir: “Sol, Sol, akoz ou pe persekit mwan?” Sol ti demande: “Lekel ou Senyer?” I ti ganny sa larepons: “Mwan menm Zezi ki ou pe persekitte.”—Akt 9:4, 5.

Zezi ti demann Sol pour al Damas e esper plis lenstriksyon laba, me dimoun ti bezwen atrap son lanmen pour anmenn li dan sa lavil akoz sa lalimyer ti’n fer li vin aveg. Dan en lot vizyon, Zezi ti aparet avek Ananyas, enn son disip ki ti reste Damas. Zezi ti demann Ananyas pour al vwar Sol e i ti dir li kot i reste. Ananyas ti en pe per pour fer sa, me Zezi ti asir li: “Mon’n swazir sa zonm pour rann temwanniaz lo mon non avek bann nasyon, bann lerwa ek pep Izrael.” Sol ti revwar kler e laba Damas “i ti konmans anonse . . . ki Zezi i Garson Bondye.”—Akt 9:15, 20.

Gras a led Zezi, Pol ek lezot predikater ti kontiny sa travay predikasyon ki Zezi ti’n konmanse. Bondye ti beni zot e zot ti ganny bann bon rezilta. Apepre 25 an apre ki Zezi ti’n aparet avek Pol lo semen Damas, Pol ti ekri ki sa bon nouvel ti’n ganny “anonse avek dimoun partou lo later.”—Kolosyen 1:23.

Plizyer lannen pli tar, Zezi ti donn sa zapot ki i kontan e ki ti ancor vivan, setadir Zan, plizyer vizyon ki’n ganny rikorde dan liv Revelasyon dan Labib. Atraver sa bann vizyon, dan en sans, Zan ti vwar Zezi pe retournen e dirize dan Rwayonm. (Zan 21:22) “Gras a lesprisen, [Zan] ti vwar bann keksoz ki ti pou arive

pandan zour Senyer.” (Revelasyon 1:10) Kan sa ti pou arive?

Ler nou etidye bann profesè dan Labib, nou vwar ki “zour Senyer” in konmans dan nou letan. An 1914, sa ki nou apel Premye Lager Mondyal konmela ti deklare. Deplis, depi 1914, nou’n vwar plis lager, maladi, tranblemandter ek lezot levidans dan lemond antye ki montre ki sa “siny” ki Zezi i la konman Lerwa pe akonpli e ki nou pe viv dan letan “lafen sa lemond”. (Matye 24:3, 7, 8, 14) Konmela sa bon nouvel Rwayonm pe ganny prese partou dan lemond, pa zis dan Lanpir Romen.

Zan ti ganny enspire pour dekrir ki sa i vedir: “Aprezan Bondye in sov limanite, son pouvwar in ganny revele, son Rwayonm in konmans dirize e son Kris in ganny lotorite.” (Revelasyon 12:10) Wi, sa Rwayonm Bondye dan lesyel ki Zezi ti koz lo la ler i ti lo later i reel!

Sa i en bon nouvel pour tou bann disip fidel Zezi. Zot kapab pran aker parol Zan ki ti dir: “Pour sa rezon, lesyel ek zot ki reste dan lesyel, zot devret dan lazwa! Maler pour later ek lanmer parski Dyab in desann kot zot avek en gran lakoler, parski i konnen i reste li zis en ptigin letan.”—Revelasyon 12:12.

Alor, Zezi nepli pe asiz lo kote drwat son Papa pe espere. I pe dirize konman Lerwa e byento i pou detri tou son bann lennmi. (Ebre 10:12, 13) Pa i vo lapenn kontinyen esper sa bann keksoz ekstraordiner?

- 
- ◇ Apre ki Zezi ti mont dan lesyel, ki i ti fer?
  - ◇ Kan ki “zour Senyer” ti konmanse e ki ti arive apre?
  - ◇ Akoz nou annan rezon pour dan lazwa?



# ZEZI I FER LATER REVIN EN PARADI E FINI SA TRAVAY KI BONDYE IN DONN LI POUR FER


1 KORENTYEN 15:24-28

Pa bokou letan apre ki Zezi ti'n batize, i ti bezwen fer fas avek en lennmi ki ti determinen pour anpes li reste fidel menm avan i konmans son minister. Dyab ti esey tant Zezi plizyer fwa. Pli tar, Zezi ti dir sa lo sa enn move: "Sef sa lemonn pe vini e i napa kontrol lo mwan."—Zan 14:30.

Zapot Zan ti vwar davans sa ki ti pou arive avek 'sa gro dragon, sa premye serpan, sa enn ki ganny apele Dyab e Satan.' Sa lennmi kriyel ti pou ganny tire dan lesyel e i ti pou annan "en gran lakoler, parski i konnen i reste li zis en ptigin letan." (Revelasyon 12:9, 12) Bann Kretyen i annan bon rezon pour krwar ki zot pe viv pandan sa "ptigin letan" ki Labib i koz lo la. Byento "sa dragon, sa premye serpan," pou ganny zete dan labim e i pa pou kapab enfliyans lemonn pour 1,000 an anmezir ki Zezi i diriz Rwayonm Bondye.—Revelasyon 20: 1, 2.

Pandan sa letan, ki pou arive lo later? Lekel ki pou reste lo later e ki manyer keksoz pou ete lo later? Zezi li menm ti donn larepons. Dan son legzanp mouton ek kabri, i ti montre ki pou arive a lavenir avek bann imen drwat ki parey mouton ki travay ansanm avek bann frer Zezi e ed zot. I ti osi montre ki pou arive avek bann dimoun ki parey kabri. Zezi ti dir: "Sa bann [kabri] pou ganny lanmor eternel, me bann ki drwat [bann mouton] pou ganny lavi eternel."—Matye 25:46.

Sa i ed nou konpran sa ki Zezi ti dir sa kriminel ki ti lo en poto o bor li. Zezi pa ti ofer sa zonm menm rekonpans ki i ti'n promet son bann zapot fidel, setadir ki zot pou form parti Rwayonm lesyel. O kontrè, Zezi ti promet sa zonm ki ti'n repantir: "Laverite mon





- SA KI POU ARIVE AVEK BANN MOUTON EK KABRI
- EN KANTITE DIMOUN POU BENEFISYE AVEK PARADI LO LATER
- ZEZI I PROUVE KI I SEMEN, LAVERITE EK LAVI



dir ou ozordi, ou pou avek mwan dan Paradi.” (Lik 23:43) Alor sa zonm ti ganny lespwar pour viv dan Paradi setadir en zoli zarden. I fer sans alor pour dir ki bann ki parey mouton e ki “ganny lavi eternal,” pou osi viv dan sa Paradi.

Sa i an armoni avek sa deskripsyon ki zapot Zan ti fer konsernan ki mannyer later pou ete sa letan. I ti dir: “Latant Bondye i avek bann imen, i pou reste avek zot, zot pou vin son pep e Bondye li menm pou avek zot. I pou eswiy tou larm dan zot lizey, i pou nepli annan ni lanmor, ni dey, ni leokri, ni douler ankor. Sa bann keksoz avan in fini disparet.”—Revelasyon 21:3, 4.

Pour ki sa zonm i kapab dan Paradi, i pou bezwen ganny resisite. Pa zis li ki pou ganny resisite. Zezi ti fer sa kler ler i ti dir: “Letan pe vini kot tou bann ki dan latonm pou tann son lavwa e zot pou resisite, sa bann ki’n fer sa ki byen pou ganny lavi eternal me sa bann ki’n fer bann keksoz mal pou ganny kondannen.”—Zan 5:28, 29.

Be ki pou arive avek bann zapot fidel ek sa pti group dimoun ki pou avek Zezi dan lesyel? Labib i dir: “Zot pou vin bann pret Bondye ek Zezi e zot pou diriz konman lerwa ansanm avek li pour sa 1,000 an.” (Revelasyon 20:6) Sa bann ki pou diriz ansanm avek Kris ti bann

zonm ek fanm lo later. Alor definitivman zot pou bann dirizan dan lesyel ki annan konpasyon e ki konpran bann ki pe viv lo later.—Revelasyon 5:10.

Zezi pou ed bann imen lo later benefisy e i pou retir pese ki bann imen in erite. Zezi e bann ki pou diriz avek li pou ed limanite fidel pour revin parfe. Koumsa, bann imen pou kapab viv parey Bondye ti anvi o konmansman ler i ti demann Adan ek Ev fer zanfan e ranpli later. Menm lanmor ki nou’n erite atraver pese Adan pou nepli egziste!

Zezi pou’n akonpli tou sa ki Zeova in demann li pour fer. A lafen Renny Mil An, Zezi pou rann Rwayonm ek limanite ki pou’n vin parfe avek son Papa. Sa i montre ki Zezi i annan limilite e zapot Pol ti ekri lo sa size: “Ler tou keksoz pou’n ganny soumet avek son Garson, alor Garson li menm pou soumet son lekor avek sa Enn ki’n soumet tou keksoz avek li, pour ki Bondye i vin tou pour tou dimoun.”—1 Korentyen 15:28.

I kler ki Zezi i annan en rol vreman enportan pour ede akonpli plan Bondye. Anmezir ki plan Bondye i kontinyen ganny akonplir pandan leternite, Zezi pou toultan viv an armoni avek sa ki i ti dir: “Mwan menm semen, laverite ek lavi.”—Zan 14:6.

- 
- ◇ Ki pou arive avek Dyab, pli gran lennmi limanite?
  - ◇ Lekel ki pou kapab viv dan Paradi e ki mannyer Paradi pou ete?
  - ◇ A lafen sa mil an, ki Zezi pou’n akonpli e ki i pou fer apre?



# ANNOU IMIT BANN KALITE ZEZI

## KONPASYON

Vi ki Zezi ti parfe, nou kapab mazin en pa ti sitan enkyet bokou oubyen strese parey lezot imen enparfe. Me kantmenm sa, i ti montre ki i ti vreman konpran e kontan lezot. I ti pare pour fer plis ki sa ki dimoun i abitye fer pour son prosen. Son konpasyon ti pous li pour ed lezot parey nou'n vwar dan Sapit 32, 37, 57, 99.

## I TI FASIL POUR KOZ AVEK LI

Dimoun tou laz, zenn konman aze, ti santi zot alez pour apros Zezi aköz i pa ti donn lenpresyon ki i tro okipe oubyen enportan. Vi ki dimoun ti vwar ki i ti entereze avek zot personnelman, zot ti kontan ler Zezi ti la avek zot parey nou'n vwar dan Sapit 25, 27, 95.

## I TI KONTAN PRIYE

Zezi ti toultan priy avek son Papa ki swa an prive oubyen avek son bann disip. Souvan i ti priye pa zis avan manze. I ti priye pour remersye son Papa, pour loue li e pour rod son gidans avan i fer bann gro desizyon. Get bann legzanp dan Sapit 24, 34, 91, 122, 123.

## I PA TI EGOIS

Par ler Zezi ti bezwen repoze, me Zezi ti toultan pare pour met son bann bezwen personel dekote e ed lezot. Pour li, byennet lezot ti pli enportan ki sa ki pour li. Sa i en bon legzanp ki nou kapab swiv. Etidye ki mannyer Zezi ti demontre sa dan Sapit 19, 41, 52.

## PARE POUR PARDONNEN

Zezi pa ti zis koz lo pardonnen, i ti demontre ki i ti pare pour fer li par pardonn son bann disip ek lezot osi. Medit lo sa bann legzanp dan Sapit 26, 40, 64, 85, 131.

## DEVOUMAN

I ti'n ganny predir ki laplipar Zwif pa ti pou aksepte Mesi e ki son bann lennmi ti pou touy li. Alor Zezi ti'n kapab pa fer bokou zefor pour ed bann dimoun. Me i ti devoue pour promot vre ladorasyon. I en bon legzanp devouman pour tou son bann disip ki bezwen fer fas avek bann dimoun ki opoz zot oubyen ki pa entereze avek mesaz. Vwar Sapit 16, 72, 103.

## LIMILITE

Zezi ti pli siperyer ki bann imen enparfe dan plizyer fason. I ti konn bokou plis keksoz ki zot e i pli ti saz. Vi ki i ti parfe, i tre probab ki i ti pli for fizikman e pli malen ki bann dimoun sa letan. Me avek limilite, i ti pare pour servi lezot. Vwar bann leson ki nou kapab aprann dan Sapit 10, 62, 66, 94, 116.

## PASYANS

Zezi ti toultan demontre pasyans anver son bann zapot ek lezot ler zot pa ti arive imit son legzanp oubyen aplik sa ki i ti dir. Avek pasyans, i ti repet plizyer fwa bann keksoz ki ti kapab fer zot vin pli pros avek Zeova. Vwar bann legzanp pasyans dan Sapit 74, 98, 118, 135.



## LALIS BANN VERSE Sa numero apre bann verse Labib i sapit dan sa liv.

<b>MATYE</b>	18:21-35	64	1:14, 15	20	13:3-37	111	7:11-17	37	
1:18-25	4	19:1-15	95	1:16-20	22	14:1, 2	115	7:18-30	38
2:1-12	7	19:16-30	96	1:21-34	23	14:3-9	101	7:31-35	39
2:13-23	8	20:1-16	97	1:35-39	24	14:10-16	115	7:36-50	40
3:1-12	11	20:17-28	98	1:40-45	25	14:17	116	8:1-3	41
3:13-17	12	20:29-34	99	2:1-12	26	14:18-25	117	8:4-18	43
4:1-11	13	21:1-11	102	2:13-17	27	14:26	123	8:19-21	42
4:12	18	21:12, 13	103	2:18-22	28	14:27-31	118	8:22-25	44
4:13-22	22	21:14-17	102	2:23-28	31	14:32-42	123	8:26-39	45
4:23-25	24	21:18, 19	103	3:1-6	32	14:43-52	124	8:40-48	46
5:1-7:29	35	21:19-27	105	3:7-12	33	14:53-65	125	8:40-42	47
8:1-4	25	21:28-46	106	3:13-19	34	14:66-72	126	8:49-56	47
8:5-13	36	22:1-14	107	3:19-30	41	15:1	127	9:1-5	49
8:14-17	23	22:15-40	108	3:31-35	42	15:2-5	128	9:6	50
8:18	44	22:41-23:24	109	4:1-34	43	15:6-19	129	9:7-9	51
8:19-22	65	23:25-24:2	110	4:35-41	44	15:20, 21	130	9:10-17	52
8:23-27	44	24:3-51	111	5:1-20	45	15:22-32	131	9:18-26	59
8:28-34	45	25:1-13	112	5:21-34	46	15:33-41	132	9:27-36	60
9:1-8	26	25:14-30	113	5:22-24	47	15:42-16:4	133	9:37-43	61
9:9-13	27	25:31-46	114	5:35-43	47	16:5-8	134	9:43-48	62
9:14-17	28	26:1-5	115	6:1-6	48			9:49, 50	63
9:18-22	46	26:6-13	101	6:3	9	<b>LIK</b>		9:51-62	65
9:18, 23-26	47	26:14-19	115	6:6-11	49	1:5-33	1	10:1-24	72
9:27-34	48	26:20	116	6:12, 13	50	1:34-56	2	10:25-37	73
9:35-10:15	49	26:21-29	117	6:14-29	51	1:56	4	10:38-11:13	74
10:16-11:1	50	26:30	123	6:17-20	18	1:57-79	3	11:14-36	75
11:2-15	38	26:31-35	118	6:30-44	52	2:1-20	5	11:37-54	76
11:16-30	39	26:36-46	123	6:45-56	53	2:21-39	6	12:1-34	77
12:1-8	31	26:47-56	124	7:1-23	56	2:40-52	10	12:35-59	78
12:9-14	32	26:57-68	125	7:24-37	57	3:1-18	11	13:1-21	79
12:15-21	33	26:69-75	126	8:1-21	58	3:19, 20	18	13:22-14:6	82
12:22-32	41	27:1-11	127	8:22-38	59	3:21, 22	12	14:7-24	83
12:33-50	42	27:12-14	128	9:1-13	60	4:1-13	13	14:25-35	84
13:1-53	43	27:15-17	129	9:14-29	61	4:14, 15	20	15:1-10	85
13:54-58	48	27:18, 19	128	9:30-37	62	4:16-31	21	15:11-32	86
13:55, 56	9	27:20-30	129	9:38-50	63	4:31-41	23	16:1-13	87
14:1-12	51	27:31, 32	130	10:1-16	95	4:42, 43	24	16:14-31	88
14:13-21	52	27:33-44	131	10:17-31	96	5:1-11	22	17:1-10	89
14:22-36	53	27:45-56	132	10:32-45	98	5:12-16	25	17:11-19	92
15:1-20	56	27:57-28:2	133	10:46-52	99	5:17-26	26	17:20-37	93
15:21-31	57	28:3-15	134	11:1-11	102	5:27-32	27	18:1-14	94
15:32-16:12	58	28:16-20	137	11:12-18	103	5:33-39	28	18:15-17	95
16:13-27	59			11:19-33	105	6:1-5	31	18:18-30	96
16:28-17:13	60	<b>MARK</b>		12:1-12	106	6:6-11	32	18:31-34	98
17:14-20	61	1:1-8	11	12:13-34	108	6:12-16	34	18:35-19:10	99
17:22-18:5	62	1:9-11	12	12:35-40	109	6:17-49	35	19:11-28	100
18:6-20	63	1:12, 13	13	12:41-13:2	110	7:1-10	36	19:29-44	102

19:45-48	103	23:4-16	128	3:22-4:3	18	10:1-21	80	18:2-12	124
20:1-8	105	23:18-25	129	4:3-43	19	10:22-42	81	18:13, 14	125
20:9-19	106	23:24-31	130	4:43-54	20	11:1-16	89	18:15-18	126
20:20-40	108	23:32-43	131	5:1-16	29	11:17-37	90	18:19-24	125
20:41-47	109	23:44-49	132	5:17-47	30	11:38-54	91	18:25-27	126
21:1-6	110	23:50-24:3	133	6:1-13	52	11:55-12:11	101	18:28-35	127
21:7-38	111	24:4-12	134	6:14-25	53	12:12-19	102	18:36-38	128
22:1-13	115	24:13-49	135	6:25-48	54	12:20-27	103	18:39-19:5	129
22:14-18	116	24:50-52	137	6:48-71	55	12:28-50	104	19:6-17	130
22:19-23	117			7:1	56	13:1-17	116	19:17-24	131
22:24-38	118	<b>ZAN</b>		7:2-10	65	13:18-30	117	19:25-30	132
22:39-46	123	1:6-8, 15-28	11	7:11-32	66	13:31-38	118	19:31-20:1	133
22:47-53	124	1:29-51	14	7:32-52	67	14:1-31	119	20:2-18	134
22:54	125	1:32-34	12	8:12-36	68	15:1-27	120	20:19-29	135
22:54-62	126	2:1-12	15	8:37-59	69	16:1-33	121	21:1-25	136
22:63-65	125	2:12-22	16	9:1-18	70	17:1-26	122		
22:66-23:3	127	2:23-3:21	17	9:19-41	71	18:1	123		

## LALIS BANN LEGZANP (PARABOL) Sa nimerò i sapit dan sa liv.

bann envite ki rod leskiz	83	lapay dan lizye ou frer	35	talan	113
bann fermye ki mertriye	106	lapes zonm	22	travayer dan plantasyon rezen	97
bann papa ki pare pour ede	35	laport etrwat	35	travayer ki ganny peye en denye	97
Bon Berze	80	lasenn	43	trezor kasyet dan plantasyon	43
bon Samariten	73	lelven bann Farizyen	58	trouv pyes larzan ki'n perdi	85
de dimoun ki dwa	40	lelven ek lafarin	43	vev ek ziz	94
de garson i ganny demande pour al travay	106	lerwa i kennsel en gro det	64	vre pye rezen	120
demon ki retourn dan en dimoun	42	lesklav fidel e pridan	111	zanfan lo bazar	39
dible ek move zerb	43	lesklav ki pa pardonnen	64	zanmi ki persiste	74
dis vyerz	112	lesklav ki pe esper son met	78	zonm ris ek Lazar	88
disel later	35	lesklav ki'n travay dan plantasyon	89	zonm ris ki konstri pli gran stor	77
en lerwa pe mazinen si i pou al lager	84	min (larzan)	100	zwazo ek lis	35
envit bann ki pov	83	mouton ek kabri	114		
fermye i touy garson sa proprieteyer	106	mouton perdi	63	<b>LALIS BANN BWAT</b>	
fermye ki dormi	43	move administrater	87	"I ti'n ariv ler pour zot ganny pirifye"	6
fermye ki senmen	43	nouvo diven, vye boutey	28	Bann vwayaz inoubliyab	10
fondasyon en lakaz	35	paste zot bwar me anval samo	109	Lekel bann Samariten?	19
garson perdi	86	perdi pyes larzan	85	Posede par demon	23
kolekter taks ek Farizyen	94	perl ek koson	35	Bann legzanp konsernan zennen	28
konstri en lakaz	84	perl ki annan en gran valer	43	Zezi i servi repetisyon pour ansennyen	35
labour later	65	poul ki rasanble son piti	110	Son transpirasyon i vin parey gout disan	123
lafwa parey lagrenn moutard	89	pye fig	79	Later Disan	127
lagrenn dan diferan later	43	pyeste vye lenz avek latwal nef	28	Bann fwet Romen	129
lagrenn dible i bezwen mor	103	resepsyon maryaz	107	"Klout li lo potò"	132
lakaz konstri lo ros	35	Rwayonm, lagrenn moutard	43		
		samo pas dan en trou zegwir	96		
		serviter fidel	78		
		swazir en pli bon plas	83		



## SERTEN PROFESI LO MESI

LEVENNMAN	PROFESI	LAKONPLISMAN	SAPIT
Ne Betleenm	Mika 5:2	Lik 2:1-6	5, 7, 67
Sov Lezip e retournen	Osea 11:1	Matye 2:13-15, 19, 20	8
Bann manman pe plere akoz lanmor zot garson ler zot pe esey touy Zezi	Zeremi 31:15	Matye 2:17, 18	8
Anons laliberte bann prizonnien	Izai 61:1, 2	Lik 4:17-21	21
Reste Kapernaoum, Galile	Izai 9:1, 2	Matye 4:13-17	22, 67
Geri bokou malad	Izai 53:4	Matye 8:16, 17	23
Pa dispit ni kriye dan semen	Izai 42:1-4	Matye 12:16-21	33
Servi bann legzanp pour ansennien	Psonm 78:2; Izai 6:9, 10	Matye 13:13-15, 34, 35	43
Antre Zerizalenm lo piti en bourik	Zekarya 9:9	Matye 21:1-9	102
Bokou pa krwar dan li	Izai 6:10; 53:1	Zan 12:37, 38	104
Enn son zanmi i trai li	Psonm 41:9	Zan 13:18, 21	117
Bann dispit i sove e abandonn li	Zekarya 13:7	Matye 26:31, 54-56	118, 124
Zot ay li san okenn rezon	Psonm 35:19; 69:4	Zan 15:24, 25	120
Bann solda ti pran son lenz e partaz li	Psonm 22:18	Zan 19:23, 24	131
Swaf ler i lo poto	Psonm 22:15	Zan 19:28	132
I ti ganny perse apre son lanmor	Zekarya 12:10	Zan 19:34, 37	133
Son lezo pa pou ganny kase	Psonm 34:20	Zan 19:36	133

Pour plis lenformasyon, al lo [www.jw.org](http://www.jw.org) ouswa kontakte Temwen Zeova.